


Алижон Саттаров
Гулбаҳор Саттарова
Нодир Абдусамад

ТАБОБАТ АСОСЛАРИ



ҲИЖОМА

АЛИЖОН ИСРОИЛ
ГУЛБАҲОР КАМОЛИДДИН
НОДИР АБДУСАМАД

ТАБОБАТ АСОСЛАРИ ВА ҲИЖОМА

«MATRIX»

Тошкент – 2023

УЎК 615.89

С 33

Табобат асослари ва ҳижома / Муаллифлар: А.Исроил, Г.Камолиддин, Н.Абдусамад. - Тошкент: «Matrix» нашриёти, 2023. - 276 б.

КБК 53.59

Ушбу китоб табобатнинг энг бошланғич билимларини ўз ичига олади. Асар табобатга ихлосли барча кишиларга, хусусан Набавий табобат ва Ибн Сино табобатига қизиқувчилар учун мўлжалланган.

Рисола табобатга оид манбалар, хоссатан Ибн Синонинг “Тиб қонунлари” ва Шамсиддин Абу Абдуллоҳ роҳмаҳуллоҳнинг “Тиббун-набавий” асарига ва уни шарҳлаган уламолар, шифокор ва табибларнинг илмий ва ҳаётий тажрибаларига асосланган ҳолда ёзилган.

Алижон Саттаров

Шифокор-кардиолог, табиб, Набавий табобатининг тарғиботчиси, “Бошланғич табобат асослари ва ҳижома ўқув курси”нинг тажрибали устози, “ZaytunTibMed” хусусий шифохонасининг раҳбари, “ZaytunMedTib” шифобахш ўсимликлардан биологик фаол маҳсулотлар ишлаб чиқарувчи МЧЖ асосчиси, “ASH-SHIFO AKADEMIYASI”нинг асосчиларидан бири.

Гулбахор Саттарова

Шифокор-педиатр, табиба, Набавий табобатининг тарғиботчиси, “Бошланғич табобат асослари ва ҳижома ўқув курси”нинг тажрибали устози, “ZaytunMedTib” хусусий шифохонаси аёллар бўлимининг раҳбари.

Нодир Алимов

Кулоқ, томоқ ва бурун касалликлари жарроҳи, МЕДАС шифохонасининг ходими, “Тиббун-Набавий” ижодий жамоасининг раҳбари, “ASH-SHIFO AKADEMIYASI”нинг асосчиларидан бири.

ISBN 978-9943-8091-1-6

© А.Исроил, Г.Камолиддин,
Н.Абдусамад, 2023 й.
© «Matrix» нашриёти, 2023 й.

МУНДАРИЖА

Такдим.....8

I – КИТОБ. Табобат асослари

1-фасл. Табобат нима?12
2-фасл. Табобатнинг даражалари12
3-фасл. Табобатнинг қисмлари15

1-қисм. Табиий ишлар (умури табиийя)

4-фасл. Унсурлар18
5-фасл. “Унсурлар” кимёгарлар тилида24
6-фасл. Хилтлар (суюкликлар)30
7-фасл. Овқат ҳазм қилиш босқичлари31
8-фасл. Табиий хилтлар36
9-фасл. Мизож42
10-фасл. Мизожни аниқлаш44
11-фасл. Мўътадил мизож ҳақида47
12-фасл. Табобатдаги “Мўътадиллик”
кимёгарлар тилида50
13-фасл. Энг мўътадил мизож соҳиби ким?55
14-фасл. Қон мизож соҳиблари57
15-фасл. Сафро мизож соҳиблари58
16-фасл. Балғам мизож соҳиблари59
17-фасл. Савдо мизож соҳиблари61
18-фасл. Инсон ҳаётининг турли даврларининг
мизожи64
19-фасл. Аъзолар ва уларнинг мизожлари ҳақида70
20-фасл. Рухлар76

21-фасл. Қувватлар	79
22-фасл. Табиий қувватлар	82

2-қисм. Олти зарурий омил (ситтаи зарурия)

1-фасл. Бадан аҳволини муҳофаза қилувчи ва ўзгартирувчи олти зарурий омиллар	88
2-фасл. Биринчи зарурий омил: тоза ҳаво	89
3-фасл. Фаслларнинг мизожи	89
4-фасл. Йил фаслларининг ҳукмлари ва ўзгаришлари ҳақида	93
5-фасл. Яхши ҳаво ҳақида	94
6-фасл. Ҳаво турларининг таъсири	95
7-фасл. Баҳор фаслининг мизожи	96
8-фасл. Ёз фаслининг мизожи	98
9-фасл. Қиш фаслининг мизожи	101
10-фасл. Куз фаслининг мизожи	102
11-фасл. Иккинчи зарурий омил: ейиш тадбири	105
12-фасл. Таомланиш борасида баъзи қоидалар	126
13-фасл. Ғизо ва унинг турлари	133
14-фасл. Сув ва ичимликлар ҳақида	134
15-фасл. Қандай сув биз учун фойдали?	135
16-фасл. Сувнинг фойдали хусусиятлари	137
17-фасл. Сув ичишнинг вақтлари	138
18-фасл. Учинчи зарурий омил – уйку ва уйғоклик	140
19-фасл. Тўртинчи зарурий омил – ҳаракат ва суқун	142
20-фасл. Бадантарбияни бошлаш ва тўхтатиш вақтлари	144
21-фасл. Саҳобаларнинг бадантарбиялари	148
22-фасл. Бешинчи зарурий омил – хилтларнинг тутилиб қолиши ва уларни бўшатиш (ихтибос ва истифроғ)	151

23-фасл. Тутиш қувватини ортишининг сабаби 8 хил бўлиб, улар қуйидагилар	152
24-фасл. Хилтларнинг тутилиши (ихтибос)нинг ҳаддан ортишида қўлланувчи танқия (тозалаш) турлари	154
25-фасл. Олтинчи зарурий омил – руҳиятга таъсир қилувчи омиллар (аворизи нафсония)	156
26-фасл. Табиб ким?	161
27-фасл. Табибнинг вазифаси	162
28-фасл. Ҳозик табиб аҳамият берадиган баъзи қоидалар	167
29-фасл. Мусулмонларнинг тиб илмини ривожлантиришларига сабаб бўлган ҳадислар	169

II-КИТОБ. Ҳижома

1-фасл. Қон олдиришдан мақсад нима?	176
2-фасл. Қон олдиришнинг нечта тури бор?	179
3-фасл. Ҳижома нима?	180
4-фасл. Асал ичиш, ҳижома ва доғлаш билан даволаш бўйича Расулulloҳ соллаллоҳу алайҳи васалламнинг йўллари	182
5-фасл. Ҳижоманинг фазилати ҳадисларда	185
6-фасл. Ҳижома суннатми?	186
7-фасл. Ҳижома тарихда	192
8-фасл. Ҳижоманинг турлари	195
9-фасл. Ҳижомаи имтисосий бошарт. (Қонли ёки катта ҳижома)	196
10-фасл. Терининг тузилиши ва унинг аҳамияти	198
11-фасл. Ҳижома учун керакли воситалар	204

12-фасл. Ҳижоманинг терини тозалашдаги ўрни қандай?	206
13-фасл. Ҳижома қандай қонни чиқаради?	206
14-фасл. Ҳижома қилишда иқлимнинг таъсири.....	206
15-фасл. Ойнинг қайси кунлари ҳижома қилинади?	207
16-фасл. Қон олдириш учун ҳафта кунларини ихтиёр қилиш.....	215
17-фасл. Ҳаммомга тушиш ва ҳижома.....	221
18-фасл. Ҳижоманинг нуқталари.....	221
19-фасл: Хайбарда яҳудийлар томонидан етказилган заҳарланишни даволашда Расулуллоҳ соллаллоҳу алайҳи васалламнинг тутган йўллари	226
20-фасл. Қуруқ ёки кичик ҳижома. (Ҳижомаи имтисосий бешарт)	231
21-фасл. Шакиқа (мигрень)да ҳижома?	236
22-фасл. Сехрланганда қандай ҳижома қилинади?	241
23-фасл. Ҳижома қилинаётган вақт ва таомланиш вақти	246
24-фасл. Ҳижомага тайёргарлик ёхуд нима учун очлик зарур?	246
25-фасл. Тиббий зулуклар. Таълиқ	248
26-Фасл. Қачон зулук қўйилади?	250
27-фасл. Қайси касалликларда зулук қўйилади?	250
28-фасл. Зулукнинг мизожи ва уни дори сифатида қўллаш?	253
29-фасл. Зулук қўйиб қон олиш	254
30-фасл. Зулук қўйилган жойдан қон оқшини тўхтатиш	256
31-фасл. Нега зулук чақмайди?	257
32-фасл Ҳижомага кўрсатмалар	258

33-фасл. Ҳижома кимларга мумкин эмас?.....	259
34-фасл. Қуйи аъзоларни ҳижома билан ҳимоя қилиш.....	261
35-фасл. Қортик қўйдирувчининг сафроси кўп бўлса	262
36-фасл. Ҳижомада зулук афзалми ёки тилиш?	262
37-фасл. Қон олдирганидан кейинги тадбирлар	263
38-фасл. Зулук қўйгач, қон чиқиб туриш вақтининг қон гуруҳига боғлиқлиги.....	264
39-фасл. Ҳижома қилувчи (ҳажжом)нинг сифатлари	265
40-фасл. Аёлларда ҳижома қилиш	265
41-фасл. Ҳижома хизмати учун ҳақ олиш	265
Хотима	272
Фойдаланилган адабиётлар рўйхати	273
Қайдлар учун	274

Бисмиллаҳир Роҳманир Роҳийм

ТАҚДИМ

Бандаларига (шифо берувчи ва тиб илмини ўрганишни осон қилувчи Аш-Шафий бўлган зотга ҳамду санолар бўлсин!

Даволанинглар, Аллоҳ Таоло қай бир дардни берган бўлса, албатта унинг давосини ҳам бергандир, деган Пайғамбаримиз Муҳаммад Мустафо соллаллоҳу алайҳи васалламга мукаммал ва батамом саловоту дурудлар бўлсин. У зотнинг кўрсатмаларига амал қилиб мисли кўрилмаган жисмоний ва руҳий соғлиққа эга бўлган саҳобаи икромлар, тобеъин ва табаъ тобеъинларга Аллоҳ таолонинг раҳмати бўлсин.

Тиб илмини бизларгача етиб келишига сабаб бўлган барча устозларимиздан Аллоҳ Таоло рози бўлсин.

Тиб илмини шу кунгача етиб келишига сабабчи бўлган барча устозларимиздан Аллоҳ Таоло рози бўлсин.

Мустақиллигимиз шарофати ва аҳолимизнинг тиббий саводхонлиги ошиб бориши билан ватанимизда табобат илми жумладан, Шарқ табобатига қизиқиш кучайиб бормокда. Шу муносабат ва қизиқишлар атрофида юзага келган саволларга жавоб ўларок, кўлимиздан келганча табобат китоблари ва устозлар ўргатган билимлар асосида мақолалар ёзишга ҳаракат қилдик. Жумладан, табобатнинг негизи бўлмиш – хилт таълимоти, мизож тушунчаси ва ситтаи зарурия ҳақида кўплаб мақолалар ёзган эдик.

Вақт ўтиб, тиб борасидаги изланиш ва билимлар кенгайиб борган сари касалликларни даволаш ва олдини олиш (профлактика) бўйича бошқа таълимотларга қараганда “хилт таълимоти”нинг устунлиги яққол сезила бошлади. Табиийки, инсонлар орасида бу борада адабиётларга муҳтожлик ор-

тиб бормокда. Хоссатан, тиб илмини ўрганувчи толибларга бу каби асарлар сув ва ҳаводай зарур!

Табобат шундай илмики, у билан мавжуд бўлган соғлиқ сақланади ва йўқотилгани қайтарилади.

Қолаверса, табобатнинг асоси бўлмиш хилт таълимотларини яхши англаган ота-она мизожга мос равишда фарзандини тарбиялай олса, жамиятга энг керакли инсонни тақдим қилган бўлади. Аниқроқ қилиб айтилганида, ҳар қандай соҳа вакилларига “мизож таълимоти” асосида таълим берилса ва замонавий билимлар билан уйғунлаштирилса, ўз юртини қисқа вақт ичида жаҳоннинг энг етакчи мамлакатига айлантира оладиган кадрларни етиштирган бўлади.

Хилт таълимоти, жумладан Ибн Сино ҳазратларининг “Тиб қонунлари” асосида даволашнинг ютуқларидан бири шуки, бу услуб табиат қонунларига мос равишда саломатликка эришиш йўлларини содда ва осон услубда очиб беради. Ер сайёрамизда ҳаётнинг мавжудлиги учун тўрт нарса шарт бўлиб, улар – ер, сув, ҳаво ва олов. Булардан бирисиз табиатни тасаввур қилиб бўлмайди.

Табобатда қиёслаш йўли (иссик, совуқ, ҳўл ва қуруқ) билан шу тўрт унсурнинг жисмга таъсири, аъзоларнинг ҳосил бўлиши, касалликларнинг келиб чиқиши ва даволаш услублари ишлаб чиқилган ва бу аниқ математик ҳисобларга асосланади.

Тўрт унсур таълимотининг бошқа назариялардан афзаллиги шундаки, ҳабибимиз Муҳаммад Мустафо соллаллоҳу алайҳи васалламнинг тибга оид кўрсатмаларини тадқиқот қилиб кўрилганида, уларнинг иккиси ҳам айна бир низом асосида эканининг гувоҳи бўласиз.

Охирги йилларда бутун дунёда шарқ табобатига ва Пайғамбар алайҳиссаломнинг табобатларига қизиқиш ўта кучли. Бу қизиқиш фақатгина кучайиб боради деб ўйлаймиз. Нега-

ки, кишилар асл табобатни қидиришмоқда. Ундан умид қилишмоқда.

Ана шу жараёнлар юртимиз аҳолиси ўртасида савия ошиб бориши билан ривожланмоқда. Ҳамюртларимизнинг тиббий саводхонлиги ошмоқда. Тиббий тушунчалардан кўпчилик эшитган ва ўйлаймизки, энг қизиқадиган мавзуларидан бири – ҳижома.

Ушбу қизиқишларни фақатгина ҳақиқий билим ва амалий ишлар қондиrolади. Қўлингиздаги китобнинг иккинчи қисмида ҳижома илми ҳақида мухтасар маълумотлар келтириб ўтамыз.

Асарни ёзишда асосан Имом Бухорий, Имом Муслим, Имом Термизий, Ибн Можа, Имом Бухорий, Имом Муслимнинг саҳиҳлари, Имом Имом Насоини суналаридан, Имом Абудавод, Шамсиддин Абу Абдуллоҳнинг “Тиббун-Набавий”, Имом Заҳабийнинг “Пайғамбар табобати” ва Абу Али ибн Синонинг “Тиб қонунлари”дан ва бошқа асарлардан фойдаланилди.

✓ Китобда хато ва камчилик бўлса, биз ожизлардан, ютуқ ва манфаатлари бўлса, Аллоҳдан деб билгайсиз. Ушбу китобни ёзилишига сабабчи бўлган азиз ота-оналаримиз ва устозларимиз ҳақларига хайрли дуоларингизни умид қилиб қоламыз.

Муаллифлар



I – КИТОБ ТАБОБАТ АСОСЛАРИ

1-фасл. Табобат нима?

Ибн Сино ҳазратлари “Тиб қонунлари”да шундай ёзадилар: “*Тиб шундай бир илми, у инсон гавдасининг аҳволини соғлиқ ва касаллик жиҳатидан ўрганиб, ундаги мавжуд соғлиқни сақлайди, йўқотилганини қайтаради*”.

Демак, табобат иккита вазифани бажаради:

1. Инсондаги мавжуд соғлиқни сақлаш (касалланишни олдини олиш чора-тадбирлари, профилактика).
2. Йўқотилган соғлиқни қайтариш (даволаш чора-тадбирлари)

2-фасл. Табобатнинг даражалари.

Шамсиддин Абу Абдуллоҳ “Тиббун-набавий” асарида табобат қуйидаги учта мақом-даражадан иборатлигини ёзадилар:

1. Халқ табобати.
2. Илмий табобат.
3. Илоҳий табобат.

Келинг, улар ҳақида қисқача тушунча бериб кетсак:

Халқ табобати деганда, авлоддан-авлодга, отадан-ўғилга, онадан-қизига, устоздан-шогирдга ўтиб келаётган амалий даволаш тадбирлари тушунилади. Бу соҳани эгаллаш учун кўплаб китоблар, гоҳида умуман китоблар ўқиш талаб этилмайди. Талаб қилинадигани шуки, мутахассис ўз ишини устозидан мукаммал ўзлаштирган бўлиши, ўша ҳудудда топилиши осон бўлган дориларни қўллаши ва қилаётган ишлари тезкор таъсир қилишидир. Халқ табобати ҳар бир минтақа ва миллатларда мавжуддир.

Илмий табобат. Бу соҳани эгаллаш учун кўплаб илмий китоблар, хоссатан Абу Али ибн Сино роҳмаҳуллоҳ-

нинг “Тиб қонунлари” асарини ўзлаштирганлик ва ҳар бир ишининг илмий исботини билиш талаб қилинади. Ҳозирги замон тиббиётининг ютуқлари, хоссатан микроскоп, ташхис асбоблари, жарроҳлик ускуналари, лазер ва бошқа илмий кашфиётлар ҳам илмий тибга киради.

Қўлингиздаги китоб асосан табобатнинг илмий қисмига тегишли бўлган жойларини ўз ичига олади.

Илоҳий даволар (чоралар, дорилар). Табобатнинг бу даражасини юқоридаги икки тиб билан тушунтириб бўлмайди. Негаки, улар физика, кимё ва бошқа фанларга бўйсунмайди. Улар Яратганнинг ихтиёридаги нарсалардир. Уларга Аллоҳ Таолога суяниш, илтижо, таваккул қилиш, зикр, дуо, Қуръони Каримни хатм қилиш ва ундан кейинги дуо, саловат айтиш, Чилёсин, зам-зам сувини ичиш, заъфарон билан оят ва дуоларни ёзиб ичиш, истизфор, тавба, назр, васила, садақа, силаи раҳм (қариндошларга яхшилик қилиш), қўшниларга яхшилик қилиш, бева-бечораларга ёрдам бериш, етимлар бошини силаш, қурбонлик, ҳадя, нафл намозлар (хоссатан таҳажжуд) ўқиш, нафл рўзалар тутуш, садақан жория (сув чиқариш, йўл солиш, кўприк қуриш, мактаб қуриш, китоб ёзиш ва б.), мавлуди шариф ўқиш, “Саҳиҳул Бухорий”ни хатм қилиш, улугларни зиёрат қилиш, сафар қилиш, ўсимлик ва ҳайвонларга гамхўрлик қилиш ва бошқалар киради.

Ҳаётда шундай бўладикки, баъзида беморларга турли даво чораларини қўллаб кўрилади. Ҳаттоки бир қанча шифоқору табиблар томонидан иложлар қилинади, лекин шифо топилмайди. Ана шу ҳолатда илоҳий даволар ёрдамга келади. Байт:

Ожиз қолса агар икки табобат,
Ёрдамда истизфор, дуо, садақот.

*Ал-Курсий, руқия, зикр, саловот,
Барчаси аталди “Тибби Рухийёт”.*

(Ҳакимий)

Илоҳий даволарни Аллоҳнинг элчилари алайҳиссаломлар одамларга таълим бериб келишган. Беморлар улардан шифо топган. Натижада, неча асрлардан бери улардан фойдаланиб келинади.

Одатда, илоҳий даволар илмий тиб китобларида ёзилмайди. Улар табиийки, “Тибби Рухоний” номли асарларда келтирилади. Биз айтамизки, Набавий табобат (тиббун-набавий) ўз ичига тибнинг барча мақомларини қамраб олган.

Баъзи олимларнинг гапига кўра, Пайғамбаримиз алайҳиссалом истискога йўлиққан кишиларга туя сути ва пешобини аралаштириб истеъмол қилишни тавсия қилишлари араб халқ табобатига кўра бўлган.

Халқ табобатига яна бир мисол – тарвоқ тошишида (халқ орасида “эшакеми” номи билан номланади) эшакака тескари қараб ем бериб, унга қарамасдан кетилади.

Аденоидитга йўлиққан болаларни араб халқ табобатига кўра кийнаб даволамай, бурнидан қуст ёғини томизиш кераклиги ҳақидаги тавсиялари илмий табобатга асосланган.

Илон чақишида руқия қилиб даволаш илоҳий даволар жумласидан ҳисобланади ва ҳ.к.

Ким билади, у Зоти муборакка набавий илм ичида яна қандай билимлар берилган экан?! Чунки, у Зот алайҳиссалом айтганларидек, у кишига Қуръон ва унинг мислича илм берилган. Қуръоннинг ўзи шифо, унинг мислича берилган илмларда албатта даво чоралари борлиги шубҳасиз.

Шунинг учун, набавий табобат тиб санъатининг султони ҳисобланади! “Тиббун-Набавий” табобатнинг қаймоғи ҳисобланади! Бундан улуғ табобат йўқ!

Қуйида сизлар билан тиб илмининг иккинчи даражаси бўлмиш – **илмий табобат**нинг баъзи бўлимлари билан бир неча фаслда танишиб чиқамиз.

3-фасл. Табобатнинг қисмлари

Қуйида Ибн Сино “Уржуза”да келтирган тақсимланишни келтириб ўтамыз:

Тиб илми иккига бўлинади: **назарий (илмий)** ва **амалийга**. Улар ҳам ўз навбатида қисмлардан иборат.

I.Назарий қисм (илмий, теория). Тибнинг бу қисми уч қисмга бўлинади:

I.1.Етти табиий ишлар (умурия табиийя сабъа).

I.2.Олти зарурий омил (ситтаи зарурия).

I.3.Табиийликдан ташиқари бўлган нарсалар.

I.1.Етти табиий ишлар (умурия табиийя сабъа):

I.1.1. Унсурлар (аносир, аркон).

I.1.2. Мизожлар (амзаж).

I.1.3. Хилтлар (ахлот).

I.1.4. Аъзолар (аъзо).

I.1.5. Рухлар (арвоҳ).

I.1.6. Қувватлар (қувва).

I.1.7. Феъллар (афъол).

I.2.Олти зарурий омил (ситтаи зарурия):

I.2.1. Ҳаво.

I.2.2. Ейиш ва ичиш (маъкул ва маируб).

I.2.3. Уйқу ва уйғоқлик (навм ва яқзо).

I.2.4. Ҳаракат ва суқун.

I.2.5. Хилтларнинг қамалиб қолиши ва уларни бўшатиши (ихтибос ва истифроз).

I.2.6. Руҳиятдаги ўзгаришлар (аворизи нафсония).

I.3. Табиийликдан ташқари бўлган нарсалар. Бу қисм 3 қисмдан иборат:

I.3.1. Касаллик (амроз). Яъни, патология.

I.3.2. Юз берадиган белгилар (ароз). Яъни, симптомалогия.

I.3.3. Асбоб (сабаблар). Яъни, этиология.

II. Амалий қисм. Тибнинг бу қисми ҳам икки бўлимдан иборат:

II.1. Қўл билан қилинадиган ишлар (иложун бил-йади).

II.1.1. Томирларда қилинадиган ишлар.

II.1.2. Гўшт устида бўладиган ишлар.

II.1.3. Суяк устида қилинадиган ишлар.

II.2. Дори билан ҳамда белгиланган таом (ғизо) билан.

Қуйида тибнинг назарий қисмига тегишли бўлимларни қисқача ўрганиб ўтамиз. Улардан энг бошланғичи ва соддаси – унсурлар.

1-ҚИСМ ТАБИЙ ИШЛАР

(умури табиийя)

4-фасл. Унсурлар

“...еру осмондаги бир зарра мисқолчалик, ундан ҳам кичик (ёки) катта бирон нарса Парвардигорингиздан махфий бўлмас...”

(Юнус сураси, 61-оят)

Луғавий маъноси: унсур (عنصور) – арабча бўлиб, бизнинг тилдаги зарра, жавҳар, асос ва асл сўзларига (зотан, улар арабча бўлса ҳам), маъиз сўзига тўғри келади. Унсур сўзини араб тилидаги маънодоши (синоними) рукн бўлиб, бизнинг тилдаги устун сўзига тўғри келади.

Элемент (elementum) – латинчада бўлиб (“бирламчи модда” маъносида), материя (materia) – латинча бўлиб, асосан модда маъносини билдирса ҳам, унсур маъносида ҳам қўлланилади.

Истилоҳий маъноси: Ибн Сино ҳазратлари унсурларга қуйидагича таъриф берадилар: “Унсурларнинг қайси бири бўлса ҳам оддий жисмлар бўлиб, одам танаси ва бошқа нарсалар учун дастлабки бўлаклардир. Оддий жисмлар шундай нарсаларки, улар шакли турлича бўлган бўлакларга бўлинмайди, [балки] мураккаб жисмлар уларга бўлинади. Оддий жисмларнинг аралашшидан коинотдаги турли шаклдаги навлар пайдо бўлади”.

Унсур ҳақида “Фарҳанг ал-мабсут” асарининг муаллифлари шундай таъриф берибдилар: “Унсур – мавжудотнинг хилқатига сабаб бўлгон асл моддаси демакдурки, рукн ҳам дерлар”.

Демак, унсур деб энг майда бўлинмас заррани айтилар экан.

Унсурлар 4 хил бўлади:

I.1.1.1. Олов (ўт).

I.1.1.2. Ҳаво.

I.1.1.3. Сув.

I.1.1.4. Ер (турпоқ)

Унсурларнинг сифатлари. Улар икки хил бўлади: фоила ва муфоила.

① Фоила, яъни таъсир қилгувчи сифат. Унга иссиқлик ва совуқлик киради.

Иссиқликдан қуйидагилар келиб чиқади:

- Иситади
- Юмшатади
- Ажратади
- Эритади
- Буғлатади
- Аралаштиради
- Жило беради
- Куйдиради, тутунга айлантиради.

Совуқликдан қуйидагилар келиб чиқади:

- Иссиқликни сўндиради
- Совутади
- Қуюлтиради
- Жамлайди
- Қотиради
- Музлатади
- Кенгайтиради
- Ёради.

Муфоида, яъни таъсирларни қабул қилувчи сифати. Буларга ҳўллик ва қуруқлик киради.

Ҳўллик

- Ҳўллаиди
- Юмшатади
- Сувоқ ва окувчан қилади
- Аралаштиради

Қуруқлик

- Қуюлтиради
- Дағал ва қаттиқ қилади
- Мустаҳкамлайди, қотиради
- Ушлашга имкон яратади ва пинҳон сақлайди.

I.1.1.1. Олов (ўт) унсурининг сифатлари:

(олов унсури қуёшга қиёсласа бўлади)

1. Табиати – иссиқ ва қуруқ (1-расмга қаранг).
2. Ранги – сарик.
3. Жойлашган жойи. Олов (ўт) унсури осмон гумбазида жойлашган. Бу унинг мутлоқ енгиллигидандир. Чунки жисм табиатан иссиқ ва қуруқ бўлса у осмон томонга ҳаракат қилади. Барча унсурлардан юқорида. Пастдан ҳаво билан чегараланган (2-расм).
4. Вазни – ўта енгил. Шунинг учун ҳам ҳар доим юқорига, яъни осмон гумбазига қараб интилади.
5. Шакл сақлаш қобилияти жиҳатидан – шакл сақламайди. Яъни, у исталган шаклга киради.



1-расм. Унсурлар ва мизожлар мажмуаси.

I.1.1.2. Ҳаво унсурининг сифатлари.

1. Табиати – иссиқ ва ҳўл. Иссиқлигининг сабаби, юқоридан олов унсурининг таъсири остида бўлади. Лекин иссиқлиги оловчалик бўлмайди. Ҳўллик оғирликка мойилдир. Шу сабабли, оловнинг остида бўлади. Ҳўллигининг сабаби, пастдан сув унсури намлиги таъсир қилади.
2. Ранги – қизилга мойил.
3. Жойлашган жойи. Юқоридан олов унсури билан пастдан сув унсури билан чегарадош. Яъни, сув унсури ва олов унсурининг ўртасида.
4. Вазни – енгил.
5. Шакл сақлаш қобилияти жиҳатидан – шакл сақламайди. Яъни, у исталган шаклга киради.

1.1.1.3. Сув унсури.

1. Табиати. Совуқ ва ҳўл. Бироқ совуқлиги ҳўллигидан 27 марта ортиқдир. Барча унсурларга сувнинг совуқлигидан кўп таъсир етиб туради. Сувга эса, бошқа унсурлардан таъсир кам етади (агар биз йилнинг исталган фаслида ариқ, сой, булок, анҳор сувларига кўлимизни солсак, албатта совуқлик ва ҳўлликни хис қиламиз).

3. Жойлашган жойи. Юқоридан ҳаво билан, пастдан ер билан чегарадош.

4. Вазни – оғир. Агар сувни юқорига улоқтирсак, у яна пастга, яъни ер томон ҳаракатланади. Бу унинг вазнини оғирлигидандир.

5. Шакл сақлаш қобилияти жиҳатидан – шакл сақламайди. Яъни, у исталган шаклга киради.

1.1.1.4. Турпоқ унсури.

1. Табиати – совуқ ва курук.

2. Ранги – қора

3. Жойлашган жойи. Юқоридан сув ва ҳаво унсури билан чегараланган. Яъни, барча жисмларнинг ўртасида жойлашган.

4. Вазни – оғир.

5. Шакл сақлаш қобилияти жиҳатидан – шакл сақлайди.


Боситхон Шоший раҳматуллоҳи алайҳ унсурларнинг ўзаро таъсири ҳақида шундай ёзадилар: “Бас, тўрт аркони жаҳон ушбулардин иборатдурки, бир-бирларига мутаҳаввил ва мустаҳил бўлурлар. Яъни, ҳар бирлари бошқаларининг таъсири билан ўз кайфиятидан чиқиб, бошқасининг кайфиятига кирар. Масалан, туффроғ ҳаво бўлур ва ҳаво сув бўлур ва сув туффроғ бўлур ва ўт ҳаво бўлур ва ҳоказо.

Ва билмоқ керакки, бу аносири арбаъада ўт ва ҳаво ва сув ва туффроқдин мурод ҳозир дунёда мавжуд бўлиб турган ўт, ҳаво, сув, туффроғ эмас, балки буларни(нг) асл моддасидур”.

Тўрт унсурсиз ҳаёт йўқ. Улар ҳар бир жонли ва жонсиз мавжудотда бор. Улардаги оғир нарсалар ер жинсига, суюқ моддалар сув унсурига боғлиқ. Уларга керакли кислород – ҳаво унсурига, зарур бўлган куёш нури – олов унсурига боғлиқдир (2-расм).

Таботатнинг асоси шу 4 унсурга бориб тақалади. Ибн Сино 4 унсурнинг бир-бири билан таъсири ва зарурати ҳақида қуйидаги гапларни ёзиб, унсурлар ҳақидаги фаслни тугатадилар:

“Икки оғир унсур [ер ва сув] аъзоларнинг пайдо бўлишига ва тинч туришига ёрдам берадилар. Икки енгил унсур [ҳаво ва олов], гарчи аъзоларни дастлаб ҳаракат қилдирувчи нафсининг ўзи бўлса ҳам, руҳларнинг пайдо бўлишига ва ҳаракатланишига ёрдам берадилар. Ана шулар унсурлардир”.



2-расм. Тўрт унсурий табақанинг борлиқда жойлашиши (“Тиб қонунлари” ва “Қонуни Боситий” асарларига кўра)

5-фасл. “Унсурлар” кимёгарлар тилида

Бу ўринда шифокор нейрорухрох Файзуллаев Фахрулла Файзуллаевич сўзларини келтирамиз. ~~Фикримизча~~, бу “таҳлиллар” замонавий тиббиёт ва қадимги табобат ўртасида кўприк вазифасини ўтайди.

Табобат таълимотни, жумладан, “мизож таълимоти”ни замонавий кишига англатиш ўзига хос қийинчиликларга эга.

Сабаби, бу илмни ўрганиш услубини ўзгарганлигидир. Ўзгаришлар ҳақиқатини англаш эса табобат мавзуларини чуқурроқ ўрганишга ёрдам беради. Халқ табобати таълимот ва хулосалари бир неча минг йиллар давомида олимларнинг мантикий хулоса, сабабларни ўрганиш туфайли сайқалланиди ва мукаммаллашди. Яқин 200 йил ичида фундаментал фанларнинг ривожланиш услуби ўзгарди, физик олимлар атомнинг тузилишини тадқиқотлар натижасида исбот қилгандан кейин, жадаллик билан унинг тузилиши, таркиби, тузилиш қонунчиликлари, кейинчалик кимёвий элементлар даврий жадвали кашф этилди. Моддаларнинг тузилиши, кимёвий формуласи ва бошқа атомистик йўналишда фан ривожланди. Эски терминлар, табобат тушунчаси ўрнини янги терминлар ва фанлар эгаллади. Янги текширув усуллари, микроскопия, биохимия ривожланиши билан бу фанларнинг текширув натижалари фанга кира бошлади. Бундан ташқари табобатдаги кўп терминлар уларнинг макро ва микро олам учун бир хил ишлатилиши кўп ўқувчиларда табобат жуда эмпирик, содда ва юзаки деган тасаввур пайдо қилди. Масалан “ер” термини каби кўп маъноли сўзлар бунга мисол бўлади. “Унсурлар” тушунчаси замонавий фундаментал илмлар билан таҳлил қилинганда, атомни ташкил қилган элементар “зарралар” эканлиги англаш мумкин.

Табобатда, шу жумладан Тиб қонунларида унсурлар 4 хил бўлиб, ҳар қандай нарса ва моддаларнинг бирламчи таркибий қисмларидир, уларнинг аралашishi натижасида табиатда турли навлар пайдо бўлади. “Унсурларнинг қайси бири бўлса ҳам оддий жисмлар бўлиб, одам танаси ва бошқа нарсалар учун дастлабки бўлаклардир. Оддий жисмлар шундай нарсаларки, улар шакли турлича бўлган бўлакларга бўлинмайди, (балки) мураккаб жисмлар уларга бўлинади. Оддий жисмларнинг аралашishiдан коинотда турли шаклдаги навлар пайдо бўлади. Унсурлар 4 та, иккитаси енгил иккитаси оғир, енгиллар олов ва ҳаво, оғирлари сув ва ер”дир.

Атомистик таълимотлар бўйича, барча моддаларнинг материал асоси атом бўлиб, нисбатан барқарор ва бўлинмас заррача ҳисобланади, атомларнинг муайян турлари кимёвий элементлар ҳисобланади. Барча атомларнинг тузилиши концепцияси ўхшаш бўлиб, уларни ташкил қилган зарраларнинг сонидан келиб чиқадиган ҳолда турлича элементлар пайдо бўлади. Атомлар – фақат тўртта элементар зарралар аралашмаси, деб қараш мумкин, булар: нейтрон, протон, электрон ва энергия. Гарчи бу зарралар (нейтрон, протон, электрон) ҳам янада майда зарраларга бўлиниши мумкин бўлса ҳам. Бу икки илмий қарашларни солиштириб, унсурлар тушунчаси атом тузилиш ҳақидаги исботланган таълимотлардаги ташкил қилувчи элементар зарралар ҳақида гап бораётганлигини англаш мумкин. Чунки шу тўрт унсурларнинг аралашishiдан турли навлар пайдо бўлиши, замонавий тушунчалар билан айтганда, тўрт элементар зарралардан ҳар хил кимёвий элементлар ва атомлар пайдо бўлиши ҳақида гап кетаётганлигига далолат қилади. Бу иккала таълимотда ҳам атомни ташкил қилувчи таркибий қисмлар ҳақида гап кетаётганлигини ҳисобга олсак, тўрт унсур ва тўртта элементар зарралар бир нарса эканлигини билиш мумкин. Энди чуқурроқ таҳ-

лил қилиб, қайси унсур элементар зарраларнинг қай бирига мос келиши ҳақида мулоҳаза қилсак. Бундан ташқари, “ер ... табиий ўрни ҳамма (жисмлар) нинг ўртасидир” дегани атом маркази, яъни ядроси эканлигидан далолат қилади, ҳақиқатда бу икки оғир унсур ер ва сув, нейтрон ва протонга тўғри келишига исботлардан бири шуки, бу зарралар атом марказида жойлашади. Яна, оғирлик сифати деб айтилаётган унсурларга оид сифат, нейтрон ва протонга ҳам тўғри келади, чунки электрон массаси битта протоннинг массасидан 1870 марта кичик, яъни атомнинг деярли барча оғирлиги нейтрон ва протон ҳисобига бўлади. Сув унсури протонга мос келишига исботлардан бири шуки, протон ва электрон ўзаро мувозанатда бўлади ва “ҳўллик” категориясига мос келади, яъни бир зарра бошқа зарра билан боғланиш, тортилиш каби ишларда қатнашади, яъни протон электрон билан мувозанатда турган ҳолатда кимёвий боғлар ҳосил қилишда қатнашади ва протоннинг ўзи ҳам водород боғларини юзага келтирувчи асосий сабаблардан биридир. Яна, “Ҳаво оддий бир жисмдир. Табиий ўрни сувдан юқори, оловдан пастдадир. Шундай бўлишига сабаб, нисбий енгиллигидир”, ҳаво электронга мос келишига исботлардан бири шуки, уларнинг иккаласи ҳам худди ер шарини ўраб турган атмосфера мисоли, атом марказини ўраб туради. “Олов оддий бир жисм бўлиб, табиий ўрни унсурларга тегишли ҳамма жисмларнинг юқорисидадир. ... унсурларнинг етилиши, латиф бўлиши, аралашishi, ва икки оғир унсурдан совуқликни кеткизиш учун” демак, олов унсури, биз айтмоқчи бўлган энергия, маълум бир жойда муқим бўлмас экан ва бошқа унсурларга аралашган ҳолатда бўлиши айтилмоқда. Текширувлар натижасида маълум бўлганки, электроннинг маълум сатҳдан пастки сатҳга тушиши ундан энергия ажралиши билан содир бўлишини кузатадиган бўлсак, чиндан ҳам электрон ўз ичида

маълум энергияларга эга эканлигини кўришимиз мумкин. Бундан ташқари ядро маркази бузилиш реакциялари, яъни ядро реакцияларини кузатиб, бу зарралар ўз ичида катта миқдорда энергияга эга эканлигини тасдиқлайди.

Бериллий атомининг схематик кўриниши.



3-расм.

Унда 5 та нейтрон (ер), 4 та протон (сув), 4 та электрон (ҳаво) ва уларга жойлашган энергия (олов) бор.

Бу зарралар бир-бири билан таъсирлашиб, мувозанатлашган бирламчи мўътадиллашган тизим (атом) пайдо қилади (3-расм).

Хулоса қилиб айтадиган бўлсак, табобат таълимотидаги унсур тушунчаси ўша давр илмий терминлари ва мантикий хулосалари шаклида ёзилганлигига қарамасдан, замонавий илмий тадқиқотларда бутунлай ўз исботини топди. Бу тўрт унсурдан оғирлари ер ва сув, нейтрон ва протон каби элементар зарраларга, ҳаво унсури электрон элементар заррасига, олов унсури эса, ҳар хил турдаги энергия (кувват) тушунчалари билан мос келади.

Унсурларнинг алоҳида хоссалари.

Ер (нейтрон) унсури, оғирликда устун, гравитация (оғирлик кучи)га эга, ўз-ўзича қолдирилса, совуқлик (харакатсизлик)

ва қуруқлик (ёпишмаслик) келиб чиқади, табиий – ўрни масса маркази ва атом ядроси.

Сув (протон) унсури, оғирликка эга, ўз-ўзича қолдирилса, совуқлик ва ҳўллик (ёпишишлик, бирикиш, тортилиш, боғ пайдо қилиш) хусусиятларига эга, табиий ўрни ер устида ва ҳаво остида бўлиши, доим ҳаво (электрон) билан мувозанатли муносабатда бўлади.

Ҳаво (электрон) унсури, вазн жиҳатдан енгил, ўзича қолдирилса иссиқлик ва ҳўллик, иссиқлик жиҳатдан ҳаво бошқа унсурлардан кўра оловга ҳамжинс, (олов унсури) энергия оқими электронлар иштирокида юз беради. Ҳаво ҳўллик жиҳатдан сувга ҳамжинс.

Олов (энергия) унсури, энг иссиқ ва қуруқ, вазн жиҳатдан енгил, ҳаракатчанлик жиҳатдан энг жадал, бошқа барча унсурларга рағбат беради, энергия кўп жойдан кам жойга кўчиб ўтиш хоссасига эга, энергия турлари кўп. Мўътадилликдан анча узоқлиги сабабли, унинг бузилиш ва пайдо бўладиган жойи осмон сатҳининг юқори қисми – қуёшдир.

Энергия турлари жуда кўп бўлиб, улардан механик энергия, бунда олов унсури жисм учун умумий бўлади ва йўналишли булади. Электр энергияси бунда электронлар учун хос бўлиши. Иссиқлик энергияси бу модда молекулаларининг ўзаро ҳаракатчанлиги. Бундан ташқари энергиянинг тўлқинли ҳаракатчан йўналишли хусиятларга эга. Тўлқиннинг амплитуда ва кучи унинг қайси даражадаги элементар зарра иштирокида бўлишига боғлиқ. Тирик организмлар жумладан инсон танаси учун асосан кимёвий боғ кўринишидаги энергия катта аҳамиятга эга. Кимёвий реакциялар натижасида чиқадиган энергия ҳам олов унсурига тааллуқли. Икки атом бирикиш пайтида электронлар ўз жойларидан силжиши натижасида чиқадиган энергия ажралиши ёки ютилиши мумкин. Қуёш-


дан ёруғлик (фотон) кўринишида келадиган энергияси ўсимликлар яшил баргларидаги хлорофилл қуёшдан келадиган ёруғлик энергиясини, кимёвий боғлар энергиясига ўтказадиган ягона манба ҳисобланади. Ўсимликларда сув, ҳаводаги карбонат ангидрид ва энергия иштирокида углеводлар синтез қилинади:



Мана шу углеводлар ($\text{C}_6\text{H}_{12}\text{O}_6$ глюкоза ва бошқа углеводлар) барча тириклик учун энергетик манба (“баратея”) ҳолатида ишлатилади. Уларни парчаланиши натижасида АТФ ва эркин иссиқлик ажралади, мана шу базовий митохондриял оксидланишдир. $\text{C}_6\text{H}_{12}\text{O}_6 + 6\text{O}_2 \rightarrow 6\text{CO}_2 + 6\text{H}_2\text{O} + Q$ (энергия)

АТФ энди бошқа кимёвий жараёнлар учун энергия “батарея” бўлиб хизмат қилади. Энергияни сарф бўлиши ва тақсимланиши озик занжири кўринишида намоён бўлади. Бошқа озик моддалари ёғлар, оксиллар учун АТФ энергияси сарфланади. Бу жараён ер юзидаги барча тириклик жараёнлари учун умумийдир, инсон ҳам шу умумий озик занжирида овқат моддаларни ўсимлик ва ҳайвон маҳсулотлари кўринишида қабул қилади. Қуръони каримда шундай марҳамат қилинади: Меҳрибон ва Раҳмли Аллоҳ номи билан. “У Зот сизлар учун ям-яшил дарахтдан олов пайдо қилган Зотдир. Сизлар ундан (оловдан) ёкурсизлар. Осмонлару-ерни яратган Зот уларга ўхшашларни яратишга қодир эмасми? Йўқ! У ўта яратувчи, ўта билувчи Зотдир” Ёсин сураси, 80-81 оятлар.

Фотосинтез ҳақида тўлиқ видео материални куйидаги интернет манзилда кўришингиз мумкин: <https://www.youtube.com/watch?v=0QWzR9ZFiMw&t=200s>



4-расм.

Бу схемали расмда ёруғлик энергияси АТФ кўринишидаги кимёвий энергияга ўтиши кўрсатилган (4-расм).

6-фасл. Хилтлар (суюқликлар)

“Хилт” арабча сўз бўлиб, қоришма, аралашма деган маънони англатади (ушбу бўлимни “хилтлар таълимоти”, деб номлаш одатимизга кирган).

Билмоқ керакки, хилт – меъдадаги таомни ҳазм бўлиши сабабли, ўз ҳолатидан ўзгарилиб, инсоннинг тириклиги учун олган шаклга айтилади.

Шайхур-раис Ибн Сино раҳматуллоҳи алайҳ хилтни “Тиб қонунлари” китобида қуйидагича таърифлаган: “Хилт ҳўл, оқувчан бир жисм бўлиб, энг аввал овқат ўшангга айланади”.

Хилт – одам баданида ҳар хил озуқа моддаларнинг ўзгаришидан жигарда ҳосил бўлган мураккаб суюқликнинг умумий номи.

Хилт савдо, сафро, қон ва балғам каби тўрт турга бўлинади.

Хилтлар инсоннинг озуқа моддаларини истеъмол қилиши натижасида пайдо бўладиган ва узлуксиз сарфланиб ва қайта пайдо бўлувчи, инсоннинг тириклигини таъминловчи муҳим омиллардан бири ҳисобланади.

7-фасл. Овқат ҳазм қилиш босқичлари

Биринчи ҳазм. Бу босқич оғиздан бошланиб, то жигарга қадар бўлган масофани эгаллайди. Оғизда луқмани бир қадар ўзгартирувчи жараёнлар (моддалар) мавжудки, шу сабабли озуқа эзилади. Оғиздаги сўлак безлари томонидан ишлаб чиқарилган секретор суюқликлар ва оғизнинг туғма иссиқлиги остида ҳазм бўлишнинг илк босқичлари бошланади.


Ошқозонга йўл олган озуқа ошқозон, ошқозон ости беши ферментлари таъсирида, ошқозонга қўшни бўлган талоқ, жигар, диафрагма, чарвидан олган туғма ҳарорат таъсирида умочга ўхшаш, арпа сувисимон (кашқоб) ёхуд бўтқасимон модда каймус (хилус)га айланади.

Ичакларнинг ҳазм безлари, перистальтик ҳаракати натижасида, хилус таркибидаги хилтга айланишга лаёқатли бўлган тиник, сифатли, соф қисми ичаклардаги мосариқо (мезентерал вена) томирлари орқали ичаклардан сўрилиб, дарвоза венаси орқали жигарга ўтади.

Биринчи босқичда жисм (организм) учун зарарли моддалар (тош, суяк, ўта қаттиқ моддалар) оғиз орқали, йўғон ичак орқали эса турли зарарли, ҳазм бўлмаган маҳсулотлар чиқинди шаклида бадандан ташқарига чиқарилиб юборилади (5-расм).

Иккинчи ҳазм. Иккинчи ҳазм жигарда бўлиб, жигар табиий қувватнинг ўрни ҳисобланади. У аъзоларни озуклантириш, тириклик учун зарур моддаларни пайдо (синтез) қилиш, баданни турли зарарли моддалардан ҳимоя қилиш, зарарли моддаларни зарарсизлантириш, хилтларни ишлаб чиқариш, турли фермент ва биологик фаол (актив) моддаларни ишлаб чиқариш ва бошқа вазифаларини бажаради. Жумладан, жигарнинг яна қуйидаги вазифалари бор:

- Модда алмашинувида (метаболик). Оксил, углевод, ёғ, биологик фаол моддалар, гормонлар, дармондорилар (вита-



5-расм. Тўрт ҳазм, тўрт ҳазмдаги чиқиндилар ва тўрт унсурнинг боғлиқлиги

минлар) ишлаб чиқарувчи, сув алмашинувини назорат қилувчи.

- Захира омбори. Оксил, углевод, ёғ, биологик фаол моддалар, гормонлар, витаминлар, менераллар моддалар сақланади.

- Ажратувчи (секретор). Ўт суюқлигини ҳосил қилиб, ёғларни парчалаб, овқат ҳазм қилишда иштирок этади.

- Зарарсизлантирувчи (детоксификация). Ичаклардан сўрилган озук маҳсулотлари қон орқали жигарга келади. Жигар

хужайралари бу озиқ моддаларни зарарсизлантириб, бутун вужуд (организм)га юборади.

- Тириклик ғалвири (биологик филътр). Жисм (организм) да ҳосил бўлган, қон орқали келган захарли моддаларни зарарсизлантиради.

- Тана (организм)ни кувват (энергия)га бўлган таъминотини кошлайди ва ҳ.к.

Жигар инсоннинг тириклигини таъминловчи бошқарувчи (раис) аъзолардан бири ҳисобланади. Биринчи ҳазмда ҳосил бўлган каймус жигарда хилт ишлаб чиқарилиши учун дастлабки хом-ашё сифатида ҳозирланади.

Иккинчи ҳазм босқичи жигарда бошланиб, бу ерда жигар ўзидаги тутувчи, шимдирувчи, пиширувчи, чиқарувчи, шакл-лантирувчи, ўзгартирувчи кувватлар орқали ранг, табиат ва хусусият жиҳатдан тубдан фарқ қиладиган, баданнинг тирик-лигини моддий таъминлайдиган мураккаб суюқлик – **хилт** ҳосил қилади.

Истеъмол қилинган қуруқ-иссиқ табиатли озуқалардан бир хил сарғиш рангли, енгил ва ҳаракатчан, таъми жуда аччиқ ўткир (табиати – иссиқ ва қуруқ бўлган) *саффо* хилти ҳосил бўлади.

Хўл-иссиқ озуқалардан тўлиқ етилган, мусаффо, латиф қисмидан ранги оч қизил, таъми ширинроқ, ялтироқ суюқлик (табиати – иссиқ ва хўл бўлган) **қон** хилти ҳосил бўлади.

Хўл-совуқ озуқалардан тухум оқи рангида бўлган, таъм-сиз, суюқ (табиати – совуқ-хўл бўлган) **балғам** хилти ҳосил бўлади.

Курук-совук табиятли озуқалардан куюк, чўкмали, қорамтир рангли, чучмал таъмли (табиати – совук-курук бўлган) *савдо* хилти ҳосил бўлади (6-расмга қаранг).

Алихонтўра Соғуний роҳмахуллох эса, 4 суюқлик (хилт) ни пайдо бўлиши ҳақида шундай ёзадилар: “*Жигарда қай-*



6-расм. Унсурлар, мизожлар ва суюқликлар мажмуаси.

наб, қонга айланур. Устига чиққан кўпиги саффо бўлур. Чет ёқога чиққан қасмоқлари балғам бўлур. Остига тушган қуй-қумлари савдо бўлур. Тиниқ, мусаффо тозаси қон бўлур” (“Шифоул-илал”, 3-саҳифа).

Ҳосил бўлган хилтлар қон билан аралашиб жигар венасига қуйилади. Сафрони маълум қисми эса, ўт қопига, савдонинг маълум қисми талокқа ўтади.

Иккинчи ҳазмда ҳосил бўлган чиқинди маҳсулотлар (фазлалар) буйрак орқали сийдик қопига, қон томирлари орқали талокқа ва ўт йўллари орқали ўт қопи томонга ўтади. Шу билан иккинчи ҳазм ниҳоясига етади.

Учинчи ҳазм қон-томирларда бўлиб, жигардан пастки ковак венаси (*vena cava inferior*)га қуйилган қон юракнинг ўнг бўлмачасига боради. У ердан ўнг қоринчага ўтиб, кичик қон айланиш доирасига ўтади. Яъни, ўпкага бориб, у ерда кислород билан бойиб, ўзида рухдан иборат моддий қувватни тут-

ган мукаммал хилтга айланиб, ўпка венаси орқали юракнинг чап бўлмачасига қуйилади. У ердан қон чап қоринчага ўтади. Қон чап қоринчадан шоҳ томир (аорта) воситасида катта қон айланиш доираси орқали бутун танага тарқалади.

Учунчи ҳазмда **хилт** қуйидаги ўзгаришларга учрайди:

- Қон томирларнинг ички юзаси(эндотелий)да жойлашган рецепторлари ёрдамида, ҳосил бўлган хилтнинг кайфиятига боғлиқ ҳолатда ва вужуднинг мизожига мос равишда кўнраб биокимёвий ўзгаришларга учрайди.

- Ўпкада кислород билан тўйинади.

- Юракнинг ўнг бўлмачасида жойлашган атровентрикуляр тугундан чиқаётган “АМР”дан ҳаётини қувватни олади¹. Яъни, тана (организм) мизожига мос равишда ҳаётини қувватга эга бўлади.

Тўртинчи ҳазм. Тўртинчи ҳазм тўқима ва ҳужайраларда бўлади. Тўртинчи ҳазмда **хилт** қуйидаги ўзгаришларга учрайди:

- Ҳар бир ҳужайра учун зарур миқдорда таъминотини қондириб, уларни озиқлантиради, қувватлайди, янгиларини ҳосил бўлишини фаоллаштиради (стимуллайди).

Учинчи ва тўртинчи ҳазм жараёнида ҳосил бўлган чиқинди маҳсулотлари ўпка орқали ҳаво билан, буйраклар ёрдамида сийдик билан, тери орқали тер ва кир шаклида ёки оқувчан ишиш, тошма кўринишида, бурун ва қулоқ тешигидан ёки тирноқ ва соч каби гавдадан ўсиб чикувчи ортиқча нарсалар воситаси билан тана(организм)дан ташқарига чиқарилади.²

¹ Синус тугунидан Аллоҳ Таолонинг амри ва низоми билан автоматик тарзда импульс ишлаб чиқарилиб, юракни бир маромда (ритмик) ишлашини таъминлайди.

Бу ҳолат замонвий тиббиётда ҳужайра мембраналарида электролитлар потенциал фарқи ҳисобига рўй беради, деб қаралади.

² Шайх Мавлоно Абдулҳай Лакнавий “Умдатур риёя” китобларида жароҳатдан қон чиқишининг таҳоратга таъсири ҳақида қуйидагича тушинтирадилар. Агар жароҳат юзасидан қон чиқиб, бошқа томонга окмаса, бу “турган” қон бўлиб,

8-фасл. Табиий хилтлар

Қон. Микдор жиҳатидан танада энг кўп хилт қондир. Қон ҳақида Ибн Сино шундай ёзадилар: *“Табиийси қизил рангли бўлиб, ёмон ҳидли эмас, жуда шириндир”* (“Тиб қонунлари”, 1-китоб).

Юқорида, яъни тиб китобларида айтиб ўтилган қоннинг белгилари замонавий тиббиётга кўра, *қизил қон таначалари (эритроцитлар)га* тўғри келади³.

Табиий қон хилти бадандаги хилтларнинг энг асосийси, ҳаётнинг манбаи ҳисобланади. Табиий қон хилтининг ранги қизил, таъми ширинроқ табиати иссиқ ва ҳўл бўлади. У жигарда ишланиб чиқади ва захирада асосан илик ҳамда жигарда сақланади. Табиий қон хилти юракни ҳаракатлантиради, бутун тана (организм)ни озиклантиради. Сарф бўлган озуқалар ўрнини тўлдиради.

Қон хилти ўпкадан олиб келган кислородни баданга тарқатиб, айна вақтда моддалар алмашинуvidан ҳосил бўлган кераксиз моддалар ва карбонат ангдрид газини ўзига бириктириб ўпка, буйрак, тер тешикчалари орқали бадандан чиқариб ташлайди.

ҳазмнинг тўртинчи босқичидаги қон ҳисобланади. Яъни, бадан (тўқима)га айланишга тайёр турган қон бўлади ва бунда таҳорат синмайди.

Агар жароҳатдан қон чиқиб оқса, бу ҳазмнинг учинчи босқичидаги қон ҳисобланиб, унинг таркибида чиқиндилар ҳам бўлади. Яъни таҳоратни бузади.

³ Бу тушунтириш нисбий бўлиб, замонамиз тушинчаларига мослаштирилди. Устоз Жакбарали Жўраевнинг фикрича, қон хилти деганимизда, қон томирларда оқаётган қонни, ёки сафро деганимизда, ўт қопида жойлашган ўтнинг тушунмаймиз. Балки, бу аъзоларда бошқа аъзоларга нисбатан тегишли хилтлар кўпроқ жойлашганлигини тушунамиз.

Умуман олганда, бирор хилт тўғрисида гап кетар экан, бутун организмга шабнам каби сочилган суякликни тушинилади. Шу тўрт хилтнинг ўзаро нисбатлар фарқи билан аралашувидан организм, аъзо, тўқима ва ҳужайраларнинг тириклиги таъминланиб турилади. Демак, ҳар қандай қон хилти иштирок этган макро ёки микро органелла (масалан, эритроцит)лар ичида ҳам албатта сафро, балғам ва савдо хилтларининг олишлари ҳам мавжуддир. Маълумингизким, хилт атамасининг асл маъноси ҳам аралашмадир.

Қон хилти ўзининг иссиқ ва ҳўллиги билан баданни иситиб, қувватини оширади. Бадан ҳароратини бир зайлда ушлаб туришда қатнашади ҳамда баданни маълум даражада ҳўллик билан таъминлаб туради.

Зарурияти: бутун тана (организм)ни озиклантиради.

Манфаати: гўшт, ёғ, маний моддаларини ҳосил қилади.

Сафро (ўт). Ибн Сино сафро ҳақида шундай ёзадилар: *“Сафрога келсак, бунинг ҳам баъзиси табиий ва баъзиси зайритабиий бўлади. Баъзиси қоннинг кўпиғи бўлиб, тоза, қизил, энгил, ўткир бўлади. Жуда қизиб кетса, кучли қизил бўлади”* (“Тиб қонунлари” 1-китоби).

Маълумки, ошқозонда биринчи ҳазм тугагач, таомнинг тузилиши ўзгаради. Уни тибда каймус (химус) дейилади. У дарвоза венаси (мосариқо томири) орқали жигарга сўрилади. Жигарда иккинчи ҳазмга ўчрайди. Натижада 4 хилт пайдо бўлади.

Устига чикқан кўпиғи сафро бўлади. Ана шу пайдо бўлган сафро (ўт)нинг табиий ва нотабиий тур (фракция)лари бўлади.

Табиий турининг ҳам бир неча турлари бўлади. Бу ҳақида Шайх ур-раис бундай ёзадилар: *“Шу табиий сафро жигарда пайдо бўлгач икки қисмга бўлинади. Бир қисми қон билан қўшилиб кетса, иккинчи қисми соф бўлиб, тиниб ўт қопчасига боради”*. Яъни, химус (каймус) жигарда вена томирлари орқали жигар ҳужайралари (гепатоцит)лардан ўтади. Бу ҳазмда билирубин пайдо бўлади. Оксил билан боғланмаган (эркин) билирубин, қон томирлари орқали бутун танамизда айланиб (циркуляция қилиб) юради. Ана шу билирубин ферментлари, ўт пигментлари табобат илмида сариқ ранг беради деб таърифланган сафро моддасининг бир қисми ҳисобланади.

Ибн Сино табиий сафронинг қонга қўшилиб кетадиган тури (фракцияси)нинг зарурати ва манфаати ҳақида бундай

ёзадилар: “Қонга қўшилиб кетадиган [тури] зарурат ва манфаат учун қўшилади.

Зарурати ўпка каби мизожидан сафродан етарли бир бўлакнинг бўлиши керак бўлган аъзони озиқлантириши учун бўлиб, керакли миқдорда қонга аралашади⁴. Манфаати эса қонни латиф қилиб, тор йўлларга ўтказишидир”.

Қон билан аралашган сафронинг манфаати икки турликидир:

- Қонни суялтириб майда капилляр томирларда қон айланишини яхшилади.
- Организмда табиий намликнинг ортиб кетишини олдини олади, табиий ҳароратни ҳосил қилади ва сақлайди (7-расм).

Болалар неврологи, нейрожарроҳ Фахрулло Файзуллаев шундай фикр билдирадилар: “Таботатда табиий сафронинг қон билан қўшилиб кетган турининг ўпкани озиқлантириши, замонавий медицинада ўпканинг сурфактант тизими (сурфактантная система)га тўғри келади”.

Қуйида Ибн Сино табиий сафронинг ўтга қонга қўшилиб кетадиган турининг зарурати ва манфаати ҳақида айтганлари: “Сафронинг иккинчи қисми соф бўлиб, тиниб ўт қопчасига ўтиши ҳам зарурат ва манфаат учун бўлади⁵.

Зарурати: ўт қопидаги сафронинг зарурияти ўт қопчасини озиқлантиради⁶.


Манфаати: ўт қопидан оқиб тушган сафронинг манфаати икки турликидир.

- ичакни қўйқа – гализ ва ётишқоқ балғамлардан (парчалайди) ювади.

⁴ Яъни, кўпроқ ўпкани озиқлантиради.

⁵ Ўт қопини озиқлантириш фақатгина артерияни ҳисобига эмас, балки кўпроқ ўт қопига қуйилган сафро хилтининг ҳисобига бўлади.

⁶ Яна аввалроқ изоҳ сифатида келтирилган Ж.Жўраевнинг хилтлар ҳақида айтган гапларига қаралсин.



7-расм. Билирубиннинг танада айланиши (соддалаштирилган чизма шакли)

- Ичакни ва орқа йўл мушагини қитиқлаб, ҳожатни ҳис этдиради ва [кишини] ҳожатга чиқишга муҳтож қилади. Шунинг учун ўт қопидан ичакка тушадиган йўлда тўсиқ воқеъ бўлиши сабабли баъзан қулунж [касаллиги] пайдо бўлади”.

Яъни, оқсил билан боғланган билирубин ферменти, ўт кислоталари ва бошқа моддалар ўт йўллари орқали ўт қопида йиғилади ва кераклик вақтида ўн икки бармоқли ичакка қуйилиб, овқат ҳазм қилишида иштирок этади. Бу билан ичак ҳаракати (қувваи дофъия, перистальтика)ни таъминлайди.

Қон билан аралашган сафронинг манфаати ҳам икки турликидир.

Бири қоннинг суялтириб майда капилляр томирларда қон айланишини яхшилади.

Иккинчиси организмда табиий намликнинг ортиб кетишини олдини олади, табиий ҳароратнинг ҳосил қилади, сақлайди.

Микдорда кўплиги жиҳатидан танадаги қон ва балғамдан кейинги ўринда сафро туради.

Балғам (ханрук) – арабчада, балғам – ўзбекчада ҳам муштарак ишлатилади. Балғам ўрнига гоҳида арабчадаги ҳўллик маъносини берувчи рутубат сўзи ҳам ишлатилади.

Балғам етилмаган қондир. Кўпчилик ўпкадан чиқадиган шаффоф ёки оқсимон суюқликни балғам, деб аташади. У ўпкадан чиқадиган балғам бўлиб, таботатдаги балғамнинг бир қисмидир. Барча тўқималар ва томирлар ичида тўрт хилт, жумладан балғам ҳам бўлади. Балғам микдорда кўплиги жиҳатидан танадаги қондан сўнг туради. *Лимфа суюқлиги, тўқималараро суюқлик, қондаги оқсиллар, оқ қон таначалари, мия пардалари орасидаги ликвор суюқлиги, кўз олмаси ичидаги суюқлик, бурун ва бурун ёндош бўшлиқларидан чиқадиган секрет (ажралма), ўпка найидан чиқадиган секрет, бўғимлар ичидаги синовиал суюқлик* каби суюқликлар балғамнинг бир қисмини ифодалайди.

Зарурияти: Қон ҳосил бўлади. Бош ва орқа мияни озиклантиради.

Манфаати: Етилмаган қон. Бўғимларнинг ва аъзоларнинг ҳўллаб туради. Организм намлигини сақлайди, қуриб кетишини олдини олади.

Шифокор ва табиба Гулбаҳор Сатторова шундай дейди: *“Тана аъзоларининг ҳаракати натижасида организм маълум даражада суюқлик, сувни йўқотади. Балғамнинг вазифаси анану намликни қуриб кетмаслиги, танада сувсизланиш рўй бермаслиги учун танани нам(ҳўл)лаб туришидир. Қон плазмаси оқсиллари онкотик босими ҳам балғам ҳўллиги сабабли пайдо бўлади”*.

Табиб-тадқиқотчи Ўрол Ўзбек айтадилар: *“Балғам тўқималарга эластик (қайишқоқ)лик бағишлайди. Агар бўғимларда балғам камайиб кетса ёки йўқолса, улар ҳаракат қила олмай қотиб қолади”*.

Савдо (қораўт). Иккинчи ҳазмда 4 хилт пайдо бўлади, дейилган эди. Тоза етилиб пишгани – қон, чала пишгани – балғам, устига чиққани – сафро ва тагига чўккан чўқиндиси (дурдаси) – савдо ҳисобланади.

Савдо микдор жиҳатидан танадаги қон, балғам ва сафродан сўнг, энг охирда туради.

Савдо хилти, унинг тур (фракция)лари, уларнинг зарурат ва манфаатлари ҳақида Ибн Сино шундай ёзади: *“Савдо жигарда вужудга келгач, икки қисмга бўлинади. Бир қисми қон билан бирга ўтиб кетади. Иккинчи қисми эса, талоқ томонга боради. Қон билан [жигардан танага] ўтувчи савдо зарурат ва манфаат сабабли ўтади*.

Зарурлиги шундан иборатки, мизожда тоза савдодан анчагина микдорда бўлиши керак бўлган ҳар бир аъзони озиклантириш учун савдонинг етарли микдорда қонга аралашishi зарур. Масалан, суяклар шундайдир. Зарурати ё бутун гавда ҳисоби билан бўлиб, уни ортиқча нарсалардан тозалайди. Талоқдаги савдо биргина аъзо ҳисоби билан бўладики, у талоқни озиклантириш учундир.

Манфаати шуки, қонга қўшилган савдо қонни пишиқ қилиб кучайтиради ва қуюқ қилиб тарқалишдан сақлайди. Қонга керак бўлмай, талоққа борадиган савдо ҳам зарурат ва манфаат учун боради.

Манфаати шуки, савдо тарқалиш олдидан меъданинг оғзига тушади ва бу манфаати икки вазж билан бўлади. Биринчи вазж – меъданинг оғзини қаттиқ ва кучли қилади. Иккинчи вазж – нордонлиги билан меъда оғзини қитиқлаб, уни очликдан огоҳлантиради ва иштаҳани кўзғатади.

Билгинки, ўт қопчасига оқиб тушадиган саффо қон учун керак бўлмайди. Ўт қопчасидан оқиб чиқадиганини эса ўт қопчаси керак қилмайди. Шунга ўхшаш талоққа сизиб ўтувчи савдо – қон учун зарур бўлмаганидир. Талоқдан сизиб ўтувчиси эса талоққа керак бўлмаганидир.

Сўнги сифатли саффо пастдан ҳайдовчи қувват [қувваи дафъия]ни қўзгатгани каби шу кейинги савдо юқори томондан тортувчи қувват [қувваи жозоба]ни қўзғатади. Яратувчиларнинг энг яхшиси бўлган Тангрини мақтайман”.

Юқорида шарқ табобатида таърифланган табиий савдо замонавий тиббиётга кўра, эскирган қизил қон таначалари (эритроцитлар), тромбоцитлар, фибриноген ва ошқозон шираси (хлорид кислотаси)га тўғри келади, деб тахмин қиламиз⁷.

9-фасл. Мизож

Мизож таълимоти табобат назариясининг асосидир.

Сир эмаски, табобатга қизиқиш ортган сари, халқимиз орасида мизож атамаси тез-тез тилга олинмоқда ва албатта “мизож нима?” деган саволлар берилмоқда.

Биз шифокору табиблар мизож тушунчасини қўлимиздан келганича, халқимизга ва табобат илмига қизиқувчиларга мизож ҳақидаги таълимотларни китоблардан ўқиганларимиз ва устозларимиздан эшитганларимизни оддийроқ ва тушунарлироқ усулда етказмоқчимиз.

Мизож таълимотига киришдан олдин бу атамани тўғри талаффуз қилмоғимиз даркор. Кўпчилик инсонлар (ҳатто адабиётларда ҳам) бу сўзни бузилган шаклда “мижоз” деб талаффуз қилишади. Ҳозирги кунимизда мижоз атамаси кўпроқ

⁷ Яна аввалроқ изоҳ сифатида келтирилган Ж.Жўраевнинг хилтлар ҳақида айтган гапларига қаралсин.

хўрранда, ташриф буюрувчи (клиент) деган маънода қўлланилади. Бу атамани мизож атамасига мутлоқо алоқаси йўқ.

Мизаж – арабча сўз бўлиб, *феъл-атвор, характер, табиат, кайфият* деган маънони англатади⁸. Мизаж сўзини она тилимизга ўзлашганда мизож шаклига келган. Уни айнан шу шаклда қўллашни ҳозирда олимлар талаб қилмоқда⁹.

Унсурлар фаслида табиат қонуниятларини тиббий жиҳатдан талқин қилиб, уларни тўрт турлик қисмга, яъни ер, сув, ҳаво ва оловга ажратган эдик.

Хилтлар фаслида эса, унсурлардан озуқалар пайдо бўлишини ва организмга кирганидан сўнг хилтларга айланиш жараёни ҳақида билимга эга бўлдик.

Бу фаслда эса, хилтлардан мизож шаклланишини англаб оламиз.

Мизожга ҳазрати Ибн Сино шундай таъриф берадилар: “Мизож деб унсурларни ниҳоят даражада майда бўлақларидаги қарама-қарши кайфиятларининг бир-бирига таъсири маълум бир чегарага (яъни чўққиға) етганда пайдо бўлган кайфиятга айтилади”.

Демак, сув, ҳаво, турпоқ ва оловнинг аралашуvidан ҳосил бўлган кайфиятга мизож дейилади. Аралашув шу даражада Аллоҳнинг қудрати билан мукамал бўладики, кимдадир сув унсури кўпроқ, кимдадир олов унсури, кимдадир ҳаво унсури ва яна кимдадир турпоқ унсури кўпроқ ёки аксинча камроқ аралашган бўлади.

“Маълумки, Биз инсонни қора ботқоқдан бўлган, сура-ти берилиб қурилган лойдан яратганмиз” (Ҳижр сураси 26-оят).

⁸ Бу ҳақда Боситхон Шоший шундай ёзди: “Мизож луғатда ҳўб аралашиб қо-ришмоқдур. Аммо, истилоҳи атиббода неча нимарсани бир-бирига ҳўб аралаш-моғи бирлан ҳосил бўлгон кайфиятдурки, ҳар қаю жузунинг кайфиятидин мурак-каб бўлгон кайфият муроддур” (“Фарҳангал-мабсут”, 401-б.).

⁹ Хоссатан, шарқшунос, манбашунос, доктарант, тиб манбалари билан шуғилла-нувчи Фаҳриддин Ибрагимов қатъиян шу фикрдалар.

10-фасл. Мизожни аниқлаш

Ибн Сино ҳазратлари “Тиб қонунлари”да мизожнинг аҳволига далолат қиладиган 10 хил белгиларни санаб ўтадилар. Қуйида улар билан танишиб чиқсак:

1) Ушлаб кўриб сезиш.

Табиб беморни ушлаб кўрганда, уни танасининг ҳарорати ўша мамлакатда яшовчи инсонларнинг тана ҳароратига солиштирилади. Агар беморнинг бадани ўша мамлакат инсонларини баданининг ҳароратидан иссиқ бўлса – иссиқ, совуқ бўлса – совуқ, дағал, куруқ бўлса – куруқ, нам бўлса – ҳўл, деб ҳукм қилинади. Албатта бемордаги ўзгаришлар иссиқ, совуқ, хаммом, шамол ва бошқа омиллар таъсири остида бўлмаса.

2) Гўшт ва ёғдан олинadиган белгилар

Агар беморнинг танаси гўштли, бақувват бўлса – ҳўл ва иссиқ, агар гўшт кўп бўлмаса, шу билан бирга ёғ ҳам кўп бўлмаса – бу мизожни куруқ ва иссиқлигига далолат қилади. Тана (организм)да ёғнинг кўплиги доимо совуқликка далолат қиладиги, бунда гўшт бўш бўлади (мушаклар таранглиги – мускул тонуси паст бўлади).

3) Мўйлардан олинadиган аломатлар.

Улар қуйидаги белгилар:

1. Мўй ўсишининг тезлиги ва секинлиги; 2. Кўплиги ва камлиги; 3. Ингичка ва йўғонлиги; 4. Силлиқ ва жингалаклиги; 5. Ранги;

Агар мўйлар секин ўсса ёки бутунлай ўсмаса, мизожни ўта ҳўлликдан гувоҳлик беради (агар бунда бемор ўта камқон бўлмаса).

Агар мўйлар тез ўсаётган бўлса, мизож куруқликка мойил, мўйлар жуда тез ва қалин, дағал ўсса, бу мизож иссиқ ва куруқ бўлади.

Мўйларнинг жингалаклиги иссиқлик ва куруқликка, текислиги ҳўллик ва совуқликка далолат қилади.

Мўйнинг қоралиги – иссиқликка, сарғишлик – совуқликка, очранглик ва қизиллик – мўътадилликка, оқлик – ҳўллик ва совуқликка далолат қилади.

Санаб ўтаётган барча белгилар ўша мамлакат аҳолисига нисбатан олинади. Албатта зангий (негр)ларни сочининг оқлиги билан славян (рус, сақлаб)ларни сочининг оқлиги ўртасида ҳукм тафовутли бўлади. Жўғрофий жойлашган ўрин ва ҳаво ҳам мўйларнинг рангига таъсир қилади.

4) Баданнинг рангидан олинadиган аломатлар.

Баданни рангининг оқлиги баданда совуқлик билан бирга, қонни етишмовчилигига далолат қилади. Рангнинг хиралиги мизожни қаттиқ совуқлигидан бўлиб, бу совуқлик туфайли қон камаяди, камайган қон қўйилиб, савдога айланади.

Қизил ранг – иссиқликка, қоннинг кўплигига, сариқ ранг ҳароратнинг кўплигидан, сафродан далолат қилади. Баъзан сариқлик, агар ўт бўлмаса, энди тузалаётган гавдаларда бўлганидек қонсизликдан келиб чиқади.

Бақлажон ранг – совуқлик ва куруқликдан, ганж ранглилик фақат совуқлик ва бағам мизожлилик, қўрғошин ранглилик бироз савдо билан бирга совуқлик ва ҳўлликни, фил суяги ранглилик бироз ўт билан бирга совуқликдан далолат қилади.

Кўп ҳолларда терининг ранги жигар туфайли сариқ ва оқликка, талоқ туфайли сариқ ва қораликка айланади.

5) Аъзоларнинг тузилишидан олинган аломатлар.

Иссиқ мизожнинг аломати – кенг кўкрак, қўл ва оёқларнинг катталиги ва ўз андозалари билан мукамаллигидир. Қон-томирлари йўғон, мушаклар таранглиги (мускуллар тонуси) баланд бўлиб, унинг акси эса, совуқликни билдиради.

Қуруқ мизожнинг аломати эса, терининг қуруқлиги, бўғимлар ва хиқилдоқ ва бурун тоғайларининг бўртиб чиққанлигидир.

6) *Аъзоларнинг таъсирни қабул қилиш тезлигидан олинган аломатлар.*

Агар аъзо қийналмасдан тезлик билан кизиса иссиқликдан, агар тез совиса, совуқликдан далолат қилади.

7) *Уйқу ва бедорлик ҳолатлари.* Уйқу ва бедорлик ҳолатлари мўътадиллиги, мизожнинг мўътадиллигини айниқса, миянинг аҳволига далолат қилади. Уйқунинг кўплиги – ҳўллик ва совуқликка, ортиқча бедорлик – қуруқлик ва иссиқликка далолат қилади.

8) *Ҳаракатлардан, аъзоларнинг ишларидан олинадиган белгилар.*

Ҳаракатлар мукамал ва такомиллашган, тамомланган, табиий рўй берса, мизожнинг мўътадиллигини кўрсатади. Ҳаддан ташқари ҳаракат ва тезлик мизожни иссиқлигидан, ҳаракатлар суст, кучсиз, бўш ва секин бўлса, мизожнинг совуқлигидан далолат қилади.

9) *Гавдани чиқиндиларни чиқариб ташлаши ва чиқарилган нарсанинг сифати.*

Танадан чиқарилаётган нарсалар – нажас, тер, пешоб ва бошқаларнинг иссиқ, ўткир хидли, рангли бўлиши, ҳар жиҳатдан етилиб шаклланиши – мизожнинг иссиқлигидан, бунинг акси унинг совуқлигидан далолатдир.


10) *Аъзоларни нафсоний қувватларнинг таъсир кўрсатиши ёки таъсирни қабул қилиш қобилиятига оид далиллар.*

Кучли ғазаб, серзардалиқ, зукколик, тушунувчанлик, яхши фикр, ботирлик, сурбетлик, қаттиққўнгиллик, дадиллик, хурсандлик, ялқовликка кам мойиллик, кам таъсирчанлик иссиқликнинг гувоҳидир. Буларнинг акси эса, мизожнинг совуқлигини кўрсатади.

Биз юқорида айтган фикрларнинг ҳаммаси ёки кўп қисми одамнинг бошланғич тузилишида пайдо бўлган аломатларига оиддир.

11-фасл. Мўътадил мизож ҳақида

Ибн Сино Тиб конунлари китобида айтадики: “Мизожнинг ҳақиқий мўътадил бўлмоғи шу асосидаки, мизож эгасидаги қарама қарши кайфиятларнинг миқдорлари тенг бўлади. Анашу миқдорларнинг ораларидаги ўрта кайфият ҳақиқий мўътадил мизождир” (8-расм).




8-расм

Табобатдаги мўътадил мизож қарама қарши кайфиятлар орасидаги мизож ўртасида бўлмай энг мўътадил ҳолатдан бир томонга силжиган бўлади, (яъни) совуқлик ва иссиқликнинг бирига ёки ҳўллик ва қуруқликнинг бирига ёки ҳар иккисига мойилроқ бўлади.

Мўътадиллик мизож эгасининг бутун гавдасида ёки бир аъзосида унсурлар миқдори ва кайфиятлари билан одамнинг мизожига керагича энг тўғри тақсимланиб, энг тўғри нисбатда тўла тўкис тақсимланганидан иборатдир. Баъзи одамларда мизож биринчи айtilган мутлақ мўътадилликка яқин бўлади. Мўътадиллик нисбий бўлиб, саккиз хил бўлади:

1. Бошқа жонли ва жонсиз борликка нисбатан одамга хос мўътадиллик. Ер юзидаги барча одам турини ўз ичига оладиган шундай чегараки, ундан чиқиш одам мизожидан чиқиб кетиш ҳисобланади (9-расм).

2. Одам турининг ичидан мўътадилликка энг яқин халқ орасида ёш бўйича ҳам мўътадил ҳолатдаги, шахсда учраши мумкин бўлган мўътадиллик бўлиб, бу мўътадиллик мутлоқ мўътадилликка жуда яқин ҳисобланади. Бу вужудга келиши



9-расм

қийин ва кам учрайди. Бундай шахс ҳар жиҳатдан (заковат, топқирлик, фикрлаш, кўриниш, сўз санъати, жангаворлик ва х.) иқтидорли бўлади.

3. Маълум бир иқлимда яшовчи халқнинг мизожи бўлиб, одам турининг мизожидан тор. Ушбу халқ шу мизож чегарасида соғлом бўлади. Хинд халқининг ўзига хос мизожи бор, у билан соғлом бўладилар. Славянларнинг бошқача мизожлари бор, уларга фақат ўша мизож хос бўлиб, шу билан соғлом юрадилар. Хинд ва славянларнинг ҳар бири ўзига нисбатан мўътадил мизожли бўлиб, бошқага нисбатан мўътадил бўлмайдилар, чунки хинднинг бадани славян баданининг мизожи билан кайфиятланса касал бўлади ёки ҳатто ҳалок бўлади. Халқнинг маълум иқлимдаги мизожининг чегараси бор. Мана шу учинчи қисм мўътадилликдир.

4. Бу маълум бир иқлимда яшовчи халқлар орасида, уларнинг энг ўртача мизожли кишида топиладиган мўътадилликдир.

5. Бир кишининг ўз соғлиқ мизожи бўлиб, унинг ҳам чегаралари бор, ундан чиққанда касаллик топади ёки ҳалок бўлади.

6. Ҳар бир киши мизожи кенглиги энг ўртасидаги мўътадиллик бўлиб, тасаввур қилинганда, ҳаёти давомида шундай бир мукамал ҳолатда бўлиши мумкинки, у шу ҳолатда энг соғлом бўлади.

7. Бу мўътадиллик аъзоларнинг айнан ўзларига мос мўътадиллик бўлиб, аъзолар айнан шу мўътадилликда бошқа аъзолардан фарқ қилади. Суякнинг мўътадиллигида қуруқлик кўпроқ бўлади, юракникида иссиқлик.


8. Ҳар бир аъзонинг шундай бир мўътадиллик ҳолати, у шу мизожда энг яхши мизожга эга бўлади. Ҳар бир аъзо касаллик мизожига бирдан ўтиб қолмайди, маълум мизож ўзгаришларидан кейин соғлиқ чегарасидан чиқиб кетиши мумкин. Мана шу соғлиқ чегарасининг энг мўътадил ҳолати ушбу мизождир.

12-фасл. Табобатдаги “Мўътадиллик” кимёгарлар тилида

Бу ўринда яна шифокор нейрожарроҳ Файзуллаев Фахрулла Файзуллаевич сўзларини келтирамиз:

Биринчи даражадаги мўътадиллик. Атомлар унсурларга нисбатан мўътадиллашган ҳолатда бўладилар. Лекин пайдо бўлган атомлар бир-биридан таркиб жиҳатдан фарк қилади. Уларнинг таркибида протонлар сонига тенг электрон ва ҳар хил микдорда нейтрон, ва уларни энергетик қийматига мос энергия жойлашади. Бу фанда ҳар хил кимёвий элементлар номи билан аталади.

Унсурлар мўътадилликдан анча узоқ бўлиб, улар бирикиши натижасида қарама-қарши кайфиятлари мувозанатлашади. (10-расм).



10-расм

Иккинчи даражада мўътадиллик кимёвий элементлар бир бирларига нисбатан, иссиқ-совуқлик ва қуруқ-хўллик бўйича солиштирилганида “углерод” (C) элементи энг ўртача (мўътадил мизожга) кайфиятга эга бўлади.

• Иссиқ-совуқлик категорияси бўйича – электроманфийлик олинди. Чунки электроманфийлик ёрдамида атомлар ўртасидаги электрон олди берди муносабатларини математик кўринишида ифодалаш мумкин ва кимёвий реакцияларда энергия ютилиш ва ажралиш жараёнлари сабаблари асосида ётади. Бунда энг электроманфий (совуқ) элемент Фтор (F) 4,1 (Полинг бўйича халқаро бирлик) билан энг кам (иссиқ) элемент Цезий (Cs) 0,8 ўртасидаги қиймат 2,4 (яъни ўртача арифметик ҳисобланганида $4,1 + 0,8 = 4,9 : 2 = 2,45$) “углерод”га тўғри келади. Бу қиймат электроманфийлик ўртаси бўлган ҳолда, иссиқ-совуқлик кайфиятида ҳам мўътадил ҳисобланади (11-расм).

Электроманфийлик									
Полинг бўйича нисбий электроманфийлик									
Группа	I	II	III	IV	V	VI	VII	VIII	
Давр	A	B	A	B	A	B	A	B	B
1	H 2,1								
2	Li 1,0	Be 1,5	B 2,0	C 2,5	N 3,0	O 3,5	F 4,0		
3	Na 0,9	Mg 1,2	Al 1,5	Si 1,8	P 2,1	S 2,5	Cl 3,0		
4	K 0,8	Ca 1,0	Ga 1,6	Ge 1,8	As 2,0	Se 2,4	Br 2,8		
5	Rb 0,8	Sr 1,0	In 1,7	Sn 1,8	Sb 1,9	Te 2,1	I 2,5		
6	Cs 0,7	Ba 0,9	Tl 1,8	Pb 1,9	Bi 1,9	Po 2,0	At 2,2		
7	Fr 0,7	Ra 0,9							

11-расм

• қуруқ-хўллик категорияси бўйича–валентлик асос қилиб олинди. Бунинг сабаби, хўллик валентликка мос келиши


шундан иборатки, бир атом бошқа атомга бирикиш қанчалик кўп бўлса ҳўл деб олинди, бирикмаслик куруқликка мос келади. Мавжуд эламентлар валентликлари 1 дан 7 гача бўлиб, ўртача қиймат 4 бўлса, тўрт валентли элемент куруқ-ҳўлликда ўртача (мўтадил) ҳисобланади (12-расм). Демак, юкорида келтирилган иккала кўрсаткич бўйича ҳам мўтадил элемент “углерод” ҳисобланади. (13-расм).

Валентлик

Группа номери кислородли энг юкори оксидларига мос келади

Группы элементов	I	II	III	IV	V	VI	VII	VIII
1	H	Li	Be	B	C	N	O	F
2	Na	Mg	Al	Si	P	S	Cl	Br
3	K	Ca	Sc	Ti	V	Cr	Mn	Fe
4	Rb	Sr	Y	Zr	Nb	Mo	Tc	Ru
5	Cs	Ba	La	Ce	Pr	Nd	Pm	Sm
6	Fr	Ra	Ac	Th	Pa	U	Np	Pu
7	At	At	At	At	At	At	At	At

12-расм



13-расм

Учинчи даражадаги мўтадиллик. Атомдан молекулалар даражасига чиққанимизда, улар кислоталар, асослар, тузлар, оддий моддалар, оксидлар, спиртлар, эфирлар, углеводородлар, ёғлар, аминлар ва бошқа кўп гуруҳлардан иборатлигини кўришимиз мумкин. Ибн Сино айтганидек тириклик, мўтадиллик устида бино қилинадиган бўлса, бу моддаларнинг ичида барча хоссалари бўйича ўртача (мўтадил) сифатларга эга бўлган моддалар оксиллар (аминокислоталар) га тўғри келади.

Асосий тириклик моддаси оксиллар таркибида аминокислоталарни солиштириб қуйидаги хулосаларга келиш мумкин. Юкорида углерод бошқа элементларга нисбатан энг мўтадил элемент эканлиги тушинтирилди. Аминокислота марказда углерод элементига тўрт томондан тўрт хил мизожли бирикмалар бирикади.

Натижада аминокислота иссиқ совуқлик ва куруқ хўлликда ўртача мўтадил кайфиятга эга бўлади. Углеродга бир томондан кислота қолдиғи (COOH), иккинчи томондан асосли қолдиқ (NH₂) бирлашса, мўтадил кайфиятли модда пайдо

Аминокислотанинг умумий формуласи




14-расм

бўлади. Бир томондан водород (протон) кучли диссоциланиш (эрувчанлик) пайдо қилса, иккинчи тарафдан радикал (20 хил) занжири паст диссоциланишни (кам эрувчанлик) юзага келтиради. Қарама-карши қолдиқлар бирикиши натижасида улар ўртачаликни сақлаб қолади, кислота-асос категорияси бўйича ҳам амфотер, диссоциланиш кўрсаткиси бўйича ҳам мўътадил бўлади. (14-расм).

Тўртинчи даражадаги мўътадиллик. Демак, аминокислоталар бошқа моддаларга қараганда мўътадил бўлиб, улар радикаллар турига қараб 20 хил бўлади. Тузилиши ўхшаш, лекин радикаллари фарқи ҳисобига бир-бирига нисбатан иссиқ-совуқлик ва қуруқ-хўллик категориялари билан баҳолаганимизда, баъзилари хўл-иссиқ, баъзилари хўл-совуқ, баъзолари қуруқ-иссиқ ва баъзилари қуруқ-совуқ бўлади. (15-расм). Радикал қолдиғи асосли бўлган аминокислоталар иссиқ, кислотали бўлган аминокислоталар (совуқ, радикали хўн қисмли ва узун занжирлилари қуруқ ва калта ва эрувчанлиги юқорилари хўл категорияларига ажратса бўлади. Шу жойда тадқиқотларим давом этмоқда, аминокислоталарнинг мизожлани аниқлаштириш ва бошқа чуқурроқ тадқиқотлар хусусида ишлар кетмоқда.

Бешинчи даражада мўътадиллик. ДНК таркибидаги 4 хил нуклеотид, бир-бирига нисбатан 4 хил мизож кайфиятида бўлади. ДНК занжиридаги нукелотидлар кетма-кетлиги генетик код яъни оксиллар кетма-кетлиги тўғрисидаги маълумот ҳисобланади. ДНК даги маълумот оксилга ўтиши бизнинг фикримизча, мизожни нусхаланиши ҳисобланади. ДНК даги маълумот мизож кўринишида бўлиб, шу маълумот триплет нуклеотидлар тарзида узатилади ва аминокислоталар (20 хил) ичидан шунга мос мизожли аминокислота занжирга бирикади, деб фараз билдирмоқдамиз.



15-расм

13-фасл. Энг мўътадил мизож соҳиби ким?

Имом Заҳабий роҳмаҳуллоҳ ўзларининг “Тиббун-набаъий” номли асарида қуйидаги қизиқ малумотларни келтиради: “*Ҳайвон (жонзот, жонивор, нафас оладиган жони бор маҳлуқ) – мизожларнинг энг мўътадили. Ҳайвонлар ичи-*

да мизожси энг мўтадили – инсон. Инсон мизожларининг энг мўтадилроғи – мўмин (иймон келтирган) бандаларнинг мизожси ҳисобланади. Мўминларнинг мизожлари ичида энг мўтадилроғи – пайгамбар алайҳиссаломларнинг мизожси. Пайгамбарлар ичида мизожсининг энг мўтадилроғи – расулларнинг мизожси ҳисобланади. Расулларнинг мизож жиҳатдан энг мўтадилроғи қайси дейилса, ул-азм пайгамбарлардир. Улар бештадир. Мана шуларнинг ичида ҳам мизож жиҳатидан энг мўтадилроғи қайси?

Саййидимиз Муҳаммад Мустафо соллаллоҳу алайҳи васалламдирлар.

Мен айтаман, Набий алайҳиссаломнинг мизожларининг мўтадил бўлишига сабаблари, Аллоҳнинг росули мизож жиҳатидан ҳулқлари энг мўтадил бўлганликлари сабаб бўлади. Яъни, табибларнинг қоидалари “нафс (инсон)нинг ҳулқлари баданнинг мизожига эргашиувчидир”. Ҳар гал нафснинг ҳулқлари чиройли бўлса, баданнинг мизожси ҳам мўтадилроқ бўлади. Нафснинг ҳулқлари ҳам шунда чиройлироқ бўлади. Шундан билинадик, Ҳақ субҳанаҳу ва таоло Росулulloҳ соллаллоҳу алайҳи васаллам ҳақларида гувоҳлик бериб, Каломининг “Қалам” сурасида: “**Албатта Биз сизни улуг ҳулқ устида яратдик**”, - дея марҳамат қилади.

Бу ҳақда Оиша онамиз розияллоҳу анҳо ҳам марҳамат қилиб айтадиларки: “Расулulloҳ соллаллоҳу алайҳи васалламнинг ҳулқлари Қуръон эди”.


Ана шулардан лозим бўладик, у зотнинг мизожлари – мизожларнинг мўтадилроғи. У зотнинг ҳулқлари эса, ҳулқларнинг энг чиройлиси бўлганлиги келиб чиқади.

Имом Бухорий роҳмаҳуллоҳ “Саҳиҳул-Бухорий”да: “Расулulloҳ соллаллоҳу алайҳи васаллам юз жиҳатидан инсонларнинг энг гўзали ва уларнинг ҳулқи жиҳатдан ҳам энг чиройлиси эдилар”, - деган ривоятни келтирадилар¹⁰.

¹⁰ Манба: Ҳофиз Абу Абдуллоҳ Муҳаммад ибн Аҳмад Заҳабий “Тиббун-наба-

Мўтадиллик мажмуаси

(манба: Имом Заҳабий роҳмаҳуллоҳнинг “Тиббун-Набавий” асари)



16-расм. Мўтадилликнинг энг мўтадили чизмаси.

14-фасл. Қон мизож соҳиблари

Алихонтўра Соғуний раҳматуллоҳи алайҳ. “Шифоул-илал” асарида шундай ёзадилар: “**Қон мизож бўлган кишининг аломати: тани – этлик, юзлари – қизил, тўлуқ бетлик, хушфеъл, хушқилиқ, кўнгли қувончоқ бўлур. Юраги – кенг, ўзи – баҳодирсифат, тани – қувватли бўлур**”.

вий”. Ливан, Байрут: - “Дорул-улум”, ҳ.141 – м.1990 йил, 21-23 бетлар (арабчадан Алимардон МирАҳмад таржимаси). 16-расмга қаранг

Ўрол Ўзбек айтадилар: “Қон мизож одамни икки юзи қизил бўлади. Унда табиий ҳўллиги кўпроқлиги сабабли сув ичса ҳам семираверади. Табобат китобларида бундай мизож мақталган.

Жиноятларнинг кўплари (қон куйиши натижасида) қон мизож (қизикқонлиги сабаб) ёки (совуққонлиги сабаб) балғам мизож кишилар томонидан содир этилади”.

Ҳаво унсури иссиқ ва ҳўл бўлиб, қон хилти унга таалуқли. Яратилишида шу унсур ғолиб инсонлар баданидаги гўшт ва ёғ қатламлари мўътадил ривожланган бўлиб, бадан ҳарорати иссиқроқ, териси силлиқ, чиройли нурли қизил, ўзлари тетик ва бақувват бўладилар. Бу мизож соҳиблари хушфеъл, очик чехрали бўлади. Бошқаларни ўзига жалб килишга мохир, тафаккури ўртача, эсда саклаш қобилияти юқори, тақлидчилик ва кўпиртиришга ўхшаш хусусиятларга эга. Нутки бир маромда, қўл ҳаракатлари гапи билан уйғунлашган. Мустақил фикри камроқ, бошқаларнинг ғоясини ўзлаштиришга уринади. Бошқаларнинг ишини диққат билан зимдан кузатади. Кўпроқ ухлайди, эснайди. Кўнгилчан кўринади. Хотиржам кўрингани билан ички ҳиссиёти тўлқинланиб туради. Тил усти қизғиш караш бўлиб, оғиз таъми ширин. Гўштли таомларни яхши кўради. Улар қон-томир, буйрак, суяк, тери касалликларига мойил бўлади. Ҳуқуқ, оммавий муносабатлар, пул муомаласи соҳасида бундай одамлар устаси фаранг ҳисобланишади.

15-фасл. Саффо мизож соҳиблари

Алихонтўра Соғуний “Шифоул-илал” асарида шундай келтирадилар: “Саффо мизож одамнинг белгиси кўпинча бугдой рангли, юзи — этсиз, ўзи — қотмол, юраги тор, зардаси тез, ўлтириб-туриши енгил, жонсарақроқ бўлур”.

Ўрол Ўзбек айтадилар: “Саффо мизож одамни икки юзи қон мизожникига ўхшаб қизил бўлмайди. Сув ичса семирмайди. Ундай одамлар семириши учун ширбоз гўштидан жаз кабоб (шашлик) ейишлари керак. Жаҳлдор ва инжик бўлади. Қўрқоқроқ, мулоҳазали, қотилликларга кам қўл уради”.

Олов унсури — иссиқ ва қуруқ бўлиб, саффо хилти унга таалуқли. Яратилишида шу унсур ғолиб инсонларнинг тери ранглари сарикка мойил, қуруқроқ, иссиқ бўлади. Кўзларининг оқи сарғишроқ, тил усти сарик караш билан қопланган, оғиз таъми аччик, тили қуруқроқ. Улар тез чанқайдиган бўлиб, совуқ ҳаво ва совуқ ичимликни хуш кўради. Уларнинг аччиғи тез, жаҳлдор, ҳаракатчан, сезгир, ҳиссиёти кучли, кам уйқу, тутруқсиз, тез ўзгарувчан, хужумкор, ғам-андухга чидамсиз, ботир кўринади. Уқувли ҳолатларни тез ва осон эслаб қолади ва тез унутиб қўяди. “Тугуннинг учини тез топса ҳам”, табиатидаги чалалик туфайли ишни тўлиқ ва мукаммал бажара олмайди. Гапирганда тез-тез, баланд-баланд овозлари портлаб чиқади. Сўзларида камтарлик оз, айблаш кўпроқ бўлади. Бировни қилган иши ёқмайди, бир жойда узок ўтира олмайди. Тез-тез юради. Осонликча бировни ёқтирмайди. Бундай инсонлар жигар, ўт қопи касалликларига, асаб касалликларига мойил бўладилар. Суяк хамир овқатларни, мойли гўштли овқатларни хуш кўришади. Совуқ ичимликларга ўч бўлишади.

16-фасл. Балғам мизож соҳиблари

Алихонтўра Соғуний “Шифоул-илал” асарида шундай келтирадилар: “Балғам мизожли одамнинг белгиси — кўпинча оқ тусли, юзлари лўппи, этли, танлари юмшоқ, уйқуси кўп, ўлтириб-туриши оғир, ғамемас, ўзи қўрқмас бўлур, қорни катта. Семиз одамлар ҳаммаси балғам мизожли бўлурлар”.

Семизлик деганда, тана вазнини нормадан ошиши, организмда ортиқча ёғ тўпланиши тушунилади. Ортиқча таом, тўйиб ейиш натижасида баданда ортиқча ёғ захираси тўпланади. Қориннинг катталиги икки хил ёғнинг захираланиши билан боғлиқ. Тери ости ёғ қавати ва чарви. Ўрол Ўзбек айтадилар: *“Ҳар қандоқ овқатни, ҳаттоки иссиқлик овқатни тўйиб ейилса ҳам, совуқликка айланади”*. Бу танада балғамнинг ошиши ва семиришга олиб келади. Бунга ҳужжат қилиб, Абу Али ибн Сино раҳматуллоҳи алайҳнинг “Тиб қонунлари”нинг 1-жузъи “Аъзоларнинг мизожлари ҳақида” фаслида ёзадилар:

“Гавдадаги энг совуқ мизожли нарса балғам, ундан кейин чарви, ёғ, ...Гавдадаги энг ҳўл нарса балғам, қон, ёғ, чарви, ... Жолинуз тузган тартиб шудир”.

Ўрол Ўзбек айтадилар: *“Балғам мизож одамлар бўйи баланд, қўрқмас, совуққон, секин, шошмай, айтиши мумкинки, маълум хотиржамлик билан ҳаракат қиладилар. Қотиллар (қиллерлар), учувчилар, гимнастлар, Сибирликлар, совуқ ўлкада яшовчилар балғам мизож бўлади”*.

Сув унсури – ҳўл ва совуқ бўлиб, балғам хилти унга тааллуқли. Яратилишида бу унсур ғолиб инсонлар чиройли, оқ, тиниқ ва қайишқоқ (эластик) тери соҳибларидир. Тери ости ёғ қавати ривожланган, тўладан келган, беғам инсонлардир. Улар ҳар қандай ташқи таъсирга бепарво бўлади. Осон ёд ололмайдилар, лекин ёд олсалар, осонликча унутмайдилар. Оғир-бо-сик, серуйку бошқаларни ишига аралашмайди. Фикрлаши суст, унутувчан. Ўзининг муқим фикрига эга. Тил усти кўпинча оқ караш билан қопланган, бемаза бўлади. Асли камгап. Бир маромда, секин ҳаракатланади. Оқ кўнгил, содда, бошқалар билан осонгина чиқишиб кетади, тез алданади, иродаси бўш, суҳбат давомида ўзини ожиз томонини осон билдиради, дўстликни қадрлайди, тез умидсизликка тушади. Кўпинча совуқ-

дан бўладиган касалликлар – бўғин оғриқлари, назла касалликларига тез чалинади. Лекин даволансалар, тез тузаладилар. Уларга ҳўл-совуқ овқатлар зарар қиладди.


17-фасл. Савдо мизож соҳиблари

Нидоий Бенавоий раҳмаҳуллоҳ (15-16-аср) “Инсонларга фойдалар” асарида бу мизож ҳақида шундай келтирадилар: “Савдойи мизожнинг нишонаси улдурким, ранги тундрок, юзи суюқ ва бадани қорарок бўлиб, доимо фикр ва андиша билан ғамгин бўлғай. Лекин оқил ва доноликка лойиқ савдоси ғолиб бўлғай. Ва ҳазон фаслида сийдигининг ранги қора бўлғай”. У зот яна ёзадиларки: “Ва агар юзи қорайса, совуқлик ва қуруқликнинг кўплигидандир”.

Алихонтўра Соғуний раҳматуллоҳи алайҳ (1885-1976 йй.) “Шифоул-илал” асарида шундай ёзадилар: “Савдо мизожнинг аломати – ранги-рўйи қорамтир, баъзиси темирқаро, гоҳ бириси тол рангида. Юзи ғўштсиз, ўзи қотмол, ориқ, бадҳўй, бадфеъл, қўрқоқ бўлур”.

Ер унсури – қуруқ ва совуқ бўлиб, савдо хилти унга тааллуқли. Яратилишида шу унсур ғолиб инсонлар кўпинча жиккак, ориқ, суяк ва мушаклари яхши ривожланмаган, қорачадан келган, тилининг усти қорамтир караш билан қопланган. Териси қуруқ, совуқ, ёғ катлами яхши ривожланмаган. Юрганда шошилмай, ҳаёл суриб юради, табиатан кўп ўйланади. Улар ёлғизликни ҳуш кўришади, ҳар иши ва ҳаракатнинг охирини ўйлайди, тафаккури юқори бўлмаса ҳам кучли, изчил фалсафийликка эга. Ўзи билмайдиган ёки тўлиқ ишонмайдиган киши олдида ўз фикрини дархол айтмайди, эҳтиёткор. Бундай инсонлар хурсандчилигини ёки қайғусини бировга билдирмайди, биров учун куйиниб ҳам кетмайди. Мустақиллиги кучли, бошқаришни яхши кўради. Самимий,

худбин, ростгўй, хийлагар, сир сақловчи. Фидоий, куйинчак ва ҳар қандай ишни пухта бажаришади. Ҳавойи орзуларга, ишқу мухаббатга берилмайди. Тортинчоклик, хижолатпарастлик ва ўзини юқори тутмаслик ҳиссиёти савдо хилтли кишиларга хос. Бу мизож соҳиблари кўпинча суяк касалликлари, асаб ва руҳий касалликлар, ичак, талоқ ва соч касалликларига мойил бўладилар. Овқатланишларида ҳўл-иссиқ мизожли овқатлар яхши манфаат қилади. Мураккаб ҳикмат, жумладан электроника соҳаси, режалаштириш ва ҳарбий соҳаларни ёқтирадилар. Саноатга қизиқади. Икки хил мураккаб бўлган соҳаларни ҳам бир вақтда бошқариш қобилиятига эга (17-, 18- ва 19-расм).



17-расм. 4 унсур, 4 хилт, 4 мизож, 4 мизож соҳибининг тахминий томир уриши ва томир кесмаси чизмаси.



18-расм. Қон, сафрo, балғам ва савдо мизож соҳибларининг тахминий ташиқи кўриниши (рассом Иоганн Лафатер, 18-аср, Швейцария)



19-расм. Тўрт унсур, тўрт мизож ва тўрт сайёра миниатюраси ([https://classicalastrologer.me/category/aristotle/astrology in islam](https://classicalastrologer.me/category/aristotle/astrology%20in%20islam). 26.09.2017)

Мизожнинг турларини осонроқ тушуниш учун 1-жадвалга қаранг.

1-жадвал. Мизожларнинг таснифи (классификацияси)

Мўътадил бўлмаган мизож турлари:		
Таркиб топиши	Моддасиз	Моддали
Содда мизожлар (мизожу муфрада)	1. Иссиқ мизож.	9. Иссиқ мизож.
	2. Совуқ мизож.	10. Совуқ мизож.
	3. Қуруқ мизож.	11. Қуруқ мизож.
	4. Ҳўл мизож.	12. Ҳўл мизож.
Икки кайфият (зиддият)ли мизожлар (мизожу мураккаба)	5. Иссиқ-ҳўл мизож, яъни қон мизож.	13. Иссиқ-ҳўл мизож, яъни қон мизож.
	6. Иссиқ-қуруқ мизож, яъни сафро мизож.	14. Иссиқ-қуруқ мизож, яъни сафро мизож.
	7. Совуқ-ҳўл мизож, яъни балғам мизож.	15. Совуқ-ҳўл мизож, яъни балғам мизож.
	8. Совуқ-қуруқ мизож, яъни савдо мизож.	16. Совуқ-қуруқ мизож, яъни савдо мизож.

18-фасл. Инсон ҳаётининг турли давларининг мизожи

Инсон туғилгандан то вафот этгунга қадар бўлган жараён 4 босқичга бўлинади:

1. Ўсмирлик даври. Инсон туғилгандан то 25-30 ёшгача давом этади.

2. Ёшлик даври (ўсишдан тўхташ) 25-30 ёшдан 35-40 ёшгача бўлган давр.


3. Қисман қувват бўла туриб чўкиш ёши (ўрта ёш даври) 35-40 ёшдан 60 ёшгача.

4. Қарилик даври. 60 ёшдан то умрнинг охиригача (20-расмга қаранг).

Ўсмирлик даврининг мизожи.

Бу давр 25-30 ёшгача давом этиб, унинг ўзи ҳам уч босқичдан иборат:

1. Чақолоқлик даврининг мизожи. Бу даврда инсон мустақил туриш, юриш ва қўзғалишга қобилиятли бўлмайди. Бу тахминан 1-2 ёшлар атрофида давом этади. Чақолоқлик даври ҳўл-иссиққа мойил бўлади, лекин ундаги иссиқликдан ҳўллик устун бўлади.



20-расм. 4 унсур, 4 хилт ва умрнинг 4 босқичининг боғлиқлик мажмуаси

Албатта, табобатда ўсиш ҳўллик билан бўлади. Шунинг учун бу босқичда бола кун сайин ўсади. Бу даврда чақалоқнинг бадани хомсемиз, тиниқ, ялтироқ ва серуйку бўлади. Баданда жигарнинг хилт ишлаб чиқариш иқтидори шаклланмаган бўлиб, озуқани сут шаклида қабул қилади. Чақалоқда ҳўлликнинг кўплиги ва иссиқликнинг ҳўлликка муқобиллигининг пастлиги сабабли, болажонларда ич кетиш (дисбактериоз), нафас йўлларининг балғам ортиши билан кечувчи касалликлар, оғиз бўшлиғининг замбруғли касалликлари кўпроқ учрайди.

Бу даврда болаларда ҳароратни бошқарувчи (терморегуляция) маркази тўлиқ шаклланмаган бўлади. Шунинг учун улар атроф муҳитнинг иссиқлик ва совуқлик ўзгаришларига тез таъсирланиб, балғамий касалликларга тез берилишади. Шу сабаб, чақалоқлик давридаги мизожни ростлаш учун имкон қадар баданни иссиқ сақламоқлик, совуқдан сақлаш керак. Яна мизожда куруқлик сақловчи озуқалар билан тана, иммун тизимини қувватлаш, сингиши осон, енгил ҳазмли озуқалар қабул қилиш лозимдир. Чунончи, эмизувчи оналар ҳам эмизикли даврда балғам хилтини оширувчи маҳсулотлар, жумладан совуқ сув, қовун, тарвуз, помидор, шафтоли, ўрик ва шунга ўхшаш маҳсулотлар истеъмолидан тийилишлари керак. Чунки бу озуқалар кўкрак сути мизожини совушига ва чақалоқнинг ичакларида совуқлик ва ҳўллик кайфиятини ортишига, бу эса касалликларга чалиниш эҳтимоллигини ошишига сабаб бўлиши мумкин.

2. *Болалик даврининг мизожини.* Бу давр икки ёшдан то илк жинсий ривожланиш белгилари пайдо бўлгунга қадар давом этувчи даврни ўз ичига олади. Бу вақтда аъзоларнинг меъёрида ишлаш иқтидори шаклланади. Жигарда хилт ишлаб чиқариш, шунингдек ошқозон-ичакларнинг ферментатив, овқат ҳазм қилиш иқтидори ортади. Баданда ҳўллик миқдо-

ри нисбатан камаяди. Лекин иссиқлик миқдорига нисбатан ўстунлигича қолаверади. Шунинг учун бу даврда ошқозон, ичак, суяк тизими жумладан, рахит касаллигига мойиллик кучли бўлади. Бу даврда болани иссиқлик ва куруқликка мойил, дармондори (витамин), оксил, минералларга бой, ҳазми енгил озуқалар билан таъминлаш керак. Бу иш ошиб кетган ҳўлликни камайтириб, иссиқликни меъёрга келтиришга эътибор ҳозирлайди.

3. *Ўсмирлик даврининг мизожини.* Илк жинсий етилиш белгилари пайдо бўлгандан то 25-30 ёшгача бўлади. Аъзоларнинг меъёрий хизмат иқтидори тўлиқ етилиб, нормал физиологик жараёнлари ривожланиб, мия фаолияти ақлий тафаккур юргиза оладиган ҳолатда бўлади.

Бу даврда иссиқлик қуввати ҳўлликнинг мўътадиллаш ҳолатига келиб, ҳўл-иссиққа мойил бўлади. Бола ўсувчан, семиз-озғинлиги меъёрида, уйқуси ва руҳияти, ақлий тафаккури ва қизиқиши яхши, баданда гормонлар ишлаб чиқарилиши ва ёшга хос ўзгаришлар юқори бўлади. Шу сабабли, бу даврда ўсмирлар қизиқувчан, жўшқин, хиссиётларга берилувчан, ақлий ва хиссий ривожланиш юқори ҳолатда бўлади. Шунинг учун ҳам уларда камқонлик ва асаб касалликларига мойиллик кучли бўлади.

Ҳазм тизими ҳам барча озуқаларни ўзлаштиришга лаёқатли бўлади. Бу босқичда болалар озуқасига хилма-хил, тўйимли, оксил, дармондори (витамин), минералларга бой бўлиши, шунингдек овқат тартибида мева, кўкатларга алоҳида жой бўлмоғи лозимдир.

Бундан ташқари, тананинг дам олиши, чиниқиши, меъёридаги жисмоний ҳаракатларнинг ва тоза қон ҳосил қилувчи табиий дориларнинг истеъмоли баробарида бўлиши, юқори даражадаги саломатликни кафиллайди.

Ёшлик даврининг мизожи

Бу давр 25-30 дан 35-40 ёшларгача бўлади. Вужуд (организм)нинг ақлий ва жисмоний қобилияти тўлиқ етилган бўлади. Бошқарувчи (раис) аъзолар (бош мия, жигар, юрак ва жинсий аъзолар)нинг фаолияти чўққига кўтарилган, иммун тизими баланд бўлиб, танадаги иссиқлик ҳўлликни енгитиш даражасига келади. Шунинг учун бу даврнинг мизожи иссиқ бўлиб, ҳўллик билан куруқликда мўътадил бўлади.

Уйку меъёридан кам, ҳаракатлар фаол ва чаққон, ақлий тафаккур юқори, бадан чиройли рангда, текис, бироз куруқроқ бўлади. Бу вақтда кишининг келажакка ишончи кучли, иродали, ҳиссиётларга бой, ижобий (позитив) бўлиб, мустақил фикрлашни, мустақил иш бажаришни яхши кўради. Бу босқичнинг охирида инсонни муаммоларга бўлган муносабати жиддий, ҳар қандай муаммони ҳал қила оладиган, мустақил дунёқараши, ҳаётий тажрибалари ҳам шаклланган бўлади. Инсон ўз хато камчиликларини тушунадиган, ҳаётга босиқлик билан қарайдиган ҳолатга етиб келади.

Ҳазрати Расулulloх соллаллоҳу алайҳи васалламга илк ваҳий ҳам 40 ёшларида нозил бўлиши ҳам, бу босқич охири инсонни тўлиқ ақлий, жисмоний камолатга етишишининг энг чўққиси эканлигининг бир далили бўлса не ажаб.

Одатда бу вақтда иссиқлик касалликлари, озуқа ва минераллар етишмаслигидан чарчаш, камқонлик, руҳий касалликлар, тери-таносил каби касалликларига мойиллик бўлади. Шу сабабли бу даврда баданга ҳўллик берувчи, оқсил, мой, минерал ва дармондори (витамин)ларга бой озуқалар истеъмол қилиш лозимдир.

Қисман қувват бўла туриб чўкиш даврининг мизожи

Бу давр 35-40 ёшдан 60 ёшгача бўлган даврни ўз ичига олади. Бу даврда тана ўсишдан тўхтаб, аъзоларнинг хизмат

қуввати чекланишлар томонга бўлган жараёни ўз ичига олади. Бу давр мизожи совуқ ва куруқликка мойил бўлади. Баданнинг хизмат иқтидори ёшлик давридаги баданнинг хизмат иқтидори билан ўхшаш бўлсада, бадандаги иссиқлик қувватини пайдо қилувчи жигар ва юрак каби раис аъзоларнинг фаолиятида чекиниш кузатилади. Бадандаги иссиқлик ўрнини совуқлик эгаллай бошлайди.

Бу босқичда оғир-босиқлик, руҳий тетиклик, ҳаётнинг иссиқ-совуғидан керакли хулосалар олинган, барқарор фикрга эга бўлинади. Гормонал ўзгаришлар ҳисобига аёлларда семиришга мойиллик, иммун тизимининг нисбатан сустлашиши, совуқлик касалликларига мойиллик, қон-томирларининг атеросклерози, қоннинг қуюқлашуви, бўғим, жигар ва ўт қопи касалликларига мойиллик кучаяди. Шу сабабли бу даврда дам олиш билан ҳаракат тенгма-тенг, бир залда ташкил қилинишига, баданни қиздирувчи, унга иссиқлик ва куруқлик етказувчи ва қонни султирувчи озуқалар истеъмолига эътибор қаратиш лозим.

Қарилик даврининг мизожи

Бу давр 60 ёшдан то умрнинг охиригача давом этади. Бу даврда раис аъзоларнинг қуввати заифлашган, баданнинг мизожи совуқлик ва куруқлик томонга силжиган бўлиб, аъзоларининг заифлик пайдо бўлади. Инсоннинг бадани кундан-кунга куриб, тана вазни камая боради. Хужайраларда емирилиш кучаяди. Қон-томирларда тикилмалар пайдо бўлишига, суяк системасида остеопороз ва остеоартрозлар кузатилиб, ҳазм қуввати кучсизланади. Бу даврда тери қуриydi, ёрилади ва экинлар тушади. Ақлий тафаккур пасаяди, тез чарчаيدиган, руҳият кучсизланиб, жахлдорлик, тез хафагарчилик юзага келади. Бу вақтда инсон арзимаган воқеаларга тез таъсирланади. Айнан шу даврдаги ўзгаришлар хусусида Қуръони каримнинг оятларида эслатма берилади.

Бутун оламлар Парвардигори инсон болаларига ота-онасига яхшилик қилишга, уларга кенгбағрли бўлишга, қалбига ботадиган, хафа қиладиган ишлардан тийилишга ва уларнинг ҳаққига чиройли дуолар қилишга буюради. Чунки бу даврда инсон ақлий тафаккури пасайиб, баъзи сўзларни қайта-қайта айтувчи ёки баъзи нарсаларда инжиқлик ва бошқа бир қатор ўзгаришларга учрайди. Бу даврда баданда қон-томир тикилмалари касалликлари, ҳазмсизлик, умуман мия, жигар, юрак ва ошқозон ишларида заифликлар юзага чиқади. Шу сабабли бу даврда озуқалар иссиқ ва ҳўл кайфиятли бўлиши, ҳазми осон ва латиф овқатлар, мева ва унинг сувлари, умумий қувватни оширувчи турли доривор гиёҳларнинг муттасил истеъмол қилиб туриш тавсия қилинади.

Юқорида айтиб ўтилган мизож ўзгаришлари нисбий бўлиб, ҳар бир баданда у ёки бу даражада акс этади. Инсон ҳаётининг ҳар бир давридаги мизожнинг ўзига хос хусусиятларини билиш инсон ҳаётининг ҳар бир даврида соғлиғини сақлашда, унга ташхис қўйиш ва даволаш чора-тадбирларини буюришда улкан аҳамият касб этади.

19-фасл. Аъзолар ва уларнинг мизожлари ҳақида

Жисмимиз(организм)нинг энг кичик таркибий қисми **ҳужайра** бўлиб, унда барча ҳаётӣй жараёнлар амалга ошади. Манашу ҳужайраларнинг йиғиндисидан **тўқималар** пайдо бўлади. Тўқималардан **аъзолар**. Аъзоларнинг йиғилишидан **тизим (система)лар** вужудга келади. Тизимлар бирлашиб, бутун **гавда (организм)**ни шакллантиради.

Аъзолар ҳақида “Тиб қонунлари”да шундай келтирилади: *“Хилтлар унсурларнинг дастлабки қўшилишларидан вужудга келувчи жисмлар бўлгани каби, аъзолар ҳам мақталган хилтларнинг дастлабки қўшилишларидан пайдо бўлувчи жисмлардир”*.

Демак, унсурлардан **озуқалар** пайдо бўлади. Озуқалар ба-
дан (организм)га тушгач, ошқозонда **каймусга**, ингичка ичак
ва мосариқо томирларида **хилусга**, жигарда **хилтга** айланади.
Хилтларнинг қуюқ жавҳар қисмидан **аъзолар** вужудга келади.

Аъзоларнинг асоси бир хил бўлса-да, улар ўзларининг ту-
зилишига кўра икки гуруҳга бўлинади:

1. Оддий аъзолар. Бунда аъзо бир хил тўқималардан ту-
зилган бўлиб, уларнинг ҳаммаси бир жинсли бўлади. “Тиб
қонунлари”да шундай келтирилади: *“Оддийлари шундай
аъзоларки, улардан қайси бўлақларни олсанг, исм ва таъриф-
да бутун аъзо билан бир хил бўлади. Масалан, гўшт ва гўшт
бўлақлари, суяк ва суяк бўлақлари”*.

Оддий аъзо раис аъзоларнинг бошқаруви остида хизмат
бажаради. Унинг тузилиши оддий, бир хил таркибда тузил-
ган бўлади. Унга суяк, тоғай, пай, гўшт, қон томир, соч, тир-
ноқ ва бошқалар киради.

2. Мураккаб аъзолар. Икки ёки ундан кўп оддий аъзо-
ларнинг қўшилишидан тузилган аъзолар бўлиб, на исмда, на
таърифда бутун аъзо билан бир хил бўлмайди. Масалан, қўл
ва юз; қўлнинг бўлаги қўл бўлмайди, юзнинг бўлаги юз бўл-
майди. Мураккаб аъзо қурол аъзолар деб ҳам аталади. “Қурол
аъзолар” дейилишига сабаб шуки, организм бу каби аъзолар
билан ўз фаолиятларини мукамал ва тугал бажаради. Унга
оёқ, кўз, қулоқ, лаб ва бошқалар киради.

Аъзоларнинг хизмат турига қараб бўлиниши:

- Раис аъзолар (бошқарувчи аъзолар – аъзои раиса).
- Хизмат қилувчи (ходимий) аъзолар.

Раис аъзолар шахс ёки турнинг сақланишига зарур бўл-
ган гавдадаги дастлабки қувватларнинг манбаларидир. Шахс-
ни сақловчи раис аъзолар учта:

- Юрак ҳаёт қувватининг келиб чиқиш ўрни;
- Мия сезги ва ҳаракатнинг келиб чиқиш ўрни;

- Жигар озиқлантириш қувватининг келиб чиқиш ўрни.

Турни сақловчи бошқарувчи (раис) аъзоларга мояклар киради.

Ибн Сино шундай дейди: *“Икки моякнинг зарурлиги шунинг учунки, улар наслни сақловчи эрлик уругини пайдо қилади; унинг фойдаси шундаки, улар эрлик ва хотинликнинг тугаллигини ва мизожини ифода қилади”*.

Хизмат қилувчи (ходимий) аъзолар ҳам иккига ажратилади:

- Тайёрловчи аъзолар. Бу раис аъзоларнинг ишидан олдин бўлади.

- Ўтказувчи аъзолар. Бу раис аъзонинг ишидан кейин келади.

Юракнинг тайёрловчи ходими ўпка бўлиб, ўтказувчи ходими артериялар хисобланади.

Миянинг тайёрловчи ходими жигар ва овқат ҳазм қилиш аъзолари, шунингдек руҳни сақлаш аъзолари бўлиб, ўтказувчи ходими асаб толаларидир.

Жигарнинг тайёрловчи ходими меъда бўлиб, ўтказувчи ходими веналар.

Икки моякнинг тайёрловчи ходими, ундан илгари эрлик уругини пайдо қилувчи аъзолар; ўтказувчи ходими эркакларда сийдик йўли ва уруғ йўллари. Аёлларда эса, ўтказувчи ходими бачадон бўйни, бачадон ва бачадон найидир.

Аъзоларнинг мизожлари ҳақида.

Тафаккур килинса, Аллоҳ Таоло борлиқ оламдаги барча нарсаларнинг ҳар бирига ўз имконияти ва аҳволига яраша мизож берганлигининг гувоҳи бўламиз. Инсон бошқа мавжудотлар ичида энг мўътадил мизожли қилиб яратилди. Шу сабабли ҳам бошқа мавжудотлар унга бўйсиндирилган.

Бу “мўътадиллик”нинг мустаҳкам бўлиши учун организмни ташкил қилган аъзоларнинг баъзиси иссиқроқ, баъзиси совуқроқ, баъзиси ҳўлроқ ва баъзиси қуруқроқ қилиб яратилган¹¹.

Вужудимиздаги **иссиқ мизожли аъзоларнинг** кетма-кетлиги:

1. Гавдадаги энг иссиқ нарса рух.

2. Юрак – рухнинг пайдо бўлиш ўрни.

3. Қон. У жигарда пайдо бўлса ҳам юрак билан боғлиқлиги учун жигарда йўқ бўлган иссиқликни у ердан олади.

4. Жигар, чунки у қотган қон кабидир.

5. Ўпка.

6. Гўшт. Гўштга совуқ мизожли бўлган нерв толалари келиб туташishi сабабли унинг иссиқлиги ўпканикидан камроқ.

7. Мушаклар – асаб томирлари ва бойлоқларнинг келиб туташуви сабабли иссиқликда оддий гўшtdан пастроқ.

8. Талоқ. Унда қон қуйкаси мавжуд.

9. Буйраклар. Унда қон кўп эмас.

10. Артериялар – қон ва рухнинг иссиқлигини қабул қилганлиги сабабли иссиқ бўлади.

11. Веналар – иссиқликни фақат қондан олади.

12. Тери;


13. Кафт териси.

Танадаги **совуқ мизожли аъзоларнинг** кетма-кетлиги:

1. Балғам;

2. Чарви;

¹¹ Инсонни қолган махлуқотлардан анча мукамал қилиб яратилганлик ҳикматлари жуда ҳам кўп бўлиб, ҳар қандай ҳолатда ҳам Аллоҳ Таолога ибодат учун яратилганмиз (21-расм).



21-расм. 25 та содда аъзоларнинг мизожлари

3. Ёғ;
4. Муй;
5. Суяк;
6. Тоғай;
7. Бойлоклар;
8. Пайлар;
9. Пардалар;

10. Асаблар;
11. Орқа мия;
12. Бош мия;
13. Тери.

Баданимиздаги ҳўл мизожли аъзоларнинг кетма-кетлиги:

1. Балғам. Унинг ҳўллиги кўпинча ҳўлланиб туриши сабабли қондан олдин келади.

2. Қон. Балғамнинг қонга айланиши натижасида ундаги ҳўлликнинг кўп қисми тарқалади.

3. Ёғ;
4. Чарви;
5. Бош мия;
6. Орқа мия;
7. Эмчак ва мойклар гўшти;

8. Ўпка. У энг иссиқ қондан озикланади. У қоннинг кўп қисмига сафро аралашган бўлади. Лекин баданда кўтарилиувчи буғлардан ва ўпкага оқиб келувчи назлалардан ўпкада кўп рутубат тўпланиб қолади. Ўпка жигарга нисбатан ҳўл мизожли бўлмаса-да, доимий ҳўлланиш унинг мизожини ўзгаришига сабаб бўлади¹².

9. Жигар. У туғма ҳўллиги туфайли ўпкадан ҳўлроқ бўлади.

10. Талок;
11. Буйрак;
12. Мушаклар;
13. Тери.

¹² Ҳар бир аъзонинг табиий мизожи у озикланадиган нарса мизожига ўхшаш бўлиб, ундан кейин пайдо бўладиган мизож эса, ўзида йиғилиб қолувчи нарсанинг мизожига ўхшайди.

Жисмимиздаги **қуруқ мизожли аъзолар**нинг кетма-кетлиги:

1. Мўйлар. Улар тутунли бугдан пайдо бўлиб, ундаги буг бўладиган хилти тарқалиб кетган, холис тутунлиги эса қотиб қолганидир.

2. Суяк. Чунки улар аъзолар ичида энг қаттиқ аъзо бўлиб, мўйдан ҳўлроқдир¹³. Суякнинг таркиби ва тузилиши қондан бўлиб, туғма ҳўлликларни шимувчи ва ўзлаштирувчи бўлади¹⁴.

3. Тоғай;
4. Бойлоқлар;
5. Пайлар;
6. Пардалар;
7. Артериялар;
8. Веналар;
9. Ҳаракатлантирувчи асаб толалари;
10. Юрак;
11. Сезувчи асаб толалари;
12. Тери.

20-фасл. Рухлар

Табиий ишларнинг бешинчиси рухлар бўлиб, инсон организмнинг таркибий қисмларидан бири ҳисобланади. Рух аъзоларнинг энг иссиғидир. Унинг инсон вужуди учун манфаати организмнинг ҳаётийлигини сақлашдан, зарурати эса танани барча қувватларини ҳаракатга келтиришдан иборат.

¹³ Кўп ҳайвонларга суяклар овқат бўлади. Мўй эса ҳайвонларнинг бирор тури учун ҳам овқат бўлмайди, ёки кам қисми учун овқат бўлади. Масалан, кўршапалаклар мўйни хазм қилишлари мумкин дейишади.

¹⁴ Суяк ва мўйни тенг миқдорда олиб, махсус идиш (қолба ва аламбик)да қатронласак, шу вақтда суякдан сув, ёғ кўпроқ оқади ва тагида озгина қуруқ чиқинди қолади.

Рух икки хил бўлади:

1. Самовий рух. Бу Аллоҳ Таолонинг ато қилган руҳидир. Унинг асл ҳақиқатидан шариат уламолари сукут сақлайдилар. У моҳиятини тушинтиришга тиришаётган замонавий билим эгаларини ожиз ва ночор қолдирадиган метафизик тушунча бўлиб, бу фақат илоҳий лутфдир. Аллоҳ Таоло Ал-Исро сурасининг 85-оятида: “Қулир-руҳу мин амри Роббий”, яъни “Айт руҳ Парвардигоримнинг ишидандир” деб марҳамат қилади. Демак, бунинг ҳақиқатини фақат Аллоҳ Таолонинг ўзигина билади.

2. Рухи унсурий. Бу биз табобатда ўрганаётган руҳдир. У тўртта унсурдан бир неча ўзгаришлардан кейин ҳосил бўлади. Чунончи, тоза латиф хилтларнинг буг қисмларининг умумий номи руҳдир. Ўпкада кислородга тўйинган хилтлар юракка қараб ҳаракатланади ва у ерда яна етилиб, пишиб, энг майда латиф бўлакларга айланади. Унинг баъзи қисмлари гўё сувнинг буғидек буг холига келиб, ажраб чиқади. Ва мана шу “буг қисмлари” (ажзойи бухорийя) руҳ дейилади. Яъни, рух хилтларнинг энг латиф ва бугли қисмларини баданга қабул қилинган кислород билан бирикишидан ҳосил бўлган *сийрак ҳаво ҳолатдаги* ҳаракатчан моддадир. Демак, рух хилтлардан ҳосил бўлсада, уни ҳар қандай асбоб билан кўриш имконияти мавжуд эмас.

Латиф таомларнинг истеъмолидан рух қувватланади ва очликдан заифлашади. Унинг озиклантирувчиси ҳам, роҳатлантирувчиси ҳам ҳаво ва яхши ҳидлардир.

Табибларнинг фикрича, жигар биринчи хил туғилишнинг манбаи бўлганидек, юрак иккинчи туғилишнинг манбаидир.

Табибларнинг наздида руҳнинг ҳаракатига қувват сабаб бўлади. Чунки қувват руҳнинг кайфиятидир. Яъни, унинг сифати ҳисобланади. Демак, организмнинг бирор қисмини

қувватлантириш керак бўлса, руҳ билан бирга қувватга кири-тилади. Яъни, руҳ билан қувватнинг ҳар иккиси бир-бирига сабабдир.

Руҳ қувватнинг фоъили ва қувват руҳнинг ташувчиси (ҳомили). Бу маънони яхшироқ англаш учун мисол келтириш лозим деб топдик. Масалан, отга минган чавандоз оёғи ва бошқа сабаблар билан туртки бериб отни юргизади, от эса одамни бир манзилдан бошқа жойга олиб боради. Бу мисолда одам отнинг фоъили, от эса чавандознинг ташувчиси (ҳомили)дир. Қувват ва руҳнинг муносабати ҳам шу кабидир.

Ҳаётнинг асоси бўлган ҳайвоний ёки ҳаётӣ руҳ қон билан аралашган бўлсада, лекин у билан боғланмасдан, танада инсоннинг бутун ҳаёти давомида узлуксиз равишда айланиб туради.

Энди руҳнинг уч қисмга бўлиниши ҳақида. Каймус ҳазмида овқатнинг жавҳари етилиб, қон, сафро, балғамга ажрагани каби, руҳ ҳам юракда етилганида ғоятда латиф ёки мўътадил, ёхуд латофати камроқ бўлиш эътибори билан уч қисм бўлади:

1. Руҳи нафсонӣ руҳнинг ғоятда латиф қисми бўлиб, у мияга боради. Мия мизожининг совуқ ва ҳўл бўлишига мос равишда руҳнинг латиф ва иссиқ бўлиши шартдир. Сабаби, мураккаб ва нозик масалаларни идрок қилиш, унинг маъноларини англаш, унга мос ҳолатда мушак ва аъзоларни ҳаракатга келтириш учун ниҳоятда латиф бўлиши муносибдир.

2. Руҳи табиӣ (табиӣ руҳ) руҳнинг мўътадил қисмидир. Бу руҳнинг жигарга боришининг муносиблиги шундаки, агар ғализроқ руҳ борса эди, жигардаги каймус жавҳарини ҳазм қилиб, ундан бир неча хил табиӣ қувватлар ҳосил қилиб, тегишли аъзоларга турли хизматлар қилдириб туриш учун унинг ҳарорати ва латофати етарли бўлмас эди. Шунингдек, руҳнинг ўта латифроғи борса эди, жигарнинг ҳарорати билан

хилтнинг ҳароратидан таъсирланиб, қизиб кетар эди. Унда ҳаво билан совитиб турувчи ўпка каби аъзо бўлмагани сабаб-ли ҳалок бўлар эди.


3. Руҳи ҳайвонӣ (ҳаётӣ руҳ) руҳнинг ҳаммадан хомроқ ва ғализроғи бўлиб, у юракда қолади. Сабаби, хом руҳ гўёки балғам пишиб қон бўлгани каби, юракнинг ҳаракати ва ҳарорати билан хом руҳ пишади ва латифлашади. Ҳатто юракнинг ҳароратига ва ҳаракатига тоқат қилолмайди ва доимо ўпка ёрдамида кислород билан совуб туришга муҳтож бўлади. Агар юракда руҳнинг латифроғи қолса эди, юракнинг ҳароратига асло чидай олмас ва унинг учун ҳавонинг ёрдами етарли бўлмас эди.

Мазкур уч қисм руҳ учта раис аъзолардан бутун танага ўзининг махсус йўллари орқали таралиб, қувват етказиб туради. Масалан, миядаги нафсонӣ руҳ асаб толалари орқали аъзоларга етиб боради. Яъни, шу йўл билан аъзоларга ҳис ва ҳаракат учун қувват бориб туради. Юракдаги ҳайвонӣ руҳ артериялар ёрдамида баданга таралиб, бутун вужудга ҳайвонӣ қувват бериб туради. Жигардаги табиӣ руҳ вена томирилар воситасида барча аъзоларга таралиб, озуқа учун табиӣ қувват бериб туради.

21-фасл. Қувватлар

Ҳаётӣ руҳнинг раис аъзоларнинг мизожини қабул қилиб, сифати ўзгариши натижасида, шу аъзоларга таъсир кўрсатишга лаёқатлиги сабабли, бу аъзоларда маълум фаолият бажарувчи таъсирга қувват дейилади (22-расм).

Руҳ ва қувват тушунчасини англаш учун яна бир мисол келтиришни лозим топдик. Ўрик дарахти униб чиқиш ва мева бериши учун унинг данаги ерга экилади. Ўрик дана-




22-расм. Тўрт қувват, уларнинг пайдо бўлиш ва асосий жойлашиш ўрни.

гининг пўсти “рух” бўлса, унинг ичидаги мағзи эса “қувват”дир. Бунда ўрик данагининг пўсти ёки мағзисиз униб чиқмаганидек, рух ва қувват бир-бирисиз фаолият юргиза олмайди.

Тиб манбаларида қувватлар ҳам худди рухлар каби уч қисмдан иборат эканлиги келтирилади:

1. Табиий қувват (қувваи табиийя).
2. Ҳаётӣй қувват (қувваи хайвонӣйя).
3. Нафсонӣй қувват (қувваи нафсонӣй).

Биз ушбу китобда қувватларнинг фақатгина табиий тури билан қўлдан келганча таништириб ўтамиз (23-расм).



23-расм. Қувватлар чизмаси.

22-фасл. Табиий қувватлар

Табиий қувватлар вужудимиздаги барча модда алмашинуви (метаболик) жараёнларни бошқаради. У икки турга бўлинади:

- I. Хизмат қилувчи (қувваи ходима).
- II. Хизмат қилинувчи (қувваи махдума).

I. Хизмат қилувчи (ходима) қувватлар тўрт қисмга бўлинади:

1. Тортувчи қувват (қувваи жозиба).
2. Ушлаб турувчи қувват (қувваи мосика).
3. Ҳазм қилувчи қувват (қувваи ҳозима).
4. Ҳайдовчи қувват (қувваи дофиъа).

Энди ушбу тўрт қувват билан алоҳида танишиб чиқсак.

1. Тортувчи қувват (қувваи жозиба). Бу қувват танани барча тўқималарида мавжуд. Масалан, меъда тортувчи қуввати билан оғиздаги луқмани ютиш орқали тортади. Кейин жигар, буйрак, қовуқ, талок, юрак каби аъзолар кетма-кетликда фаолият олиб боради. Ҳужайра ва тўқималар ўз тириклиги ва вазифа (функция)ларини таъминлаб туриши учун тортувчи қувват ёрдамида ўзига керакли моддаларни тортиб олади.

2. Ушлаб турувчи қувват (қувваи мосика). Ўзига фойдали озуканинг ўзида ушлаб, сақлаб турувчи қувват бўлиб, у ҳам барча аъзоларда мавжуддир. Бу қувват ёрдамида куйидаги жараёнлар амалга ошади:

- Ҳазм жойи бўлган аъзоларда масалан, ошқозон, жигар, вена ва артерия қон томирлари, ичак, ўт қопи, талок, буйрак, қовуқ ва бошқа аъзоларда бўлган озукани тамомий ҳазм бўлгунча тўхтатиб туриш.

- Аъзо ва тўқималарда бўлган нарсани тозалаб суви, чиқиндисини ва ёғини ажратиб бўлгунча сақлаб туриш.

- Аъзо ва тўқималарда захира қилинган моддаларни керак пайтгача сақлаб туриш.

3. Ҳазм қилувчи қувват (қувваи ҳозима). Бу қувват фақат меъда, жигар, ингичка ичак, вена ва артерияларда бўлиб, бошқа аъзоларда бўлмайди. Болалар неврологи, нейро-жарроҳ Фахрулло Файзуллаевнинг билдиришича, бу қувват ҳужайра ичида ҳам бўлади.

4. Ҳайдовчи қувват (қуввати дофиъа). Бу қувват ҳам барча аъзоларда мавжуд. Бу қувват ёрдамида куйидаги жараёнлар амалга ошади:

- Овқат ҳазм бўлганидан сўнг, ундан маълум бир жавҳар ҳосил бўлади. Аъзолар ўзларида турган ўша жавҳарни бошқа муносиб ёки муҳтож аъзога юборади ва бу билан ҳайдаш вазифа (функция)сини амалга оширади.

- Тўқима ва ҳужайраларда ўзлари учун кераксиз чиқиндилар пайдо бўлганида уларни чиқариб ташлайди.

Ошқозон каймусдан сўнг, ўзидаги тоза жавҳарни жигарга, ёғни чарвига, сувни буйракка ҳайдайди. Жигар ҳам ўзида ҳосил бўлган хилтларнинг кўпик қисмини ўтга, дурдаси (қолдиғи)ни талокқа, суюғини буйракка ва тоза жавҳарини қон томирларига ҳайдайди. Буйрак ўзига келган сувни тозалайдиган сўнг, ёғини чарвига, сувини қовуққа, қовуқ эса ташқарига ҳайдайди.

Ўт ва талок ҳам меъда муҳтож бўлган вақтида ўзларидаги сафро ва савдодан керакли микдорини меъдага ҳайдайди.

Аъзолар ўзларида ҳосил бўлган чиқиндиларни ўзларидан ҳайдайдилар. Масалан, ўпка балғамни йўталиб даф қилади, миёя назлани аксириш орқали ҳайдайди. Бошқа аъзолар ҳам

тер, кир ёки жароҳатлар кўринишида чиқиндиларни чиқаради.

II. Хизмат қилинувчи (махдума) қувватлар ҳам иккига бўлинади:

1. Шахсга ғизо учун ишлагувчи қувват. Бу тана (организм)ни сақлаш ва барча метаболик жараёнларни тартибга солувчи қувватдир. У инсон туғилганидан ўсиш даври тамом бўлгунига қадар унинг ўсишига ёрдам беради ва жисм умрининг охиригача шу қувват ёрдамида озикланади. Бу қувватнинг турадиган ўрни ва таъсирининг пайдо бўладиган ери жигардир.

Шахснинг боқийлиги учун озуқа ишлайдиган бу қувват ҳам ўз навбатида иккига бўлинади:

А) Озиклантирувчи қувват (қувваи ғозия).

Б) Ўстирувчи қувват (қувваи номийя).

А) Озиклантирувчи қувват (қувваи ғозия). У ҳазм қилувчи қувватлардан ҳосил бўлган жавҳарни баданга (аъзога) ўхшаш ҳолга келтирувчи қувватдир. Бу қувват барча хужайра ва тўқималарда бўлади.

Тўртта ходим қувватлар: тортувчи, тутувчи, ҳазм қилувчи, ва ҳайдовчилар озиклантирувчи қувватнинг ходимлари бўлиб, улар таомни озиклантирувчи қувватнинг тасарруфи учун қобил даражага етказиб, ҳазм қилиб берувчилар ҳисобланади.

Ҳар бир хужайра ва тўқимани ўзининг алоҳида озиклантирувчи қуввати бўлиб, фақат шу аъзога керак бўлган озикнигина тасарруф қилади. Яъни, бир аъзо учун ажратилган озуқа бошқа аъзога сарф бўлмайди. Гўшт учун қобил бўлган озуқа пай учун сарф бўлмайди. Аммо, фақатгина жигарнинг озиклантирувчи қуввати барча аъзонинг озиклантирувчи қувватига мутаносиб ва муштаракдир. Чунки жигарнинг

озиклантирувчи қуввати озикнинг жавҳарини қонга кўшади. Қон эса ҳар қандай аъзо учун зарурдир. Демак, озиклантирувчи қувват ҳазмнинг иккинчи ва учинчи босқичида озуқани мизожда, рангда ва жавҳарда аъзога ўхшаш қилиб ишлаб беради.

Озиклантирувчи қувватнинг таъсири икки қисм бўлади:

- Қобил озуқани бутун вужуд(организм)га узликсиз етказиб бериш.

- Шу етказилган жавҳарни бадан аъзосига ўхшатиш.

Демак, озиклантирувчи қувватнинг биринчи даражадаги ишида нуқсон бўлса, гўштсимон истиско (истискойи лаҳмий) пайдо бўлади. Иккинчи даражали ишида нуқсон пайдо бўлса, барас (пес) ва баҳақ (тери оқи) ҳасталиги пайдо бўлади.

Етказилган озуқалар жавҳарини бадан аъзосига ўхшатиш гўртинчи ҳазмда бўлиб, бу хужайра ва тўқималарда бўлади. Бунда озиклантирувчи қувватга ота-онадан ўтган туғма (ирсий) қувват ҳам ёрдам беради. Бироқ бу ирсий қувват 35-40 енгача сақланиб, ундан сўнг асосий қувват манбаи озик-овқат ва кислород ҳисобланади. Демак, “ёшлик даври” тугагандан сўнг инсондан мизожига мос равишда ҳаётини тўғри шакллантириши талаб этилади. Чунки туғма иссиқлик камайиб, мизож совуқлик томонга қараб силжийди.

2. Навга ғизо учун ишлагувчи қувват. Насл қолдиришга озик тайёрловчи қувват бўлиб, нави сақлаш ва кўпайиш наифасини бажаради. Хилтлардан уруғ моддасини ажратиб олиб, унга Яратувчининг изни билан шакл беради. Бу қувват ҳам ўзининг турадиган ўрни ва таъсир манбаига қараб иккига бўлинади:

А) Туғдирувчи қувват (қувваи муваллида).

Б) Шаклга келтирувчи (қувваи мусаввира).

Хулоса: Юқорида биз табиий қувватлар билан танишиб
чикдик ва уларнинг саккиз турга бўлинишини ўргандик. Са-
наб ўтилган саккиз қувватларнинг асл манбаи жигар бўлиб,
машғул бўладиган жойлари ҳар хил аъзолардир.



2-ҚИСМ

ОЛТИ ЗАРУРИЙ ОМИЛ

(ситтаи зарурия)

1-фасл. Бадан аҳволини муҳофаза қилувчи ва ўзгартирувчи олти зарурий омиллар

Билиш керакки, ҳифзи сиҳҳат – соғлиқни сақлаш илмининг вазифаси киши мизожига қарама-қарши нарсаларининг истеъмоли орқали табиий ажал деб аталмиш кунга соғлом ҳолатда етказишдан иборат¹⁵.

Инсоният пайдо бўлибдики, соғлом яшашни, жасадини офиятда бўлишини хоҳлайди ва шу йўлда доимий изланишлар олиб боради. Инсон дунёга келган кундан бошлаб, то умрининг охиригача (табиий ўлимигача) танасида куруклик камайиб боради. Табиий қуриш тугагач, ўлим содир бўлади. Аммо бу ҳўлликнинг йўқолиши табиий бўлиб, ўрни истеъмол қилинадиган маҳсулотлар ва ичимликлар билан тўлдириб турилади. Инсоннинг танасидаги табиий қуриш ирсий-табиий тана ҳарорати ўз ўрнини орттирилган (ҳаётий-табиий) тана ҳароратига берган кундан бошланади. Яъни, бу вақт инсоннинг ёшлик даври тугаб, қисман қувват бўла туриб чўкиш даврига ўтиш кунидан бошланади.

Захирадаги ирсий-табиий ҳарорат тугаб, ҳар кунлик олинаётган озукадан ва ҳаводан шаклланаётган ҳаётий-табиий тана ҳарорати ҳисобидан инсон танасида моддалар алмашинуви жараёни кечади.

Аммо, шахс томонидан тибнинг тиббий манбаларидан нотўғри фойдаланиш, носоғлом турмуш тарзи ва бошқа омиллар таъсирида танадаги қуриш жараёнлари тезлашиб, натижада инсон касаллик сари юзланиб, ажал чегарасига юқори жадалликда етиб келади.

Инсон туғилгандан то вафот этгунгача унга зарурий ва зарурий бўлмаган омиллар ўз таъсирини ўтказади. Зарурий

¹⁵ “Тиб қонунлари” 1-китоб, “Қонуни Боситий” 2-китоб.

бўлганлари тиб китобларида “олти зарурий омил”, яъни “ситтаи зарурия” деб номланади. Улар китобнинг “Тиб илмининг қисмлари” фаслида санаб ўтилди (24-расмга қаранг). Ҳозир эса, улар ҳақида қисқача гапириб ўтамыз.

2-фасл. 1-зарурий омил: тоза ҳаво

Бу омил ҳақида ёзишдан аввал “Тиб қонунлари”нинг соҳиби йил фасллари ҳақида бир неча фасл келтирадилар. Улар бевосита ҳаво омилга боғлиқ бўлганлиги сабабли, биз ҳам Ибн Сино ҳазратларининг йўлини тутиб ўша фаслларни келтириб, бироз изоҳ бериб кетамиз.

3-фасл. Фаслларнинг мизожи

Табиат ва ундаги борлиқ жонли ва жонсиз мавжудотларнинг ўзига хос кайфияти (мизожи) бўлади. Уларнинг мизожи тўрт унсур асосида шаклланган. Яъни, дунёдаги барча жисмлар ўзида мавжуд бўлган ёки табиатдаги ҳар хил таби-



24-расм. Олти зарурий омил (ситтаи зарурия).

ий манбалардан келган ҳаракат ва кувватлардан ҳар дақиқада иссиқлик, совуқлик, ҳўллик ва қуруқликни қабул қилиб туради. Буларнинг бир-бирига таъсиридан янги кайфият (мизож) шаклланади.

Шу сингари, ҳар бир фаслнинг ўзига хос кайфияти бўлади ва бу кайфиятлар фаслларнинг ўзгаришига эргашган ҳолда ўзгариб туради. Тиб илмида ҳам худди табиат илмидаги каби фаслларни тўртга: баҳор, ёз, куз ва қишга ажратилади. Бу хил ажратиш етти иқлимнинг ҳар бирида бир-биридан фарк қилиши мумкин. Иқлимшунослик илмида кетма-кет беш кун ичидаги ўртача ҳаво ҳароратига асосланиб тўрт фасл ажратилади. Ҳаво ҳарорати 22°C дан юқори бўлган пайт ёз фасли деб ажратилса, ҳарорат 10°C дан паст бўлган вақт қиш фасли, қиш билан ёз фасли оралиғидаги вақт баҳор фасли, ёз фасли билан қиш фасли оралиғидаги вақт куз фаслларига ажратилади.

Ер куррасининг қуёш атрофида айланиши натижасида тўрт фасл мунтазам тартиб бўйича алмашилиб туради. Коинотшуносликдаги бўлиш усули бўйича, қуёш нурининг ер юзига тушиш бурчагининг ўзгаришига асосан тўрт фасл ва унинг кайфиятини ажратиш мумкин (25-расм).


Ибн Сино ҳазратлари “Тиб қонунлари”да шундай ёзади: “Билгил, табибларча йил фасллари коинотшунослар тушунган йил фаслларида бошқадир. Чунки уларнинг ўлчамича, тўрт фасл қуёшнинг буржлар фалагининг баҳорги (кеча-кундуз баробарлиги) нуқтасидан бошлаб, бир чорагидан бошқа чорагига ўтиш замонларидир.

Аммо табибларча, баҳор шундай бир замонки, мўътадил иқлимли мамлакатларда совуқдан сақланишга аҳамият бериб исинишга ёки иссиқдан сақланиб салқинланишга ҳоҷат тушмайди. Бунда дарахтлар амал қилишга бошлайди. Баҳор даври кеча-кундуз баробарлигидан ёки ундан бироз олдин ё

кейин боиланиб, қуёш то Савр буржининг ярмига келгунигача давом этади.

Куз бизнинг мамлакатларга ўхшаиш мамлакатларда баҳор вақтига мос келади. Бошқа мамлакатларда баҳор биздагидан олдин ва куз кейин бўлиши мумкин. Иссиқ даврнинг ҳаммаси ёз ва совуқ даврнинг ҳаммаси қиш деб аталади.

Табиблар наздида баҳор ва куз даврларининг ҳар бири ёз ва қиш даврларининг ҳар биридан қисқароқ бўлади. Қиш дав-



25-расм. Фасллар ва буржлар.

ри ёз даврига муқобил бўлади ёки мамлакатига қараб камроқ ё кўпроқ бўлади.

Баҳор даври мевали дарахтларнинг гуллаши ва мевасини кўрсатиш вақтига, куз даври эса дарахт баргларининг ранги ўзгариб, тўкилиш вақтига ўхшайди. Булардан бошқаси қиш ва ёздир.

Биз айтамиз, баҳорнинг мизожси мўътадил мизождир. Гумон қилинганча иссиқ ва ҳўл эмасдир. Бунини ҳақиқати билан текшириш ҳикмат илмининг табиат қисмига оиддир. Баҳорни шак-шубҳасиз мўътадил фасл деб ҳисоблайлик.

Ёз қуёш қиёмга яқин бўлгани учун иссиқ ва қуруқдир. Қуёшдан келган нурларнинг кучли бўлиши, уларнинг келиши чизиклари билан акс этилиши чизиклари ораларидаги бурчакларнинг жуда тор бўлиши ёки бурчак ясамасдан, орқага қайтишлари туфайлидир. Ёз иссиқ бўлиши билан бир қаторда, кучли иссиқлик сабабли ҳўлликнинг буғланишидан, ҳавонинг моддаси сийракланиб, олов табиатига ўхшашидан ва шудринг кам тушиб, ёмғир кам ёғишидан қуруқ ҳам бўлади.

Қиш эса юқорида айтилган сабабларнинг зидди бўлгани жиҳатидан, совуқ ва ҳўл бўлади.

Кузда эса иссиқлик камаяди, аммо совуқлик хали кучаймаган бўлади. Йилнинг бу пайтида биз, узоқлик жиҳатидан юқорида айтилган ўқ билан атроф оралигининг ўрталигида туриб қолгандай бўламиз. Шунинг учун куз иссиқлик ва совуқликда мўътадилликка яқин бўлиб, ҳўллик ва қуруқликда мўътадил бўлмайди. Нега шундай бўлмасинки (шундай бўлиши керак), агар қуёш ҳавони қуритиб, қуритувчи омилларнинг қуритиш таъсирига қарши турадиган ҳўлловчи омилларни тугдирмаган бўлса. Совутиш ҳолати ҳўллаш ҳолатидай эмас. Чунки совуқликка айлантириш энгиллик билан бўлиб, ҳўлликка айлантириш бундай энгиллик билан бўлмайди...”

4-фасл. Йил фаслларининг ҳукмлари ва ўзгаришлари ҳақида

Ибн Сино ҳазрат шундай давом этадилар: “...ҳаво мизожларининг чиритиб саситишига яқинроғи иссиқ ва ҳўл мизождир. Ҳавонинг ўзгариши кўпинча сатҳи текис бўлмаган жойларда ва чуқурликларда содир бўлади. Текис ерларда, айниқса, баландликларда бундай ҳолат кам учрайди.

Йил фасллари ўзларига лозим бўлган хусусиятлари билан келишлари керак. Яъни, ёзнинг иссиқ бўлиши, қишнинг совуқ бўлиши ва шунингдек, бошқа фаслларнинг ҳам ўзига хос бўлиши каби. Агар бу бузилса, касалликларга сабаб бўлади.

Фасллари доимо бир турли кайфиятда бўлган йил ёмон йилдир! Масалан, йилнинг ҳамма фасллари ҳўл ва қуруқ, иссиқ ёхуд совуқ бўлса, бундай йилларда ўз кайфиятларига муносиб касалликлар кўп бўлади ва бу касалликларнинг муддатлари ҳам узун бўлади. Ҳатто бир фасл ўзига муносиб касалликлар қўзғатса, нимага бир бутун йил касалликларни қўзғатмасин? Масалан, совуқ фасл балғам мизожли гавдага таъсир қилиб, тутқаноқ, фалаж, сакта, юз асабларининг фалажси, тортишиш ва шунга ўхшаш касалликларга олиб боради.

Иссиқ фасл саффо мизож гавдага таъсир қилиб, руҳий хасталик, ўткир иситма ва иссиқ шишларни келтириб чиқаради. Агар бутун йил бир фасл табиатига ўхшаса, бу тўғрида нима ҳам дейиш мумкин?

Агар қиш ўз вақтидан илгари келса, қишки касалликлар ҳам аввалроқ бошланади. Агар ёз вақтлуроқ келса, ёзги касалликлар ҳам вақтлуроқ бошланади ва аввалда бўлган касалликлар шу фасл ҳукми билан ўзгарадилар. Агар бирор фасл узайиб кетса, тегишли касалликлар кўпаяди, айниқса, ёз ва куз фаслларида.

Билгинки, бир фаслдан иккинчи бир фаслга ўтишида бир таъсир юз беради. Лекин бу даврдан келмайди. Чунки давр бир вақтдир. Балки у билан бирга бўлган кайфиятдан келади. Ҳолларнинг ўзгаришларида бунинг буюк таъсири бордир. Шунингдек, агар ҳаво бир кунда иссиқдан совуққа айланса, гавда соғлигининг ўзгаришига, албатта шу сабаб бўлади.

Энг соғлом вақт, кузнинг ёмғирли ва қишининг ўта совуқ бўлмасдан шу мамлакатга хос мўътадил даражада совуқ бўлишидир. Агар баҳор ёмғирли бўлиб, ёз ҳам ёмғирдан холи бўлмаса, бу энг соғлом фаслдир”.

5-фасл. Яхши ҳаво ҳақида

Олти зарур шартнинг биринчиси ҳаво бўлиб, у инсонни ўраб туради. Қолган беш зарурий нарсаса нисбатан ҳавога эҳтиёж кучлироқдир. Билмоқ керакки, ҳавога эҳтиёжимиз доимийдир. Бир дақиқа ҳам ҳавосиз тура олмаслигимиз барчамизга сир эмас. Ҳаводаги килород оркали бутун танамиз нафас олади ва вужуд (организм)даги барча жараёнлар бево-сита килород билан боғлиқдир.

Ибн Сино ҳазратлари шундай ёзадилар: “Моддаси билан яхши ҳаво ҳеч бир буг ва тутун каби ёт нарсалар аралашмаган ҳаводир. Бу осмон тагидаги очиқ ҳаво бўлиб, девор ва томлар ичида беркилган бўлмайди...”

Бу яхши ҳаво тоза ва тиниқ бўлиб, унга пастлик, чуқурлик, чакалакзор, ботқоқ ерлар ва полизлардан, айниқса, қарам ва индов ўсимлиги экилган ерлардан кўтарилган сув буглари аралашмаган, айниқса қалин дарахтзорлар, айниқса ёнғоқ, шавҳат, анжир каби моддалари ёмон бўлган дарахтлар [ўсган жойдан] кўтарилган сув буглари ва сассиқ ҳидли еллар аралашмаган бўлади...

Ҳаво ўзгаришларининг баъзилари табиий, баъзилари гайритабиий ва баъзилари табиий ҳам эмас, табиийликдан ташқари ҳам эмаслигини билдинг...

Йил фаслларининг энг соғлом бўлишлари ўз табиатларига мувофиқ бўлишидадир. У табиатнинг ўзгариши эса, касалликларни тугдиради”.

6-фасл. Ҳаво турларининг таъсири

Ибн Сино ҳазратлари ўз сўзларида бундай давом этадилар: “Иссиқ ҳаво эритиб тарқатади. Агар иссиқлик фаслга хос мўътадил бўлса, тери рангини қизартиради. Агар иссиқлик ҳаддан ортса, ранги саргайтиради, терлашни кучайтириб, сийдикни камайтиради [ёз фаслига ўхшаб], ҳазмни заифлаштиради ва чанқашни кучайтиради.

Совуқ ҳаво ҳазмни мустаҳкамлаб кучайтиради”. Тер тешиклари зичлашиб, ташқарига тер ажраши камайиши ҳисобига сийдик кўпаяди. Ич қотишга мойиллик кучаяди.

Ибн Сино яна ёзадилар: “Ҳўл ҳаво терини юмшатиб, гавдани ҳўллайди; қуруқ ҳаво терини ҳам, гавдани ҳам қурилади. Тўзонли ҳаво нафсга гам беради ва хилтларни қўзғатади”.

Ҳаводаги ўзгаришлар унинг жавҳаридаги ёки унинг сифатидаги ўзгаришларни ўз ичига олади.

Жавҳаридаги ўзгариш шундай ўзгаришки, бу унинг унсур (элемент)ларидаги ўзгаришдир. Бу ҳолат вабо (юкумли касаллик), грипп ва шунга ўхшаш ҳаво томчи йўли билан юкувчи касаллик қўзғатувчиларнинг ҳаводаги микдорининг ортиши билан кечади. Натижада инсонларнинг касалланиш эҳтимоллиги юқори даражада ортади.

Сифатидаги ўзгаришлар шундай ўзгаришки, ҳаво чидаб бўлмас даражада иссийди ёки чидаб бўлмас даражада совуб кетади. Натижада ўсимлик ва ҳайвон жинслари ҳалок бўлади.

Инсонларда эса, ўта исиш окибатида намлик тарқалади, бўғимлар бўшаши, одам ҳолсизланади, ҳазм заифлашади, тери ранги сарғайиб сафро ортади. Ўта киздириши туфайли хилтлар эриб оқади, юрак ҳолсизланади, соғлом инсонларга азият етказади. Лекин, баъзан истиксо (асцит), фалаж, полиартрит, совуқ назла, умуман олганда совуқликни ортиши билан касалланган инсонларга фойда қилиши мумкин.

Ўта совуқ ҳаво туғма ҳароратни пасайтиради. Ҳатто ўлимга олиб боради. Ҳаддан ташқари совуқ бўлмаган ҳаво хилтларни қамаб қўяди. Лекин назлалар пайдо қилади, асабларни заифлаштиради, нафас йўлларига зарар етказади.

Намли ҳаво терини намлайди, юз рангини яхшилайди. Қуруқ ҳаво эса, бунинг акси ҳисобланади.

7-фасл. Баҳор фаслининг мизожи

Ибн Сино ҳазратлари “Тиб конунлари”да бу ҳақида шундай ёзади: “Баҳор ўз мизожида бўлса, йил фаслининг энг яхшиси ҳисобланади. У руҳ ва қон мизожига муносиб келади ва биз юқорида айтганимиздек, у баҳор, ўзининг мўътадиллиги билан тезда осмоннинг енгил иссиқлигига ва табиий намликка айланади. Баҳор юз рангини қизартиради, чунки у қонни, жуда иссиқ ёзнинг эритиб тарқатиши даражасига етказмасдан, мўътадиллик билан тортади. Баҳорда узоққа чўзиладиган касалликлар қўзғалади. Чунки баҳор туриб қолган хилтларни юргизиб оқизади. Шу сабабдан меланхолия касаллиги бор одамларда бу касаллик қўзғалади. Қишда таомни кўп еб, кам ҳаракат қилганларидан хилтлари кўпайган кишилар баҳорнинг эритиб тарқатиши сабабли шу моддалардан қўзғаладиган касалликларга йўлиқувчан бўладилар. Агар баҳор, мўътадил бўлиб тургани ҳолда, чўзилиб кетса, ёз касалликлари камаяди.

Баҳор касалликлари қуйидагилар: ичдан қон ўтиши, бурун қонаши, сафро табиатида бўлган меланхолиянинг қўзғалиши, шишлар, йирингли шишлар, томоқ оғриқлари – булар ўлдирувчидир ва бошқа чиқиқлар. Баҳорда кўпинча томирларнинг ёрилиши қон тупуриши ва йўтал бўлади. Бу нарса айниқса, қиш сифатида бўлган баҳорда бўлади. Шу касалликларга, хусусан сил касаллигига дучор бўлган одамларнинг аҳволлари баҳорда ёмонлашади.

Баҳор балғам мизожли кишиларда балғам моддасини қўзғатгани сабабли сакта, фалаж ва бўгин оғриқлари касалликларини келтириб чиқаради. Бу касалликларга дучор қилувчи нарсалар: ортиқ даражада бўлган жисмоний ва нафсоний ҳаракат ва қиздирувчи нарсаларни истеъмол қилиш ва бошқалар. Уларнинг ҳар иккиси ҳавонинг табиатиға ёрдам беради.

Ҳеч бир нарса қон олдириш, гавдани бўшатиш, кам ейиш, ичимликни кўп ичиш, маст қиладиган шаробларга сув қўшиб, кучини синдириб ичиш чоралари каби баҳор касалликларидан қутқара олмайди.

Баҳор болаларга ва ёш жижҳатдан болаларга яқин бўлган кишиларга мувофиқ келади”.

Бу фаслда ер юзига қуёш нурининг тушиш бурчаги катталашиб боради. Қуёшдан ерга тараладиган иссиқлик қуввати жонланади. Лекин бу қувват атмосфера юқори катламидан пастлашиб тушган кўп миқдордаги сув буғини сийраклаштириб, атмосфера юқори катламига чиқариш даражасига етмаганлиги сабабли, ер юзи маълум даражада исийди.

Аммо ҳўллик кайфияти мавжуд бўлади. Натижада ер юзи ҳавосининг кайфияти бу фаслда мўътадил бўлиб ифодаланади. Бу хил кайфият одам вужудига таъсир қилиб, баданда ҳўл-иссиқ кайфият ғолиб келганда, у бадандаги қон-томирларини кенгайтириб, қон томирларидаги суюқликнинг оқиш

суратини жадаллаштириб, хужайраларнинг модда алмаштириш фаолиятини кучайтириб, кон томирлар деворларининг ўтказувчанлигини ошириб, қоннинг тўқималар оралиғига кириш ҳолати кучаяди ва қондаги кислород сарфини кўпайтиради. Бунда оксидланган гемоглобин камайиб, оксидланмаган гемоглобин кўпайиб, юрак кон-томир касалликлари ва тери касалликлари юз бериши учун шароит туғилади. Шу сабабли бу вақтда қонни қайнатиш ва бузиш таъсири бўлган нарсалардан парҳез тутиб, қоннинг совитиш, тозалаш хусусияти бўлган дори ва озиқ-овқат маҳсулотларини, жумладан, чилонжийда, шотара, коснин [сачратки] арақисини, чилон шарбати, матбухи афтимун кабиларни кўплаб истеъмол қилиш лозим.

Баҳор фасли қонни кўпайтиради ва қонга оид касалликлар юзага чиқади. Ҳар хил яраларни пайдо қилади. Бироқ бу касалликларнинг кўп пайдо қилиши унинг ярамас ва ёмонлигидан эмас, балки вужудда йиғилиб қолган хилтларни эритиб тарқатишидадир.

8-фасл. Ёз фаслининг мизожи

Ҳазрати Ибн Сино “Тиб қонунлари”да бундай ёзадилар: “Ёз фасли хилтларни ҳаддан ташиқари кўп эритиб, тарқатиб, қувват ва табиий таъсирларни заифлаштиради. Ёзда қон ва балғам камаяди. Ёз бошида саффо кўпайиб, сўнгра охирида ўтнинг суюқ моддаси тарқалиб, қуюғи тўпланганлиги сабабли, савдо кўпаяди. Қариларни ва уларга яқин бўлганларнинг ёзда кучли топасан. Юзга тортилган қон эриб тарқалганлигидан ёзда юз ранги сарғаяди.

Ёзда касалликларнинг муддати қисқа бўлади. Чунки касалликнинг қуввати ортиқ бўлса, хилтларни эритишда ҳаводан ёрдам топади. Сўнг касалликнинг моддасини етилтириб, ҳайдаб чиқаради. Агар касалнинг қуввати кучсиз бўлса,

ҳавонинг иссиқлиги бу кучсизликни зўрайтиради, гавдани бўшашитиради. Бунинг натижасида куч камаяди ва касал ўлади.

Иссиқ ва қуруқ ёз касалликни тезда ажратади. Иссиқ ва ҳўл ёз унинг муддатини чўзади. Шунинг учун яраларнинг кўпчилиги бундай ёзда эт ейилишига айланади. Бундай ёзда истисқо касали, ичак тайғоқлиги ва ичининг юмишиши пайдо бўлади. Шуларнинг ҳаммасига суюқликларнинг юқоридан настга тушиши айниқса, бошдан настга тушиши ёрдам қилади.

Иссиқ фасл касалликларига келсак, буларга, масалан, кун оралатиб турадиган иситма, доимий иситма, куйдирувчи иситма ва гавданинг ориқлаши киради. Бу даврда оғриқлардан қулоқ оғриғи ва кўз оғриғи бўлади. Хусусан, қаттиқ иссиқ ёз шамолсиз бўлса, булар кўп бўлади. Яна сарамас ва шу фаслга муносабати бўлган тошмалар кўп бўлади.

Ёз баҳорсимон бўлса, иситмага дучор бўлганларнинг холи яхши бўлиб, кучли иссиқ ва қуруқлиги ўткир бўлмайди. Баҳорсимон ёзда терлаш кўп бўлади. Иссиқ ва ҳўлликнинг терга муносабати жиҳатидан тер кўпроқ буҳрон вақтларида кутилади. Чунки иссиқ суюлтиради, ҳўллик эса бўшаштириб, тери тешикларини кенгайтиради.

Агар ёз иссиқ бўлса, вабо, чечак, қизамиқлар кўп бўлади. Совуқ ёзга келсак, бу хилтларни етилтиради, лекин бунда “сиқилиш касалликлари” кўп бўлади. “Сиқилиш касалликлари” ташиқи совуқ уриб сиққанида, ички ёки ташиқи иссиқлик сабабли, ёмон хилтларнинг оқишидан пайдо бўладиган касалликдир. Буларнинг ҳаммаси назалар ва улар билан бўладиган касалликлар кабидир.

Совуқ ёз қуруқ бўлса, балғам мизожларга ва аёлларга фойдали бўлади. Саффоли мизожларда қуруқ кўз оғриғи ва чўзиладиган куйдирувчи иситмалар пайдо бўлади, ҳамда қамалиб қолиши сабабли саффо куйишидан савдонинг кўпайиши ҳам юз беради.

Ёз фаслида қуёш нури ер юзига тенг, бир текис тушиб, бу вақтда қуёш иссиқлик қувватининг унга бўлган таъсири ниҳоятда кучли бўлади. Ер юзи зиёда қизийди. Ҳаво таркибидаги юқори зичликка эга бўлган сув бугининг зичлиги сийраклашиб, атмосферанинг юқори қаватига кўтарилади. Ҳўллик кайфиятининг ўрнини қуруқлик кайфияти эгаллаши билан бу фаслдаги ҳавонинг кайфияти қуруқ-иссиқ бўлиб шаклланади.

Ёз фаслида шаклланган бу хил қуруқ-иссиқлик кайфияти табиий мизож (ёки ўзгарган мизож) қуруқ-иссиқ бўлган инсонларнинг юрак қон-томир ҳаракатини яна ҳам жонлантириб, қон айланишини тезлаштиради, бадандаги табиий ҳўлликни камайтиради, мия тўқималарига қуруқлик етказиб, асаблардаги модда алмашинуви бузилиши билан, асабларда қитиқлаш пайдо қилиб, марказий асаб тизимининг меъёрий қўзғалиши ва тўхтатиш фаолиятини издан чиқариб, ҳар хил асаб касалликларини келтириб чиқаради. Ёз фаслида моддаларнинг чирши, бузилиши нисбати юқори бўлиб, қуруқ-иссиқ муҳитда ўсиб кўпаядиган жаросимларнинг кўпайишига шароит тўғилади. Натижада, ҳаво ва озуқаларнинг жаросимлар билан буғланиши юз беради. Ва албатта тозаликка риоя қилинмаса, юқумли жаросимли (инфекцион) касалликлар тарқалади.

Бу фаслда емак-ичмак тозалигига, муносиб дам олишга, бадан ҳароратини пасайтирадиган ва уфунатга қаршилик кўрсатиш хусусиятига эга бўлган озиқ-овқат ва дори-дармонларни истеъмол қилиш лозим бўлади. Масалан, қатиқ, совуқ сут, мева, кўкатлар, тamarҳиндий суви, қовоқ, чилонжийда, олхўри, олма шарбати, беҳи шарбати, олхўри мураббоси каби озуқалар баданнинг меъёрий мизожини сақлайди, муҳитдаги жаросимларнинг кўпайишига шароит яратиб берадиган омиллар пайдо бўлишининг олдини олади”.

Ёз фаслида ҳаво ҳарорати юқори бўлиши боис сафро кўпаяди ва сафрога оид касалликлар юзага чиқади. Булар ич суриши билан кечувчи касалликлар, турли ҳароратли касалликлар, чанқаш, бетоқатлик ва шунга ўхшаш касалликларни пайдо қилади.

9-фасл. Қиш фаслининг мизожи

Шайх ур-раис “Тиб қонунлари”да ўз сўзларида давом этадилар: “Қишга келсак, у ҳазм учун энг яхши вақтдир. Чунки совуқ [ҳаво] тўғма иссиқликнинг жавҳарини сиқади ва бунинг натижасида иссиқлик зўрайди ва тарқалмайди ва қишда мевалар кам бўлганлигидан, одамлар ҳақиқий овқатларни истеъмол этадилар, тўлган меъда билан кам ҳаракат қиладилар ва иссиқ жойларда турадилар.

Қиш ўзининг совуқлиги ва кечаси узун бўлиб, кундузи қисқа бўлиши билан бошқа фаслларга қараганда савдони синдириш учун энг яхши фаслдир. У ёмон хилтларни кўпроқ беркитади ва юмшатувчи парчаловчи дориларни истеъмол этишга муҳтож қилади.

Қишки касалликларнинг кўпчилиги балғамдан бўлади. Қишда балғам шундай кўп бўладик, ҳатто кусукларнинг кўпчилиги шиллиқли бўлади. Қишда шишларнинг туслари кўпинча оқимтир бўлади. Тумов касалликлари кўп бўлади. Тумов кузги ҳавонинг қишки ҳавога ўзгариши билан бошланади. Кейин бориб зотилжам [плеврит], ўпка яллиғланиши, хириллаш ва томоқ оғриқларига айланади. Сўнгра биқиннинг ўзида ва орқада оғриқ пайдо бўлади, асаблар зарарланади. Узоқ чўзиладиган бош оғриғи ҳатто сакта ва тутқаноқ касалликлари пайдо бўлади. Мана шуларнинг ҳаммаси балғам моддаларининг кўпайишидан ва тикилиб қолишидан пайдо бўлади.

Қари одамлар кишда азоб чекадилар. Ёш жиҳатидан қариларга яқин бўлган одамлар ҳам шундай. Аммо ўрта ёшдаги одамлар кишдан баҳра оладилар. Ёзга қараганда кишда сийдикнинг чўкмаси кўп бўлади, миқдори ҳам кўп бўлади.

Қиш фаслида кўёш нурининг ерга тушиш бурчаги кичик бўлиши сабабли, иситиш даражаси энг паст нуқтага тушади. Натижада атмосфера қатламидаги сув буғларининг зичлиги ортиб, ер юзига яқинлашиб, ушбу фасл кайфиятининг ҳўл-совук бўлишини келтириб чиқаради. Бу хил ҳўл-совук кайфият баданга таъсир қилса, вужуднинг табиий ҳароратини пасайтириб, қон-томирларидаги қоннинг оқиш суръатининг секинлатади. Тўқима ҳужайраларнинг модда алмашиш фаолиятини издан чиқаради. Ҳамда бадандан чикиб кетиши зарур бўлган (тер орқали чиқадиган суюқликлар) кераксиз моддалар чикиб кетолмай, аъзолар фаолияти сустлашади. Бу аъзоларда бўшашиб кетиш табиатли касалликларнинг пайдо бўлишига ва шунингдек, нафас йўллари касалликлари, тери касалликлари, ҳаракат-таянч аъзолари касалликларининг келиб чиқишига сабаб бўлади. Бу вақтда баданни совуқдан асрашга алоҳида эътибор бериб, унинг ҳарорати ва қувватини оширувчи озиқ-овқатларни, масалан, қаймоқ, сариёғ, қўй гўшти, асал ва нишолда кабиларни кўпроқ истеъмол қилиш керак.

Қиш фасли балғамни кўпайтиради, балғамга оид касалликлар юзага чиқади. Булар тумов, назла, йўтал, астма нафас сиқиши, юз фалажи, шол, тутқаноқ шунга ўхшаш касалликларни пайдо қилади.

10-фасл. Куз фаслининг мизожи

Ибн Сино ҳазратлари “Тиб қонунлари”да яна шундай ёздилар: “Кузда одамлар иссиқ офтобда юриб, кечаси совуққа чиққанларидан, мевалар кўплигидан ва улар билан хилтлар

бузилишидан ҳамда ёзда қувват камайишидан касалликлар кўп бўлади. Кузда ёмон озиқлар еганликдан, латиф нарсалар таралиб, қаттиқ нарсалар қолиши ва гавда куйишидан хилтлар бузиладилар. Ҳар қачон бирор хилтни ҳайдаш ва тарқатиш учун табиат таъсири билан қўзғатилса, совуқ уни тиклашга мажбур қилади. Кузда қон жуда кам бўлади. Балки куз ўз мизожидида қонга зид бўлиб, унинг тугилишига ёрдам қилмайди. Юқорида ёз қонни суюлтириши ва камайтириши тўғрисида айтилди. Кузда хилтлардан ёздан қолган сафро кўпаяди ва ёзда хилтлар куйганидан савдо кўп бўлади. Ёз хилтларни куйдиради ва куз совутади. Шунинг учун кузда савдо кўпаяди. Куз фаслининг аввали қари одамлар учун бир қадар мувофиқ бўлса ҳам, охири уларга қаттиқ зарар қилади.

Куз фасли касалликлари куйидагилар: пўст ташлайдиган кўтир, темиртки касаллиги, саратон ўсмалари, бўгин оғриқлари, аралаш иситмалар ва тўрт кунли иситмалар. Буларнинг ҳаммасига сабаб, савдо (қора ўт)нинг кўплигидир. Шунингдек, кузда талоқ катта бўлади ва иссиқ ва совуқдан қовуқ мизожини ўзгариши натижасида томчилаб сийиш ҳолати тугилади. Кузда сийдик тўхталлиши ҳам томчилаб сийишликка қараганда тез учрайди ва баъзан ичак тойгоқлиги ҳам бўлади. Чунки совуқ хилтнинг суюқ қисмини гавда ичига ҳайдайди. Шунингдек, кузда қўймич асабининг яллиғлаши (ирқуннасо) ҳам учрайди. Кузда ангина (забҳа) қаттиқ ачиштирувчи бўлиб, сафродан, баҳорда эса балғамдан бўлади. Бу икки хил касалликдан ҳар бирининг боиланиши, ўзидан илгарги фаслнинг қўзғатган хилтидан бўлади.

Кузда қуруқ ичак бураллиши ҳодисалари шунингдек, сакта касаллиги ва ўпка касалликлари, бел ва сон оғриғи кўпаяди. Бунинг сабаби, ёзда чиқиндилар ҳаракат қилиб, кузда қисилишидир.

Кузда кўпинча ичакда гижжсалар пайдо бўлади. Чунки овқатни ҳазм қиладиган ва чиқиндиларни ҳайдайдиган

жисмоний қувват жуда оздир. Кўпинча, агар куз қуруқ келса айниқса, куз олдида иссиқ ёз келган бўлса, чечак кўпаяди. Кузда руҳий хасталик ҳодисалари ҳам кўпаяди. Бунинг сабаби ўтнинг ёмон сифатли бўлиши ва унга савдонинг аралашшидир.

Ўпкалари яра бўлган сил касаллари учун энг зарарли фасл куздир! Сил куздан илгари боиланиб, аломатлари ошкор бўлмаган бўлса, куз бу аломатларни ошкор қилади.

Куз фасли ингичка ориққа йўлиққан кишилар учун энг зарарли фаслдир! Унинг сабаби ҳам ёзнинг қуришиши натижасида келиб чиқади. Чунки куз ёздан қолган касалликларга нисбатан ёз вакилидир. Энг яхши куз ёмғирли ва намли куздир. Қуруқ куз энг ёмон куздир.

Куз фаслида қуёш нурининг ер юзига тушиш бурчаги нисбатан кичик булади. Табиийки, унинг ер юзини иситиши ҳам озаяди. Ер юзини иссиқлик кайфиятининг ўрнини тадрижий оғиз совуқлик кайфияти эгаллайди. Атмосферанинг юқори қаватига кўтарилиб чиққан сув буғи қуюқлашиб, ер юзи ҳавосига тўлиқ аралашши даражасига етмаганлиги натижасида қуруқлик кайфиятининг камайиши даражаси нисбатан секин бўлади. Унинг ўрнини ҳўллик кайфияти тўлиқ эгаллаб улгурмайди. Натижада бу фаслдаги ҳавонинг кайфияти қуруқ-совуқ ҳисоблансада, иссиқлик на совуқликда мўтадилликка яқин бўлиб, ҳўллик ва қуруқликда мўтадил бўлмайди.

Бу кайфиятнинг одам вужудига таъсир қилиши натижасида баданда қуруқ-совуқ кайфият ғолиб келса, баданнинг табиий ҳарорати пасаяди (моддалар алмашинуви учун зарур бўлган иссиқлик қуввати оз бўлади), юрак, қон-томирларининг мулойимлиги ва қайишқоклиги (эластиклиги) камаяди, қон томирлар торайиб, қоннинг томирдаги оқиш суръати пасайиб, қон томирларда чўкма пайдо бўлиши осонлашади. Модда алмашинуви сустлашади. Бу хил ўзгаришлар баданда

озуқа етишмаслиги, юрак, қон-томир касалликлари, ўпка-нафас, асаб тизими касалликларининг келиб чиқишига сабаб бўлади. Шунинг учун бу пайтда баданни қуритадиган нарсаларни истеъмол қилишдан сақланиб, ҳўл-иссиқ табиатли баданни ҳўллаб қиздирадиган озукаларни кўпроқ истеъмол қилиш лозим. Масалан, мастава, шўрва, бодом, қовоқ мағзи шираси ва б.

Куз фасли савдони кўпайтиради, савдога оид касалликлар юзага чиқади.

Демак, фаслларнинг алмашиб, ўзгариб туриши одам танаси (организми)даги хилтлар ўзгаришини пайдо қилиб, ҳар бир аъзонинг тўқималарида ўзгаришга хос кайфиятларни келтириб чиқаришга ва кўзгашга сабаб бўлади. Шу сабабли, турли фасллардаги кайфиятларнинг одам вужудига таъсир қилишидан сақланиш учун шу фаслдаги кайфиятга қараш ва мос чора-тадбирларни қўллаб туриш ниҳоятда катта аҳамиятга эга.

11-фасл. Иккинчи зарурий омил – ейиш тадбири

Расулulloҳ соллalloҳу алайҳи васаллам: «Биз то қорнимиз очмас экан таомланмайдиган, агар (очиқиб) таомлансак ҳам тўйиб кетгунча емайдиган бир миллатмиз», деб марҳамат қилдилар.

Билмоқ керакки, инсонни тириклигининг моддий сабабидан бири, бу емак ва ичмакдир. Озуқа ва ичимлик моддалари танага тушади, парчаланади, сўрилади ва ҳазм бўлади. Ундан ҳосил бўлган қувват ўсиш учун тўхтовсиз сарфланиб турган қувват (энергия)нинг ўрнини қоплаш учун сарфланади. Чунки, тирик жонзот бор экан тириклигини сақлаш учун, сарфланган қувватининг бадалига доим муҳтож бўлади.

Агар сарфланган қувватдан қабул қилинаётган энергия ортиқча бўлса, баданнинг тўлишиши, семириш юз беради. Аксинча, сарфланган энергияга нисбатан камроқ энергияли овқат қабул қилинса, баданнинг озиши ва нуксонга юз тутиши аста-секин юз беради. Таом (ғизо) ҳаёт учун сарфланган қувватнинг ўрнини тўлдириши ва ўсиш ёшидагиларнинг ўсишини таъминлаш керак.

Инсон соғлиғини сақлаши ва соғлом турмуш тарзини шакллантириши учун овқатланишнинг умумий қонуниятларини билиши ва унга амал қилиши лозим. Бу қонуниятлар қуйидагилардан иборат:

1. Таомланишда йил фасллари, жуғрофий жойлашув ва миллий-анъанавий ўзига хосликни инобатга олиш.
2. Таом истеъмолининг мизожга хос хусусиятлари.
3. Сув ичишнинг аҳамияти, фойда ва зарарлари.
4. Овқатланиш ва очлик.

Соғлиқни сақлаш учун ейиш ва ичиш билан бирга, маълум қоидаларга кўра, овқат маҳсулотлари ва ичимликлардан тийилиш ҳам катта аҳамиятга эга.

Тўқлик вақтидаги овқат истеъмоли (мечкайлик ва пурхўрлик)нинг оқибати ёмон! Бу ҳолат жигар кучсизлиги, организмда тикилмалар ҳосил бўлиши ва унинг ахлатланишига замин ҳозирлайди. Айниқса, бизнинг асрда овқатларнинг ҳаддан зиёд кўп истеъмоли, аралаш ейиш, турли сунъий ва ярим тайёр овқатларга ружу қўйиш ҳеч бир асрда учрамаган бўлса керак. Ҳаттоки, бу иш одат даражасига кўтарилди ва инсонлар соғлиғини сақлашга шу қадар муҳтожлигидан, йил давомида турли дори восита(препарат)лари билан кун кечириб даражасигача тушиб қолдилар. Шунинг учун овқатланиш маданиятига, унинг қонун-қоидаларига амал қилишга барчамизнинг муҳтожлигимиз яққол сезилмоқда.

Киши тўйиб овқатланмаслиги, яъни нафси тийиши лозим. Тўйиб овқатланмаслик даражаси қандай? Келинг, бу саволга жавоб бериш учун сарвари коинот Муҳаммад солаллоҳу алайҳи васалламнинг табобати бўлмиш “Тиббун-Набавий” китобига мурожаат қиламиз:

Расулulloҳ солаллоҳу алайҳи васаллам: **“Одамзод қориндан кўра ёмонроқ идишни тўлдирмайди. Одам боласига қаддини тиклаб турадиган луқмалар етарли. Агар қилиши (таомланиши) керак бўлиб қолса, (қорнининг) учдан бири таоми учун, учдан бири ичимлиги учун ва учдан бири нафаси учундир”**, – дедилар. Бу ҳадис Имом Аҳмад роҳмаҳуллоҳнинг “Муснад”ларида келтирилган.

Микдом ибн Маъдиқариба томонидан қилинган шу лафздаги ҳадисни Абу Исо роҳимаҳуллоҳ бу ҳадис ҳасан саҳиҳ, деган эканлар. Бу ҳадисни Имом Ҳоким ривоят қилганлар.

Ушбу ҳадис ўзида бир қанча улкан диний ва тиббий маъноларни жамлаган. Келинг, ушбу Набавий кўрсатмаларни бирма-бир тушунишга ҳаракат қилайлик:

Биринчи таълим – **“Одамзод қориндан кўра ёмонроқ идишни тўлдирмайди”**. Одам болалари ҳаёти давомида кўплаб идишларни: донлар билан қопларни, сув билан мешни, пул билан чўнтакни ва бошқа идишларни тўлдираркан. Ана ўша идишлар ичида энг ёмонроқ идиш – ўзининг қорни экан. Ошқозонни тўлдириб, яъники тўйгунча овқат ейиш энг ёмон “идиш”ни тўлдириш билан тенглаштирилмоқда.

Ошқозонни тўлдириб ейишнинг қандай зарари бор? Бунга икки хил: руҳий ва тиббий маъно бериш мумкин:

1) Руҳий жихати. Манбаларда тўйиб овқат еб юриш, қалбга доғ туширади. Қалбига доғ тушган, доим тўйиб овқат еб юрган одамнинг қалби қотади, ўзидан ночор одамларни, Аллоҳ асрасин, Яратган Раббисини унутиши мумкин. Бу

жиҳатдан, инсон қорнини тўлдиришда, ёмон ишлардан бирини қилаётган бўлади.

Қорни ўта тўқ инсонда вужуд ҳазм билан овора бўлгани боис, ибодат, ҳушуъ ва ҳузуъга рағбати камайиб, бош мияда кислород тақчиллиги кўпаяди. Натижада, эснаш ва мудроқ кўпайиб, ибодатга рағбати сустлашади.

Ушбу ҳадиснинг диний жиҳатдан шарҳларида асосий эътибор қўп таом ейишдан қайтаришга қаратилган. “Фатҳул Борий”да Ибн Ҳажар Аскалоний роҳмаҳуллоҳ бу ҳадисдаги ошқозонни уч қисмга тақсимлаш ҳақида шундай ажойиб гапларни келтирадилар: *“Имом Қуртубий роҳимаҳуллоҳ “Шарҳул асмаъи” (Аллоҳ таолонинг исми сифатларини шарҳлаш) китобида шундай дейдилар: “Агар мана шу тақсимотни Букрот¹⁶ кўрганида, бу ҳикматдан ҳайрон бўларди”*).

Сўнгра, Ибн Ҳажар Имом Ғазолий роҳмаҳуллоҳнинг “Ихёу улумид дин”нинг “Икки шаҳватни синдириш” (касруш шаҳватайн) бобидаги ошқозонни уч қисмга тақсимлашдаги тенг тақсимлаш яхшироқ, деган фикр аъло, афзаллигини келтирганлар.

Тиббий жиҳати. Боситхон Шоший роҳмаҳуллоҳ шундай ёзадилар: “Аҳли тиблар: *“Уммул аъзои ал-меъдату ва уммул амроз ат-тоаму”*, дейишади” (“Қонуни Боситий”, 1/330 бет). Яъни, табиблар жамоаси иттифок қилиб шундай хулоса қиладилар: *“Аъзоларнинг онаси – ошқозон ва касалликларнинг онаси таомдир”*.

Инсон қанчалик ошқозонини таомга тўлдираверса, табибларнинг қондасига кўра, барча аъзоларнинг онаси бўлган ошқозон, қолган аъзолар (“фарзанд ва набиралари”)га зарар етказади. Касалликларнинг онаси бўлмиш – *нотўғри, хоссатан тўйиб ейилган таом*, аъзоларнинг онаси бўлмиш

¹⁶ Гиппократ.

– *ошқозон*, деб аталмиш идишни тўлдиришда кўплаб касалликларни келтириб чиқади. Ва бу ишда касалликларни она каби “туғувчи” (юзага келтирувчи), “эмизувчи” (қувватлаб турувчи) ва “тарбияловчи” (ўсиб, кучайишига ёрдам берувчи) вазифаларини бажарар экан.

Мана шу каби кўплаб сабабларга кўра, тўйиб овқатланиш мумкин эмас. Бунини Пайғамбаримиз алайҳиссалом ўз ҳадисларида қисқа, лекин ўта моҳирона қилиб: **“Одамзод қориндан кўра ёмонроқ идишни тўлдирмайди”**, - дея марҳамат қилган эканлар.

Иккинчи таълим – **“Одам боласига қаддини тиклаб турадиган луқмалар етарли”**.

Бу ердаги “тикка тутиб туришга” калимасида ажиб ҳикматлар бор. Қачонки, одамзод таом емай, оч юраверса, жисми заифлашади. Тананинг асосий таянчи умуртқа поғонасидир. Жасад заифлашгач, умуртқа ҳам олдинга эгила бошлайди.

Энди иккинчи ҳолат. Агар инсон керагидан ортиқ таом еса, қорнини тўлдираверса, кўкраги тўлиб нафас ололмайди. Натижада, қорнини олдинга қаппайтириб, бошини орқароққа қилиб, нафас олишга мажбур бўлади. Бунда умуртқа поғонасининг меъёридан орқага букилиши кузатилиши мумкин.

Ҳадиси шарифда буюрилади таом микдор, ана шу икки ҳолатдан ўртадаги, меъёрий ҳолатга олиб келади. Яъни, одам боласига қадди қомати, умуртқасини тик тутиб, мувозанатни йўқотмай, ўзгаларнинг етаклашига муҳтож бўлиб қолмайдиган даражада таом ейиши керак экан. Мана шу қаддини тик ушлаб юришга кераклик қувват (ҳозирги замон тилида килокалория) унга ҳожат даражаси ҳисобланаркан. Ана шу микдор аслида одам боласига етарли экан. Хўш, ўша микдор ҳаммада бир хилми? Ёки турличами? Бир косами ёки ундан камроқми?

Бу миқдор ҳақида Имом Заҳабий роҳмаҳуллоҳ ўзларининг ёзган “Тиббун-Набавий” асарида ёзганлар. Хоссатан, биз ўрганаётган ҳадисга шарҳ айта туриб:

“Емаклар – “емак”нинг кўплигидир. Емак бир луқмадир”, - дейдилар.

Субҳаналлоҳ, бу гапнинг гўзаллигини қаранг. Ҳамма учун луқма ўлчовда турличадир. Қадимда таом асосан қўлда ейилган. Ҳар кишининг кафти ўзига мос бўлади. Демакки, уларнинг луқмаларида ҳам фарқ бўлади.

Энди тиб манбаларида инсон қаддини тик ушлаб туриши учун етарли таомнинг миқдори ҳақида нима дейилган? Шунини ўрганайлик.

Тиб китобларида, хоссатан “Тиб қонунлари”да бир киши бир маротаба ейдиган таомининг миқдори ҳақида шундай ёзилган: “*Овқатнинг миқдори одат ва қувватга қараб белгиланади. Унинг миқдори қуввати яхши бўлган кишиларда еганда оғир бўлмайдиган, қобирга бошларини чўзмайдиган, қоринни кўпчиратмайдиган ва қўлдиратмайдиган, [меъда тепасига] сузиб чиқмайдиган ва бир муддатдан кейин кекирганда овқатнинг мазаси келмайдиган миқдорда бўлиши керак. Узоқ муддатдан кейин [кекирикда] овқатнинг мазаси келиб туриши энг ёмон ҳолдир*”.

Таомнинг миқдори яна одамнинг ёши, мизожи, фасл, касбининг тури, ҳомиладорлик ва бошқа омилларга кўра бир-биридан фарқ қилиши мумкин. Демак, таомнинг миқдори ҳар кишининг қаддини тикка ушлаб туришигагина етарли миқдорда, тиб кўрсатмаси бўйича юқоридаги тавсияларни инобатга олган ҳолда белгиланар экан. Ана шунда одам боласи ошқозонни тўлдирмайди, яъники тўйиб овқат емайди. Байт:

*Меъдани тўлдирма, қилгин итоат,
Юзлаб касал бўлиб, қилма маломат,*

*Зарур бўлса егин, айтди Имомат,
Битилди рисола “Набий табобат”.*

*Таомлан, тик бўлсин “Алиф”дек қомат,
“Йо” каби оч бўлиб, йиқилма ҳеч вақт,
“Те” каби қоринни тўйдирган – бадбахт,
“Сукун” қил, тўхтагин, бўлгин саломат.*

(Ҳақимий)

Учинчи таълим – “*Агар қилиши (таомланиши) керак бўлиб қолса, (қорининг) учдан бири таоми учун, учдан бири ичимлиги учун ва учдан бири нафаси учундир*”.

Ушбу ҳадисга шарҳ сифатида биринчи навбатда табибларнинг энг катталаридан бўлмиш Абу Али ибн Сино ҳазратнинг куйидаги гапларини келтирамиз: “*Агар сен хом семизликдан омон бўлмогингни истасанг, ичингни учга тақсим қил! [Унинг] учдан бири нафас олиши учун, яна учдан бир қисми гизо учун ва қолгани эса сув учун эсой бўлсин*” (“Уржуза” 828-829 байтлар).

Ҳадисдаги ушбу гапнинг ўзида учта кўрсатма келмоқда. Ушбу 3 та кўрсатмани қандай тушунамиз? Уларни тушунишда тиб жиҳатидан икки хил йўл тутиш мумкин:

1-усул: учовини алоҳида, алоҳида ўрганиш; 2-усул: учала тавсияни бирга қўшиб ўрганиб, хулоса чиқариш. Келинг, аввал биринчи йўлдан юрамиз. Бундан учта тавсия келиб чиқади:

1-тавсия: Инсон бу дунёда яшайдики, 6 зарурий омиллар таъсир қилади. Шулардан иккинчиси бўлмиш ейиш ва ичиш (маъкул ва машруб)га ҳам умри давомида ҳар куни эҳтиёжи тушади. Ана ўша еб-ичишга эҳтиёж тушган вақтда қанча миқдорда таом ейди? Буни севиқли Пайғамбаримиз соллал-

лоҳу алайҳи васаллам илоҳий ваҳий, илми ладуний орқали бизларга билдирмоқдалар: *“Қориннинг учдан бири таоми учун”*, - деб.

“Учдан бири” дея таржима қилинган лафз арабчада. Бу ҳам икки маънони билдиради: “учдан бир” (33.33%) ва “уч қисмининг бири”. Демак, инсон ошқозонини уч қисмга бўлиб, унинг бир қисмини таомга ажратиши керак экан.

Хўп, ошқозон ўлчами ҳаммада ҳам бир хилми? Ёки ҳамманинг ошқозони ҳар хилми? Ушбу ҳадиси шариф айтилаган вақтда ҳар бир саҳобий ўз ошқозонининг сиғимини қандай билиши мумкин эди? Ахир, қоринни очиб кўришнинг иложи бўлмаса?

Бу ерда айтилган миқдорни тушунтиришга Боситхон Шоший роҳмаҳуллоҳнинг қуйидаги гаплари ёрдам беради: *“Мўтадил миқдор шулки, иштаҳонинг тақазо қилгон миқдорини учдан икки ҳисса миқдоридур”* (яъни, инсон мўтадил миқдорда таом емоқчи, у ўз ошқозонининг сиғимини аввал ўлчатиб олиб, сўнг уни учдан бир қисмини ҳисоблаб чиқиб, ўша миқдордаги овқатни ейиши керакмас экан. Бу мантиққа ҳам тўғри келмайди. Чунки, ошқозон очлик ва тўқлик ҳолатларига қараб сиғими ўзгариши мумкин). Бу тавсиядан шуни тушунамизки, бир киши таом емоқчи. У ошқозоннинг сиғимига эмас, балки иштаҳасига қарайди. Аниқроғи, ҳақиқий иштаҳаси (иштаҳаи содиқ)ни баҳолайди. Масалан, унда бир коса таом ейишга иштаҳа бор. Ана шу миқдорнинг ҳаммасини емайди. Балки, ўша косасининг учдан икки қисми миқдоридаги таомини ейди. Ана шу миқдор унинг танаси учун ҳақиқатда зарур бўлган эҳтиёжи, яъни ҳақиқий иштаҳаси экан.

2-тавсия: *“Қориннинг учдан бири ичимлиги учун”*. Бу ҳам юқорида айтилганидек, 6 зарурий омилдан. Бу тавсияда ҳам икки хил маъно чиқиши мумкин:

1-маъно: Таомга ошқозондан бир қисм ажратгач, таомлангач, яна бир қисмини сувга ажратинг ва сув ичинг. Тавсияга бундай маъно бериш тиб қоидаларига бироз тўғри келмайди. Негаки, тиб манбаларининг бир қанчасида таомдан сўнг сув ичишнинг зарарлари ҳақида ёзилади. Фақат истисно ҳолатлари келтирилади. Шулардан бирини қуйида бериб ўтамиз.

Боситхон Шоший роҳмаҳуллоҳ *“Қонуни Боситий”* асарларининг *“Ичимлик ичиш”* қисмида шундай ёзадилар: *“Ам-мал-мау фа-вақтуҳул ʼаташу саваун кана ʼалат-тоами ав баъдаху”*, яъни сув ва чой каби нимарсаларни ичмоқнинг вақти таиналик вақтидур. Хоҳ таом тановули бирлан бирга бўлсин, хоҳ таомдан сўнг бўлсин. Ва билмоқ керакки, таиналик икки навъ бўлурки, бирини ʼатаиши содиқ ва бирини ʼатаиши козиб дерлар. Яъни, чин таиналик ва ёлгон таиналик демакдур.

Бас, ʼатаиши содиқ шулки, таомда жавҳари арзият (ерлик унсури) голиб бўлур. Бинобарин ҳазми комил учун ноқобил бўлур. Чунки, ҳазм учун таомни қивоми мўтадил бўлмоғи лозимдур. Ва ани мўтадилул-қивом қилмоқ учун ҳазм вақтида таомга сув қўймоққа табиат муҳтож бўлурки, бул ҳолатнинг номи ʼатаиши содиқ, яъни чин таиналикдур.

Аммо, агар меъданинг юқори тараф қисмида шўр балғам ўрнагон бўлса, ани шўрлигидин меъда озорланиб, ани ювиб юбормоқ ёки шўрлик ҳиддатини таскин бермоқ учун доим сувни тақозо қилурки, бу ҳолатнинг номи ʼатаиши козиб, яъни ёлгон таиналикдур....ва истисқо касалидаʼатаиши козиб ва табиат ҳождатидан зиёда талабдур” (*“Қонуни Боситий”*, 2/339 б.). Яъни, юқорида Боситийнинг келтирган матнларидаги ташна (чанқок)ликдан мурод, ҳақиқий ташналик экан.

Меъеридан ортиқ ичимлик ичишнинг зарари ҳақида *“Тиб қонунлари”*да шундай ёзилган: *“Овқатларнинг энг ёмони меъдага оғирлик қилгани, ичимликларнинг энг ёмони мўтадилликдан ошиб, меъда тўлдирганидир”* (1-китоб, 388 б.).

Демак, ҳадис ва табобат тавсиясига кўра, сувни ҳам меъ-ёрдa ичиш керак экан. Хўш, одам боласи ошқозонида таом учун жой ажратиб мўътадил микдорда, қаддини тик ушлаб туриши учун етарли таомни еди. Энди, сув учун ҳам меъдасида жой ажратди. Агар таомдан сўнг дарров сув ичишга рухсат бўлмаса, қачон сув ичса бўлади?

Қуйида яна Боситхон Шошийнинг китобаларидан иқтибос келтирамиз: *“Билмоқ керакки, мўътадил мизожлик кишилар учун сув ичмоқнинг вақти меъда таомнинг ҳазмига шуруъ қилгондин (киришгандан) сўнгги вақтдур. Яъни, таом тановулидин сўнг, бир соати комил (тўлиқ) ўтгандин сўнгра ичмоқ мумкин бўлур. Ва таомдин сўнг сув ичмоқга ҳожат бўлмоқнинг сабаби шулки, гизоларнинг аксариди арзият (ерлик моддаси) голиб бўлур. Ваҳоланки, ани ҳазми учун қивоми (қуюқ-суюқлиги) мўътадил бўлмоғилозимдур”* (“Қонуни Боситий”, 2/340 б.). Демак, мўътадил мизож кишилар таомдан сўнг сув ичмоқчи бўлсалар, тўлиқ бир соат ўтиши керак экан.

Шу ерда икки савол пайдо бўлади. 1-савол: Аллоҳ таоло Қуръони Каримнинг бир қанча оятларида аввал сийиш ва ичишни, егулик ва ичимликни зикр қилар экан, аввал емоқ, сўнгра ичмоқни айтади-ку?

2-савол: Мўътадил мизожли кишиларнинг топилиши — жуда ноёб ҳолат. Бошқа мизожли кишиларга бу қоида тегишлими?

Жавобни яна “Қонуни Боситий”дан топамиз: *“Ва махфий қолмасинки, таомнинг тановул вақтида ва тановулидин сўнг, бевосита сув ичмоқ манҳий (қайтарилган) ва нодурустдур.*

Лекин бу манъ иссиқ мизож бўлмогон кишиларга махсусдур. Чунки, иссиқ мизожли кишини меъдаси қизуб тургон бўлур. Ва ани таом тановулида ва тановулидин сўнг бевосита сув ичмоғи жоиз, балки вожибдур. Зероки, андоғ киши

ташналикга сабр қилса, гизоси агарчи суюқ бўлса ҳам куйуб фосид бўлур. Зероки, таомнинг суви иссиқлик сабабидин меъданинг ҳароратини таскин бермоқга асар қилмас...

Ва яна билмоқ керакки, баъзи одамнинг меъдаси ҳароратлик бўлур. Бинобарин таомга иштаҳоси кам бўлур. Ва агар совуқ сув ичса, меъдасини ҳарорати таскин топуб, иштаҳо ҳосил бўлур. Ба ҳарҳол сув ичмоқга вақт таъйин қилмоқни мизожнинг ҳолига ҳавола қилинурки, ани риоясидин қатъий назар ҳукм қилмоқ хатодур. Зероки, агар чин ташналик пайдо бўлса, сув учун табиатнинг муҳтожлигига далилдурки, андин манъ қилмоқ боиси мазарратдур (зарурат юзасидандир)” (“Қонуни Боситий”, 2/340–341 б.).

Бу ҳақда Бобурнинг хос табиби Юсуфий “Ейиш ва ичишнинг тадбири ҳақида рисола”сида байтга солиб шундай ёзди-лар:

*Меданг иссиқ бўлса, агар эй ўртоқ,
Овқат орасида мумкин сув ичмоқ.*

Демак, таомдан сўнг сув ичиш мумкин эмас, деган қоида иссиқ мизожли кишилар ва ошқозони иссиқ мизожли кишиларга тегишли эмас экан (иссиқ мизожли меъданинг белгиларини эса “Тиб қонунлари” 3-китобидан қаралсин).

Биз айтамизки, таомдан кейин сув ичиш масаласи ҳақида гапирилган вақтда, Имом Заҳабий роҳмаҳуллоҳнинг “идишни ялаш ҳазм қилишга ёрдам бўлиб, иштаҳани сўндиради” деган гапларини ёдга олиш керак. Ушбу тавсия таом еб бўлгач, идишни ялаб қўйиш ҳақидадир.

Юртимизда таом еб бўлгач, идишни ялаб қўйишдан ташқари яна бир ажиб одат бор. Бу ичига озгина сув қуйиб, идишни чайиб, ўша сувни ичиб юборишдир.

Агар Имом Заҳабий роҳмаҳуллоҳ берган маълумот ва Боситхон табиб келтирган таъкидларни инобатга олиб, улар-

га амал қилишни хоҳласак, бу биздаги урфни амалга ошириш билан амалга ошишини тушунамиз. Ота-боболаримиз нақадар доно бўлишган. Бир одатнинг ичида улкан тиббий тавсияларнинг амалини йўлга қўйиб кетган эканлар.

“Қориннинг учдан бири ичимлик учун” деган лафзнинг 2-маъноси: ошқозонда худди таомга ажратилгани каби, сув учун ҳам жой ажрат. Яъни, уни қоринни овқатнинг ўзи билангина тўлдириб қўйма.

Инсон ичимлик ичганда қанча пиёла ичиши керак? Бунда ҳам муайян литрлар келтириш унчалик тўғри эмас. Чунки, бунда худди таомдагидек, ишининг мизожи, касби, фасл, яшаётган иқлим, қўшимча касалликларнинг бор ё йўқлиги ва бошқа кўплаб омиллар ҳисобга олинаши керак (тибда уни ичишдаги одоблар, фойда ва зарарлар ёзилган).

Демак, ҳадиснинг **“қориннинг учдан бири ичимлиги учун”** деган қисмидан таомланишда ошқозонда ичимликка жой қоладиган даражада таом ейиш кераклигига буюрилганлигини тушунамиз. Энди, ҳадиси шарифдаги кейинги тавсиядаги тиббий ҳикматларни ёритсак.

3-тавсия: **“Қориннинг учдан бири нафаси учундир”**. Бу тавсияни қандай тушунамиз? Ошқозон ҳазм аъзоси бўлса, нафасга нима алоқаси бор? Ёки ейилган таом ўпкага ҳам таъсир қиладими? Буни тушунтириш учун яна Боситхон Шошийнинг рисоаларидан иктибос келтирамиз: *“...иштаҳонинг тақозо қилгон миқдорини уч ҳиссадин икки ҳиссага қаноат қилмоқдагина бажсо келур.*

Ва иштаҳога мутиъ бўлуб (иштаҳага эргашиб), бу миқдордин зиёда тановул қилмоқда зарар кўндур. Зероки, тановул вақтида меъда тамом тўлмаса, тўйгонлик маълум бўлмай, ҳамон иштаҳо боқий турар (иштаҳа бўлиб туради).

Ва агар мазкур миқдорни тановулидин сўнг сабр қилинса, бир соатдин сўнг мазкур боқий иштаҳо худ-бахуд зоил

бўлур. Ва ани сабаби шуки, таомнинг ҳазмига шарт ани меъдада ҳарорати гаризийя таъсири бирлан қайнамоғидур. Ва қайнамоқнинг лозимасидурки, таомнинг ҳажми зиёда бўлур. Ва анга тухалхул ва ҳоволиклар пайдо бўлуб, меъдада боқий қолгон холийликни тўлдирар. Бинобарин иштаҳо зоил бўлур.

Бас, агар аввалги иштаҳога тобеъ бўлуб, меъда тамом тўлгунча таом тановул қилса ва меъдада холий жой қолдирилмаса, ул вақтда таомга ҳарорати гаризийя таъсир қилолмас. Ва агар андак таъсир қилса ва таомнинг ўсиб зиёдалашмоқга тақозо қилса, меъда ани ўз ичига сигдиролмас, ночор таом ҳар тарафдин сиқилуб қувват ва матонат ҳосил қилур. Ҳарорати гаризийя ва ҳарорати гаризийяга мағлуб бўлмас, бил-акс анга золиб бўлуб сўндирар ва ҳазм фосид бўлур. Ва бўкмоқ шундан иборатдур.

Ва агар меъдада андакгина холий жой боқий бўлуб, то ул холий ўрин тўлгонигача ҳарорати гаризийя таомга таъсир қилиб, чала ҳазм қилиб, сўнгра меъда тўлиб қолиб, боқий ҳазм нотаом бўлиб тўхталса, ул вақтда таом тиқилуб, ночор меъдадин ичакга чалалик ҳолда ўтмоқга музтар бўлур. Ва чала ҳазм таомни тамом ҳазм қилмоқга ичаклар ҳам ожиз бўлур. Ва жавҳари гизони ул таомдин ажратуб, баданга юборолмас. Ва баъзи бир қисмини чала ҳазмлик ҳолда ажратиб, мосориқо томурлар (vv.mesenterica) воситаси бирлан жигарга юборилса ҳам, лекин аксар қисми мунҳазим бўлмай, пастдин ҳориж бўлуб кетар. Ва жигар томонга боргон оз қисмидин ҳам бир миқдор гализ(қуюқ) ва ноқисул-ҳазми (яхши ҳазм бўлмагани) мосориқода гализлик бирлан ўрнаб қолиб, судда (тиқилма, шлак) пайдо қилур. Ва баъзи миқдори жигарга етиб борса ҳам, лекин ҳазми даражаи кайлусликга етмаган чала бўлгони учун, жигар ҳам ани қон ва бошқа табиий ахлот қилиб еткузмоқдин ожиз бўлур. Бинобарин бу жавҳари гизолар чала ҳазмликни касри бирлан жузви бадан

(тананинг бир бўлаги) бўлолмас, балки офати балан бўлур” (“Қонуни Боситий” 2/287-288 б.).

Мана, ҳадисда нима учун ошқозонда таом еган вақтда тўйиб емай, ошқозонда ҳавога жой қолдириш кераклигини таъкидланиши (26-расмга қаранг).

Энди, биров таом ва ичимликнинг тақсимотини билиб ё билмай килиб еб-ичди. Ошқозонига тушиб бўлди. Овқатни меъёрида едими ёки кўпми? Меъёрида ейишдан кейинги бўладиган танасидаги ўзгаришлар қуйидагилар: “Овқатнинг мўътадил даражада ейилганлигига нафаснинг калталашмаслиги ва томир уришининг катталашмаслиги далил бўлади. Шундай ҳолат меъданинг кўкрак-қорин пардасини сиқийи сабабли пайдо бўлади ва шу вақтда нафас олиш кичиклашиб тезлашади. Натижада юракнинг иши кўпайиб, агар қувват заифлашмаса, томир уриши зўраяди” (“Тиб қонунлари” 1/388 б.).

Келинг, ҳадисдаги тиббий тавсияни “қоринларингизни уч қисмга ажратинглар”, дея айтилди, дейлик. Унда Пайғам-




26-расм. Ошқозоннинг ҳадисга мувофиқ 3 қисмга бўлиниши.

бар алайҳиссалом ўша вақт учун айтган тиббий маълумотлар келиб чиқади. Тиббиётдан маълумки, қорин бўшлиғи 3 қаватга бўлинади: 1) юқори қават (эпигастрий), 2) ўрта қават (мезогастрий), 3) пастки қисм (гипогастрий; 27-расмга қаранг).

Тўғри, таом ва ичимликлар 3-қаватга дарров ўтиб кетмайди.

Хасталиклар икки турли бўлиб, биринчиси моддадан бўлган касалликлар (амрози модда) ва кўп учрайди. Бунда танада қайсидир модда ҳаддан зиёда кўпайиб кетиб, унинг табиий ҳаракатларига зарар беради. Ушбу касаллик аввалги егани ҳазм бўлмасидан орқасидан яна таом тановул қилиш, жасад учун етарли миқдордан ортикча ейиш, фойдаси кам ва секин ҳазм бўлувчи овқатлар билан таомланиш, кўп ҳолларда



Тарқимон:
Н.Шошай

27-расм. Қориннинг анотомик жиҳатидан 3 қисм (қават)га бўлиниши


таркибида ҳар хил моддалари бор егуликлар истеъмол қилиш сабабли келиб чиқади. Одамзод мазкур таомлар ила қорнини тўлдирса ва шунга одатланса, турли хил касалликларни чақираверади. Айримлари тез, баъзилари секин тузалади.

Лекин, қоринни 3 қисмга бўлиш ва замонавий илмда ҳам уни 3 қаватга бўлиб ўрганиш ўртасида ҳам балки боғлиқликлар бордир (28-расмга қаранг). Байт:

*“Уч бўлак” дегани – айни каромат,
Таомга бир қисм жойини ажрат,
Сувга ҳам унутма, ахир у шарбат,
Жой қолдир нафасга, шудир адолат.*

(Ҳакимий)

Бу мавзунини узундан-узоқ давом эттириш мумкин. Лекин шунча сўз кифоя қилса керак. Энди, қуйида муаллиф бу ҳадисдан сўнг, сўзларини айтадилар. Бу ерда гап баданий касалликлар ҳақида, хоссатан танада 4 суюқлик (хилт)нинг меъдидан ошиб кетиши тўғрисида кетмоқда. Улар нима сабабли



28-расм. Ошқозоннинг анатомик жиҳатидан 3 қисмга бўлиниши.

кўпаяди? Қуйида ўша сабаблар келтирилмоқда. Хилтларнинг меърдан ошиб кетишига асосан таомланишдаги жиддий хатоликлар сабаб экан. Уларнинг ҳар бири ҳақида тушунча бериб кетсак:

• *Биринчи еган таоми ҳазм бўлмасдан туриб, кетидан иккинчисини истеъмол қилиш.* Бу иш ўта нотўғри ва афсуски, ҳозирги кунда кўп тарқалган. Абу Али ибн Сино роҳмаҳуллоҳ “Тиб қонунлари”да шундай ёзадилар: *“Соғлиқни истасан киши иштаҳаси чин бўлмай туриб, меъдаси ва юқори ичкалари аввалги овқатдан бўшамай туриб, [ҳеч бир нарса емаслиги керак]. Гавдага энг зарарли нарса меъдада овқат етилмасдан ва ҳазм бўлмасдан туриб яна овқат киритишидир!”* (Қонун 1/387-бет).

Бунинг зарари ҳақида Аллома Алихонтўра Соғуний роҳмаҳуллоҳ “Шифоул-илал”да шундай огоҳлантирадилар: *“Ҳукамолар айтибдурлар: “Ҳар киши бир таом еб, шу таом яхши сингиб, ҳазм бўлмасдин туриб, очкўзлик қилиб, устига яна бир таом еса, ўз қўли бирла захар – оғу ичиб, ўзини ҳалок қилгондек бўладур”, - дейдурлар”.*

Тиб китоблари хоссатан “Ал-Қонун” ва “Қонуни Боситий” асарларида бир таом ҳазм бўлиб, ошқозон-ичакдан жигарга сўрилгунча (яъни, биринчи ҳазм тугаб, иккинчисига ўтгунча) кўплаб жихатларга кўра, 3 соатдан 6 соатгача вақт кетади, деб ёзилган. Маълум бўладики, биринчи ҳазм тугамагунча, иккинчи таомни ейиш тиббий жихатдан мумкин эмас.

• *Тана учун зарур бўлган миқдордан кўп ейиш.* Ибн Сино ҳазрат шундай огоҳлантирадилар: *“Овқатнинг миқдори одат ва қувватга қараб белгиланади. Унинг миқдори қуввати яхши бўлган кишиларда еганда оғир бўлмайдиган, қобирга бошларини чўзмайдиган, қоринни кўпчиртмайдиган ва қўлдурабмайдиган, [меъда тепасига] сузиб чиқмайдиган, кўнгил айнитмайдиган даражада бўлиши ҳамда ютоқшини*

ёки [иштаҳа] тушувини, зеҳн пастлиги ва уйқусизликни келтириб чиқармайдиган ва бир муддатдан кейин кекирганда овқатнинг мазаси келмайдиган миқдорда бўлиши керак. Узоқ муддатдан кейин [кекирганда] овқатнинг мазаси келиб туриши энг ёмон ҳолдир!” (“Тиб қонунлари” 1/388 б.).

Бу ҳақда Боситхон Шоший ҳам шундай ёзадилар: “Сиҳ-ҳатнинг футурига боис бўладургон энг зўр сабаб таомни миқдори кўплигидурки, андин меъда қайнамоғи ва бошқа кўп офатлар пайдо бўлур” (“Қонуни Боситий” 2/304 б.).

Алихонтўра Соғуний шундай ёзадилар: “Шунинг учун шариатимизда айтулур: **“Бир киши тўқ қурсоқ устига таом еганидин [кўра], агар беришга одам тофмаса, итга бергани яхшидур”**. Демакки, мундоғ таом емаклик тан-соғлиқлики бузадур. Тарбияти бадан қилиб, тан-соғлиқни сақламоқ ҳар бир кишига шарият бўйича фарздур. Шу тўғридин, тўйуб туруб, устига ишгаб емаклик шариятда ҳаром бўлди”.

Мана анбиё, ҳукамоларнинг айтқон сўзлари шул. Шунга қараб ҳар бир киши амал қилиши фарздур. Бўлмаса, икки дунёда зиён кўрадур”.

• Фойдаси кам ва секин ҳазм бўлувчи овқатлар билан таомланиш. “Тиб қонунлари”да шундай келтирилади: “Меъда бузилишидан, хусусан, ёмон овқатлардан бўладиганидан зарарлироқ нарса йўқдир. Чунки у ғализ. Агар инсон овқатланишда ўртача бўлса, сифат ва миқдорда мўътадилликни ушласа, тананинг ундан олган фойдаси ортиқча еганниқидан кўра кўпроқ бўлади.

Овқатлардан пайдо бўлган вақтда бўгин оғриғи, буйрак оғриғи, астма, нафас сиқилиш, ниқрис, талоқ ва жигарнинг қаттиқлашиши, балғам ва савдодан келиб чиқадиган касалликларни тўздиреди” (“Тиб қонунлари” 1/387 б.).

“Фойдаси кам” дея таърифланаётган таомлар тиб китобларида ёмон қон ҳосил қилувчи (радиъ ул-каймус) деб келади.

Улар кўп бўлиб, мисол сифатида шароб (хамр), ҳардал (горчица), эчки гўшти, ҳўкиз гўшти ва бошқаларни келтириш мумкин.

• Турли таомларни аралаштириб ейиш. Бу ҳақда тиб манбаларининг энг катта қонунида Ибн Сино шундай қондани келтирадилар: “Энг ёмон нарса бир-бирига келишмайдиган овқатларни аралаштириши ҳамда овқатланиш вақтини узайтиришидир. Бунда аввалги овқат ҳазм бўла бошлаганида, кейинги овқат бориб қўшилади. Натижада овқатнинг бўлаклари ҳазм бўлишда бир-бирига баробар бўлмайди”.

Бир-бири билан аралаштириб еб бўлмайдиган махсулотлар ниҳоятда кўп. Ҳаттоки, устозларимиз 70 хил нарса бир-бири билан чиқишмайди, деган қондани айтадилар. Уларнинг ҳаммасини келтириш бу ерда имконсиз бўлиб, алоҳида китоб битилишини талаб қилади. Мисол сифатида факатгина энг машҳур биттасини келтирамиз – сут билан баглиқни аралаштириб еб бўлмайди.

Мўътадиллик ўта муҳим. Биз ўрта умматмиз. Ҳамма соҳада ўрта бўлишимиз керак. Агар меъеридан ортиқча ейилса, зарари аниқ. Тажрибали табиблардан Ўрол Ўзбекнинг билдиришича: “Ҳар қандай таом, ҳаттоки дейлик қўй гўшти ҳам иссиқлик бўлишига қарамай, тўйиб ейилса, совуқликка айланади”.

Мўътадил миқдор таом ҳақида ҳадиси шариф ва ундаги тиббий ҳикматларни тушунтиришда гапириб ўтдик. Қўшимча тарзида улуғларнинг қуйидаги қисқа, лекин ўзида кўплаб тиббий фойдаларни мужассам қилган байтни келтирамиз:

Агар тўйиб есанг шакар зарардур,
Қуруқ нон вақтида қанду асалдур.

Тўғри таомланиш инсоннинг соғу саломат бўлишига энг асосий омиллардан эканлиги ҳақида Аллома Алихонтўра

Соғуний роҳмаҳуллоҳ “Шифоул-илал”да шундай огоҳлан-тирадилар: “Кўз кўруб турадурки, кўфинча дард (касал)лар томоқдин бузулб [пайдо] бўладур. Энди, ҳар киши нафсини тийиб, емак-ичмакни тартибини сақлаш лозимдур”.

Шамсиддин Абу Абдуллоҳ “Тиббун-Набавий”да шундай ёзадилар: “Озуқа (таом)лар уч хил даража (мартаба)да бўлади:

1. Ҳожат даражаси (الحاجة مرتبة)
2. Кифоя даражаси (الكفاية مرتبة)
3. Ортиқча миқдор (الفضلة مرتبة)

Набий (соллаллоҳу алайҳи васаллам) инсонга қаддини тиклаб туриш даражасидаги луқмалар кифоя қилишининг хабарини берганлар. Бу билан унинг қуввати сусайиб, заифлашмайди. Агар ейишни ўша луқмалардан оширса, қорнининг учдан бирига есин, иккинчи ва учинчи бирликларини сув ҳамда нафас учун қолдирсин. Бундай қилиш бадан ва юрак учун фойдали. Чунки қорин таом билан тўлса, ичимликни сиздирмайди. Шу ҳолатда суюқлик ичса, унинг оғирлиги сабабли нафас олишга қийналиб, оғир юк кўтарган киши каби чарчайди ва машаққат чекади. Ҳолат шундай давом этаверса, натижада юрак фаолияти бузилади, аъзолар тоатларни бажаришга дангасалик қилиб, тўйиб ейиш оқибатида юзага келувчи шаҳватларга интилади. Демак, қориннинг доим ёки кўп ҳолларда таом билан тўла бўлиши бадан ва юрак учун зарардир.

Аммо аҳён-аҳёнда шундай бўлиб туришида зарар йўқ. Абу Ҳурайра (розияллоҳу анҳу) Набий (соллаллоҳу алайҳи васаллам) ҳузурларида “Сизни ҳақ билан юборган Зотга қасамки, унинг учун жой тополмайман”, деб қолгудек даражада сут ичганлар”.

Ҳикоя. Арабшунос олим Асадуллоҳ Қудратуллоҳ қори шундай маълумот берадилар: “Пайғамбар алайҳиссаломнинг

замонларида яшаган энг машҳур араб табиби бўлган. Исмои Ҳорис ибн Калада. Бу зотнинг Форс подшоҳи (Кисроси) Анушервон билан учрашган ажойиб, узун ҳикоялари бор. Унинг қисқача таржимаси шу: у киши Кисро билан учрашганларида Кисро сўрайди:

- Сен тибни қанчалик биласан? – деб. У киши:
- Энг аъло даражада, дейдилар.
- Тибнинг асли нима?
- Ал-азм.
- Нима у?
- Икки лабингни тийишлигинг ёки қўлингни мулойим қилишлигинг.

- Ҳа, топдинг. Дардларнинг энг дарди нима?

- Овқатни устига овқат ейишинг. Бу ҳаттоки саҳродаги энг йиртқич ҳайвонларни ҳам ҳалок қилиб юборадиган даражадаги дарддир.

- Ҳа, топдинг. Касалликнинг энг катта сабаби нима?

- Ҳаддан ташқари овқатланиш (ат-туҳма). Агар бунда овқат ошқозонда қолиб кетса, ўлдиради. Агар фаразан у ҳазм бўлган тақдирда ҳам касал қилади.

Юқоридаги суҳбатга Кисронинг вазири – Бузругмеҳр ҳам гувоҳ бўлган”.

Набий соллаллоҳу алайҳи васалламдан: “**Албатта ошқозон баданнинг ҳовузи ва томирлар унга тушувчи. Ошқозон соғлом бўлса, томирлар ҳам соғлом бўлади. Агар у касал бўлса, томирлар ҳам касал бўлади**” ҳадиси зикр қилинган.

Ҳорис айтади: “Даволанишининг боши парҳез”.

Бошқа ҳадиси шарифда Пайғамбар алайҳиссалом: “**Танада бир парча эт бор. Агар у соғлом бўлса бутун тана соғлом, агар у касал бўлса, бутун бадан касал бўлади. У қалбдир**”, деганлари машҳур.

Энди савол пайдо бўлади: инсон танаси учун энг муҳим аъзо юракми ё ошқозонми? Зеро, иккови ҳам шу маънода зикр қилинмоқда.

Биз бунга қуйидагича жавоб берамиз. Ҳар бир аъзонинг ўз ўрни бор. Бири-бирининг ўрнини босолмайди. Лекин, бошқарувчилик жиҳатидан юрак (қалб, дил) аъзои раисалардан ҳисобланади. Ва у оркали бутун танага қон, озуқа, кислород, ҳаётий қувват ва руҳи ҳайвоний (импульслар), минераллар ва бошқалар етиб боради. Агар у касал бўлса, шу жиҳатдан бутун жасад касал бўлади.

Табиблар наздида соғлом кишининг зарар берувчи нарсалардан парҳез қилиши – касал ва тузалаётган одамнинг аралаш-қуралаш таомлар ейишдан парҳез қилган билан баробар.

12-фасл. Таомланиш борасида баъзи қоидалар

Биринчи қоида: касалдан тузалаётган киши учун парҳез энг фойдали даво. Чунки унинг табиати ҳали хануз қувватга қирмаган, ҳазм қилиши заиф, табиати эса иштаҳага қирган ва аъзолар шунга тайёрланаётган бўлади. Бу пайтда таомларни аралаштириб юбориш касалликнинг қайталанишига олиб келади. Ушбу ҳолат касаллик бошланишидан ҳам оғирроқ.

Иккинчи қоида: тананинг тетик, бардам ва енгил бўлишини таъминлаш учун овқат кеч истеъмол қилинмаслиги ёки енгил ва камроқ бўлиши лозим. Бу қоида қарилар ва ёш болаларга татбиқ қилинмайди. Сабаби, қарияларда ҳазм заиф, ожиз бўлиб, қувватни сақлаб туриш учун тез-тез оз-оздан овқатланишга муҳтождирлар. Ёш болалар эса ўсувчан бўлиб, ўсиш учун етарли ғизо лозимдир.

Учинчи қоида: мизожга ва ҳаракатга мос овқатланиш. Балғам мизожли инсонлар иссиқ ва қуритувчи мизожли овқатлар, сафро мизожли инсонлар совуқ мизожли ва ҳўлловчи

овқатларга рағбат қилмоқлиги, савдо мизожлилар қўп ҳўлловчи ва оз қиздирувчи, қон мизож инсонлар озуқлиги оз ва совиувчи истеъмол қилиши фойдалидир. Чунончи йилнинг иссиқ фаслида сафро мизож соҳиблари таом миқдорини камайтириши ва суюқлик миқдорини қўпайтириши лозимдир.

Тўртинчи қоида: йил фаслларига мос овқатланиш. Ёзда совуқ табиатли, қишда иссиқ табиатли, баҳор ва кузда мўътадил табиатли озуқалар истеъмол қилмоқ лозимдир. Шунингдек, таом истеъмолида ҳазм қуввати, иштаҳа, меҳнат тури ва турмуш тарзини ҳам ҳисобга олиш зарурдир.

Суюқ ва ғализ (ҳазми қийин) овқатларни истеъмол қилиш қоидалари. Овқатлар истеъмолида табобатнинг маълум қоидалари бор. Ҳазми тез, суюқ овқатлар устига ҳазми қийин ғализ овқатлар истеъмол қилишдан сақланиш керакки, аввал ейилган ҳазми қийин овқат ҳазм бўлишга улгурмасдан, ундан кейин истеъмол қилинган ҳазми енгил таом ҳазм бўлиб, ошқозондан ичакка ўтишга йўл топа олмай туриб, сасиб чирийди ва аралашган нарсасини ҳам бузади. Чунончи, ҳазми қийин озуқалар, айниқса гўшти таомлар меъдада хлорид кислота таъсирида парчаланиши лозимки, уларни яхши парчаланмаслиги ичакларда оқсил парчаланишини охирига етмаслигига, бу эса сасиб чириш ва еллар ҳосил бўлишига ва организмнинг заҳарланишига сабаб бўлади.

Билингки, овқатланиш учун ошқозон ва ичакларнинг юқори қисми олдин истеъмол қилинган овқатлардан халос этилиши зарур. Ҳақиқий иштаҳа пайдо бўлишини кутиш лозим.

Инсон танасига энг зарарли нарса бу чала пиширилган овқатнинг истеъмол қилинишидир. Бундан ҳам ёмонроғи ҳазм бўлмайдиган, организмга ёқмайдиган таом ҳисобланади. Дағал, ошқозонда яхши ҳазм бўлмайдиган таомни истеъмол қилиш бўғимларда ва буйракда оғриқ бўлишига, нафас

олишнинг бузилишига, бронхиал астмага, жигар ва талоқнинг қаттиқлашишига ҳамда балғам ва қора ўт билан боғлиқ турли касалликларга олиб келади. Таом ҳазм қилиш ингичка ичакда бузилган бўлса, кучли иситма чиқишига ёки ёмон сифатли ўсмаларнинг пайдо бўлишига олиб боради.

Қишда иссиқ, ёзда совуқ ёки илиқ овқат ейиш лозим. Иссиқлик ва совуқликнинг ҳар иккиси чидаб бўлмас даражага етмаслиги керак. Қишда тўйимли, қуюқ таомларни, ёзда эса унинг акси бўлган таомларни истеъмол қилиниши лозим.

Бундан ташқари, ошқозонни бошқа таомларга жой қолмайдиган даражада тўлдириш ўта зарарлидир. Ҳар доим таом қабул қилгандан сўнг, иштаҳа сақланиб қолган ҳолда таом ейишдан тийилиш лозим. Қолдиқ иштаҳа эса, маълум вақтдан сўнг ўтиб кетади.

Овқатланганда одатий тарбияга риоя қилиши керак. Мазали, фойдали таомгина энг зарур озуқа ҳисобланади. Бундай озуқа истеъмол қилинганда ошқозон яхши ишлайди, инсон танасининг барча аъзолари бир-бирига мутаносиб равишда овқат ҳазм қилишда иштирок этади.

Овқатлангандан сўнг кўп суюқлик ичмаслик лозим. Чунки суюқлик овқатни ошқозондан ажратиб, уни меъдада сузиб юришга мажбур этади ҳамда ошқозон ширасининг кислоталигини камайтиради. Шунинг учун овқатни ошқозондан ўтишини кутиш лозим. Буни эса қориннинг юқори қисмида енгиллик сезиш орқали ҳис этиш мумкин. Агар одамни чанқоқ ҳисси қийнаётган бўлса, озгина совуқ сув ичиш мумкин (култумлаб).

Ҳар хил овқатларни аралаш истеъмол қилиш ярамайди. Масалан, ёғли овқатлар билан ширинликларни бир вақтда истеъмол қилиш, овқатлардан сўнг тезда ширинлик (десерт) қилиб, мевалар (масалан, олма) ейиш, катикни турп билан ёки қўй гўшти билан истеъмол қилиш, балиқ билан сутни

бирга танаввул қилиш, шароб ва сутни бирга ичмоқ никрис (подагра), баҳақ (тери рангини оқариши), товук тухумини доимий ковуриб истеъмол қилиш юзда сепкиллар, бош ва меъда бодларига сабаб бўлиши мумкин.

Хом, яхши пишмаган гўштнинг истеъмоли гижжа касалликларига, ваҳший ҳайвон ва ҳўкиз гўштини кўп истеъмол қилиш ақлий заифликка, хотирани пастлашига, фаросатсизликка организмда тикилмаларни кўпайишига олиб келади. Бу эса, сурункали касалликларни келтириб чиқаради.

Куруқ (мизожли) овқатларни кўп истеъмол қилиш гавда қувватини камайтиради, рангни бузади, ични қуритади. Ёғли нарсаларни кўп ейиш кишини ланж қилади, иштаҳани кетказади. Совуқ овқатларни кўп ейиш кишини бўшаштиради, нордонни кўп ейиш инсонни қаритади. Шунингдек, мазаси ўткир (аччик) ва шўр нарсани кўп истеъмоли меъда, кўзга зарар қилади.

Иссиқ нонни совуқ сув билан истеъмоли ёки иссиқ нон устига совуқ сув ичиш меъдада бузилишни келтириб чиқаради, тишларга зарар қилади.

Палов, ковурилган гўштлар устидан қовун, тарвуз, ширин мевалар истеъмоли ёки бўлмаса жигар ҳазми учун яхши бўлган таомлар устидан оғир ва ёмон ҳазмли озуқалар, шунингдек ширинликлар истеъмоли мумкин эмас. Бундай ҳолатларда овқат ҳазми жуда қийин бўлиб, шундай овқатланиш тартибини узоқ давом этиши жигар заифлиги, истиксога сабаб бўлиши мумкин.

Шунингдек икки иссиқ мизожли, икки совуқ мизожли, икки хил бодли, икки бадҳазм, икки қабзият чакирувчи, икки бўшаштирувчи таомни бир вақтда ва бир маротабада истеъмол қилинмайди. Аччик сабзавотларнинг қишда фойдаси кўпайгани каби, ширинларнинг ёзда фойдаси кўп бўлади.

Ёмон овқатлар ейишга мажбур бўлган инсонлар ейиш навбатини озайтирсин, кетма-кет емасин ва уларга зид нарсалар аралаштирсин.

Ширин нарсалардан азиятланадиган инсонлар ширин нарса устидан сирка, сиканжубин, беҳи ва шунга ўхшаш нордон нарсалар ичсин ва ичини бўшатсин. Нордон нарса истеъмолидан азиятланган киши унинг устидан асал есин. Бу тадбирлар олдин ейилган нарсани ҳазм бўлишидан бурун бўлиши лозимдир.

Шунингдек ёғли нарсадан азиятланувчи инсон дуб ёнғоғи, мирта уруғи, шом жинжаги, кунор дарахти меваси, дўлана каби нордон ва тахир нарса, шом занжабилига ўхшаш аччиқ нарса, шунингдек пиёз ва саримсоқ сингари шўр ва мазаси ўткир нарсалар билан даволансин.

Набий соллаллоҳу алайҳи васаллам касалликдан энди тузалаётган Али розияллоҳу анҳуни ғужум хурмоларни ейишдан қайтаришларида ғўзал тадбир бор. Ейиш учун осиб қўйилган барра хурмо (рутаб) шодалари узум бошлари кабидир. Мева тез ўзгарувчан ва касалдан энди тузалган одамнинг табиати ҳимоя қила оладиган даражада қувватга кирмагани боис у мевани ейиш ўша касал учун зарарли. Чунки унинг табиати ҳали касаллик қолдиқларини танадан чиқариб юбориш билан машғул. Айнан барра хурмо (рутаб)нинг ошқозонга оғирлик тарафи бор. Ошқозон уни муолажа қилиш ва ислоҳ қилишга киришиб, касаллик асоратларини чиқариб юборишдан юз ўгиради. Натижада, касаллик асоратлари тўхтаб шундайлигича қолади ёки яна ривожланиб кетади.

Олдиларига арпа ва лавлагидан тайёрланган егулик қўйилганида у Зот соллаллоҳу аалайҳи васалам ҳарати Алий каррамаллоҳу ваҳҳаҳуга ундан ейишга буюрдилар. Чунки у касалдан энди тузалган одам учун фойдали. Негаки, арпанинг сувида совитиш, юмшатиш, тўйимлилиқ ва табиатга

қувватбахшлиқ бор. Бу эса касалликдан энди тузалган киши учун жуда фойдали. Айниқса, у лавлагини билан пиширилганда ошқозони заиф одам учун мос таом ва у сабабли хилтларда хавфли ўзгаришлар пайдо бўлмайди.

Ибн Сино ҳазратлари “Тиб қонунлари”нинг “Касалдан янги турган кишига бериладиган овқатлар” фаслида бу ҳақида шундай ёзадилар: *“Бериладиган овқат яхши каймусли (ҳасанул-каймус) ва ҳазми енғил (сарифул-ҳазм) бўлиши керак. Билгинки, рутубатли суюқ овқатларнинг озиқлиги тез ва кам бўлади. Аммо, хоҳ овқат, хоҳ ичимликларнинг ғализ ва қуюқлари бунинг аксичадир...”* (“Тиб қонунлари” 4-китоб, 214-б.).

Ҳадис шарифда айтилганидек, рутаб, яъни янги етилган хурмонинг баъзи зарарлари ҳам бор. Юқорида бўлиб ўтган воқеадан маълум бўладики, Пайғамбар алайҳиссалом ҳазрати Али каррамаллоҳу ваҳҳаҳунинг қандай касаллик билан оғриб энди тузалаётганларини билганлар. Ва албатта рутабнинг хусусиятларидан хабардор бўлганликлари учун уни ейишдан қайтарганлар (шариатда ҳам *“Садъуз-зарорайн”*, яъни “зарарни дафъ қилиш” ва *“дафъул лизарро муқаддамун мин-жанби манфаъа”*, яъни “зарарни дафъ қилиш фойдани жалб қилишдан муқаддам туради”, деган қоида бор. Хуллас, токим, зарарни йўқотилмас экан, фойдали ишга уринилмайди).

Уй эгаси саҳобия розияллоҳу анҳо ҳам зийрак аёл эканлар, дарров касалликдан тузалаётган киши учун муносиб таом тайёрлаб чиқдилар.

Хифзи сиххатнинг асосий қоидаларидан бири овқатнинг асосий қисми сабзавот ва мевалардан бўлмоғи (даво бўладиган овқатлар, яъни давои ғизодан бўлмаслиги) керак. Чунки давои ғизо озуқаларининг латифлари суюлтирувчи, қонни куйдирувчи, ғализлари эса балғамнинг кўпайтирувчи ва аъзога оғирлик келтирувчидир.

Шунинг учун овқат гўштга ўхшаш нарсалардан бўлиши, айникса улоқ, бузоқ, қўзичоқ гўштлиридан, офат етмаган экологик соғлом жойда ўстирилган ГМО, кимёвий қўшимчалар (химикатлар) билан ишлов берилмаган, қўшимчаларсиз буғдойдан, ширин ва мизожга мос ичимликлардан бўлиши лозим. Булардан бошқа ғизолар даволаниш ва касалликнинг олдини олиш учунгина ишлатилади.

Ибн Сино бундай ёзадилар: *“Мевалардан овқат учун мос келадигани анжир, етилиб пишиган узум, одат қилинган шаҳар жойларида хурмодир. Агар шу нарсаларни истеъмолда чиқиндилар пайдо бўлса, тезлик билан ўша чиқиндини бўшатишга ҳаракат қилмоқ керак. Овқатнинг иштаҳа билан емоқ ва иштаҳани қайтармаслик лозим. Иштаҳа бўлган ҳолда овқатдан қайтиш меъдани ёмон зардобли хилтларга тўлдиради. Овқатлангандан сўнг кўнгил айнаш, ҳолсизланиш, уйқусизлик каби ҳоллар рўй бермаслиги, кекирганда овқат мазасини, таъмини ҳис этмаслик лозим.*

Меъёрда овқатланганда томир уриши тезлашмайди, нафас қисмайди, балки ортиқча овқатланганда ошқозон кенгайиб, унда босим ортиши туфайли кўкрак-қорин тўсиги юқорига кўтарилиб, кўкрак қафаси тораяди, юрак уриши, томир уриши, нафас олиш тезлашади ва одамни беҳол қилади.

Гавдага энг зарарли нарса меъдада овқат етилмасдан ва ҳазм бўлмасдан туриб яна овқат истеъмол қилишидир!”

Зайд ибн Аслам айтади: “Умар розияллоху анху бир касални парҳез қилдирдилар. Шунчалик қаттиқ парҳез қилдирганлари сабабли, ҳатто у данак шимарди”.

Хуллас, парҳез касал бўлишдан олдинги энг фойдали даволардандир. У касалликнинг келишини олдини олади. Агар касаллик келса, уни кучайиши ва кенг тарқалишини тўхтатади.

13-фасл. Ғизо ва унинг турлари

Табобатда озиқ-овқатларнинг умумий номи ғизо деб аталади. Улар уч турли бўлади (“Қонуний Боситий”да ғизонинг 7 хили саналган: 1-ғизои мутлоқ, 2-давои мўътадил, 3-давои мутлоқ, 4-ғизои давои, 5-давои ғизои, 6-давои саммий, 7-саммий мутлоқ):¹⁷

1. Ғизои мутлоқ (мутлоқ озуқа).

2. Ғизои давои (асосан озиқлантириш мақсадида ишлатилади, дорилик хусусияти қўшимча).

3. Давои ғизои (асосан дори сифатида қўлланилади, қўшимча озуқа сифатида фойдаланилади).

1.Ғизои мутлоқ. Организмга кирганда озуқа сифатида баданнинг эҳтиёжларини таъминлайди, қувватлайди ва ўстиради. Бу ҳам ўз навбатида иккига бўлинади:

1.1.Ғизои латиф. Истеъмол қилинганда осон ҳазм бўлиб, сингувчи, суюқ, юмшоқ, қуввати юқори бўлган озиқ-овқатлардир. Булардан суюқ, латиф қон пайдо бўлади. Масалан: илитилган тухум сариғи, моул-лахм (“гўшт суви”), чумчук, каклик, каптар, жўжа гўшти, ҳалим, сариёғ ва ёш қўй гўшти. Бу озуқалар сурункали касалликларга чалинган ёш болалар ва қарияларга тавсия қилинади.

1.2.Ғизои гализ. Ҳазми қийин, қуюқ, бақувват озуқалар бўлиб, буларнинг истеъмолидан қуюқ, бақувват, пишиқ қон туғилади. Буларга палов, кабоб (шашлик), тандир кабоб, манти, ўрдак кабоб, ёғда қовурилган тухум ва бошқалар киради.

2.Ғизои даво (биринчи ўринда озиқлантириш хусусияти бўлган дорисифат озуқалар). Булар организмга тушгач, ҳам озиқлантиради, ҳам дорисифат таъсир қилади. Буларга шолғом, турп, бодринг, сабзи, олма, нашвати, шафтоли, узум, анжир ва полиз маҳсулотлари кириб, организмда пешоб ҳайдовчи, каб-

¹⁷ “Қонуни Боситий” 300-б.

зиятни бартараф қилувчи, иштаҳани очувчи, сафро ва қон хилтининг ҳароратини пасайтирувчи таъсир қилади.

3. *Давои ғизо* (биринчи ўринда даволовчи, озуқалиги қўшимча бўлган озуқалар). Бу озуқалар асосан даволовчи ва баданни кучайтирувчи ва озиқлантирувчи таъсирга эга бўлиб, турли касалликларнинг самарали даволашда кенг қўлланилади. Буларга қизилгул, райҳон, анжир, бодом ва писталар қиради.

Умуман олганда, табобатда ғизолар билан даволаш касални тез соғайишига ва асоратсиз даволанишига сабаб бўлувчи, муваффақиятли ва самарали даволанишни таъминловчи, муҳим заруриятлардан бири сифатида қаралади.

14-фасл. Сув ва ичимликлар ҳақида

Сув барча жонзотлар учун ҳаёт манбаи бўлиб, гарчи у озуқа бўлмасада, организмдаги барча моддалар алмашинуви жараёнлари сувда эриган ҳолатда амалга оширилади. Сув эритувчи бўлиб, озуқа моддалар, чиқиндилар ва ферментатив жараёнларининг катализатори ҳисобланади.

Танамизнинг аксар қисми сувдан иборатлигини ҳам қўп бора эшитгансиз. Хўш, одам организмнинг қанча қисми сувдан иборат? Сув танамизнинг барча аъзоларида, ҳатто суяк тўқималарида ҳам мавжудми?

Буни қарангки, танамизнинг ҳар битта ҳужайрасида сув мавжуд. Тўғрироғи, ҳужайраларимиз деярли сувдан иборат. Бош мия ҳужайраларида сув 80%, мушакларда 76%, суяк тўқимасида эса 25% ни ташкил этади. Аслида бу ҳақда бундан 1400 йил муқаддам Аллоҳ таоло ўз Каломи мажидида қуйидагича марҳамат қилиб билдирган:

“Аллоҳ ҳамма жониворларни сувдан яратди” (Нур, 45).

Дарҳақиқат, сув – улуғ неъмат. Сув – ҳаёт манбаи ва Аллоҳ таолонинг мўъжизасидир. Аллоҳ таоло Қуръони Каримда бутун инсониятга қарата шундай марҳамат қилади:

“Ўзларингиз ичадиган сувни ўйлаб кўринг-а! Уни булутлардан сиз туширасизми ёки Биз туширувчимизми? Агар хоҳласак, Биз уни шўр қилиб қўямиз. Шукр қилсангиз-чи!” (Воқеа, 68-70).

15-фасл. Қандай сув биз учун фойдали?

Албатта биз инсонлар, нафақат инсонлар, балки дунёдаги барча тирик жонзотлар сувсиз ҳаётимизни тасаввур эта олмаймиз. Сув бизнинг тириклик манбаимиз, ҳаётимизнинг асосидир.

Истеъмол қилаётган сувимиз қандай сифатлар билан сифатланган бўлиши керак? Бу ҳақда бир неча юз йил аввал Ҳиндистонда яшаб ижод этган бобомиз, подшоҳ Заҳириддин Муҳаммад Бобурнинг машҳур, шахсий табиби Муҳаммад Юсуфий ёзганлар. У зот табобатга оид назм билан ёзилган форсча “Ейиладиган ва ичиладиган нарсалар ҳақида рисола” китобида ҳозирги олимларимиз кашф этган илмий хулосаларни ўша асрдаёқ айтиб кетганлар:

*Сув ичмоқликни агар айласанг хаёл,
Анхор сувидан айла истеъмол,
Қара, унда бўлсин бир неча хислат,
Шундагина бўлмас унда ҳеч иллат.
Биринчиси, тош узра бўлсин у равон,
Иккинчиси, баланддан оқсин паст томон,
Учинчиси, вазни ҳам енгилроқ чиқсин,*

*Тўртинчиси, бўрондек чарх уриб оқсин,
Бешинчиси, йўл узра бирорта нодон,
Ифлослаб қўймасин уни ногохон.
Олтинчиси, гўзаллар лабидек ҳалол,
Еттинчиси, майли келса қаёқдан,
Меҳри нур сувидек келсин узоқдан.
Шундай сув бўлса сенга муяссар,
Касаллик ҳеч қачон қилмагай асар.*

Албатта, ҳозирги кунда юқоридаги сифатлар билан сифатланган сувни топиш осон эмас. Нима қилсак истеъмолимиздаги сувлар “тирик” ва шифобахш сувга айланади?

(эслатма: “тирик сув” – ёмон ахборотлардан холи, сувни майда кристалларидан (қор, муз парчаларидан) ҳосил бўлган, енгил, ишқорий муҳитли сув ҳисобланади).

Бунинг учун сув қувуридаги сувдан олиб, (хлор ва фтор газлари чикиб кетиши учун) устини бир кун давомида қисман очиб қўямиз. Кейин уни 95 даража иссиқликкача қиздирамиз (қайнашга оз қолади). Ушбу сувни табиий совигач, уни музлаткичга қўямиз.

4 соатдан сўнг, сувнинг юза қисмида ҳосил бўлган биринчи яхни олиб ташлаймиз (унда захарли дейтерийли сув йиғилган бўлади).

Яна шу сувни музлаткичга қўямиз. Ҳосил бўлган муз парчасини олиб, унинг остки қисмини ҳам тўкиб юборамиз (унда оғир металл тузлари ва кимёвий бирикмалар чўкинди си бўлади. Агар сувнинг ҳаммаси музлаган бўлса, эритилгандан сўнг остки қисми тўкиб юборилади). Муздан тушган сув биз учун фойдали тирик сувга айланади.

16-фасл. Сувнинг фойдали хусусиятлари

1. Баданнинг энг тор йўлларида озик моддаларни суюлтириб ўтказади. Шунингдек, вужудимиздаги барча хилтлар сув ёрдамида суюлиб фаолият кўрсатади. Айни дамларда жуда кўпчилигимиз сув истеъмолини сифат ва миқдор жиҳатдан нотўғри олиб боришимиз сабабли қон қуюқлашиши, ич қотиши ва турли тери касалликлари куршовида қолганмиз. Сув етишмаслиги бунинг негизида асосий ўринлардан бирини эгаллайди.

2. Овқатни ҳазм бўлишга тайёрлайди. Яъни, танага тушган озуқалар ҳазм аъзолари томонидан парчаланиши ва сўрилиши учун сувнинг ўрни бекиёсдир. Сув ёрдамида озуқалар ичаклар томонидан ўзлаштириш даражасигача парчаланади.

3. Овқатни меъдада қуйишига қаршилиқ қилади. Яъни, ошқозон шираси (хлорид кислота) таъсирида парчаланаётган озуқаларни ҳаддан ортишига йўл қўймайди.

4. Бадандаги ортикча хилтларни организмдан (тер, сийдик, ахлат ва қусиқ каби) турли йўллар орқали чикиб кетиши учун ёрдам беради.

5. Сув ўзининг зотий совуқлиги билан баданни иссиқ кунларда тер орқали совитади ва тана ҳароратнинг меъёрий назоратида бевосита иштирок этади.

6. Баданни руҳнинг таъсири, ҳаракати, шунингдек сафро ва савдонинг иссиқлиги ва қуруқлигини меъёрлаштиради ва ҳ.к.

Ибн Сино ҳазратлари шундай ёзадилар: “Сувларнинг энг яхшиси булоқ сувидир. Лекин ҳамма булоқнинг эмас, балки ери тоза ва турпогида биронта чет хусусият ва кайфият бўлмаган булоқ сувидир. Шунингдек, булоқ суви оқадиган жой тошли бўлиши керак. Чунки у балчиққа ўхшаб сасимайди.

Ҳамма тоза турпоқли булоқнинг суви яхши бўлавермайди. Сув оқар бўлиши, оққанда ҳам қуёш ва шамоллар учун очиқ жойда оқиши керак.

Сувнинг оғирлиги унинг сифатини аниқлашда самарали усулдир. Енгилроқ сув яхшироқ бўлади. Сувнинг вазнини қуйидаги усул билан ўлчаши мумкин: оғирлиги бир хил бўлган мато ёки пахтани икки хил сув билан ҳўллаб, кейин улар яхшилаб қуригилади ва тортилади. Қайси бир пахта енгил келса, ўша ҳўлланган сув яхшироқ бўлади.

Сувни қайнатилиши унда совуқликдан пайдо бўлган қуюқликни кетказиши ва ундаги аралашмаларни чўктириши орқали латифлаштирилади.

Ёмғир суви энг яхши сув ҳисобланса ҳам, у тез сасийди. Чунки у жуда суюқ бўлиб, ер ва ҳавонинг бузилиши тез таъсир қилади. Зарурат юзасидан тез сасийдиган ёмғир сувини ичишга тўғри келганда, нордон нарсаларни ейиши унинг зараридан сақлайди...

Муз ва қорлар анча тоза сув бўлиб, уларнинг суви биронта ёмон қувват аралашмаган бўлса, эритиб сув қилинса ҳам фойдали бўлаверади. Лекин бундай турдаги сув зичроқ бўлгани учун асаблари оғрийдиган кишиларга зарарлидир...

Исломишунос Асадуллоҳ Қудратуллоҳ қори шундай маълумот берадилар: “Сийрат китобларида дунёдаги энг афзал сув бу Расулulloҳ соллаллоҳу алайҳи васалламнинг бармоқларидан мўъжиза ўлароқ чиққан сувдир, дейилган. Барокат ва шифоликда унга етадигани йўқ. Ундан кейин зам-зам суви муборак ва шифоликда энг аълодир. Валлоҳу Аълам”.

17-фасл. Сув ичишнинг вақтлари

Билмоқ керакки, совуқ сувдан мўътадил миқдорда ичиш меъдага қувват беради ва иштаҳани очади. Совуқ сув истеъмоли иссиқ мизожли ва бақувват ёшларга шунингдек, баъзи

иссиқликни ортиши билан кечувчи касалликларда ва иссиқ фаслларга тўғри келади. Чунки совуқ сув хилтларнинг чириши ва қўзғалишини босишда, юрак ва ошқозон ҳароратини меъёрлашда фойдалидир.

Қуйидаги ҳолларда совуқ сув истеъмоли табобат илмида қайтарилган: наҳорда, бадантарбиядан кейин, ҳаммомга тушгандан кейин, оч коринга, жинсий алоқадан кейин, иссиқда юргандан сўнг, ўрик ва қовун истеъмолидан кейин ва хазми қийин овқатлар истеъмолидан кейин. Шунингдек, совуқ мизожли инсонлар, қариялар ва совуқликни ортиши билан кечувчи касалликларда совуқ сув истеъмолидан тийилиши лозимдир.

Ибн Сино ҳазратлари бундай ёзадилар: “Мўътадил мизожли [инсонлар]га ёқадиган сув совуқлиги ўртача ва ташиқаридан муз билан совитилган сувдир”. Бу ҳукм иссиқ фасллар учун хосдир.

Ибн Сино яна давом этадилар: “айниқса, муз ёмон бўлганда [уни сувнинг ичига солинамасин], муз яхши бўлса ҳам барибир”. Музлаткичда ёки ичига муз солиб совитилган сув ўта зарарлидир.

Ибн Сино яна давом этадилар: “Чунки сувда эриган [муз] асабларга, нафа аъзоларига ва умуман ички аъзоларга зарар қилади. [Ичига муз солиб совитилган сувни] қони жуда кўп бўлган кишилардан бошқалар кўтара олмайди. Бундай сув дарҳол зарар қилмаса ҳам, вақт ўтиши билан ва ёш улғайиши билан зарар қилади”.

Меъёрдан кўп сув ичиш уч сабабдан инсон учун зарарлидир:

1. Барча аъзолар, жумладан раис аъзоларнинг туғма қувватини пасайтиради.

2. Жигарнинг туғма иссиқлик қуввати пасайиб, қондан сувни айириб буйракка юбориш қуввати пасаяди. Натижада истисқо (асцит) касаллигининг келиб чиқиш эҳтимоли ор-

тади. Шунингдек, буйрак ва сийдик қопининг фаолияти заифлашиб, сия олмаслик ёхуд сийдик томчилаши касаллигига мойиллик ортади.

3. Овқатни суюлтириб, ҳазм жараёнларини бузади ва овқатни вақтидан илгари яхши ҳазм бўлмасдан пастга тушиб кетишига сабаб бўлади.

4. Сувни овқатдан 1-2 соат илгари ёки овқат истеъмолидан 1-3 соат ўтиб истеъмол қилиш мақсадга мувофиқдир. Овқат вақтида сув истеъмолидан тийилиш тикилиб қолмаслик учун, кам миқдорда, қултимлаб ичиш тавсия қилинади.

Иссиқ сув истеъмоли. Табобат аҳли куёшда туриб исиган сувни ишлатишдан қайтарган.

Иссиқ сув таом устидан ичилса, ҳазмни бузади ва кўнгилни беҳузур қилади. Иссиқ сувни наҳорда ичиш меъдадаги балғам ва бошқа хилтларни эритиб, ичак ҳаракатини кучайтириб, ич келишга ёрдам беради.

Иссиқ сув оғрикка таскин беради. Сийдик ва ҳайзни равон қилади. Совуқлик билан кечувчи касалликларда фойдалик. Чунки қайноқ сув моддани пишириб етилтиради.

18-фасл. Учинчи зарурий омил – уйқу ва уйғоқлик

Мўътадил уйқу табиий қувватга ўз ишини бажаришда мадад бериб, нафсоний қувватларни роҳатлантиради ва кун бўйи сарфланган қувват (энергия)ни тиклайди. Ўсиш жараёни асосан уйқу вақтида бўлади.

Сабаби, тўртинчи ҳазм асосан кечаси бўлади. Ўт-тош касалликларида тошни парчаловчи дориларни кечаси ичиш тавсия қилинади. Кечаси яхши ухлаган чақалоқ ўсиши ва ривожланиши жиҳатдан кечаси ухламайдиган чақалоққа нисбатан сезиларли фарқ қилади. Кечаси вужуд куни билан бошдан

ўтказган фаолиятларни сарҳисоб қилади. Мия фаолияти ва бошқа ички аъзоларнинг фаолияти тизимланиб, ўзларидаги кераксиз чиқиндиларни тозалайди ва иммун тизими рағбатланади. Инсон кечаси яхши ухлаганда эндорфин, соматотропин ва тестостерон баланд юради.

Кечаси билан ухлай олмайдиганларнинг кортизол – стресс гормони баланд, тестостерон эса паст бўлади. Тестостерон нафақат жинсий гормон, у териға ва кайфиятга ҳам таъсир этади. Бу даврда ухлалмаслик инсоннинг гормонал тузилиш мутаносиблигини бузади).

Имом Заҳабий роҳмаҳуллоҳ “Тиббун-Набавий” асарида шундай ёзадилар: “Керагидан ортик ухлаш ҳамда уйқусизликнинг мияға ва ҳамма қувватларға зараридан сақланмоқ керак.

Ухлаш тадбириға тўхталладиган бўлсак, энг афзали таом ҳазм бўлганидан кейин чуқур ухлашдир.

Уйқуни Росулulloҳ соллаллоҳу алайҳи васаллам қилганларидек, ўнг томон билан ётишдан бошлаш лозим бўлади. Бу Оиша онамиз розияллоҳу анҳо онамиздан ривоят қилинади: **“Албатта у Зот қиблага юзланиб уйқуга кетар эдилар”**, - деганлар.

Кундузги уйқу (навмун-наҳар) зарарли бўлиб, рангни бузиб, касалликларни келтириб чиқариб, ланж қилади. Кундузги уйқудан эҳтиёт бўлгин! Фақатгина, жазирама иссиқ бўлса, Набий соллаллоҳу алайҳи васалламнинг: **“Дам олинглар. Албатта шайтонлар дам олмайди”**, сўзларига мувофиқ дам олиш жоиз.

Набий соллаллоҳу алайҳи васаллам: **“Кечани қоим қилиш (қиёмул-лайл)ға, кундузи қайлула қилиш билан фойдаланинглар”**, - дедилар.

Яна у Зот соллаллоҳу алайҳи васалламдан ривоят қилинади: **“Тонгда ухлаб ётиш (навмал-сабаҳ) ризқдан маҳрум қилади”**.

Жобир розияллоҳу анҳудан ривоят қилинади: *“Расулуллоҳ соллаллоҳу алайҳи васаллам киши жисмининг баъзи қисми қуёшда ва баъзи қисми сояда бўлган ҳолда ухлашдан қайтардилар”*.

Оиша онамиз розияллоҳу анҳо айтадилар: *“Ким асрдан сўнг ухласа, ақлдан озади. Бас, у инсон фақат ўзини маломат қилсин”*.

Имом Аҳмад ибн Ҳанбал роҳимаҳуллоҳ: *“Киши ақлу ҳушини йўқотишидан хавф қилиб, асрдан кейин ухлашни макруҳ дейман”*, - дедилар.

Бомдод намозидан сўнг, ҳатто қуёш кўтарилгунча ва хуфтондан олдин ухлаш макруҳ бўлади. Набий соллаллоҳ алайҳи васаллам хуфтондан олдин ухлашни ёки хуфтондан сўнг гаплашишни карохият ҳисоблар эдилар. Албатта, гаплашиш илм ёки зикр ёки музокара аҳлининг суҳбати бўлса, карохият ҳисобланмайди. Оч қоринга ухлаш ҳам ёмон у қувватни су-сайтиради”.

19-фасл. Тўртинчи зарурий омил – ҳаракат ва суқун

Ибн Сино ҳазрат “Тиб қонунлари”да шундай ёзадилар: *“Бадантарбия бу кишининг чуқур ва кетма-кет нафас олишга мажбур қилувчи ҳаракат бўлиб, соғлиқнинг сақлашда асосий тадбир ҳисобланади”*.

Маълумки, бадан доим егулик ва ичимликка муҳтож. Таомнинг ҳаммаси ҳам танага сингмайди. Ҳазм жараёнида озгина бўлса-да, қолдиқ-чўкиндилар қолади. Вақт ўтиши билан улар кўпайиб, маълум миқдори танада тўпланиб қолади. Натижада тана оғирлашиб, тикилма (судда)лар ҳосил бўлади. Натижада [хилтларнинг] қамалиб қолиш касаллиги (амрозул-ихтибос) келтириб чиқаради.

Бундан халос бўлиш мақсадида турли дори-дармонлар истеъмол қилиниши бир аъзони тозаласа, иккинчисига зарар етказади. Натижада бошқарув ва хизмат қилувчи аъзоларнинг қуввати пасаяди. Чунки, уларнинг аксари заҳарли бўлиб, тана учун фойдали (солиҳ) моддаларни ҳам чиқариб юборади!

Бундан ташқари, қолдиқ-чўкиндилар йиғилавергани сари димланиб, айнийди (чирийди). Бу эса, баданнинг табиий ҳарорати (ҳарорати ғаризийа)ни пасайтиришига олиб келади. Чўкиндилар пайдо бўлиши муттасил давом этадиган жараён. Муайян муолажа билан ҳам буткул йўқотиб бўлмайди. Энг яхши йўл уни олдини олишдир! Энг яхши даво – ҳаракатдир!

Ҳаракат сабабли инсон терлайди. Натижада чўкиндилар эрийди. Гап ўз-ўзидан бадантарбияга такалмоқда. Маълумки, бадантарбия вақтида ва меъёрида амалга оширилса, у баданга енгиллик бағишлайди, иссиқликни оширади, танани озуқа қабул қилишга тайёрлайди, чиқиндиларни чиқариш йўли томон ҳаракатлантиради, бўғимлар бақувватлашиб, пайлар мустаҳкам бўлади, тортувчи қувватларни ҳаракатга келтириб, рутубатларни суюлтиради ва тери тешикчаларини кенгайтиради.

Шунингдек, моддий касалликларнинг ҳаммасини ва мизожий хасталикларнинг кўпини олди олинади. Бундан ташқари, меъёрида қилинган машқ сабабли юзга қон юради, бадан чиниқади ва намланиб озиқланади.

Имом Заҳабий роҳимаҳуллоҳ “Тиббун-Набавий” асарида шундай ёзадилар: “Билгинки, мўътадил ҳаракат соғлиқни сақлашдаги сабабларнинг энг кучлисидир. Албатта у аъзоларни қиздириб, ортиқча нарсаларни эритиб, баданни енгил тетик қилади.

Таом ошқозондан тушгандан сўнг, мўътадил ҳаракат [учун] вақтни тақсимланади. Мана шу ошқозондан тушади-

ган микдор беш ёки олти соат ёки ундан оз ёки кўпроқ. Бу инсонларнинг мизожлари ва таомга қараб ҳисобланади.

20-фасл. Бадантарбияни бошлаш ва тўхтатиш вақтлари

Бадантарбияни бошлашда гавда тоза, ички аъзоларда ёмон етилмаган хилт бўлмаслиги лозимки, бадантарбия ушбу хилтни кўзгатиб, таркатиб юбориши мумкин. Шунингдек, қорин очлик ва тўқлик ўртасида бўлиш лозимки, очликдаги бадантарбия қувватни сусайтиради. Тўқликдаги бадантарбия ҳазм ишларига ҳалақит беради. Лекин, оч қоринга қилинган бадантарбиянинг зарари тўқ қоринга қилинган бадантарбиянинг зараридан кўпроқдир.

Гавдаси қуруқ ва ориқ кишиларнинг бадантарбияси енгилроқ, гавдаси семиз, совуқ ва ҳўл инсонларники эса давомийроқ ва шиддатлироқ бўлгани маъқул.

Бадантарбия қилмоқчи бўлган инсонлар аввало катта ва кичик ҳожатдан фориғ бўлиб, кейин бадантарбия қилишлари лозимдир. Бадантарбия қилувчилар ва кўп машаққатли ишларни бажарувчилар ҳазми қийин овқатларни осон ҳазм қилишади. Ҳўл мевалар ёзда меҳнат ва бадантарбия қилувчи сафро мизожли кишиларга ёқади. Бу меваларни овқатдан олдин истеъмол қилмоқ лозимдир.

Бадантарбиянинг давомийлигига келсак, бунда уч нарсага эътибор қилинади:

1. Терининг ранги ижобий томонга ўзгарса, ҳаракатни давом эттириш лозим.
2. Ҳаракатларни ортикча машаққатларсиз, енгил бўлиши давом эттиришга кўрсатма бўлади.
3. Агар беморда тер маржон-маржон бўлиб қуюлса, каттиқ энтиқиш, тери рангининг оқариши, юрак беҳаловат бўл-

са, бадантарбияни тўхтатиш лозим бўлади. Ундан кейин мой билан ишқаланиш саломатлик учун жуда манфаатли ҳисобланади.

Ибн Сино “Тиб қонунлари”нинг 1-китобида бадантарбия ҳақида қуйидагиларни ёзадилар: *“Мўътадил равишда ва ўз вақтида бадантарбия билан шугулланувчи одам бузилган хилтлар туфайли келган касалликларнинг ва мизож, ҳамда илгари ўтган касалликлар туфайли келувчи касалликларнинг давосига муҳтож бўлмайди. Бунда, албатта, ўзга тадбирлар ҳам мувофиқ ва тўғри амалга оширилиши керак.*

Масалан, сен биласанки, биз овқатга ва соғлиғимизни сақлашга муҳтожмиз. Кейингиси ҳам мувофиқ, миқдори ва кайфияти мўътадил бўлган овқатни истеъмол қилиш билан бўлади.

Ҳар бир аъзонинг ўзига хос машқи бор. Масалан, кўкракнинг машқи – ўқиш. Бунда аввал ичида ва кейин овоз чиқариб ўқишга ўтади.

Қулоқ товуш ва гапларни босқичма-босқич эшиттириш билан машқ қилдирилади. Шунингдек, тил ва кўз ҳам машқлари воситасида чиниқтирилади.

От минни, камон отиш, қураш ва югуриш каби машқларда бутун бадан ҳаракатда бўлиб, бу мохов, истисқо, қуланж каби сурункали касалликларнинг олдини олади.

Нафснинг машқи – таълим олиш, одоб ўрганиш, шодланиш, сабр-бардош, олийжаноблик, мардлик, яхшилик каби амаллардир. Булар ичида энг афзали – сабр, муҳаббат, шижоат, эҳсондир. Нафс мазкур ҳолатларга аста-секин мослашиб, бора-бора одатга айланади”.

Сиз Расулulloҳ соллаллоҳу алайҳи васалламнинг шу бо-радаги йўллари ҳақида фикр юритсангиз, унинг энг мукам-мал йўллигини, инсон соғлиғи-ю қувватларини сақловчи эка-нини биласиз.

Имом Заҳабий роҳимаҳуллоҳ “Тиббун-Набавий” асарида шундай ёзадилар: “Қайси аъзонинг машғулоти кўп бўлса, кучли ва ҳаракатчан бўлади.

Руҳий қувватда ҳам шундай. Агар ёдлаш эсда тутиш кучли бўлишини хоҳласа, ёдлашни кўпайтирсин. Зикр ва фикр юритишида ҳам шундай.

Ҳар бир аъзонинг ўзига хос машғулоти бор. Кўкракники қироат бўлиб, қироатда паст овоздан бошланиб, баланд овозгача бўлади. Кўзники майда хатни кўриш, қулоқники ёқимли нафис товушларни эшитишидир. От минини бадан машғулотлари ичида барча машғулотларнинг мўътадили ҳисобланади”.

Расулulloҳ соллаллоҳу алайҳи васаллам бизларни баданларимиз ва қалбларимизни ислоҳ қиладиган машғулотга йўллаганлар.

Ибн Сино “Тиб конунлари”нинг 1-китобида бадантарбия ҳақида яна қуйидагиларни ёзадилар: “Бадантарбиянинг турларига келсак, улар қуйидагилардир: тортииши, мушт билан туртииши, ёйдан ўқ отиш, найза отиш, юқоридаги бир нарсага иргиб осилиш, бир оёғида сакраш, қиличбозлик ва найзбозлик, отда юриш, икки қўлни силкитиш, бу вақтда одам оёқ учларида туриб, қўлларни олдга ва орқага чўзиб тез ҳаракат қилади. Булар **тез ҳаракатлар** жумласидандир.

Нозик ва энгил бадантарбия турларига аргимчоқларда учини, беланчақларда тик ҳолда ўтириб, ё ётиб учини, қайиқ ё кемаларда сайр қилиш.

Кучлироқ [ҳаракатлар]га эса отга, туяга минини, кажсава ва араваларга тушини қилади.

[Бадантарбиянинг] кучли турига майдонда қилинадиган [қуйидаги] ҳаракат қилади: киши майдоннинг у четидан бу четига тез ҳаракат билан бориб қайтиб, ҳар сафар юриш масофасини майдоннинг ўртасида туриб қолганига қадар

камайтиради. Шу турга кишининг ўз сояси билан олишиши, чапак чалиш, сакраш, найза учи билан санчиш, катта ва кичик курралар билан човгон уйини, коптоклар билан ўйнаш, кураш, тош кўтариш, қувлаиши ва [чопаётган] отни жисловидан тортиб тўхтатиш қилади.

Курашининг турлари ҳам бир нечадир. Улардан бири: икки курашувчининг ҳар бири ўз рақибининг белбоғидан ушлаб ўзига тортади. Шу билан бирга курашувчи ўз рақибидан қутилишининг чорасини қилади. Иккинчиси эса, уни қўйиб юбормасликка ҳаракат қилади.

Бошқа тури: икки курашувчидан бири иккала қўли билан иккинчисини маҳкам қучоқлаб ўзига тортади ва ёнга ағдаради; бу вақтда биринчи курашувчининг ўнг қўли иккинчисининг ўнг қўли остидан, чап қўли эса чап қўли остидан ўтиши керак, [курашувчилар] гоҳ қадрларини тиклаб, гоҳ эгиладилар.

[Кураш] турларига яна кўкрак билан зарбани қайтариш, иккинчи бир кишининг бўйнидан ушлаб пастга эгиш, бир-бировининг оёқларини ўз оёқлари билан чалкаштириб, чалиб, ёки оёқлари билан иккинчисининг оёқларини йириб қилинадиган ва полвонлар ишлатадиган ҳаракатлар ҳам қилади.

Тез жой алмаиши, тартибли ёки тартибсиз равишда орқага, кейин олдинга томон узлуксиз сакраш **тез ҳаракатлар** тоифасига қиради. Икки жуволдиз билан қилинадиган ҳаракат ҳам шу турдандир; бу шундайки, киши бир ўрнида туриб, чап ва ўнг томонига қўли етарли ерга икки жуволдизни санчийди ва мумкин қадар тезлик билан ўнг томондаги жуволдизни чапга, чапдагисини эса ўнг томонга кўчиради ва жуволдизлар жойини шу тариқа алмаштиради.

Тез ва шиддатли ҳаракатлар энгиллари билан бирга қилинади. Ҳаракатларни турлича қилиб алмаштириб туриш ва бир ҳаракат устида тўхтаб қолмаслик керак”.

Абу Хурайра розияллоху анхундан ривоят қилинади: “Расулуллоҳ соллаллоху алайҳи васаллам айтдилар: **“Кучли мўмин Аллоҳ ҳузурини кучсиз мўминдан яхшироқ ва маҳбуб-роқдир...”**” (Имом Муслим ривоятлари). Пайғамбар алайҳиссалом ҳам бунга амал қилганлар. Кучлари ниҳоятда кўп бўлган. Бунинг учун иккита воқеани мисол келтирса kifоя.

Биринчи мисол: Хандақ уруши кунини хандақ қазиш вақтида ниҳоятда катта ҳарсанг тош чиқади. Ҳеч ким уни жойидан силжити олмайди. Шунда Набий алайҳиссалом чўкич билан уч маротаба урганларида ҳарсанг синиб кетади.

Иккинчи мисол: ўша замонда Рукна исмли паҳлавон бўлган. Курашда ҳеч кимга енгилмаган. Ана шу кишини Пайғамбаримиз алайҳиссалом ер тишлатганлар. Шунда Рукна бу иш оддий одам кўлидан келадиган нарсасиз эмас, деб ислонни қабул қилади. Албатта, ундан ҳам кучлироғи бўлганда, Набий алайҳиссалом унинг курагини ҳам ерга босардилар.

Юкоридаги ҳадисга амал қилароқ саҳобийлар ер юзидаги энг кучли кишиларга айландилар. Қуйида уларнинг баъзилари билан танишамиз.

21-фасл. Саҳобаларнинг бадантарбиялари

- Камондан ўқ узиб энг тўғри нишонга теккизувчи ва Оллоҳ йўлида энг биринчи ўқ отган ва Форс давлатининг фатҳида жуда тез оқувчи Фурот дарёсини отда сузиб ўтган саҳоба – Саъд ибн Абу Ваққос розияллоху анху.

- Энг тез югурадиган, ҳаттоки отдан тез югурадиган ҳамда уламо саҳобий – Салама ибн Аква розияллоху анху.

- Энг моҳир чавандоз саҳобий – Абу Қатода розияллоху анху.

- Найза отиш бўйича энг мерган саҳобий – Ваҳший розияллоху анху. Ислонга киргач, энг ёмон одам – ўзини пай-

ғамбар деб эълон қилган Мусайламатул-каззобни найза отиб ўлдирадилар.

- Азонни энг чиройли овоз билан айтган саҳобий – Билол ибн Рабоҳ розияллоху анху.

- Қорилар ичида энг чиройли қироат соҳиби (Довуд алайҳиссаломнинг оилаларидан бир ҳисса берилган) – Абу Аййуб ал-Ансорий розияллоху анху.

- Қуръонни тажвид билан ўқиш борасида энг гўзал ўқувчи, таровеҳни ҳазрати Умар розияллоху анху вақтларида имом бўлиб ўқишни бошлаб берган саҳобий – Убай ибн Каъб розияллоху анху.

- Қироатда ҳамма саҳобалардан пешқадам – Абдуллоҳ ибн Масъуд розияллоху анху. Пайғамбар алайҳиссалом бу зот ҳақларида: “Ким Қуръонни Муҳаммадга нозил қилингандай ўқишни хоҳласа, Абдуллоҳ ибн Масъуд ўқигандек ўқисин!” – деб марҳамат қилганлар.

Ҳарбий тайёргарлик жиҳатидан энг кучли саҳобийлар: - Ҳамза ибн Абдулмуттолиб розияллоху анху – лақаблари “Асадуллоҳ”, яъни “Оллоҳнинг шери”.

- Умар ибн Хаттоб розияллоху анху – болаликларидан курашда ютқазмаганлар. Қўл зарбалари жуда кучли бўлган. Ўнг қўлда қандай иш қилсалар, чап қўлда ҳам бажара олганлар. Шу жумладан жангда ҳам.

- Али ибн Абу Толиб каррамаллоху ваҳҳаху – ўта кучли саҳобий ҳисобланадилар. Ҳайбар жангида у зотга Пайғамбар алайҳиссалом ўзларининг машҳур Зулфиқор қиличларини берганлар. Жангда қалқонлари синиб кетгач, қалъанинг бир эшигини суғуриб олиб қалқон қилиб фойдаланадилар. Қалъани фатҳ қиладилар. Кейинчалик ўша эшикни 40 киши ҳам кўтара олмаган.

- Ҳолид ибн Валид розияллоху анху. Энг кучли саркарда (генерал). Бирорта жангда мағлубиятга учрамаганлар. Мўъта



29-расм. Мўътадил ҳаракат соғлиқни сақлашдаги сабабларнинг энг кучлисидир!

ғазотида қўлларида 9 та қилич синган. Пайғамбар алайҳиссалом у кишини “Сайфуллоҳ”, яъни “Оллоҳнинг қиличи” деб айтганлар.

- Муовия ибн Абу Суфён розияллоху анхунинг бармоқлари шунчалик кучли эканки, бир кафтлари билан ҳар қандай кишининг суягини эгиб, синдириб юбора оларканлар (29-расмга қаранг).

Яратган Парвардигоримиз бизларни ҳам юқоридаги айтилганларга амал қилишни насиб этсин. Омин!

22-фасл. Бешинчи зарурий омил – хилтларнинг тутилиб қолиши ва уларни бўшатиш (ихтибос ва истифроғ)

Инсон гавдаси бир томондан давомли равишда озука, ҳаво, сув ва бошқа истеъмол моддаларни киргазиб, иккинчи томондан эса, тананинг бир қисмини (энергия, тер, катта ҳожат, кичик ҳожат, қусик, ҳайз кўриш, кўз ёшлари, маний, мазий, ел келиши, тупук, балғам, тирнок, бадандан кир ва ёғ кўринишида) чиқариб ташлайди. Бу инсон ҳаётида муҳим жараёнлардан бири бўлиб, моддалар алмашинуви деб аталади.

Организмга кираётган маҳсулотларнинг ва сарфланаётган қувват (калория) ва чиқиндиларнинг нисбати муқобил бўлиши лозим. Унинг бузилиши тана учун катта зиён етказди.

Чиқиш (сарф бўлиш) меъеридан ортиб кетса, баданнинг мувозанати бузилиб, ориқлаш, камқувватлик, камқонлик, иммунитетнинг пастлаши, иш қобилиятининг пастлаши, ташки муҳит омилларига мосланувчанлик камайиб, ўткир ва сурункали касалликларга чалиниш эҳтимоллиги ортади.

Тутишнинг меъеридан ортиб кетиши (ихтибос) қабзият, семириш, гормонлар мувозанатининг бузилиши, ҳайзнинг тўхтаб қолиши, пешобнинг озайиши ва тутилиши, тер ва ёғ

безларининг яхши ишламаслиги ва шу каби кўринишда бўлиши мумкин. Булар инсоннинг соғлиғига салбий таъсир этиб, жуда кўп ўткир ва сурункали касалликларга замин ҳозирлайди. *Хилтларнинг қамалиб қолиши (ихтибос)* ва *уларни чиқариш (истифроғ)*нинг амалга ошишида икки қувват муҳим рол ўйнайди.

Буларнинг биринчиси, **қувваи мосика**, яъни *ушлаб турувчи (сақловчи, тутувчи) қувват*.

Иккинчиси, **қувваи дофиъа**, яъни *ҳайдовчи, чиқарувчи қувватлар*. Соғлом кишиларда буларнинг иккиси доимо мувозанатда бўлади.

Мана шу қувватларнинг мувозанати бузилганда, табиб ва шифокорлар керакли муолажаларни ўтказадилар. Масалан, ич қотса, сургилар буюрилади. Ич сурса, ични қотирувчи дори ва воситалар буюрилади.

(эслатма: ич суришининг сабаби овқатдан заҳарланиш ёки ҳайза касаллиги бўлса, тиб қондаси бўйича зинҳор ични тўхтатиб бўлмайди. Зеро, бунда заҳарли моддалар ташқарига чиқиб кетиши керак).

23-фасл. Тутиш қувватини ортишининг сабаби 8 хил бўлиб, улар қуйидагилар:

1. Сақловчи қувватнинг зўрлигидан. Тутувчи (сақловчи) қувват кучли бўлса, чиқиндиларнинг ҳайдалишига йўл қўймайди.

2. Ҳазм қуввати ва ҳайдовчи қувватнинг заифлигидан бўлади. Яъни, тана (организм)да ҳазм ферментлар, энзимлар ва ошқозон шираси (хлорид кислотаси)нинг етишмаслиги оқибатида озуқа моддалар ошқозон-ичак тизимида узоқ вақт ҳазм жараёнларида қолиб кетиши. Шунингдек, ичакларнинг ҳайдовчи қувватининг заифлиги (перисталь-

тиканинг сустлиги, ичаклар атонияси) сабаб, ахлатларнинг тутилиб қолиши.

3. Ўтиш йўллариининг торлигидан. Бунда чиқиндининг суюқ қисми чиқиб, қуюқ қисми қамалиб қолади. Масалан: ўт йўли ёки ичакларнинг туғма ёки орттирилган торайиши, турли онкологик касалликларда ўсимталар чиқариш йўллари босиб, қисиб қўйиши. Натижада чиқиндиларнинг ўтиши қийинлашади.

4. Ўтувчи йўлнинг баландлиги ва модданинг, яъни чиқиндининг қуюқлигидан. Масалан: кам миқдорда сув ичиш ёки доим ғализ таомларни узлуксиз истеъмоли чиқиндиларнинг қуюқланишига сабаб бўлади. Сийдикнинг қуюқланиши ёки қатта ҳожатнинг қаттикланиши, қонни қуюқлашиши...

5. Модданинг, яъни чиқиндининг кўплигидан. Масалан пурхўрлик, яъни ўта очкўзлик ва ортиқча таом истеъмолига рағбат қилиш натижасида организм ҳазм қилишга улгурмайди. Киришнинг ортиқлиги чиқиндининг камлиги ҳисобига организмда оралиқ маҳсулотлар турли кўринишда терида ёғли ўсма (липома) кўринишда, турли ўсма (хосила)лар, қон томирларда ёғли тикилмалар (атеросклеротические бляжки), ўт қопи ва сийдикда туз ва тошлар, ички аъзоларни ёғ қоплаши (боғлаш) шаклида.

6. Модданинг ширадор ва ёпишқоқлигидан. Масалан, толлари дағал хужайрали маҳсулотлар (клетчатка)нинг кам истеъмоли, ширинлик ва ярим тайёр овқатларга ружуъ қўйиш, оқ ун, ҳамирли, турли кимёвий, газли, шакар миқдори кўп бўлган пишириқлар, нотабиий овқатларнинг истеъмоли, аралаш ва бетартиб овқатланиш оқибатида шакланган ахлат ширадор ва ёпишқоқ бўлади.

7. Сезувчи қувватнинг йўқлигидан. Масалан: ўт тош ва ўт қопининг букланиши (қийшайиши) касалликларида ўтнинг ингичка ичакка ажралиши камаяди. Бизга маълумки, ичакка

ажраган сафронинг манфаати ичакни китиклаб, ҳожатни ҳис эттириш эди. Демак, юқоридаги ҳолатларда ҳам ич қотиши кузатилиши мумкин экан.

8. Тана чиқиндини ҳайдашдан кўра, зарурроқ иш билан машғул бўлганда. Масалан: ўткир юқумли (инфекцион) касалликларда тана инфекция билан олишиш билан овора бўлиб, ҳазм қуввати, ахлат ва сийдик ажралиши камаяди.

24-фасл. Хилтларнинг тугилиши (ихтибос)нинг хаддан ортишида қўлланувчи танқия (тозалаш) турлари:


1. Аксиртириш (атташ). Танқиянинг бу тури бурун ва бош миёдаги тикилмаларни очиш, ғайритабиий хилтлардан тозалаш учун қўлланилади. Бу танқия ўткир ҳидли, тозаловчи ва аксиртирувчи гиёҳлар ёрдамида амалга оширилади.

2. Қон олиб даволаш. Бутун танадаги ғайритабиий қон хилтини фасд, ҳижома ва зулук ёрдамида чиқариб ташланади (ушбу китобнинг кейинги қисми ҳижомага бағишланган).

3. Қустириш (қайъ). Асосан, ошқозон, ичак, ўт қопи ва бошқа касалликларида қўлланилади. “Тиб қонунлари”-нинг 1-китобида Ибн Сино ҳазрат ошқозон ва миё ўртасида боғловчи асаб борлигини ёзадилар. Замонавий тиббиётга кўра, бу адашган асаб (блуждающий нерв – *n. vagus*). Шу сабабли, миёни ортиқча хилтлар, хоссатан орқа миёга чўккан ҳўллик (миё ички босимининг ортиши) каби касалликни даволашда беморга қайт қилдирувчи дорилар тавсия қилинади.

4. Ҳукна (амалча – клизма). Йўғон ичак, аёллар, эркалар жинсий аъзоларининг касалликлари ва бошқаларда қўлланилади.

5. Сурги (исҳол). Бунда аввал мунжиз (етилтирувчи), сўнгра сурги дорилар буюрилади. Бу амал бутун танадаги



30-расм. Танқиянинг фаслга мос турлари.

чиқиндиларни чиқаради. Ошқозон, ичак, жигар, ўт қопи ва бошқа касалликларида қўлланилади.

6. Терлатиш (капилляротерапия). Бутун тана ва қурол аъзоларни тозалаш учун қўлланилади. Масалан, сариқ касаллигида ёки истиско (асцит)да яхши натижа беради.

7. Пешоб ҳайдаш (сийдирувчи – мудирруул-бавл - диуретиклар). Бутун тана, буйрак ва сийдик қопини бўшатади.

Юқорида танқия (танани тозалаш)нинг асосий турлари билан танишдик. Уларни тушунтириш учун аввалги фаслларда чизма ҳам келтириб ўтган эдик. Уларни қўллашдан аввал қўллашга кўрсатма, қарши кўрсатма, уларнинг миқдори, қўллашдан аввал тайёргарлик, ўтказилаётган фаслга мос танқияни танлаш ва бошқа омилларни инобатга олиш шарт! (30-расмга қаранг) Уларга катта китобларда катта-катта фасллар ажратилган. Ҳозиқ табиб улар билан танишиб, сўнгра амалига киришиши лозим!

25-фасл. Олтинчи зарурий омил – руҳиятга таъсир қилувчи омиллар (аворизи нафсония)

Инсоннинг асли руҳдир. Бадан уни тасарруф қилувчи жойидир. Демак, гўёки руҳ – ҳоким, бадан эса унинг мамлакатидир. Нафсда пайдо бўладиган кайфиятлар олти қисмдир:

1. Ғазаб (жаҳл).
2. Шодлик (севинч, фарах).
3. Ғам-андух (қайғу).
4. Умид (ражо).
5. Уялиш (ҳижл).
6. Қўрқув (фазаъ).

Уларнинг ҳар бирига қисқача таъриф ва тушунча бериб ўтамиз (19-расмга қаранг).

Ғазаб кўпинча инсон мўнжаллаган, ҳаракат қилган, умид қилган ишлари амалга ошмаса ёки акси бўлса, пайдо бўлади. “Ғазаб” луғатда розиликнинг тескарасидир. Аслида ғазаб шиддат ва қувват маъноларини англатади. Ҳадисда албатта ғазаб қалбда ёниб турган чўғдир маъносида огоҳлантириш келган. Араблар қаттиқ харсангни “ғазба” дейишади. Ғазаб ҳам шундан олинган. Зотан у қаттиқ жаҳл чиқишини англатади. Имом Ғаззолий: “Ғазаб қалб қонининг интиқом талабида ғалаён қилишидир”, - деган.

Қаттиқ ғазабланганда руҳ ташқарига қараб қаттиқ ҳаракат қилади. Шу вақтда инсонда асабийлашиш (стресс) гормонлари (адреналин, кортизол ва бошқа) ажралиб чиқади. Натижада инсон кизаради, ички аъзолардаги қон томирлари торайиб, босим ортади, асабийлашади, бакиради, тафаккур қилмаган, охирини ўйламаган ҳолда сўзлар айтиб, ҳаракатлар қила бошлайди. Бу жараённинг тез-тез қайталаниши инсон ҳаёти учун хавфли бўлиб, қон томирларнинг ёрилиши, ҳаттоки инсульт ва инфарктга қадар олиб келиши мумкин.

Бу ҳақида улуғ муаллим Пайғамбар алайҳиссалом бизларни огоҳлантирганлар. Абу Саъид ал-Худрий розияллоху анҳудан ривоят қилинади: *“Пайғамбар алайҳиссалом: «Огоҳ бўлинглар албатта ғазаб одам боласининг қалбидаги бир чўғдир. Унинг кўзидаги қизиллик ва бўйин томирларининг бўртиши кўрмаганмисизлар? Ким бу нарсалардан бирини ўзида сезса, ерга маҳкам ётиб олсин», - дедилар”*.

Шунинг учун, аввало киши ғазаб қилмаслиги керак. Агар жаҳл чикса, дарров унинг чорасини кўрмоғи лозим. Бу тадбирни севикли Пайғамбаримиз алайҳиссалом кўплаб ҳадисларида бизга таълим берганлар. Шулардан бири билан танишсак:

Абу Зарр розияллоху анҳудан ривоят қилинади: *“Расулуллоҳ соллаллоҳу алайҳи ва саллам бизга: “Агар сизлардан кимдир ғазабланса, турган бўлса, ўтириб олсин. Агар ундан ғазабланиши кетса, шунинг ўзи етади. Агар ундай бўлмаса, ёнбошлаб олсин”, - дедилар”*.

Табобатда ғазабнинг шаклланишида саффо хилтининг ўрни катта, дейилади. Шунинг учун, унинг давосида совуқ ва ҳўл нарсалар манфаатлидир. Одам ғазабланганда совуқ сув билан таҳорат қилишлиги мустаҳаб бўлади. Сабаби ғазаб оловдандир. Олов эса фақат сув билан ўчирилади. Бу ҳақида ҳам Расулуллоҳ соллаллоҳу алайҳи васаллам бизга таълим берганлар:

“Албатта ғазаб шайтондандир. Шайтон эса оловдан яратилган. Олов эса сув билан ўчирилади. Сизлардан кимнингдир ғазаби келса, таҳорат қилсин”.

Шодлик (хурсандчилик – севинч – фарах). Бу инсонда пайдо бўлувчи бир кайфиятки, у сабабли руҳ танинг сиртига тезлик билан, бир дафъада интилади. Ғазабдан ва шодликнинг фарқи шуки, биринчиси – салбий, иккинчиси – ижобийдир. Бу инсонни ҳар бир шароитга розилик ва умидворлик (позитив) билан ёндашуви, қазои қадарни миннатдорчилик билан

қабул қилишидир. Сукрот бу ҳолни шундай таърифлайди: *“Инсон ҳамиша хурсанд юрадиган бир юракка, яъни руҳий кучга эга бўла олса, беҳисоб қийинчилик ва хафагарчиликлар ичида бўлганида ҳам у янада бахтиёр бўлади.*

Хурсанд юракка эга бўлмаган ғамгин ва руҳсиз одамлар ҳар қанча бахт ичида бўлсалар ҳам бахтсиздирлар”.

Албатта, шодликнинг ҳам меъёри яхши. Кучли шодлик ҳам зарарлидир. Чунончи, баъзи ҳолларда қаттиқ хурсандлик юракнинг қон-томирларининг ишига жиддий зарар етказиб, ҳаттоки ўлим ҳолатларигача олиб бориши мумкин. Буни тиб китобларида *шодмарг* дейилади.

Хурсандликнинг энг чиройли кўриниши табассумдир. Чунончи, Пайғамбаримиз соллолоҳу алайҳи васаллам доим табассум қилганлар ва биз умматни ҳам шунга буюрганлар. Абу Зарр розияллоҳу анҳудан ривоят қилинади: *“Расулуллоҳ соллаллоҳу алайҳи ва саллам: «Биродаринг юзига табассум қилишинг ҳам садақадир» дедилар”.*

Шу ерда айтиб ўтиш керак бўлган жиҳат. Баъзи инсонлар доим хурсандчилик излаб, хурсанд қиладиган, кайфиятни кўтарадиган махсулотларни истеъмол қилиб юриши ҳам хатарлидир! Инсон ҳамиша кўзғалган ҳиссиёт, орзу, ишқ-муҳаббат ва шахвоний хисларга берилиб кетса, ақлий заифликка учрайди. Яна ҳаётни тўғри ҳис қилолмайди. Ҳар бир инсон Аллоҳ берган ақл ва тафаккур билан иш қилиши ва ҳиссиётларини ақлига бўйсундириши лозим.

Умид (ражсо). Бунда руҳ тананинг сиртига секин, батадриж ҳаракат қилади. Руҳиятга таъсир қилувчи бу омил уларнинг ижобий турига киради. Инсонни умид билан (позитив) бўлиши имкон қадар ҳаётдан хурсанд бўлиб яшашга ва турли режаларни амалга оширишга олиб келади.

Қўрқув (фазаъ). Бу кишида пайдо бўлувчи бир кайфиятки, у сабабли руҳ ташқаридаги зарарли нарсалардан қутилиш

учун бадан ичига ҳаракатланади. Бу нарса хоҳ воқеликда, хоҳ тасаввурида бўлсин. Қўрқув вақтида руҳ ва қувватлар тананинг ички аъзолари томон ҳаракат қилади. Натижада тананинг сиртида касалликларга қарши курашиш қобилияти пасаяди.

Замонавий тиббиётга кўра, қўрқув вақтида қон айланиши тананинг чекка қисмлари, яъни тери ва шиллиқ қаватларидан ички аъзолар томон йўналади. Яъни, қон айланишининг марказийлашиши (централизация кровообращения) рўй беради.

Шунинг учун, бундай ҳолатларда юракнинг тез уриб кетиши (ҳафакон – тахикардия – тапидани дил) кузатилади. Бунинг оғир ҳолатларида халқ орасида “юрак тушиши”, замонавий тиббиётда пароксизмал тахикардия, гоҳида кардиомиопатия ҳолатлари келиб чиқиши мумкин.

Ғам (қайғу – андуҳ – хафалик). Бу ҳаётда юз берган бирор ёқимсиз ҳолатга нисбатан афсус пайдо бўлган кайфиятга айтилади. Унда руҳ инсон баданининг ичига (доҳили бадан томон) интилади. Натижада тана сиртида иссиқлик ва қувват камаяди. Ичкарида, хоссатан юракда иссиқ-қуруқлик ошади. Бу эса, инсон танаси ва руҳиятига зарар берадиган ҳолат бўлади. Шунинг учун, доно халқимиз орасида буни қисқа ва содда, лекин тиб илмини ўзида жамлаган ҳолатда “юрагида ғами бор”, дейилади.

Ташвиш – инсонда пайдо бўлувчи бир кайфиятки, ҳаётда сезилган бир ёқимсиз нарсани ҳал этиш билан бўлади. Яъни, ташвиш озгина шодлик ва кўпгина қўрқувдан таркиб топган кайфиятга айтиладики, унда ҳам хавф ҳам умид ҳосил бўлади. Ғам-ташвиш инсон мизожини совитади ва ҳароратни олиб юрувчи руҳ ўзининг пайдо бўлиш жойи, яъни қалб томонга мойил бўлгани туфайли табиатининг ҳароратини сусайтиради.

Ташвиш ва ғамнинг фарқи шундаки, ташвишда озгина бўлса ҳам умид бўлади. Ғамда эса умид кесилган бўлади.

Уялиш (*хижолат, ҳижл*) деб шундай кайфиятга айтиладики, у билан туғма ҳарорат ва руҳ ташқарида юз берган ёқимсиз воқеадан кочиш учун бадан ичкарисига ҳаракат қилади. Лекин ҳамият ва номус ҳисобига ўша ёқимсиз воқеани даф этиш учун бадан ташқарисига ҳаракат қилади. Демак, туғма ҳарорат ва руҳ ичкарига ҳаракат вақтда юзда оқариш, иккинчи вазиятда юзда қизиллик пайдо бўлади.

Бу кайфиятларнинг издан чиқиши инсон саломатлигига катта таъсир кўрсатади. Шунинг учун ҳам инсон ҳаётида доим келажакка умид (оптимизм) бўлиши, бу дунёнинг ҳам ташвишлари абадий эмаслиги, албатта бир ташвиш ортидан енгиллик келишига ишониб, яратган Парвардигоридан яхшиликлар умид қилиб, ҳаёт кечиришда давом этиши лозимдир.

Мусибатзада инсонларни кўриб тасалли бериш, мусибат аламини кетказишдир. Шунинг унутмаслик лозимки, ҳамма жойда ҳам қийналганлар бор. Ўнгга қараса қийинчилик, чапга боқса ҳасрат-надомат. Дунёни остин-устун қилиб чиқсангиз, албатта, ҳар ерда мусибатга учраганларни кўрасиз. Кимдир суюклисидан айрилган бўлса, бошқаси қийинчиликка дуч келган.

Дунёдаги мусибатлар уйкудаги туш ёки вақтинчалик сояга ўхшайди. Дунё шундай: озгина кулдирса, кўп йиғлатади. Бир кун хурсанд қилса, узоқ вақт хафа қилади. Бироз фойдалантирса, кўп вақт узиб қўяди. Қайси хонадонни яхшиликка тўлдирса, албатта, кўз ёшини ҳам бисёр қилади. Хурсандчилик куни келса, унинг ортида ёмон кун ҳам бўлади. Шунинг учун маҳзунланмасдан олдинга ҳаракат қилмоқ лозимки, хотиржамлик ва сукунат соғлиқни сақлашда муҳим аҳамиятга эга.

Ҳар қандай инсон – бой ҳам, камбағал ҳам бахтли яшашга, ҳаётини бекаму кўст бўлишига ҳаракат қилади. Ҳозирги давримизга келиб, Дейл Карнеги ва бошқа ёзувчиларнинг “бахт-

ли яшаш сирлари” каби асарларга эҳтиёж ортиб бормокда. Аслида бунинг ечими жуда оддий ва қулай бўлиб, бунинг тушунтириш учун устозларимдан бирларининг гапини келтиришни лозим деб топдим. Устозимиз шундай дердилар: *“Бахтли яшашнинг 25 хил формуласи бор бўлиб, бунинг Аллоҳ Таоло 25 та пайғамбар мисолида биз мусулмонларга таълим берган”*.

Ҳа азизлар, исломда ҳар қандай муаммонинг ечими аллақачон ҳал қилиб бўлинган. Қуръони каримда Аллоҳ таоло шундай дейди:

“(Менинг номимдан) айт: “Эй ўз жонларига исроф (жабр) қилган бандаларим, Аллоҳнинг раҳматидан ноумид бўлманг! Албатта, Аллоҳ барча гуноҳларни мағфират этар. Албатта, Унинг ўзи ўта мағфиратлидир, ўта раҳмлидир” (Зумар сураси, 53-оят).

Уламолар юқоридаги ояти карим Қуръондаги энг умидбахш оят ҳисобланади, дейдилар. Бизнинг муқаддас динимиз тушқунлик дини эмас. Балки, умид қилдирувчи, муждалар берувчи диндир!

26-фасл. Табиб ким?

Шамсиддин Абу Абдуллоҳ “Тиббун-набавий” асарида қуйидагича таъриф келтирадилар:

“Табиб тўпланиб қолиши инсон учун зарар бўлган нарсаларни тарқатиб юбуровчи, тарқоқлиги зиён берувчи нарсаларни жамловчи, кўпайиб кетиши зарар бўлган нарсаларни камайтирувчи, камайиб кетиши зиён етказадиган нарсаларни кўпайтирувчи шахсдир.

Демак, у йўқотилган соғлиқни тиклайди, шакл ва ҳолатни сақлайди, мавжуд касалликни зидди билан кетказди, чиқаради, парҳез воситасида касалликнинг олдини олади. Булар-

нинг ҳаммаси Расулulloҳ соллаллоҳу алайҳи ва салламнинг йўллари бўлиб, Аллоҳнинг куч-қудрати, фазли ва ёрдами ила кифоя қилгудек шифо бериши билан бўлади”.

27-фасл. Табибнинг вазифаси

Шамсиддин Абу Абдуллоҳ “Тиббун-набавий” асарида шундай ёзадилар:

“Моҳир (ҳозик) табиб эътибор қаратиши керак бўлган 20 та жиҳат:

1. Касалликка қараб, унинг қайси турдан эканини аниқлаш.
2. Касалликнинг нима сабабдан пайдо бўлганини топиш;¹⁸
3. Беморнинг қуввати. Унинг қуввати касалликка қарши кураша оладими ёки кучи етмайдими? Агар касалликка қарши курашиб, уни енгиб ўтадиган бўлса, унга тегмайди. Дори бериб тинч турган дардни қўзғатмайди;¹⁹
4. Баданнинг табиий мижозининг ҳолати;²⁰
5. Табиий ҳолати ўзгарганда мижозда содир бўлиши мумкин бўлган жараён;²¹
6. Беморнинг ёши;²²
7. Унинг одати;²³
8. Ҳозир қайси фасл ва уни даволашга қайси фасл муносиб экани;²⁴

¹⁸ Яъни, касалликнинг этиологиясини аниқлаш.

¹⁹ Бу беморнинг ички қуввати, яъни, иммун тизимига баҳо бериш (оценка иммунной системы) демакдир.

²⁰ Тиб илмига кўра табиий мижозларнинг турлари ҳақида аввалги фаслларда айтиб ўтган эдик.

²¹ Бунга хилларнинг ошиши ё камайиши, уларни сифатининг ўзгариши ва бошқалар кирази.

²² Чунки, болалар, ўрта ёшлилар ва қариларни даволашда фарқлар бор.

²³ Одат ҳақида олдинги фаслларда ҳадислар ва тиббий хулосаларни келтирган эдик.

²⁴ Табобат илмига кўра, ҳар бир фасл ўз мижозига эга. Яъни, йил фаслларида инсонларда маълум ўзгаришлар бўлади. Шунга кўра, ҳар бир фаслда маълум ка-

9. Беморнинг юрти ва ери (гўшаси);²⁵

10. Касаллик вақтидаги ҳавонинг ҳолати;²⁶

11. Касалликка қарши курашадиган дорини топа олиш;²⁷

12. Дорининг қуввати ва даражаси, беморга унинг қуввати кўтара оладиган миқдорда дори бериш;²⁸

13. Мақсад фақат касалликни йўқотиш эмас, балки унинг ортидан ёмонроқ касаллик келиб чиқишининг олдини олиш бўлиши лозим²⁹.

Агар касалликни бутунлай кетказиш амали бундан ҳам ёмонроқ касалликни келтириб чиқарса, табиб касалликни даволамасдан шундайлигича қолдириши афзал ҳисобланади³⁰.

Демак, табибнинг вазифаси, аввало, касалликни енгилаштиридир. Бунга мисол қилиб томирларнинг оғизлари касаллигини айтиш мумкин³¹. Чунки уни кесиб, ёпиб қўйиш билан

салликлар кўзгайди ва баъзилари йўқ бўлиб кетади (бу ҳақида яна “Тиб қонунлари”нинг 1-китоби ва “Қонуни Боситий”нинг 1-жузига қаралсин).

²⁵ Олдинги фаслларда биз яшаётган қуруқлик 7 иқлимдан иборат эканлиги айтилган эди. Ҳар бир иқлимнинг ўзига хосликлари бор. Табиб ана шу жиҳатга ҳам эътибор қаратиши керак.

Турар-жой масаласи тиб китобларида алоҳида фаслда ситтаи заруриянинг 1-қисми бўлиш – ҳаво ҳақида гапирилганда айтиб ўтилади.

²⁶ Ҳаво – олти зарурий омилнинг 1-омили эканлигини ўрганганмиз. Беморнинг касаллик вақтида ҳавонинг ҳолати деганда, ўша ерда вабо, яъни, юқумли (инфекцион) касалликларнинг таркаган-таркамаганлигини ҳисобга олинади.

²⁷ Албатта бу иш кўплаб омиллари билан боғлиқ. Беморга муносиб дорини танлашда юқорида санаб ўтилган барча бандларни ҳисобга олиш керак.

²⁸ Бунда беморнинг, касалликнинг ва дорининг мижози ва қуввати баҳоланади. Бу ҳақида “Тиб қонунлари”нинг 1-китоби ва “Қонуни Боситий”да алоҳида тўхталиб ўтилган. Яна бу ҳақида шу китобда бир фаслдан сўнг гапирилади.

²⁹ Чунки, шариятимизда қоида бор: “Ла зароро ва ла зирор”, яъни, “Зарар бериш ҳам, зарар кўриш ҳам йўқ”. Бу борда тиббиётда ҳам олтин қоида бор: “Non poseri” (лотинча) – “зарар берма!” – “не навреди!”

³⁰ Масалан, бир беморнинг саратон (онкологик) касаллиги бор. Саратонни олиб ташлаш мумкин, лекин бунинг натижасида ўсманнинг ҳужайралари тананинг бошқа аъзоларига тарқаб кетиш хавфи бўлса, жарроҳлик амалиёти ўтказилмай турилади.

³¹ Ушбу касаллик ҳақида Боситхон Шоший шундай ёзадилар: “АФВОҲУЛ-УРУҚ (افواهالروق) томурларнинг оғизлари демакдур.

муолажа қилинса, бундан ҳам ёмонроқ касаллик келиб чиқиши хавфи бор³².

14. Енгил-енгил муолажалар билан босқичма-босқич даволаш. Егулик билан даволашдан дорига фақат зарурат ҳолатидагина ўтилади³³.

Содда дорилар таъсир қилмасагина мураккаб дорилар билан муолажа қилади³⁴.

Ҳозик табиб дорини ўрнига озуқа билан, мураккаб дорининг ўрнига енгил дорилар билан муолажа қилади;

15. Касалликни даволаб бўлиш ёки бўлмаслиги. Агар даволашнинг имкони бўлмаса, ўз ҳурматини сақлайди. Бирор нарса ундириши умидида фойдаси йўқ муолажага уринмайди.

Агар даволашнинг имкони бўлса, касалликни йўқотиши мумкин ёки мумкинмаслигини ўрганиб чиқади.

Ва ул шундин иборатдур: бадан шараён томури ила варид томури ҳар иккиси бир-бирига мутавозий ва ҳамроҳ бўлуб, қўб адад шохларга ва шохлардин яна шохларга ажрашиб, баданга таралурлар. Ва энг ниҳоят учлари кўзга кўринмас даражалик жуда танг тешук бўлурки, бадан ҳожати учун андин хўб латиф қон баданга сингиб ўтиб турар ва зиёдаси ва ғализроғи то латофат ҳосил қилғон вақтигача шараён тешугидин чикиб, варид тешугига кирар ва андин ўпкага келиб, хориждин совуғ ҳавойи насим бирлан ани зиёда ҳарорати камайиб, мўътадил бўлғондин сўнг, дилга кириб, андин яна шараён воситаси бирлан баданга таралиб турарки, давронуд-дам (қон айланиши) шундин иборатдур.

Ва қон ўтмак учун мазкур ҳар икки томурни(нг) тешуклари бир-бирига қўб яқин ва рўбару яратилғондурки, афвоҳул-уруқ шул тешуклардур.

Ҳам шул томурларни ҳамма атрофларида бағоят танг (тор) масом (тешик)лари бордурки, мажозан ани ҳам афвоҳул-уруқ дерлар”(“Фарҳангал-мабсут”, 34-б.).

³² Замонавий жарроҳликда ёши улуг, масалан 80 дан ошган, кўшимча касалликлари кўп, қуввати (иммун тизими) паст, кичик бир сабаб билан шамоллаб қолувчи, умумий оғриксизлантириш (наркоз)ни кўтаролмайдиган беморларга кўпгина режали жарроҳлик амалиёт (операция)лар ўтказилмай турилади. Бу иш шариятнинг “Ҳавфуз-зарорайн”, яъни, “Икки зарарга тўқнаш келинганда енгил танланади ва каттасидан қочилади” (“палка двух концов” – рус.) қоида-сига тўғри келади.

³³ Бу ҳақида бир фаслдан сўнг алоҳида фаслда гапирилади.

³⁴ Ушбу қоида ҳозирги замон тиббиётида ҳам қўлланилади. Бу қоида “соддадан мураккабга қараб” (от простого к сложному) деб номланади.

Агар мумкин бўлмаса, уни енгиллатиш ва камайитириш имкони бор ёки йўқлигини аниқлайди.

Агар имкони бўлмаса, охирги чора сифатида уни тўхта-тиш ва кучайиб кетишидан асраш йўллари қўллайди ва муолажасидан шуни мақсад қилади. Касалнинг қувватини оширишга ва зарарли моддалардан халос бўлишига эътибор қаратади;³⁵

16. Хилтни пишиб етилмасдан олдин уни чиқариб ташлаш (истифроғ)га уринмаслик. Балки уни пишириб етилтиришга ҳаракат қилиш лозим. Пишиб етилгандан кейин тозалаб ташлаш (истифроғ)га шошади;³⁶

17. Қалб ва руҳ касаллиги, уларни даволашдан хабардор бўлиш. Танани даволашда бу асосий пойдевор ҳисобланади. Чунки бадан ва унинг табиати нафс ва қалбдан таъсирланиши маълум. Табиб қалб ва руҳ касалликлари ва уни муолажа қилишни билса, комил табиб бўлади!

Баданни даволашда ҳозик бўлса-ю, лекин руҳий даволашдан хабардор бўлмаса, у чала табибдир. Беморнинг қалбини назорат ва ислоҳ қилиш ила, руҳини ростгўйлик, яхши амаллар, Аллоҳга ва охиратга юзлантириш билан руҳини кўтаришни билмаган табиб ҳақиқий эмас, балки ўзини табиб қилиб кўрсатувчи билимсиздир.

Беморга ёрдам берадиган энг катта муолажа яхши амал, зикр, дуо, Аллоҳ таолога ялиниб ёлвориш ва тавбадир. Ушбу амаллар касалликни кетказиб, шифо ҳосил бўлишида табиий дорилардан ҳам кучлироқ таъсирга эга. Бунинг учун нафс

³⁵ Даволовчи шифокор бу бандда айтилганларга кўра ҳолатни яхшилаб ўрганиб чикқач, кейинги чорани албатта беморга тушунтириши керак. Агар беморга тушунтирилгач, бемор нотўғри қарор қабул қиладиган бўлса, унга ва яқинларига албатта маълумот беради ва бу суҳбатлар “Муолажага розилик варағи” да акс этиши керак.

³⁶ Табобат китобларида, хоссатан Муҳаммад Акбар Арзонийнинг “Мезонут-тиб” асарида тўрт хилтни етилтириш йўлари ва пишиб етилиш муддати берилган.

ҳозирлиги, қабул қилиши, шу нарсалар унга фойда беришига ишониши шарт;³⁷

18. Гўдакка кўрсатилганидек беморга ҳам меҳрибон ва хушмуомала бўлиш;³⁸

19. Табиий, илоҳий ва (даво қаерга таъсир қилаётганини) ҳис қилдириш³⁹ каби муолажалар турларини қўллаш. Ҳозик табиб ҳис қилдириш воситасида дори-дармонлар кучи етмайдиган ажойиб натижаларга эришади. Қисқасини айтганда, ҳозик табиб беморга ёрдам бериши мумкин бўлган барча усулни қўллаши лозим;⁴⁰

20. Табибнинг муолажа ва тадбири олти асосга қурилган бўлиши унинг асосий вазифаси ҳисобланади:

1) Мавжуд саломатликни сақлаб қолиш;⁴¹

³⁷ Яъни, шифокор беморнинг руҳиятига баҳо бериши керак. Бу олти зарурий омилнинг олтинчи қисми ҳисобланади. Бемор тушкунлик, ғам-кайғу ёки кўркинч ҳолатида бўлиши мумкин. Табиб уни шу жарликдан олиб чиқиш учун унга қўл узатиши ва у ердан чиқариши керак.

Рухиятни даволашда юкорида айтиб ўтилган илоҳий даволар (чоралар)нинг ўрни бекиёс. Қачонки табиб ҳам тиббий чораларни ҳам илоҳий дориларни баробар қўллай олса, муаллифнинг айтишича комил табиб бўлади. Барчамизга шу мақом насиб этсин.

³⁸ Шамсиддин Заҳабий роҳимаҳуллоҳ шундай ёзадилар: Букрот шогирдига айтди: “Инсонларга воситачиларнинг афзали, уларга муҳаббатли, ҳолатларини билувчи ва уларга яхшиликларни қилиб берувчилардан бўлгин” (“Тиббун-Набавий”, 36-б., тарж.: Алимардон МирАҳмад).

Ширин сўзнинг ўзи гоҳида даво бўлади. Гоҳида шифокорни беморнинг шикоятларини тинглаши, у билан бўлган суҳбатининг ўзи хастага энгиллик беради. Сўнгра, хаста ўзини тузалгандек сезади ва бошқалар. Гоҳида беморлар ана шу яхши сўзга зор бўлиб, шифохоналарга бормай юради. Байт:

Сўрадим: сенга не керак, эй хаста кўнгли?

Сўзлади: биргина ширин сўз, шугина бергил!

(Ҳакимий)

³⁹ Таҳаййул (تخيل) ҳаёл сурмоқдур (“Фарҳангал-мабсут”, 81-б.).

⁴⁰ Бу борада ахли илмлар ва дуо ўқиб дам солувчилар тажрибасини ўрганиш, китоблар билан танишиш катта фойда беради.

⁴¹ Ҳифзул-сихҳа – арабча, соғлиқни сақлаш – ўзбекча, здравоохранение, сохранение здоровья – русча, health care – инглизча.

2) Имкон қадар йўқотилган соғлиқни тиклаш;⁴²

3) Илоҳи борича касалликни йўқотиш;⁴³

4) Ёки уни камайтириш;

5) Катта зарарни йўқотиш учун кичик зарарга рози бўлиш;

6) Катта фойдани сақлаб қолиш учун кичик фойдадан воз кечиш.

Мазкур қоидалар муолажанинг асосини ташкил қилади. Табиб қиши ушбу қоидаларни ўзига йўриқнома қилиб олмас экан, у табиб табиб эмасдир! Аллоҳ билгувчироқдир.

28-фасл. Ҳозик табиб аҳамият берадиган баъзи қоидалар

Шамсиддин Абу Абдуллоҳ “Тиббун-набавий” асарида ушбу қоидалар ҳақида шундай ёзадилар:

✓ “Енгил муолажа турганида кучлисига ўтмаслик табибнинг ҳозиклигидан дарак беради. Кучсиз муолажадан кучлисига босқичма-босқич ўтилади. Лекин касал қувватсизланиб қолиши хавфи бўлганида, табиб кучли муолажадан бошлайверади. Даволашда бир хилликдан қочини лозим. Бўлмаса табиат ўша дорида ўрганиб қолиб, ундан таъсирланмай қўяди ва кучли фаслларда кучли дориларга жасорати қолмайди.

✓ Таомлар билан даволашнинг имкони бўлганида табиб дори қўлламаслиги тепада айтиб ўтилди. Касаллик иссиқ ёки совуқдан экани қоронғи бўлиб турганида, аниқлаб олмагунича салбий оқибатли тажрибалар ўтказмайди. Аммо зарари йўқ муолажани қўллаши мумкин. Агар беморда бир қанча касаллик мавжуд бўлса, улардан биттасига хос учта

⁴² Восстановление здоровья – русча.

⁴³ Устранить болезнь (заболевание) – русча.

муолажадан бошлайди. Бир касалликни даволаш бошқасининг тузалишига сабаб бўлса, ўшанисидан бошлайди. Масалан, шиш ва йирингли яра (қурух)да шишнинг муолажасига киришади.

✓ Бири иккинчисига сабаб бўлиб турган касалликни даволайди. Масалан, тикилма (судда) ва чиришдан бўлган иситма (ҳуммойи афния)да қай бири бошқасига сабаб бўлса, шу сабабни кетказишига уринади.

✓ Тузатиши муҳим бўлганидан бошлайди. Масалан, ўткир касаллик ва сурункали касалликда ўткир касалликни даволаш муҳим. Бу нариги касалликка эътиборсиз бўлиш дегани эмас. Агар беморда бир касаллик ва яна бошқа касалликнинг аломатлари ҳам бор бўлса, табиб, аввало, касалликни даволашга киришади. Бироқ ҳали ўрнашиб улгурмаган касаллик белгиси қаттиқ безовта қилса, масалан, бошқа касалликка аломат ҳисобланган ичак тутилиши (қулунж) безовта қилса, биринчи оғриқни тўхтатиб, кейин касалликни даволашга ўтади.

✓ Касалликни танқия (истифроғ) қилиш ўрнига очлик ёки рўза ё уйқу билан муолажа қилиш имкони бўлса, танқия (истифроғ) қилмайди.

✓ Табиб саломатликни сақлаб қолиш илинжида бўлса, табиатга мос келувчи воситаларни қўллаши керак. Агар саломатликни олдингисидан ҳам яхшироқ қилмоқчи бўлса, зид нарсалар билан даволайди”.

Юқорида табибнинг вазифалари ҳақида келтирил. Бу борада тарихимизда кўплаб китоблар ёзилган. Шулар орасида машҳурларидан бири ҳамюртимиз Исҳоқ ибн Роҳавайх Марвазий роҳмаҳуллоҳнинг “Одобут-табиб” асаридир. Бу асар ҳам тенги йўқ бўлиб, ҳали-ҳануз ўз таржимонини пойлаб ётибди.

29-фасл. Мусулмонларнинг тиб илмини ривожлантиришларига сабаб бўлган ҳадислар

Шамсиддин Абу Абдуллоҳ “Тиббун-набавий” асарида бундай ёзадилар:

“Имом Муслим “Саҳиҳ”ида Абу Зубайрнинг Жобир ибн Абдуллоҳ розияллоҳу анҳудан ривоят қилган ҳадисини келтирадилар: “Набий соллаллоҳу алайҳи ва саллам: **“Ҳар бир дард учун даво бор. Агар касалликнинг давоси топилса, Аллоҳнинг изни ила тузалади”**, – дедилар”.

“Саҳиҳайн”да Ато розияллоҳу анҳунинг Абу Ҳурайра розияллоҳу анҳудан ривоят қилган ҳадиси келган: “Расулуллоҳ соллаллоҳу алайҳи васаллам: **“Аллоҳ таоло туширган ҳар бир касаллик учун, албатта, шифони ҳам нозил қилган”**, – дедилар”.

Имом Аҳмаднинг “Муснад”ида Зиёд ибн Илоқанинг Усома ибн Шарикдан ривоят қилган ҳадиси жой олган: “Набий соллаллоҳу алайҳи васаллам ҳузурларида эдик. Аъробийлар келиб: “Эй Аллоҳнинг Расули, даволанаверамизми?” – дейишди. Шунда у зот соллаллоҳу алайҳи васалам: **“Ҳа, эй Аллоҳнинг бандалари, даволанинглар. Чунки Аллоҳ азза ва жалла берган хасталик учун, албатта, шифони ҳам ато қилган. Бир дард бундан мустасно”** – дедилар. Улар: “Нима у?” – дейишди. У зот соллаллоҳу алайҳи васаллам: **“Қариллик”** – дедилар”.

Бошқа бир ривоятда: **“Аллоҳ таоло туширган касаллик учун, албатта, шифони ҳам нозил қилган. Бун билган биллади, билмаган билмайди”**, – дейилган.

“Муснад”да Ибн Масъуд розияллоҳу анҳудан ривоят қилинган марфуъ ҳадис бор: **“Аллоҳ таоло туширган касаллининг шифосини ҳам нозил қилган. Бун билган биллади, билмаган билмайди”**.

“Муснад” ва “Сунан” да Абу Ҳузома розияллоҳу анхундан ривоят қилинади: “Ё Аллоҳнинг Расули, биз солиб юрадиган дам солишлар, даволанадиган давойимиз ва ҳимояланадиган ҳимоямиз ҳақида хабар беринг. Булар Аллоҳнинг қадаридан бирор нарсани қайтара оладими?” – дедим. Шунда у зот (соллаллоҳу алайҳи васаллам): **“Булар Аллоҳнинг қадаридандир”**, – дедилар.

Расулulloҳ соллаллоҳу алайҳи васалламнинг **“Ҳар бир дард учун даво бор...”**, деган сўзлари умумий бўлиб, ўлимга олиб келувчи ва табиб тузата олмайдиган касалликларни ҳам назарда тутган. Лекин, Аллоҳ таоло ўша хасталикка даво бўлувчи дорини яратган-у, бироқ унинг илмини башариятдан сир тутиб, у томон йўл бермаган бўлиши мумкин. Зеро, махлуқот фақат Холиқи билдирган нарсаларни билади.

Шунинг учун Набий соллаллоҳу алайҳи васаллам шифони дорининг дардга тўғри келишига боғлаганлар. Яратилган ҳар бир нарса борки, унинг зидди бўлади. Демак, ҳар бир дарднинг зидди бўлмиш давоси ҳам бор. Шу боис у зот соллаллоҳу алайҳи васаллам хасталик дорига мувофиқ келганида тузалиш бўлишини таъкидлаганлар.

Юқорида келтириб ўтилганлар касалликнинг давоси борлиги ҳақидаги гаплар эди, холос. Энди қачонки даво ҳолатга кўра касаллик даражасидан ошиб кетса ёки миқдори керагидан кўпайиб кетса, ортидан бошқа дард келиб чиқиши мумкин.

Агар дори касаллик даражасидан камроқ бўлса, унга қарши чиқолмайди ва муолажа ҳам ноқис бўлади.

Даволовчи давосини топа олмаса ёки даво касалликка тушмаса ҳам, шифо ҳосил бўлмайди.

Яна вақт ҳам даволаш учун муносиб бўлиши керак. Акс ҳолда, фойда бермайди.

Агар инсон табиати дорини қабул қилмаса ёки қуввати камлик қилиб, кўтара олмаса, ё дорининг таъсирига монелик

килувчи нарса бўлса, дори тўғри келмаган ҳисобланиб, тузалишга эришилмайди.

Қачонки дори ва касаллик ўртасидаги мувофиқлик комил бўлса, Аллоҳнинг изни ила тузалиш юз бериши аниқ. Бу ҳадиснинг икки хил таъвилидан биридир.

Иккинчиси, ҳадиснинг умумийлигидан хослик назарда тутилган бўлиб, ҳадис лафзининг қамровига кирувчи касалликлар унга кирмайдиганларидан бир неча баробар кўпроқ. Бундай истеъмол ҳамма тилда ҳам мавжуд. Демак, бундан мурод Аллоҳ таоло давони қабул қилувчи касалликни давоси билан берган, дегани бўлади. Шунда давони қабул қилмайдиган дардлар мақсад қилинмайди. Бу Қуръонда келган Од қавми устидан ҳукмрон қилинган шамол ҳақидаги оятга ўхшайди. Аллоҳ таоло айтади:


“У Парвардигорининг амри билан барча нарсани вайрон қилур...”. Оятда шамол вайрон бўлишни қабул қилувчи барча нарсани вайрон қилур, дейилмокчи. Демак, унинг вазифаси шуларни вайрон қилишдир. Бунга ўхшаш мисолларни кўп келтириш мумкин.

Ким бу оламда ҳар бир нарса зидди билан яратилгани, улар ўзаро қарши туриши, суришиши, бир-бири устидан ҳукмрон бўлиши ҳақида фикр юритса, Аллоҳ таоло қудратининг мукамаллиги, Унинг ҳикмати, ҳамма нарсани тўқис яратгани ҳамда рубубият, ёлғизлик ва қаҳрда ягоналиги, Ундан бошқа ҳамма нарсанинг зидди борлиги, У Ўз Зоти ила беҳожат ва ҳар бир яратилмиш Унга муҳтож эканини очиқ-равшан билади.

Расулulloҳ соллаллоҳу алайҳи васаллам: **“Ҳар бир дард учун даво бор...”**, дейишларида бемор ва табибни қўллаб-қувватлаш ҳамда ўша давони қидириб топишга ундаш бор! Чунки касал дардини кетказувчи даво борлигини ҳис қилса, қалби умид руҳига боғланиб, умидсизлик ҳарорати пасаяди ва

умид эшиги очилади. Нафси қувватли бўлса, фитратидаги ҳарорати қўзғалади. Бу эса ҳайвоний, нафсоний ва табиий рухлар қувватига сабаб бўлади. Қачон ушбу рухлар кучайса, улардаги ундовчи энергиялар ҳам қувватланиб, касалликка қаҳр қилади ва уни кетказди. Шунингдек, табиб ҳам шу дарднинг давоси борлигини билса, уни излайди ва кидиради.

Қалб касалликлари бадан касалликларига таққосланади. Демак, Аллоҳ таоло бирор қалбга хасталикни берган бўлса, унинг зиддида шифосини ҳам яратган. Касаллик эгаси буни билиб, қўлласа ва у қалбга тўғри келса, Аллоҳ таолонинг изни ила уни тузатади”.



31-расм. Алижон Саттаровнинг тиббиёт олий ўқув юрти магистратураси “Кардиология” бўйича битирганлиги муносабати билан берилган ҳужжат (диплом)




32-расм. “ЗайтунТибМед” шифохонасининг устозлари томонидан Шуҳрат Шерназаровга “Бошланғич табобат ва ҳижома” йўналишида берилган ижозанинг нусҳаси.



33-расм. Шифокорлар Алижон Саттаров ва Нодир Алимов талабалар билан ҳижома нуқталарини амалий ўрганиш ва “Ҳижома” китобини ёзиш вақтида, Тошкент, 2022 й.



34-расм. Шифокорлар Алижон Саттаров ва Нодир Алимов талабалар билан ҳижома нуқталарини амалий ўрганиши ва “Ҳижома” китобини ёзиш вақтида, Тошкент, 2022 й.



35-расм. 4 унсур, мизожлар, араб ҳарфлари ва абжад ҳисобининг боғлиқлик мажмуаси.

II – КИТОБ ҲИЖОМА

1-фасл. Қон олдиришдан мақсад нима?

Тиб китобларидан маълумки, инсон туғилганидан то вафот этгунига қадар унга бир қанча омил (фактор)лар таъсир ўтказди. Ибн Сино, табиб Юсуфий, Боситхон Шоший ва бошқалар бир овоздан ўша омилларни олтита эканлигига иттифок қилганлар.

Шу омиллардан бешинчи қисми – хилтларнинг камалиб қолиши (ихтибос) ва уларни бўшатиш (истифроғ, яъни танқия)дир.

Танқиянинг, яъни танани тозалашнинг бир неча турлари бор. Шулардан бири, қон олишдир.

Танқиянинг бир тури асосан маълум бир хилтни тозалайди. Ибн Сино, Боситхон Шоший ва Ҳаким Арзонийларнинг ёзишларича, қон олиш – танқияи куллий, яъни умумий тозалашдир. Демак, қон олинганда нафақат қон хилти, унга қўшилиб, қолган уч хилт (сафро, балғам ва савдо) ҳам чиқади. Лекин, қон хилти кўпроқ чиқади.

Ҳижома асосан қон бузилиши сабабли келиб чиққан касалликларни даволашда фойда беради. Ҳозирги кунда тиббиёт мутахассислари қон олдириш фойдалари кўп эканини исботлаб, уларни илмий мақолалари, китоблари ва маърузаларида очиб берганлар

Умуман олганда ҳижома таъсири назарияси 4 асосда тушунтирилади.

1. Ортиқча хилтдан ҳалос бўлиш (Қонни заҳардан тозалаш назарияси)

2. Оғриқнинг қолдиради. (Оғриқ эшиклари назарияси, рефлекс зонаси назарияси, оғриқнинг оғриқ қолдиради назарияси).

3. Иммуниетни фаоллаштиради. (Иммуниетни ошириш назарияси).

4. Шамоллашга қарши ва қон айланишни яхшиланиши назарияси.

Ҳижома қилинганида организмда қуйидаги ўзгаришлар юзага келади:

- Умумий бўшаниш. Қон орқали организмдаги ортиқча касаллик қўзғатувчи ғайритабиий хилтлар (ғайритабиий балғам, ғайритабиий сафро, ғайритабиий савдо, ғайритабиий қон) чиқиб кетади.

- Ҳадиси шариф “Ҳажжом қандоқ ҳам яхши банда, қонни тозалайди, белни бақувват қилади ва кўзни равшанлаштиради”. (Ибн Аббос) Термизий ва Ибн Можа ривояти.

- Танада ҳижома қилинаётган жой тилиниши ҳисобига тўқималарнинг қайта тикланиш жараёни юз беради, майда тилинишларга жавобан организмда ўша соҳани тиклаш ва ёпиш учун кўп миқдорда лейкоцитлар, тромбоцитлар, коллаген эластик толалар ишлаб чиқарилади бу эса қон ишлаб чиқариш, иммун тизимни фаоллашувига сабаб бўлади.

- Қон ишлаб чиқаришда иштирок этувчи органлар фаолиятини стимуллайди, иммун тизимини қувватлантиради, оғриқларни кетказади, касалликни олдини олади.

- Қон томирларнинг очилиши ва тозаланиши, қон айланишининг яхшиланиши. Аниқланишича, касалликларнинг 70%и аъзоларда қон бир маромда айланмаслиги сабабли келиб чиқади;

- Қон-томирлардаги ва лимфа оқимидаги тикималар очилади. Заҳарли моддалар, газлар қон орқали чиқиши, ўша ердаги қон ва лимфа айланишни кучайтиради. Қон олдириш тўқималардаги озикланиш ва кислород билан таъминотни кучайтиради, яллиғланиш ва шишларни даволайди. Инсон

организмидаги захарлар, дориларнинг асоратлари ва тузлар каби зарарли чўкиндиларнинг сўрилиб кетиши;

- Танадаги айрим хужайраларда йиғилиб-тўпланиб қолган чўкиндиларнинг тарқатиб юборилиши. Таъсир соҳасида некрозланган тўқиманинг ферментатив парчаланиши ва биологик фаол моддалар (гистамин, ацетохолин..) ҳосил бўлиши фагоцитоз ва бошқа иммунобиологик ва бошқа жараёнларнинг фаоллашуви;

- Вакуум таъсирида юзага келган капилляр зарарланиш тўқиманинг кислородга бўлган талабини оширади. Бу эса ўз навбатида қўшимча капилляр қон айланишини кучайишига ва ҳосил бўлган кўкаришлардаги қон ивиб аутолизга учрайди ва аутогемотерапияга ўхшаш таъсир қилади.

- Инсон организмидаги ички тизимлар реакциясини қўзғатиш. Шунда мия оғрикли аъзони яхши сезиб, унга бошқа аъзолар билан муносабатга киришишни буюради;

- Моддани бошқа томонга тортиш. (Бачадондан қон кетганда кўкрак соҳасига қуруқ ҳижома қилиш кетаётган қонни тўхташига ёрдам беради.)

- Инсон организмида энергияларнинг фаоллашуви. Биологик актив нуқталар, меридианаларда энергия оқими кучаяди. Организмнинг асосий энергия манбаси бўлган чакраларда тикилмаларни очилиши жуда қўп биз билган ва билмаган касалликлар шифосидир. (Шунинг учун табиб ёки шифокор организмдаги меридианалар, чакралар, улардаги энергияни оз-қўплигини кўрсатувчи белгиларини билса нур устига аъло нур булади.);

- Организмда, айниқса, бўйин-умуртқа қисмида иммунитет тизимининг яхшиланиши ва гармонларнинг бир маромга келиши;

- Руҳий гармония, яъни ҳамжиҳатликнинг яхшиланиши. Руҳий ҳамжиҳатлик бўлмаса, инсон табиатида ғазабланиш,

махзунлик, тушкунлик, таъсирчанлик, лоқайдлик ва шафқатсизлик ҳукм суради;

- Мия фаолияти яхшиланади, яъни инсондаги ҳаракат, идрок, эшитиш ва эслаш хусусиятлари фаоллашади;

- Безлар, айниқса, гипофиз фаоллашади;

- Асаблардан таранглик кетади. Гоҳида бу қон қуюқлашиб, томирчаларда қон тикилиши ва яхши юрмаслигига сабаб бўлади. Натижада асабларда, айниқса, бошда оғриқ пайдо қилувчи босим кучаяди;

- Гоҳида аъзоларда оғриқ вужудга келиб, унинг сабаби топилмайди. Шу вақтда қон олдириш фойда бериб, оғриқларни тўхтатади;

- Организмдаги ортикча кислоталар сўрилиб кетади. Метоболизм маҳсулотлари утилизацияси ва хужайралар аро бўшлиқда дренаж кучайганлиги сабабли тўқима рн кучсиз ишқор томонга силжийди. Қон муҳитининг кислоталиги зиёдалиги эса қизил қон таначалари йўғонлашиб, қон қуюлишига олиб келади;

- Ҳижома – кўпгина касалликлардан фориғ этибгина қолмасдан, назар нафасдан ҳам халос этади. Унинг фойдасини илмий нуқтаи назардан тушунтириш қийин, илм-фан ҳалигача маълум бир жойдан чиқадиган қоннинг фойдасини мукамал тушунтириб бера олмайди.

2-фасл. Қон олишнинг нечта тури бор?

Қон олишнинг уч тури фарқланади:

1. Фасд. Бунда асосан вена томири ништар билан тилиб (уриб), қон чиқарилади. Замонавий тиббиётда бу амал вена-секция атамаси билан машҳур.

2. Ҳижома. Қон олишнинг бу турида терини тилиб, ўша соҳага қортик (лўнка – банка) қўйиб қон олинади (қўлингиздаги асар шу усулга бағишланган).

3. Таълиқ. Бу усулда терига зулук деб аталмиш қон сўрувчи жонивор қўйилади (таълиқ – арабчада осиб қўйиш маъносини билдиради). Сўнгра, қон олинади. Замонавий тиббиётда зулук билан даволашни – гирудотерапия дейилади. (36-расм).


Имом Заҳабий шундай ёзадилар:

Ҳижома ва фасд соғлиқни муҳофаза қилувчилардан ҳисобланади. Имом Бухорий роҳмаҳуллоҳ ҳам бу борада “Қасаллик туфайли қон олдириш ҳақида боб” деб “Саҳиҳи Бухорий” асарларида алоҳида тўхталиб ўтганлар. Пайғамбаримиз алайҳиссалом қон олдиришга буюрганлар.

3-фасл. Ҳижома нима?

Унутмаслик лозимки, “ҳижома” сўзи сўрмоқ, эммоқ, шиммоқ маъноларини англатувчи “ҳажома” феълидан келиб чиққан. Ҳижома терининг маълум соҳаларидан яъни организмдаги ортиқча зарарли, ғайритабиий хилтларнинг (ғайритабиий балғам, ғайритабиий сафро, ғайритабиий савдо, ғайритабиий қон) танани тикилма ва зарарли моддалар энг кўп тўпланган жойларидан қасалликлардан қутилиш ва соғлиқнинг сақлаш мақсадида бирор восита орқали бўшатишга (яъни сўриб қон чиқариб юборишга) айтилади Араблар гўдакнинг она кўкрагини эмишига нисбатан ҳам ушбу феълни қўллашади. Қон зулук ёки махсус ускуналар ёрдамида сўриб олингани учун мазкур сўз қон олиш маъносидан ишлатилади. Бизда оддий халқ тилида бу оддий қон олдириш дейилади. Шу боис баёнимиз давомида ушбу ибораларни галма-гал қўллаверамиз.

Қортиқ, – табибчиликда қон олиш учун ишлатиладиган, сигирнинг шохидан махсус ясалган асбоб (“Ўзбек тилининг изоҳли луғати” Қ ҳарфи, 344-б.). Ҳижома – арабча, лўнқа – туркийда (“Шифоул-илал” асарига қаранг), банка – русчада.



36-расм. Шарқ тобобатида кўра қон олишнинг турлари.
 (“Даволанадиган нарсаларингизнинг энг афзали ҳижома ва фасддир”)

Амалий тиббиётда ҳижома деб киши терисига қортиқ қўйиб, манфий босим ҳосил қилиб уни тортиш (сўриш)га айтилади.

Ҳижома – лўнка – қортиқ – банка қўйиб, манфий босим билан тортиб қон олиш. Қадимда ҳижомани қон олувчилар махсус асбоб, гоҳида шоҳни терига қўйиб туриб, манфий босим ҳосил қилиш учун оғиз билан тортишган (2, 3-расмлар). Ҳозирги кунда бу асбобларнинг замонавий кўринишдагилари чиқди. Уларда юқоридагидек ишга ҳожат йўқ.

4-фасл. Асал ичиш, ҳижома ва доғлаш билан даволаш бўйича Расулulloҳ соллалллоҳу алайҳи васалламнинг йўллари.

Ибн Аббос розияллоҳу анҳудан ривоят қилинади: “Набий соллалллоҳу алайҳи васаллам: “Шифо уч нарсадир: асал ичишда, қортиқ солишда (ҳижома қилдириш) ва олов билан доғлашда. Ва умматимни доғлаб даволашдан наҳий қилурман”, – дедилар”. Бухорий ривояти.

Абу Абдуллоҳ Мозарий айтади: “Тўлиб кетишга оид касалликлар (амрози имтилоий) тўрт хил бўлади:

1. Қонга оид (дамавий);
2. Сафровий;
3. Балғамий;
4. Савдовий.

Агар касаллик қонга оид бўлса, унинг шифоси қон чиқаришдир. Қолган уч қисм хасталиклар улардан ҳар бирига мос хилтни чиқариш билан шифоланади. Гўё Набий соллалллоҳу алайҳи васаллам асал ичиш – сурги ва қортиқ қўйиб қон олиш (ҳижома) – фасд (томирдан ништар орқали қон олиш) эканига ишора қилдилар.

Баъзилар: “Фасд (тилиб туриб томирдан қон олиш) Расулulloҳ соллалллоҳу алайҳи васалламнинг “қон олиш асбоби солишда” деган гаплари остига киради”, – дейишади. Агар дори ҳолдан тойдирса, охирги даволаш доғлаш билан бўлади. Расулulloҳ соллалллоҳу алайҳи васаллам ушбу услубни дорилар жумласидан зикр қилдилар. Чунки, у касал табиати дориларга устун келиб, ичиладиган дорилар фойда бермаган пайтда қўлланилади.

Расулulloҳ соллалллоҳу алайҳи васалламнинг “Мен умматимни нарса қиздириб босишдан наҳий қилурман” деганлари ва бошқа бир ҳадисда: “Ва нарса қиздириб босишни хуш кўрмасман”, – деб келган ривоятда нарса қиздириб босиш воситасида даволашга зарурат туғилмагунча, у охирги ўринда туришига ишора бор. Ушбу услуб билан даволашга шошилиш тўғри эмас. Чунки, кучсизроқ оғриқни кетказиш илинжида шошиб, биринчи бўлиб шу усулни қўллаш оқибатида ундан кўра кучлироқ, яъни, қиздириб босишнинг кучли оғриғи юзага келади”.

Баъзи табиблар: “Мизожий касалликлар икки хил сабаб туфайли юзага келади:

1. Модда сабабли;
2. Моддадан бошқа нарса сабабли.

Биринчи тури қуйидагича бўлиши мумкин:

- иссиқ;
- совуқ;
- нам (хўл);
- қуруқ;
- юқоридагилардан таркиб топган (яъни, мураккаб).

Мазкур тўрт ҳолатдан аввалги иккитаси, яъни, иссиқлик ва совуқлик таъсир ўтказувчи ҳамда кейинги иккитаси, яъни, намлик (хўллик) ва қуруқлик таъсирланувчи ҳисобланади. Таъсир қилувчи икки ҳолатдан бирининг устун келишидан

таъсирланувчи ҳолат ҳам у билан бирга ҳамроҳ экани келиб чиқади. Шунингдек, баданда мавжуд суюқлик(хилт)лар ва бошқа мураккаб моддаларнинг ҳар бирида икки, яъни, таъсир қилувчи ва таъсирланувчи ҳолат бўлади.

Бундан маълумки, мизожий касалликларнинг асли хилтлар ҳолатларининг кучлиси ҳисобланиш иссиқлик ва совуқликка тобе. Набий соллаллоҳу алайҳи васалламнинг ҳадислари тамсил йўлига кўра совуқ ва иссиқ касалликларни муолажаси ҳақида келган. Агар касаллик иссиқ бўлса, уни тилиб-кесиб ёки ҳижома қилиш орқали қон чиқариш йўли билан муолажа қиламиз. Чунки бунда (иссиқ) моддадан фориғ бўлиш ва мижозни совитиш бор.

Агар касаллик совуқ бўлса, уни иситиш-қиздириш йўли билан муолажа қиламиз. Бу усул асал билан даволашда мавжуд. Агар мизожида совуқлик касали бўлган бемор совуқ моддадан халос бўлишга эҳтиёж сезса, асал ушбу амални бажаради. Чунки унда етилтириш (назж), кесиш, юмшатиш (талтиф), тозалаш (жило), майинлаштириш бор. Демак, унинг воситасида оҳисталик ва кучли ич сурувчи дорилар зараридан омонда бўлиш билан ўша моддалардан қутилишга эришилади.

Ҳар қандай моддий касаллик ўткир ёки сурункали бўлади. Касаллик ўткир бўлганида икки тараф (иссиқлик ва совуқлик)дан бирига тез ўтади. Бу пайтда нарса қиздириб босишга зарурат туғилмайди.

Хасталикнинг сурункали шаклида (керакли муолажалар босқичи)дан ўтиб бўлингач, унинг афзал давоси нарса қиздириб босиш имкони бўлган аъзоларда шу услубни қўллашдир. Чунки бу касалликнинг сурункали бўлишиги сабаб кучли совуқ моддадир. У аъзога ўрнашиб олиб, мижозини бузади ва унга етиб келган ҳамма моддаларни ўзининг жавҳарига

ўхшаш моддага айлантиради ва кейин у ўша аъзода алангаланаяди. Мазкур моддани ўрнашиб олган маконидан нарса қиздириб босиш билан чиқарилади. Бу билан ушбу услуб натижасида мавжуд оловли жуз йўқотилади.

Расулulloҳ соллаллоҳу алайҳи васалламнинг “Кучли иситма жаҳаннам алангасидандир. Бас уни сув билан совутингиз”, – деб марҳамат қилганлар (Бухорий ва Муслим ривояти). Бу ҳадисларидан оддий-содда касалликларни муолажа қилишни ўрганган эдик. Шунингдек, ушбу фаслда келган ҳадиси шариф орқали ҳамма моддий касалликларни даволаш йўлидан сабоқ олдик.

5-фасл. Ҳижоманинг фазилати ҳадисларда

Касир ибн Салимдан ривоят қилинади: “Анас ибн Молик розияллоҳу анҳудан Расулulloҳ соллаллоҳу алайҳи васаллам: “Мени (Масжиди Ҳаромдан Масжиди Аксога) сайр қилдирилган тунда мен олдидан ўтган (фаришталардан иборат ҳар бир) жамоа: “Эй Муҳаммад, умматингизни ҳижомага буюринг!” – дейишди”, – деганини эшитдим”. Ибн Можа ривояти.

Ушбу ҳадис “Жомийи Термизий” китобида ҳам Ибн Аббос розияллоҳу анҳумодан ривоят қилинган. Фақат унда “Ҳижомани лозим тутинг, эй Муҳаммад!” – деган лафз билан келтирган.

“Ҳижома қилдирадиган кунларингизнинг яхшиси ўн еттинчи, ўн тўққизинчи ва йигирма биринчи кунларидир”. Ибн можа ривояти.

“Даволанадиган нарсаларингизнинг яхшиси оғиздан дори ичиш, бурундан дори томизиш, ҳижома ва сургидир”. Термизий, Абу Довуд, Насоий ривояти.

6-фасл. Ҳижома суннатми?

Расулуллоҳ соллаллоҳу алайҳи васаллам умрлари давомида баданларининг ҳар хил жойларидан қон олдирганлар. Ички организмлар терининг муайян қисмларига алоқадордир бўлиб, қайси аъзо хасталигига қараб, ўша аъзога боғлиқ муайян жойдан қон олинади. Ҳадиси шарифларда у зот соллаллоҳу алайҳи васаллам қуйидаги жойларидан қон олдирганликлари қайд этилади:

Бош оғриғи учун қон олдириш. Расулуллоҳ соллаллоҳу алайҳи васаллам бош оғриғи сабабли қон олдирганлари тўғрисида келган ҳадислар жуда кўп. Имом Бухорий, Муслим, Насоий, Ибн Можа ва бошқа муфаддислар ривоят қилган ҳадисда Ибн Аббос розияллоҳу анху: “Расулуллоҳ соллаллоҳу алайҳи васаллам бошларидан қон олдирдилар” – деди.

Имом Бухорий келтирган яна бир ривоятда “Набий соллаллоҳу алайҳи васаллам бошларидаги қаттиқ оғриқ сабабли эҳромда бўлган ҳолларида бошларидан қон олдирдилар” – дейилган.

Ҳома⁴⁴дан қон олдириш. Табароний Абу Кабша Анморий розияллоҳу анху ривоят қилган ҳадисда Расулуллоҳ соллаллоҳу алайҳи васаллам бошларининг тепа қисмидан ҳам қон олдирганлари айtilган.

Лингвистик маъноси бошнинг олдинги қисми пешонани сочли қисмга ўтиш жойи. Анатомиқ жиҳатдан бош мия катта ярим шарлари пўстлоқ қисмини пешона бўлагига тўғри келади. Бу бўлак олий даражадаги феъл-атворни, тафаккурнинг бошқаради, жумладан, оператив хотира бошқаруви, хотирадаги нарсани эслаш, нутқ, ёзилган сўзларни тушуниш, эътиборни ушлаб туриш, режалаштириш, ижтимоий хулқ-атвор

⁴⁴ Ҳома арабча сўз бўлиб, бошнинг умумий қисмига айтилади. Яъни бошнинг тўлиқ ҳамма қисми бу – ҳомадир.

ва бошқа кўпгина муҳим фаолиятларни тартибга солиш каби вазифаларни бажаради. Бу ҳақида Қуръони каримда Алақ сураси 15-16 оятларида бир неча аср илгари илм фан техника ривожланмасдан мукамал ва гўзал тарзда эслатиб ўтган. (Холбуки нейробиология соҳаси ривожланаётганига эндиғини бир аср бўлади). “Йўқ агар қайтмаса пешонасидан шиддатла тутамиз, ёлғончи, ҳатокор пешонасидан.”

Бу соҳадан ҳижома қилиш ҳаракатда бузилишларда, паралич, руҳий ва ахлоқий бузилишларда, турли васваса, наркотик ва бошқа қарамликларда қўллаймиз.

Қарндан(бош мия шох қисми) қон олдириш. Абу Довуд Таёлисий Абдуллоҳ ибн Жаъфар розияллоҳу анху ривоят қилган ҳадисда “Албатта, Расулуллоҳ соллаллоҳу алайҳи васаллам заҳарланганларидан кейин қаринларидан қон олдирдилар” – дейилган. Бу нуқта жойлашув жиҳатидан бош мия нутқ маркази проекциясига тўғри келади.

Қўлланилиши: Нутқ бузилиши билан кечувчи касалликларда, васваса, руҳий бузилишларда.

Яфух (васато роси, бошнинг тепа қисми)дан қон олдириш. Абу Довуд ривоят қилган ҳадисда Абу Ҳурайра розияллоҳу анху айтади: “Абу Ҳинд Набий соллаллоҳу алайҳи васаллам бошларининг ўртасидан қон олди. Шунда Набий соллаллоҳу алайҳи васаллам: “Эй Бану Баёза, Абу Ҳиндни уйлантиринглар, унга (бирор аёлни) никохлаб беринглар. Агар сизлар даволанаётган нарсадан бирортасида яхшилик бўлса, бас, (у) ҳижомадир”, дедилар”. Бу нуқта иккала қулоқ супраси орасидан чизик тортсак ва пешонадан бошнинг орқасига чизик тортсак кесишган нуктасидир. Бу нуқта ёш болаларнинг лиқилдоқ соҳасига тўғри келади. Бу асосий нуқталардан бири бўлиб, деярли барча касалликларда жумладан кучли бош оғриғи, мигрень, аутоиммун касалликлар, ақлий ва нутқ ривожланишдаги бузилишларда, маторика ва хотира

бўзилишида, бош ички босимини ортишида, атеросклероз ва артериал гипертонияда, марказий ва периферик асаб тизими касалликларида қўлланилади.

Бўйиндан (ал-каҳил), бўйиннинг икки тарафидаги икки кўктомирдан (Ал-ихдаъану) ва икки елка ўртасидан қон олдириш. Ҳижоманинг ушбу тури энг кўп қўлланилади. Расулulloҳ соллаллоҳу алайҳи васаллам гардандан ва бўйиндаги икки кўктомирдан қон олдирганлар ҳамда бу ҳижоманинг энг фойдалиси эканини айтганлар.

Имом Ибн Можа ва Термизийлар қилган ривоятда Анас ибн Молик розияллоҳу анҳудан ривоят қилинади: “Набий соллаллоҳу алайҳи васаллам бўйиндаги икки кўктомирдан ва гардандан қон олдирдилар”. Бир ривоятда: “Набий соллаллоҳу алайҳи васаллам уч марта, (яъни) бўйинларидаги икки кўктомирдан икки марта ва гардандан бир марта қон олдирдилар” – дейилган.

Имом Аҳмад ривоят қилган ҳадисда Ибн Аббос розияллоҳу анҳумодан ривоят қилинади: “Албатта, Набий соллаллоҳу алайҳи васаллам уч марта, (яъни) бўйинларидаги икки кўктомирдан ва икки елка ўртасидан қон олдирдилар ва қон олувчига ҳақ бердилар. Агар ҳаром бўлганида, уни бермаган бўлардилар” – дейилган.

Абу Абдуллоҳ айтади: “Гардандан қон олдириш елка ва томоқ оғриғини даволашда фойда беради. Бўйиндаги икки кўктомирдан қон олдириш бош қисми касалликлари, яъни юз, тиш, қулоқ, кўз, бурун ва томоқ касалликларини даволашда фойдаси бор. Чунки бу касалликлар қон кўплиги ёки бузилишидан бўлиши мумкин”.

Ал-каҳил, деб келган нукта тиббиётга кўра, орқа томондан 7-умуртқа соҳасига тўғри келади. Баъзилар шу нуқтадан қон олишни “гардандан қон олиш” деб айтишади. Лекин, аслида гардон форсча сўз бўлиб, бўйин маъносини беради. Каҳил эса, бўйинни тугаш ва икки курак ораси нуқталари-

нинг кесишмасидир. Ал-ихдаъану, деб келган соҳа “Тиб қонунлари”нинг таржимасида “бўйиннинг иккала томири” деб келтирилган. Бунинг ҳижомада 3 га бўламиз. Ҳар бир нуктанинг ўз вазифаси бор.

1. Бош суяги тугаши қисми.

Қўлланилиши: Сурункали касалликларда, бош оғриғида, гипертонияда.

2. Қулоқлар орқаси.

Қўлланилиши: бош мия ички босимида, эшитув системаси касалликларида, мигрен, қулоқларда шовқин бўлганда. Шунингдек Ибн Сино табобатида қулоқ орқаси раис орган бўлмиш бошнинг бўшалиш қисми ҳисобланади.

3. Лимфатик филътр.

Бу соҳа қулоқнинг орқасидан то ўмровгача тушган мушак бўлиб, бўйинтуруқ мушаги – *m.sternocleidomastoideus* – кивательная мышкага тўғри келади.

Қўлланилиши: Лимфани тозалашда, лимфа тугунлари яллиғланишида, наркотик ёки наркотикка қарамликда, озиқ овқат ва химикатлардан заҳарланишда, фил товон касалликларида қўлланилади.

Энсанинг боиланиш қисми⁴⁵дан қон олдириш. Расулulloҳ соллаллоҳу алайҳи васаллам бош орқасининг пастки қисмидан қон олдириш бир неча касалликларга шифо бўлишини айтганлар.

Табароний қилган ривоятда Сойфий отасидан: “Расулulloҳ соллаллоҳу алайҳи васаллам: “Бош орқасининг пастки қисмидан қон олдиришни лозим тутинглар. Чунки бу етмиш иккита дардга даво. Бешта даво: мажнунликдан, моховдан, песликдан ва тиш оғриғидан” – дедилар”, деб ривоят қилган.

Табиблар энса чукурчаси (нукра)дан яъни энсадўнги (камаҳдуваху)дан ҳижома қилишда ихтилоф қилдилар. Яъни, бош орқасининг пастроқ қисми.

⁴⁵ Яъни бош орқасининг пастроқ қисми.

Муаллиф роҳимаҳуллоҳ нукра ва қомаҳдуваҳу жойларини бир деб келтирмоқдалар. Лекин, табиб Боситхон Шоший роҳимаҳуллоҳ уларни бир-бирига жуда яқин, лекин бошқа нуқталар эканлигини қуйидагича ёзадилар: “Қомаҳдуваҳу – бошнинг охири ва гардан устидаги нукра чуқурининг устидаги дўнг мавзеъдур ва ҳомаҳ ба таҳфифи мим бошнинг ўртасидур” (“Қонуни Боситий”, 2-китоб, 782-б.) Ривоят қилинишича, Аҳмад ибн Ҳанбал бунгамуҳтож бўлиб, энса чуқурчаси (нукра)дан эмас, балки бўйин(гардан)нинг икки томонидан ҳижома қилдирганлар. Ушбу жойдан қон олдиришни “Қонун” китоби муаллифи ҳам қариб кўриб: “Саййидимиз вазариатимиз соҳиби Муҳаммад соллаллоҳу алайҳи васаллам айтганларидек, албатта, бу эсдан чиқаришни келтириб чиқаради. Чунки, орқа мия ҳифз ўрни ҳисобланиб, у жойдан қон олдириш ҳифзни йўқотади” деган. Бошқалар унга раддия бериб, айтишадик, (энсанинг чуқурчасидан ҳижома қилиш эсдан чиқаришни келтириб чиқариши тўғрисидаги) мазкур ҳадис собит эмас. Агар собит бўлса ҳам, зарурат бўлмаган ҳолатда қон олдиришгина орқа миани заифлаштириб қўярди. Аммо қон қолиб келиб турган вақтда табобат жиҳатидан ҳам, шариат томонлама ҳам фойдалидир. Набий соллаллоҳу алайҳи васалламнинг ҳолат тақозосига қараб бўйин (гардан)нинг бир қанча жойидан ва эҳтиёж сезилганда бўйин (гардан)дан бошқа аъзоларидан ҳижома қилдирганлари собит. Демакки бу нуқта ихтилоfli бўлиб, ундан жуда зарурат бўлмаса фойдаланмасликни тавсия этамиз.

(Энса чуқурчаси (нукра)дан қон олишнинг фойда ва зарарлари ҳақида кўпроқ маълумот истаганлар “Тиб қонунлари”нинг 1-китоби 487-488-б., ва “Қонуни Боситий”нинг 2-китоби 781-783-бетларига қаралсин). Қадам⁴⁶нинг устидан қон олдириш. Абу довуд Анас ибн Молик розияллоҳу анху-

⁴⁶ Оёқнинг юзаси.

дан ривоят қилган ҳадисда “Набий соллаллоҳу алайҳи васаллам эҳромда бўлган ҳолларида, оёқларидаги оғриқ сабабли қадамларининг устидан (оёқлари юзасидан) қон олдирдилар” – дейилган.

Хулоса: бу ҳадисдан келиб чиқадики ҳижома оғрикли нуқталарга ҳам яхши таъсир қилади. Яъни организмнинг оғрикли соҳасига тўғридан-тўғри ҳижома қилиш ўша соҳани қон айланишини стимуллади, бош мия нерв системасини эътиборини жалб этади.

Белдан қон олдириш. Имом Насоий Жобир ибн Абдуллоҳ розияллоҳу анху дан ривоят қилган ҳадисда “Расулуллоҳ соллаллоҳу алайҳи васаллам, эҳромда бўлган ҳолларида, белларидаги ёки ёнбошларидаги шиш сабабли қон олдирдилар” – дейилган. Агар эътибор қилинса пайғамбаримиз соллаллоҳу алайҳи васаллам ҳижома қилдирган деярли барча нуқталар асосан бош ва орқа мия йўналишида жойлашган.

Сондан қон олдириш. Абу Довуд Жобир ибн Абдуллоҳ розияллоҳу анху дан ривоят қилган ҳадисда “Расулуллоҳ соллаллоҳу алайҳи васаллам сонидан лат еганликлари сабабли қон олдирдилар” – дейилган.

Бу ҳадисдан биз ҳижомага оид яна бир қондани ўрганишимиз мумкин. Яъни лат еган, қон тўпланган жойлардан ҳам ҳижома қилиш организм учун фойдали ҳисобланади.

Раҳса⁴⁷ сабабли қон олдириш. Имом Абу Довуд ва Аҳмадлар Жобир ибн Абдуллоҳ розияллоҳу анху ривоят қилган ҳадисда “Расулуллоҳ соллаллоҳу алайҳи васаллам эҳромда бўлган ҳолларида ўзларига етган раҳса сабабли қон олдирдилар” – дейилган.

Муқаддам ўтган ҳадислардан даволаниш ва ҳолат тақозо қилган вақтда ҳижома мустаҳаб экани кўринади.

⁴⁷ Ибнул Асийр “Раҳса бу – ҳайвоннинг туёғи остига нимадир тегиб, оёқни ҳолсизлантириб қўйиш ёки ҳолсизликдан оёқ остига сув йиғилиши” – деган.

7-фасл. Ҳижома тарихда

Ҳижоманинг келиб чиқиш тарихи Асбахонга бориб тақалади. Тарихга назар ташласак, инсоният қадим замонлардан бери бу даволаш усулига эътибор қаратиб турганини ва бу авлоддан авлодга мерос сифатида ўтиб келганини кўрамиз. Манбаларда келтирилишича, ҳижома милоддан 1500 йил олдин қадимги мисрликлар томонидан қўлланган. Топилган осори атиқаларда ушбу амалиётда ишлатилган ускуналар ўйиб нақш кўринишида ифода этилган. Айрим манбаларда милоддан олдинги 341-281 йилларда яшаб ўтган хитойлик бир ўсимликшунос илк бор, мол шохлари ёрдамида ҳижома амалиётини ўтказганга айтилади.

Қон олдиришнинг ҳозирги кунимизгача халқ орасида муомалада экани бежиз эмас. Негаки, ҳижома ҳар хил касалликлардан даволанишда фойдали ва самаралидир. Доктор Абдулжавад Совий шундай дейди: “Жоҳилият даврида ҳам араблар ҳижомадан фойдаланганлар. Ислоҳ келгандан кейин Расулulloҳ соллаллоҳу алайҳи васаллам қавмларига ушбу муолажа воситасидан фойдаланишга буюрдилар. Ўзлари ҳаётларига татбиқ қилиб, бошқаларни ҳам шунга қизиқтирдилар. Мағриб ва Машриқнинг кўпгина мамлакатларида кенг ёйилган бу амалиёт Оврупага Андалус (Испания) орқали кириб келган. Ўша пайтда мусулмон табиблар ва уларнинг таботат соҳасидига асарлари биринчи манба бўлган”. Ислоҳ келишидан олдин араблар орасида ҳижома маълум бўлса ҳам, лекин унчалик машҳур эмасди. Самура ибн Жундуб розияллоҳу анҳудан ривоят қилинади: “Расулulloҳ соллаллоҳу алайҳи васаллам ҳузурларида эдим. Ҳажжомни (ҳижома амалиётини бажарувчи табибни) чақирдилар. Табиб у зот соллаллоҳу алайҳи васалламдан шохлардан бўлган миҳжамлари (қон олиш ускуналари) ёрдамида қон олди. Тиғи билан



37-расм. Эронда ишлатилган лўнқа (банка),
1-ҳижрий аср, Лувр музейи, Париж.



38-расм. Араб ҳақимлари ночор италианларда қон олишни
бажармоқдалар (асар 1699 йили, Giuseppe Maria Mitelli
(1634–1718) томонидан чизилган).

у зотнинг танасини тилишга киришди. Шунда ҳижома нима эканлигини билмаган бир аъробий кириб қолиб, манзарани кўраркан, даҳшатга тушиб: “Ё Аллоҳнинг Расули, нима учун бунга терингизни кесишга қўйиб берасиз?” – деди. Шунда Расулуллоҳ соллаллоҳу алайҳи васаллам: “Бу – ҳижома” – дедилар. У яна: “Ё Алоҳнинг Расули, ҳижома дегани нима у?” – деб сўради. У зот соллаллоҳу алайҳи васаллам: “Бу – инсонлар даволанадиган нарсаларининг яхшиси” – дедилар”.

Ислом келганидан кейин ҳижома кенг ёйилиб, жамиятнинг асосий муолажа воситаларидан бирига айланди. Ислом етиб борган барча ўлкаларда бу усул Муҳаммад соллаллоҳу алайҳи васалламнинг тавсиялари дея маҳкам ушланди. Мусулмон уламолари Расулуллоҳ соллаллоҳу алайҳи васалламнинг табо-батлари ҳақида китоблар ёзишди. Жумладан, ҳижома ҳақида ҳам алоҳида китоблар таълиф қилинди.

Маълум вақт оралиғида қон олдиришга эътибор сусайиб, ҳатто хурофот сифатида ҳам қаралди. Аммо кейинчалик бу муолажа воситасига аҳамият яна аввалги ҳолига қайтди. Аҳо-лиси асосан мусулмонлардан иборат баъзи мамлакатларда, ҳатто ҳижома марказлари ва шифохоналари очилди. Чунки қатъий эътиқод қилинардик, уммат пайғамбари Муҳаммад соллаллоҳу алайҳи васалламнинг қилган амаллари, буюрган-лари ва қайтариқларида инсонлар учун кўп фойдалар бор. Зеро, у зот соллаллоҳу алайҳи васаллам ўз ҳавойи нафсла-ридан гапирмайдилар. Аксинча, ҳамма айтганлари фақат ва фақат ваҳийдир. Дастлаб ҳижома учун ишлатилган ускуна-лар мол шохлари, сопол идишлар ва ўсимлик ҳамда дарахт-ларнинг ичи ғовак тана ва новдалари бўлган. Кейинчалик, замон тақозосига қараб, махсус шиша банкачалар кенг ом-малашган. Шаффоф, тоза ҳамда қон олувчи шахс қон олди-рувчидан қанча миқдор қон чиққанини кўриб билиб туришга имкон берувчи ва бошқа афзалликларга эга банкачалар ушбу амалиёт учун жуда қулай воситага айланди. (37–38-расм).

8-фасл. Ҳижоманинг турлари

Ҳижоманинг бир неча турлари мавжуд бўлиб, юртимизда яшаб ижод этган **ҳозиқ табиб Боситхон ибн Зоҳидхон Шо-шийнинг** «Қонун ал Мабсут» асарида келтирилган синфла-ниш қуйидагича:

1. Ҳижомаи имтисосий бошарт. Бунда терида кичик-ки-чик кесмалар қилинади ва қортиқ қўйиб, қадимий услубга кўра оғиз билан, замонавий усулга кўра ҳавони сўриб олиш билан манфий босим ҳосил қилинади. Шунинг натижасида қон қортикқа чиқади.

2. Ҳижомаи имтисосий бешарт. Бунда худди юқоридаги услубда манфий босим ҳосил қилинади, лекин тери тилин-майди.

3. Ҳижомаи норий бошарт. Бунда терини тилиб, шиша ёки бошқа идиш ичига оловни бир киргизиб (ичидаги ҳавони кетказиб) терига қўйиш;

4. Ҳижомаи норий бешарт. Бунда худди юқоридаги ус-лубда лекин, тери тилинмайди (“Қонуни Боситий”нинг 2-жузъидан).

Бошқа манбаъларда келтирилган турлари:

1. Қонли ёки катта ҳижома.
2. Қуруқ ёки кичик ҳижома.
3. Сирпанувчи ҳижома.
4. Магнит банкалар воситасида қилинадиган қуруқ ҳижо-ма.
5. Сувли ҳижома.

Ҳижома банкларининг сўриш қучига қараб:

1. Енгил.
2. Ўртача.
3. Қучли.

9-фасл Ҳижомаи имтисосий бошарт. (Қонли ёки катта ҳижома).

Ҳижоманинг энг машҳур ва кенг тарқалган тури *қонли ҳижомадир*. Бунда терида кичик-кичик кесмалар қилинади ва кортик қўйиб, қадимий услубга кўра оғиз билан, замонавий усулга кўра ҳавони сўриб олиш билан манфий босим ҳосил қилинади. Шунинг натижасида қон кортикқа чиқади.

Қонли ёки катта ҳижома турлари:

1. Хитойча ҳижома.

Хусусиятлари:

- Кесик чуқур қилинади. Чуқурлиги 3-5 миллиметр.
- Акапунктура атласи бўйича ҳиджома банкалари қуйилади.

• Бир сеансда бир неча 10 лаб точкалардан қон олинади. Банкарлар 5-10 минут туради.

Мусбат томонлари:

- Жуда тез клиник эффект чиқади. Айниқса, артериал босимни ортиши, заҳарланиш, организмда суюқликни ортиши, кучли травмарларда (жароҳатланиш, мия чайкалиши.)

Манфий томонлари:

- Чуқур ва кўп сонли тилиш оқибатида ноҳўя таъсирларни келтириб чиқаради. Чуқур тилинганда димланган қон эмас, балки функционал (танада айланиб юрган қон) чиқиб кетади.

- Танада чандик қолади.

• Бир вақтнинг ўзида кўп банка ва ўша точкада қонни узоқ димланиши оқибатида хушдан кетиш холлари кўп учрайди. Айниқса бу бўйин ва белдан қон олганда.

- Атласдаги баъзи точкалар нима учун ўша ерга қўйилаётгани ақлга тўғри келмайди.

Ноҳўя таъсирлари:

- Ҳижомадан кейин ўзини нохуш ҳис қилиш, холсизлик, чарчоқ.

• Умумий ҳолатни ёмонлашуви, кучли холсизлик, камқонлик, иммунитетни пастлаши асосинда организмда янги касалликни юз бериши.

Қарши кўрсатма

- Камқонлик
- Болалар ва қари инсонлар.
- Диабетик оёқда
- Артериал босимни пастлигида.
- Ҳомиладорлик
- Инплантант органлар амалиёти ўтаган инсонлар.

2. Косметик ҳижома

Асосий хусусияти:

- Терида жуда кичик тилинишлар билан қилинади.
- Тайёргарликларсиз, яъни вакуум банка қўлланмасдан қилинади. Баъзи ҳолатлардан ташқари.

Мусбат томонлари:

- Кўқариш бўлмайди.
- Кесик излари қолмайди.

Манфий томонлари:

- Кесик ўта кичик ва торлиги учун функция қилмаётган(ахлатланган, димланган қон) тўлиқ чиқиб кетмайди.
- Тайргарликсиз, яъний банка қўйиб керакли микдорда ахлатланган, димланган қон, токсинли қон йиғилмайди. Шунинг учун организмнинг иммун жавоби етарлича бўлмайди.

3. Тиббиёт ҳижомаси.

Асосий хусусияти:

- 2мм.гача яъни салфетка қалинлигида кесилади. Амалиётда фақат функция кўрсатмайдиган, димланган қон чиқади.

- Банкалар бир вақтда 60-90 секунддан ортик бўлмаган вақтга қўйилади.

- Ҳижома нуқталари асосли медицина нуқтаи назаридан, нерв таъминоти, касалланган ва қон айланиши бузилган участкалардан олинади. Бу нуқталарни хажжом массажа вақтида аниқлайди.

Мусбат томонлари:

- Деярли ножўя таъсирларсиз, қарши кўрсатмаларсиз.
 - Ҳижоманинг фойдали хусусиятлари максимал сезилади.
- Манфий томонлари: Йўқ.

10-фасл. Терининг тузилиши ва унинг аҳамияти

Тери — бу одамнинг яшаш шароитидаги гомеостазни сақлаб турувчи энг муҳим аъзо. Тери ички аъзолар, эндокрин ва асаб системаларнинг фаолиятини кўрсатиб туради.

Терининг умумий тузилиши:

1-эпидермис; 2-дерма; 3-гиподерма.

Агар организмда озгина ўзгаришлар содир бўлса, албатта у терида ўз ифодасини топади. Тери ички аъзолар патологияси ҳақида хабар беради. Масалан, гастрит касаллигида ошқозонинг кислотали шароити пасайган бўлса ёки жигар касалликларида қон томирлар кенгаяди; сурункали ич қотганда (запорда) терида тошма пайдо бўлади; асаб системаси касалликларида терининг ёғ чиқариш фаолияти кучаяди, қора нуқталар — камедон, хуснбузарлар тошади. Диабет, буқоқ касалликларида тери ўзгаради — қуриб, бўшашиб, осилиб қолади (дистрофик ўзгаришлар пайдо бўлади).

Юз териси эса одамнинг эмоционал ҳолатини, унинг ақл-идрокини ифодалаб, ўзига хослигини кўрсатади. Терининг оғирлиги одам умумий вазнининг 7% ини ташкил қилади. Бу эса ўртача 4 кг деганидир. Демак, тери энг катта аъзо

ҳисобланади, унинг сатҳи эса 1,5-2 м², қалинлиги 4 мм ни ташкил қилади.

Тузилиши бўйича тери 3 қаватдан иборат: эпидермис, дерма ва тери ости клетчатка. Терининг устки қавати эмульсион парда билан қопланиб, унинг қалинлиги 7-10 мкм бўлади, асосан тери орқали чиққан маҳсулотлардан иборат.

Эпидермиснинг ўзи 5 қаватдан иборат:

1. Бошланғич, унинг ҳужайраларида меланин пигменти ҳосил бўлади, у қанча кўп бўлса, терининг ранги шунча қора бўлади;
2. Тикансимон қават;
3. Донадор қават — ҳужайраларида оксил моддаси сақланади;
4. Тиниқ ёки ялтироқ қават;
5. Муғуз (шоҳ қавати).

Эпидермиснинг умумий массаси катта одамларда 0,5 кг ни ташкил қилади. Унинг ташки томонида ҳар хил чизиклар, ажинлар, бўртиб турган жойлар бўлиб, улар ҳар одамда ўзига хос ва бошқаларда такрорланмайди (хатто эгизакларда ҳам). Эпидермиснинг қалинлиги 0,15 мм, лекин энг қалин жой — бу кафт ва товонда бўлади (қалинлиги 1,5 мм). Энг пасти эпидермиснинг базал қаватида доимо янги ҳужайралар ҳосил бўлади. Иммуни ҳужайраларда янги ҳужайра ҳосил қилувчи эмбрион қавати мавжуд. 28 кун давомида ёш ҳужайралар устки қаватга ўтади, улар ўз ядросини йўқотади ва ясси (ўлик, қуриган кератин) бўлиб қолади. Устки қавати — муғуз қаватини ҳосил қилади. Эпидермис қавати озукани дерма қавати билан ўзаро чалкашув натижасида олади. Вақт ўтиши билан чалкашув ўз кучини йўқотади. Шунинг учун терини ташқаридан озикланиши керак. Бу эса косметологиянинг асосий вазифаси.

Донадор қават деб аталишининг сабаби, унинг ҳужайраларида кератолинин моддалари доначалар шаклида бўлади.

Ялтироқ қаватда махсус оксил модда бўлиб, унинг нур синдириш хусусияти кучли. Шу сабабли ҳам бу қаватга ана шундай ном берилган. Муғуз қават ташқи муҳит билан алоқадор ва терини барча нобоп таъсирлардан, яъни ёмғир, офтоб, шамол, совук, чанг ва микроблардан ҳимоя қилади. Шунингдек, уриб олиш, механик, физик, кимёвий таъсирлардан ҳам асраб, эпидермис орқали сув, электролитларнинг сўрилишига йўл қўймайди.

Дерма – у эпидермис қавати остида жойлашган бўлиб, эластик тўқима – коллагендан ташкил топган. Дермада қон томирлари, нервлар, соч ва тирноқ илдизлари жойлашган. Қалинлиги 2 мм.

Коллаген ёш соғлом терида бир-бирига параллел жойлашган боғламларни ҳосил қилади. Шунинг учун ёшларда тери қайишқоқ ва таранг. Коллаген тугунлари пружинали матраци эслатади.

Терининг учинчи қавати – тери ости ёғ қатлами – гиподерма дейилади. Бу – энг чуқур қатлам бўлиб, ички аъзолар ва тўқималарни ҳарорат ўзгариши ҳамда механик таъсирлардан ҳимоя қилади. Бу қатлам энергия манбаи бўлиб, терининг ҳаракатланувчанлигини таъминлайди. Соғлом терида 70% сув бор, тери орқали 1 литргача тер чиқади, лекин ҳаво ҳарорати юқори бўлганда ва қаттиқ ишланганда бу кўрсаткич 10 литргача ортади. Терида ёғ ва тер ишлаб чиқарадиган безлар, нерв толалари, майда қон томирлари кўп. Ёғ безлари ёғ ишлаб чиқариб, терини қуриб қолишдан асрайди. Бу безлар суткасига 20 гр гача ёғ ишлаб чиқариши мумкин. Яна ҳам ишончли далил келтирадиган бўлсак, терини катта бир текислик деб фараз қилinsa, унда 6 метр қон томирлари, мингдан ортиқ нерв толалари, 645 та тер ва 75 та ёғ безлари, 65 та соч қоплари топилади.

Терида минглаб нуқталар бор, улар оғриқ, совук, иссиқ, босимга ҳозиржавобдир. Шунинг учун терини тана баромет-

ри дейишади. Тери ҳар хил ички ва ташқи воқеаларга жавоб беради. Масалан, жигар, ўт пуфағи касалликларида тери сарик рангга киради. Скарлатина, қизамиқ, қизилча билан касалланганда тошма тошади. Модда алмашинуви бузилса, терининг ҳолати ва ранги ўзгаради – фурункулёз пайдо бўлади. Анемияда тери оппоқ, консиз тусга киради.

Терининг ўзи ҳам юпка ҳимояловчи қават кислотали парда билан қопланган, у терини майда ёт моддалар, касал чакирувчи бактериялар, кимёвий моддалар ва атмосферадаги ўзгаришлар таъсиридан ҳимоялайди.

Кислотали парда – бу юпка ёғ сув эмульсиясининг пардаси. Сувли фазада аминокислоталар, мочеви́на, электролитлар сақлайди. Ёғли липид фазада эса фосфолипидлар, мой кислоталари, эфир бирикмаларини сакловчи ёки эркин ҳолдаги стероидлар бор. Сувли ёғли эмульсия тери қуриб кетишининг олдини олади, чунки рН 4,6-6,5 га тенг бўлган кислотали буфер эритма ҳосил бўлади.

Соғлом тери микробларни баратараф қилувчи махсус ҳимояловчи моддалар ишлаб чиқаради. Агар тери усти тилинса ёки тимдаланса, микроблар ичига кириб қолиши мумкин, шунда организм ичга кирган инфекция билан курашади. Бу эса мураккаб жараён бўлиб, ҳимояловчи моддалар – анти-телалар ишлаб чиқаради. Демак, инфекцияга қарши кураш жараёнида тери фаол иштирок этади ва бу тери хоссасининг “ичига бўлган ҳимоя” деб аталади.

Терининг моддалар чиқарувчи хусусиятлари ҳам тер ва ёғ ишлаб чиқарувчи безлар ёрдамида вужудга келади. Тери орқали чиқарадиган терда 98% сув, 1% эриган натрий хлорид тузи ва 1% органик моддалар: мочеви́на, сийдик кислотаси, аммиак бор. Тер билан 10 г азот, 60 г оксил, 40 г гача ош тузи чиқиши мумкин. Тер таркибидаги сув қондан ўтади, тўқималардаги сув камайганда оғиз қурийди ва одам қаттиқ

чўллайди, ёғ безлари орқали ёғ чиқади ва унинг таркибида холестерин, оксил, мой кислотаси, тузлар ва экстрактив моддалар мавжуд.

Тери орқали 2% CO₂ чиқади ва кислороднинг фақат 1% игина тери орқали ўтади. Терида иссиқлик алмашинуви 3 хил намоён бўлади: иссиқдан совуққа, иссиқ чиқариш ва бугланиш. Терининг томирларидан қанча кўп қон ўтиб айланса, унинг ҳарорати шунча баланд бўлади.

Терининг вазифалари.

Тери куйидаги фаолиятларни бажаради:

1. Мухим ва мураккаб орган бўлиб, ташқи муҳитнинг ҳар хил таъсиридан саклайди, ташқи ҳимояловчи қоплам ҳисобланади;

2. Тана ҳароратининг доимийлигини саклаб туради, шу сабабли иссиқ-совуқга сезгир ва чидамлимиз;

3. Одам териси тананинг ичига зарарли микроблар киришига тўсқинлик қилади ва уларнинг зарбасини биринчи бўлиб қабул қилади, захарли моддаларни зарарсизлантиради, сўрилишини камайтиради;

4. Кўриниши нозик, юмшоқ бўлган тери етарли даражада мустаҳкам, чидамли;

5. Кўплаб тешикли, ғовак, шунинг учун сув ўтказувчанлик хоссасига эга ва тери организмнинг ички системаларини ташқи муҳитнинг таъсиридан ҳимоя қилади;

6. Хавфли модда тери орқали сўрилса, уларнинг таркибидаги ферментлар бу хавфли моддани парчалайди;

7. Тери ҳужайралари интерферон ва интерлейкин моддаларни ишлаб чиқаради ҳамда организм тўқималарини вируслардан ҳимоя қилади, иммунитетни кучайтиради;

8. Тери – бу чиқариш системаси, 2,5 млндан ортиқ тешиклари орқали ҳар хил чиқинди ва алмашув натижасида ҳосил бўлган зарарли моддаларни чиқариб ташлайди (тер билан);


9. Тери ҳимояловчи аъзо (қуёш нуридан тўқ пигмент ҳосил қилади, таъсирини ичкарига ўтказмайди);

10. Тери ёғ безлари билан таъминланган, 15-16 см ёғ ишлаб чиқаради;

11. Тери сув ва ҳар хил озиклантирувчи моддалар омбори, витамин D ишлаб чиқаришда иштирок этади (рахит бўлмайди);

12. Тери кўзгу вазифасини ўтайди, касалликлар тўғрисида ахборот бериб туради, одамнинг кайфиятини билдиради (қизариш, оқариш, қўллар титрайди).

13. Тери доим организмнинг ташқи муносабатини тартибга солади. Соғлом тери – бу юмшоқ, силлиқ, қайишқоқ, доғсиз, камчиликсиз бўлиши керак.



39-расм. Терининг қаватлари ва қон-томирлар билан таъминланиши (манба: meduniver.com)

Терини парвариш қилиш ҳар кимда ўзига хос бўлади ва косметика ва даволаш ишларида турли воситаларидан фойдаланишда тери хоссалари ва бажарадиган функцияларини ҳисобга олиш зарур. Терини парвариш қилиш, демак тозалаш, озиклантириш ва ҳимоя қилишдан иборатдир (39-расм).

11-фасл. Ҳижома учун керакли воситалар

- Стерилланган ҳар хил ўлчамдаги банкалар.
- Стерил пахта, салфетка
- Водород пероксида
- Спирт, табиий олма ёки узум сиркаси
- Лезвия ёки тиббий тигча(скальпел)
- Тиббий қўлқоплар
- Ниқоб(маска)
- Ишлатилган нарсаларни солиш учун халта (полиэтилен пакет)
- Седана ёки зайтун мойи
- Жароҳатни ёпиш учун восита (дока, махсус шаклдаги пахта)
- Қон сўрувчи махсус аппарат (вакуум насос)
- Нашатир спирт.
- Ажралган қонни солиш, йиғиш учун махсус куракчалар.
- Дока ёки бинт.

Ҳижома қилиш жараёни

- Бемор кўрувдан ўтказилади, артериал қон босими ўлчанади.
- Аввало керакли буюмлар ҳозирланади. Булар вакуум насос, банкалар, скарификатор ёки лезвия, спирт, салфетка, бинт, ахлат пакетлари.

- Хажжом қўли тоза совунланиб ювилиб, бир марталик резина медицина қўлқопи кийилган бўлади.
- Беморни кушеткага ётқизиб қон олинадиган жойларини танлаймиз. Терини тукли соҳаларини туклардан тозалаймиз.
- Белгиланган нуқталарга моддани (чиқармоқчи бўлган ахлатланган қон)йиғиш учун аввало бадан зайтун ёки седана ёғи билан массаж қилинади.
- Қон олинадиган нуқталар спирт ёки табиий олма ёки узум сиркаси билан артилади.
- Банкалар вакуум насос ёрдамида ёпиштирилади. 3-4 минутдан кейин бўшатилади. Натижада тери дўппайиб чиқади.
- Банкачалар теридан ажратиб олиниб, ҳар бирининг ўрни ўтқир тигли ускуна ёрдамида тилиб чиқилади. Сўнгра яна банкачалар ўша тилинган жойга иккинчи бор қўйилиб, ҳавосизлантирилади.
- Банкалар 2-3 дақиқа тургач енгил бўшатилиб, эҳтиёткорлик билан ўша соҳа атрофида енгил айлантрииб яна қайтадан ҳавосизлантирилади. Бу жараён 2 мартаба қилинади.
- Банкаларни эҳтиёткорлик билан теридан ажратилиб ҳосил бўлган қонли ажралма куракчаларга тўкилиб, махсус ахлат пакетиға солинади.
- Кесик жойларидаги ва атрофдаги қон лахталарини арта-миз, водород пероксид эритмаси ёрдамида тозалаймиз, лекин кесик ораларидаги қон қолдиқларини қолдира-миз. Сабаби касаллик қўзғатувчи инфекцион омил учун кесик ораларида-ги қон табиий девор бўлади ва организмға турли инфекция-ларни тушишини олдини олади.
- Кесик жойларига антебактериал маз ёки седана мойи сур-тамиз.
- Кесилган жойга стерил боғлам қўямиз ёки дока билан ёпамиз.

Шу тариқа инсон организмидан ушбу банкачалар ёрдамида қон сўриб олинади.

Ушбу услуб муолажа мақсадида қўлланилганда бирор аниқ вақт тайин этилмасдан, қачон ҳижома қилинса ҳам бўлаверади. Лекин афзал вақтини топиб, ўша вақтда ҳижома қилишнинг фойдаси кўпроқдир.

12-фасл. Ҳижоманинг терини тозалашдаги ўрни қандай?

Ибн Сино ҳазратлари “Тиб қонунлари”нинг 1-китобида “Ҳижома” фаслида шундай ёзадилар:

“[Терини тилиб] кортиқ қўйиб қон олиш тери атрофларини ништар уриб томирдан қон олишга нисбатан яхшироқ тозалайди”.

13-фасл. Ҳижома қандай қонни чиқаради?

Ибн Сино ҳазратлари бундай ёзадилар:

“Қортиқ қуюқ қондан кўра суюқ қонни кўпроқ чиқаради. Қуюқ қонли йўғон гавдаларда қортиқдан фойда кам. Чунки, қортиқ уларнинг қонларини керагича чиқаролмайди. Балки, қийинлик билан жуда суюқ қонларинигина чиқаради ва аъзода заифлик пайдо қилади”.

14-фасл. Ҳижома қилишда иқлимнинг таъсири

Ҳижома тана юзасини фасд (томирни тилиб қон чиқариш) дан кўра кўпроқ тозалайди. Фасд баданнинг ички қисми учун афзал. Ҳижома эса, қонни тери атрофларидан чиқаради.

Ҳижома ва фасд борасида аниқ гап шуки, иккаласи замон, макон, йиллар, табиатлар ҳар хиллигига қараб, турлича бўла-

ди. Демак, иссиқ ўлкалар ва замонларда, ҳамда қони қайноқ иссиқ табиатли кишиларда ҳижома қилиш фасддан кўра фойдали. Чунки қон пишиб, суюлади ва ичкаридан баданнинг юзасига чиқади. Бу пайтда ҳижома фасд чиқара олмаган нарсани чиқаради. Шунинг учун ҳижома болалар ва фасдга қуввати етмайдиганларга фойдали ҳисобланади.

Табиблар ҳам иссиқ юртларда ҳижома тилиб қон олишдан кўра фойдали ва афзал эканини айтишади.

“Даволанаётган нарсаларингизнинг яхшиси — ҳижомадир” ҳадиси иссиқ ўлкалар ва Ҳижоз аҳлига ишорадир. Чунки, биринчидан, уларнинг қонлари суюқ. Бундай қон баданларининг устига интилувчи бўлади. Чунки ташқи ҳарорат қонни баданнинг ташқи қисмига тортиб, тери атрофларига тўплайди.

Иккинчидан уларнинг териларидаги тешикчалар кенг ва қувватлари бўшашгандир. Бундай ҳолатда фасд улар учун хатарли. Ҳижома (қортиқ қўйиб қон олиш) ихтиёрий равишда тананинг бир қисми (қон билан бирга хилтлар)ни чиқариш бўлиб, баданни томирлар орқали умумий бўшатиш усулидир. Бунинг натижасида (майда) томирлардан, айниқса, кўп тилиб бўлмайдиган томирлардан сўриб олиш ҳосил бўлади.

15-фасл. Ойнинг қайси кунлари ҳижома қилинади?

Ой ерга энг яқин бўлиб, унинг парланишига ўта таъсирчан. Шунинг учун, ойнинг асосий кайфияти ҳўллик. Лекин, ойнинг табиати доимий эмас. Ой бошқа сайёраларга нисбатан буржлар бўйича тезроқ ва бир сайёранинг сифатини бошқасига ўтказиб ҳаракат қилади.

Қадимий китоблар, тиб китоблари ва замонавий илм маълумот беришича, ой тўлин бўлган вақтда қудуқдаги сувлар,

дарё сувлари, денгиз ва уммондаги сувлар кўтарилиши маълум. Буни илмда “ой ва куёшнинг оқим кучи” (приливные силы луны и солнца) дейилади. Ой тўлган вақтда ҳаттоки, инсон бош миясидаги суюқликларнинг ошиши, танадаги хилтларнинг тананинг сиртига кўтарилиши, бунинг натижасида турли касалликлар (мия ички босимининг ошиши, шақиканинг қўзғаш, юрак миокарди инфарктининг кўпайиши, ойпараст – лунатикларнинг ва б.қ.лар) хуруж қилиши тиб китобларида келган. Балки шу сабабли бўлса керак, Пайғамбаримиз соллаллоҳу алайҳи васаллам томонларидан шу вақтларда нафл рўза тутишни ва қон олдиришни буюрганлар. Тиб китобларида ҳам бунга буюрилган жойлар кўп топилади. Ой тўлин бўлган вақтда бўрилар увуллаши, инсонлар томонидан қотилликлар содир этилишининг сабаби ҳам шундан. Тибда “сув-сувни тортади” деган қоида бор. Шу сабабли, ой ўз мизожига тегишли унсурни, яъни сувни тортади. Демак, маълум бўлдики, ой – совуқ-хўл.

Тўлин ой вақтида шунча сирлар яширинган. Бу буюк ҳодиса бўлгани учун Раббимиз ўзининг каломи мажидида ҳатто шу вақтга қасам ичади:

Маъноси: “Ва тўлин ой билан (қасам ичурман)” (Иншиқоқ сураси 18-оят).

Биз ўрганаётган унсур, мизож, хилт ва ҳижома тушунчалари билан ойнинг ҳар бир куни ўртасида қандай боғлиқлик бор? Бу ҳақда буюк ватандошимиз Абу Райҳон Беруний роҳмаҳуллоҳ ўзларининг юлдузлар илми асосларига бағишланган асарда шундай ёзадилар: “Ой мўътадил совуқ ва ҳўллик томон йўллайди. Вақти билан бири иккинчисидан устунлик қилади. Чунки, куёш нуридан оладиган иссиққа кўра ой ҳар чоракда ўзгаради. Агар йил фаслларига солиштирсак, унда биринчи ҳафтанинг мизожи баҳорийга ўхшаб, иссиқ ва ҳўллик томон йўналтиради.

Иккинчи ҳафта ёз каби иссиқ ва қуруқ, учинчи (тўлин ойликдан сўнг) ҳафта – кузги бўлиб совуқ ва қуруқ томонга, тўртинчи чорак эса – қиш каби бўлиб, совуқ ва ҳўллик томон.

Баъзилар ой қаерда жойлашишидан қатъий назар, унда доимо ҳўллик устунлик қилади, дейишади. Лекин, шу нарса аниқки, ойнинг нури унинг биринчи ярмида ошиб борган сари унинг ҳўллиги иссиқлик томон йўналган. Ойнинг нури унинг иккинчи ярмида камайиб борган сари, у совуқлик томон ўзгаради. Чунки, ой ўзининг асл ҳолига ташқи таъсир тугагандагина қайта олади”.

Беруний ҳазратнинг берган маълумотларига асосланиб қаралса, ой тўлин бўлган вақтда у энг қуруқлик томон ўзгарган бўларкан. Тўлин ой вақтида ойнинг қуруқлиги ошади, ердан эса сувларни, ҳўлликларни, хоссатан инсон танасидаги хилт (суюқлик)ларни тери юзасига тортилиши юзага келади.

Ибн Сино ҳазратлари бу ҳақида шундай ёзадилар:

Ой бошида қортиқ қўйиб қон олишни буюрилмайди. Чунки бу вақтда хилтлар ҳаракат қилган ва қўзғалган бўлмайди;

Шунингдек, ойнинг охирида ҳам қортиқ қўйиб қон олиш буюрилмайди. Чунки бу вақтда хилтлар камайган бўлади.

[Қортиқни] ойнинг ўртасида қўйиш буюрилади; [бу вақтда] хилтлар қўзғалади [ва улар] ойдаги нурнинг кўпайишига эрганиб кўпаяди; калла суяклари ичида бош миянинг миқдори кўпаяди; суви тортилиб ва қайтиб турадиган дарёларнинг сувлари кўпаяди.

Мезондан: Ойнинг 14-15-кунлари яхшиси ҳижомат қилмаслик керак. Энг яхши кунлари – ойнинг 16-17-санаси.

“Ҳижома қилдирадиган кунларингизнинг яхшиси ўн еттинчи, ўн тўққизинчи ва йигирма биринчи кунларидир”. Ибн Можа ривояти.

Ҳуллас, ойнинг учинчи чорагида ҳижома қилиш яхшироқ. Чунки қон ойнинг аввалида қўзғалган ва зўрайган бўлмайди,


охирида эса сокинлашади. Ойнинг ўртаси ва ўртасидан озгина кейин нихоят даражада зиёдалашади.

Имом Термизий “Жомий” китобида Ибн Аббос розияллоху анхунинг марфуъ ҳадисини ривоят қилган: “Албатта, ҳижома қилдирадиган кунларингизнинг яхшиси ўн еттинчи, ўн тўққизинчи ва йигирма биринчи кунлардир” Анас розияллоху анхундан ривоят қилинади: “Расулуллоҳ соллаллоху алайҳи васаллам бўйинларининг икки томони (ихдаъайни)дан ва икки елкаларининг ўртаси (коҳил)дан ҳижома қилдираар эдилар”. “Расулуллоҳ соллаллоху алайҳи васаллам ўн еттинчи, ўн тўққизинчи ва йигирма биринчи кунлари ҳижома қилдираар эдилар”.


“Сунани Ибн Можа”да Анас розияллоху анхундан марфуъ ҳадис ривоят қилинган: “Ким ҳижома қилдиришни хоҳласа,



40-расм. Қомар мажмуаси.



41-расм. Ой тўлиши ва қортиқнинг тўлишидаги ўхшашлик (илоҳий ишора).




42-расм. Ой ва қуёшнинг таъсирида сув сатҳининг кўтарилиши ва қайтишининг чизма кўриниши



43-расм. Ой ва қуёшнинг таъсирида сув сатҳининг қўтарилиши ва қайтиши, Фанди бўғози, АҚШ ва Канада чегараси

Анъанавий хитой тиббиётида тананинг детокс ритми

Ци ва қон айланиш соат миллари бўйича бошланади.



44-расм. Анъанавий хитой тиббиётида тананинг детокс ритми.

ўн еттинчи, ўн тўққизинчи ёки йигирма биринчи кунларни қасд қилсин. Бирортангизга қон ғолиб келиб, ўлдириб қўймасин”.

“Сунани Абу Довуд”да Абу Ҳурайра розияллоху анхудан марфуъ ҳадис ривоят қилинган: “Ким ўн еттинчи, ўн тўққизинчи ва йигирма биринчи кунлари ҳижома қилдирса, ҳамма дардга шифо бўлади”. Бунинг маъноси: (юқоридаги кунларда ҳижома қилдириш) қон ғолиблиги сабабли пайдо бўлган ҳар қандай касалликдан шифо бўлади, деганидир. Юқорида келтирилган ҳадислар табиблар ижмосига мувофиқ келади: “Ойнинг иккинчи ярми ва тўртдан учиди қилинган ҳижома ойнинг аввали ва охирида бўлганидан манфаатлидир”. Агар ҳижомага эҳтиёж сезилса, ойнинг ҳар қайси вақтида, яъни, аввали ва охирида ҳам ҳижома қилинса, фойдадан холи бўлмайди.

Халлол айтади: “Исмаи ибн Асом менга: “Ҳанбал айтадики, Абу Абдуллоҳ Аҳмад ибн Ҳанбал қайси вақт ва қайси соатда бўлса ҳам қон ғалаён қилганда, ҳижома қилдирадиз”, – деди.

Имом заҳабий бундай ёзадилар: Табиблар: “Ҳижома қилиш ой тўлган вақтда бўлиши, фасдни эса ой кичрайган вақтда бўлиши лозим”, – дедилар. Ҳижома қилиш мустаҳаб бўлган кунларга тўхталадиган бўлсак, Абу Ҳурайра розияллоху анхудан ривоят қилинади: “Расулуллоҳ соллаллоху алайҳи васаллам: “Ким ўн етти, ўн тўққиз ва йигирма биринчи кунларда ҳижома қилдирса, ҳар бир дардга шифо бўлади”, – дедилар (Имом Абу Довуд роҳмаҳуллоҳ ривояти).

Холбуки, у Имом Муслим роҳмаҳуллоҳ шартларига кўра-дир. У кишининг сўзлари: “Қон ғалаба қилиши (ғалабатуд-да-ми)га сабаб бўлган ҳар қандай дардга (шифодир)”. Анас розияллоху анхудан ҳам шунга ўхшаш ривоят қилинган, Имом Термизий роҳимаҳуллоҳ ривояти.

Билгинки, кортик қўйиб қон олишнинг энг яхши вақти [қун чиққандан кейинги] иккинчи ва учинчи соатдир.

Мезондан: Энг яхши вақт эса, қун чиққандан уч соатлар кейин.

Қуннинг қуёш билан боғлиқ нима жиҳати бор? Фикри ожизимизча, тиб китобларидан олган ҳулосаларга қўра, қуёш ўз иссиқлиги билан тана сиртини иситади. Қуннинг қуёшсиз қисмида танага иссиқлик керак бўлади. Замонавий тиббиётга қўра ҳам, инсон ҳароратининг меъёрий тушишининг энг паст кўрсаткичи саҳар соат 3-4 ларга тўғри келади. Қувват ва ҳарорат ҳали заифроқ бўлган вақтда қон олиш қувватнинг ва ҳароратнинг тушишига сабаб бўлиши мумкин.

Қуёш чика бошлагач, тана ҳарорати бироз кўтарила бошлайди. Шунинг 2-3 соатларида қон олиш тибга қўра энг муносиб вақт бўлиб чиқмоқда.

Тадқиқотчи-табиб Ўрол Ўзбек қон олдириш борасидаги ўз тажрибали билан улашадилар: “Энг яхши вақт эрталаб. Ҳижоманинг энг афзали зулук қўйиб, зулук тушгач, жойидан кортиқда то қон чиқмай қолгунча қон олдириш. Бунда керакли нуқталардан қон олиш имкони пайдо бўлади. Дейлик, мигрен(шакиқа)да юз ва қулоқ орқасидан, яъни, Ибн Сино кўрсатган нуқтадан қон олиш мумкин бўлади.

Зулук ва кортиқларда қон олиш бошқа. Ҳар иккала қўл веналаридан қон олиш бошқа ва бошқа. Булар иккиси бир-бирини тўлдиради. Қони қуюқларнинг қони суюлганча қон олишнинг бу иккала турини алмаштириб туриш керак. Яъни, қўл (вена)лардан қон олинган кунларда зулукда қон олинмай, зулук навбат кунини кутилади. Зулугу кортиқда олинган кунлар қўл веналаридан қон олинмай турилади.

Шошилини шароитларда (фавқулодда) қўл веналаридан қон олишдан бошланади. Аниқ вақтини юқорида Ибн Синонинг “Тиб қонунлари”дан бериб ўтилди.

Қон олдиришдан олдин, агар йўтал кучли бўлмаса, 50 мл ширин анор сувига бир бўлак нонни ботириб еб олинади. Ва қони қуюқ (ковид билан касалланганлар) камида ўн бешта зулукни елкадан қўйиб, тушган ҳар зулук жойидан икки ё уч мартадан (токи қон тўхтагунча) қон олдиради. Кейинги сафарлар, яъни, зулук қўйишни ўзлаштиргач, баданнинг бошқа керакли нуқталаридан қон олинади.

Қон олиниб бўлган заҳоти, ўша сонияларнинг ўзида ковид бўлмаган, йўтали йўқ қон олдирувчи икки-юз уч юз граммгача, ковид касал эса 50 грамм ширин анор сувини дарҳол ичиши керак.

Қон олдирилиб бўлгач 40 минутдан кейин овкатланиш мумкин (ковид касал товуқ шўрва ичади). Шу ҳижоманинг энг афзали”.

Кечаси қон олиш ҳақида Имом Заҳабий бундай ёзадилар:

Имом Бухорий роҳмаҳуллоҳ ривоят қилади: “Абу Мусо розияллоҳу анху кечаси ҳижома қилдирар эди” (39-44-расмлар).

16-фасл. Қон олдириш учун ҳафта кунларини ихтиёр қилиш

Халлол “Жомий” китобида айтади: “Ҳарб ибн Исмоил бизга ривоят қилди: “Мен Аҳмадга “Қунларнинг қайси бирида ҳижома макруҳ саналади?” – дедим. У: “Чоршанба ва шанба кунлари”, – деди”. Ушбу китобда келтирилган бир ривоятда Ҳусайн ибн Ҳассон Абу Абдуллоҳдан қайси вақтда ҳижома қилиш макруҳ бўлиши тўғрисида сўради. У: “Шанба ва чоршанба кунлари. Баъзилар жума куни ҳам дейишган”, – деди.

Халлол ривояти билан Абу Салама ва Абу Саид Макбурийлар Абу Ҳурайра розияллоҳу анху ривоят қилинган марфуъ ҳадисда: “Ким чоршанба ёки шанба кунлари ҳижома

қилдириб, байаз ё барас касалига чалинса, ўзидан бошқани маломат қилмасин”, – дейилган.

Халлол айтади: “Муҳаммад ибн Али ибн Жаъфарнинг хабар беришича, Яъқуб ибн Бухтон ривоят қилади: “Аҳмаддан чоршанба ва шанба кунни қон олдириш ва нура ҳақида сўрашганда, у бу ишни қарих кўриб айтдики: “Бир кишининг чоршанба кунни нура ишлатгани ва қон олдиргани, ҳамда шу сабабли барас касалига дучор бўлгани ҳақида менга айтишди”. Шунда мен унга: “Ҳадисга бепарво бўлгандир-да?” – дедим. У: “Ҳа”, – деди”.

Доракутний “Афрод” китобида Нофиънинг ҳадисини ривоят қилади: “Нофиъ айтади: “Абдуллоҳ ибн Умар менга: “Қон менга ғалаён қиляпти. Мен учун ёши катта ҳам, кичик ҳам бўлмаган қон олувчи кидир. Чунки мен Расулуллоҳ солаллоҳу алайҳи васалламнинг шундай деганларини эшитганман: “Ҳижома ҳофизнинг зеҳнини ва оқилнинг ақлини зиёда қилади. Аллоҳнинг исми билан ҳижома қилдириш. Пайшанба, жума, шанба ва якшанба кунлари қон олдириш. Душанба кунни қон олдириш. Мохов ва барас касали фақат чоршанба кунни тушади”.

Доракутний айтади: “Ушбу ҳадисни ёлғиз Зиёд ибн Яҳё ривоят қилган”. Мазкур ҳадисни Нофиъдан Айюб ҳам ривоят қилган ва унда: “Душанба ва сешанба кунлари ҳижома қилдириш. Чоршанба кунни ҳижома қилдириш”, – дейилган.

Абу Довуд “Сунан” китобида Абу Бакр розияллоҳу анҳудан ривоят қилади: “У сешанба кунни ҳижома қилдиришни ёмон кўрар ва Расулуллоҳ солаллоҳу алайҳи васаллам: “Сешанба кунни қон кунни ва унда қон тўхтамайдиган бир соат бор”, – дедилар”, – дер эди”.

Аммо ҳижомага бу вақтларни ихтиёр қилиш эҳтиёт бўлиш, касалликдан сақланиш ва соғлиқни сақлаш учундир.

Аммо касалликни даволашда қайси вақт эҳтиёж тугилса, ўшанда қон олдириш лозим бўлади. Расулуллоҳ солаллоҳу алайҳи васалламнинг “Бирортангизга қон ғолиб келиб, ўлдириб қўймасин”, деган ҳадислари шунга далолат қилади.

(Ҳадисда “қон ғолиб келиш” деб таржима қилганимиз) “ат-табаййуғ” “ҳаддан ошиш, ғалаён қилиш” маъносидадир. Юқорида Имом Аҳмад қон ғалаён қилиб, ҳижомага эҳтиёж сезилганда ойнинг ҳар қайдай кунда қон олдирилари айтиб ўтилди.

Имом Заҳабий айтадилар:

Айтаманки: бу қайтариқларнинг барчаси соғлом ҳолатда ҳижома қилишга тегишлидир. Аммо касал вақтида ва зарурат вақтида эса Абу Бакра розияллоҳу анҳу наздларида ўн еттинчи ёки йигирманчи кунни бўлишининг фарқи йўқдир.

Жалол роҳмаҳуллоҳ айтди: “Менга Иъсма ибн Иъсом хабар берди: “Бизга Ҳанбал ҳадис айтдилар: “Абу Абдуллоҳ роҳимаҳуллоҳ Аҳмад ибн Ҳанбал роҳимаҳуллоҳни қони тўлқинланганда қайси вақт ва қайси соатда бўлса ҳам ҳижома қилар эди.”

Ҳафтанинг айнан бир кунда қайтарилишининг ҳикматини ўрганиш табибларга қолдирилади. Бунинг санади заиф бўлса ҳам, илмий мўъжиза ўлароқ ўрганиб чиқишлари лозим бўлади. Исботланмаса, ҳам биз буйруққа бўйин эгаверамиз. Ҳадисларда келган гапларга биз қўл кўтаришимиз керак. Булар тааббудий нарсалар, деб аталади. Биз намоз ракатларининг саноғининг сабабини сўраб ўтирмаймиз. Аллоҳ таоло соатларга, баъзи бир вақтларга, баъзи бир лафзларга массирлик, яъни таъсир ўтказишлик хусусиятини берган! Масалан, талоқ лафзини айтишлик билан эр-хотин орасига бутунлай ажрим тушади. Буни биз кўзимиз билан кўролмаймиз, лекин Аллоҳ таоло ана шу лафзга ана шундай қувватни, таъсирни берган. Ёки бўлмасам, кунларни олайлик.

Жобир розияллоҳу анҳудан бир ривоят бор: “Мен қайси бир яхши ишни бошламоқчи бўлсам, чоршанба кунга тўғрилайман. Ва чоршанба куни бошлайман. Ва чоршанба куни бошлаган ишларимни бирортасининг орқаси кесик бўлмаган. Чунки, Расулуллоҳ соллаллоҳу алайҳи васаллам бир ғазотда мушрик қавми қамал қиладилар. Ҳеч нусрат келмайди. Охири, чоршанба кунда у Зотга ғалаба насиб қилади. Мен ҳам бир ишни бошламоқчи бўлсам, чоршанба кунини пойлаб бошлайман. Ва Аллоҳ таоло менга равнақ беради”. Ёки соатларни олайлик. Аллоҳ таоло жумада бир соат борки, унда дуолар қайтарилмайди. Ёки азон ва икомат ўртасидаги дуо ижобат. Ёки беш вақт намоздан кейинги қилинган дуо қайтарилмайди. Ёки Арафа куни қилинган дуо қайтарилмайди, деб вақтга хосланган куч бор! Вақтга боғланган ҳолатлардан бири – намоз. Уни ўзининг вақтидан бошқа вақтда ўқисангиз – қабул эмас. Ёки ҳажни олайлик. Ҳаж вақтида Арофатда бир кун аввал ё кейин турилса ҳам ҳаж қабул бўлмайди. Шулар сингари, Аллоҳ таоло баъзи бир вақтларга таъсирият хусусиятини берган. Валлоҳу аълам”. Юқорида ҳадиснинг диний жиҳати ёритилди. Навбат унинг тиббий ва табиат қоидаларига кўра изоҳларига. Сешанба – форсчадан ўзбекчалаштирилган, учинчи кун – ўрхунэнасой ёзувларида, сали – Туркия туркчасида, сешанбе – форсча. Келинг энди бу кунда бўлиб ўтган тарихий воқеалар билан танишиб чиқсак. Ас-Саъид ас-Самарқандий “Рисолаи сайдия”да сешанба куни ҳақида шундай ёзадилар: “Ва яна сешанба кунининг хосиятидин савол қилмишлар. Бас, ул Ҳазрат демишларким: “Сешанба куни қон кунидур”. Нечунким, Ҳазрати Ҳавво ано разияллоҳу анҳо ул кун лойиз (хайзли) бўлдилар, ва Кобил Ҳобилни ул кунда ўлтурди. Ва ҳамул кун Ҳазрат Жиржис ва Закарийё ва Яҳё алайҳиссаломлар мактул [қатл] бўлдилар. Ва Фиръави соҳир [сеҳргар]лариким, мўъмин

бўлуб эрдилар. Ва Осиё бинти Мароҳимким (мўъмина ва Фиръавннинг хотунидир) разияллоҳу анҳо ва бақарайи бани Исроил ҳам ул кунда мактул бўлдилар. Анинг учун Ҳазрати Расули акрам саллаллоҳу алайҳи васаллам сешанба куни қон олдурмоқдин бағоят қаттиғ наҳий [манъ] қилмишлар ва демишларким: “Сешанба кунининг ичида бир номаълум соат бордурким, агар қон олдурғон вақтда ул соат иттифоқ тушса, қўб воқеа бўлурким, то ўлгунча қони тинмас”. Ва сешанба кунда Иблис алайҳи-л-лаъна ерга нузул қилди [тушди] ва ҳамул куни жаҳаннам халқ бўлди ва ҳамул кун Худойи таъоло Малакул-мавт [Азроил]ни одам авлоди арвоҳи қабзи [жопнин олиш]га мусаллат [ҳоким] қилди. Ва баъзи ривоятда Ҳазрати Айюб алайҳиссалом ҳам сешанба куни қурт балосига мубтало бўлди” (“Жонзотларнинг тиббий хусусиятлари”, 65-66-б.). Юқоридаги тарихий қонли воқеалар шу кунда бўлган экан. Балки жиноятлар ҳам ҳақиқатан сешанба куни кўпроқ бажарилар? (бу борада криминалистларга мурожаат қилиш керак бўлади). Бу кунда қон олиш ҳақида шифокор-гинеколог, тажрибали ҳажжом, гирудотерапевт Гульнора Турдиева шундай дейдилар: “Мен Шайхимиз Муҳаммад Содик Муҳаммад Юсуфнинг “Ҳадис ва Ҳаёт” (тиб ва дам) китобларини ўқиганимдан кейин сешанба кунлари зулук қўймайдиган бўлдим. Иложисиз қўйганимда қон худди булоққа ўхшаб, қоп-қора қон булоғига ўхшаб битта нуктадан қайнаб чиқарди. Нечта зулук қўйсам ҳам, оддий кунларга қараганда кўп қон кетарди. Ҳижомада ҳам қортиқ орқали манфий босим билан қон тортилганда оддий кундагига нисбатан кўпроқ қон чиқади”. Сешанба қон олдириш ўртасидаги боғлиқлик ҳақида олий тоифали шифокор ва табиба Гулбахор Сатторова қуйидагича ёзадилар: “Ҳижомада ҳеч қачон қон кетиши кузатилмайди, агарки медицина (суннатга хос) ҳижомаси бўлса. Сабаби, тилишлар чуқурлиги 2.5 мм га етмайди. Фақат, зулук

қўйганда қон тўхтамаслиги мумкин. У ҳам бўлса, қон жуда суяқ бўлса, вена ёки артерия қон томир устини зулук тишла-са, ўта катта зулук бўлса. Турли сабабларга кўра гоҳида то-мир тери устида кўринмайди. Ана ўшанда иш қийинлашади. Менинг амалиётимда бундай ҳолат икки марта бўлган. Қон тўхтатиш учун аминакапрон кислотасини вена ичига қўйиб, қон кетишини аранг тўхтатиб олганман. Гемостатик губкаям фойда бермаган”. Бу борада табиб Ўрол Ўзбек ўз тажриба-лари билан бўлишиб қуйидагича ёзадилар: “Илк тажриба. Ўтган сешанба куни (09.03.2021 й.) бир беморимизга зулук ва қортиқлар ёрдамида керакли, деб топган нуқталаримиз-дан қон олдиртирган эдик. Қани нима бўларкин, деб. Қони шу қадар қуюқ эдики, чап қўл венасидан бирор томчиём қон олишолмади. Шу қон қуюқлигига ишониб, сешанба куни қон олдиришга рухсат бергандик. Натижа шуки, беморда кескин салбий ўзгаришлар дарҳол юз берди. Асоратлари-ни хануз даволаб келяпмиз. Алқисса, жуда мажбур қолма-сак, сешанба қон олдиртириш тавсиясидан кечсак керак”. Замонавий тиббиётга кўра, қонашнинг тўхтамаслиги қон ивиш жараёни (нарушение свёртывание крови) ҳисобига бўлади. Лекин, айнан шу жараённинг сешанба куни билан боғлиқ би-рор манбани ҳозирча топа олмадик. Фақатгина қадимий илм-лардан чиқмоқда.

Албатта, ҳижома касалликларни олдини олиш, даволаш мақсадида куз ва баҳор ойларида кенг тарғиб қилинади, чун-ки қишда кунни совуқлиги, ҳаракат камлиги учун, касаллик кўзгатувчи ғайритабиий хилтлар гўёки йиғилади ва ухлайди. Баҳор келиши билан ўсимлик, ҳайвонот олами билан бирга танамиздаги касалликлар ҳам уйғона бошлайди. Ёзда эса ўта иссиқ ва ҳаракатнинг кўплиги сабабли хилтлар (касал-ликлар) эриб таркайди. Куз фаслида совуқ тушиши, фасл алмашинуви сабабли касалликлар яна кўзғайди. Юқорида

ёритилган мавзулардан хулоса қилган ҳолда, шунини айтиш мумкинки, ойнанинг ва ҳафтанинг қайси кунлари қон олдириш афзаллиги борасида келган ҳадислар ва салаф солиҳларнинг гаплари касалликка чалинмаган, балки ихтиёрий тарзда қон олдирмоқчи бўлганларгадир. Албатта бемор инсон агар ҳи-жомага боғлиқ касаллик билан касалланса, йилни қайси ойи, куни бўлишидан қатъий назар, зудлик билан ҳижома қилдир-моқлиги зарур. Чунки касаллик бир дақиқада инсон ҳаётига нуқта қўйиши, ёки ортга қайтмайдиган оғир асоратларга са-баб бўлиши мумкин.

17-фасл. Ҳаммомга тушиш ва ҳижома

Ибн Сино ҳазратлари бу ҳақида шундай ёзадилар:

“Қони қуюқ киши бўлмаган киши ҳаммомдан кейин қор-тиқ қўйиб қон олишдан сақланиши керак. У киши ҳаммомга тушиб, бир оз муддат [тинч] туриб, сўнгра қортиқ қўйиб қон олдириши керак”.

18-фасл. Ҳижоманинг нуқталари

Ибн Сино ҳазратлари бу ҳақида шундай ёзадилар:

Қўп кишилар гавданинг олдинги қисмларига қортиқ қўйиб қон олишни, бу сезгига ва зехнга зарар қилади, деб ёқтирмайдилар.

Бўйин чуқурчасига қортиқ қўйиб қон олдириш акҳал то-миридан [қон олдиришнинг] ўрнига ўтади. У қошлар оғир-лашувини тузатади, ковоқларни енгиллаштиради, кўз кўтири ва оғиз ҳидланиши, кўз ковоғида тош пайдо бўлган вақтда фойда қилади.

Қўлнинг тирсакдан елкагача бўлган қисмида жойлашган қон томир бўлиб, у мускулнинг ички ва ташқи томонлари,

яъни, рўпарадан қараганда кўриниб турган томирлар [Форсчада – ҳафт андом, арабчада – нахрул-бадан, замонавий тиббиётда – *vena intermedia cubiti* – тирсакнинг ўрта венаси – промежеточная локтевая вена. Буни акҳал дейилишидан мақсад, куҳл арабча сурма бўлиб, бу томир тери остидан яққол (сурма ранглик бўлиб) кўриниб тургани учундир.

Ибн Сино, Ҳаким Арзоний, Боситхон Шоший ва яна бошқа улуғ табиблар энса чуқурчаси, яъни нукрага кортик қўйиб қон олишдан қайтарган эканлар. Акупунктура мутахассислари, шифокор Обиджон Раҳимжонович ва бошқалар бу нуктага игна қўйишдан қайтаришар экан.

Энди, шу соҳага зарба бериладиган спорт турларини бир кўзингизнинг олдига келтиринг. Уларда хотира пасайиши бўлмайди, дейсизми?! Бу спорт турларини ривожлантираётган ва унга қатнашаётганларга унинг тиббий зарарини эслатиб ўтаминиз ва огоҳлантираминиз. Зеро, бадантарбия билан шуғулланишдан мақсад тананинг саломатлигини сақлаш эмасмиди?!

Икки курак ўртасига [кортик қўйиб қон олиш] бослик томиридан қон олиш ўрнига ўтади, елка ва томоқ оғриғига фойда қилади.

Муҳаммад Акбар Арзонийнинг “Мезонут-тиб” асарида бу икки томир ҳақида қуйидагича изоҳ келтирилади: “Бослик деб грекчада улуғ подшони айтишади. Бу томир қўлтиқдан келган томирга ўхшатилгани учун шу ном билан аталган. Бу томирдан қон олиш, жигар, талок, биқин, ўпка, кўкрак, икки сон, тизза ва томоқ остидаги барча аъзоларнинг қонини тозалайди” (таржимон: Илёс домла Раҳмонов). Бослик томирини бошқа асарларда таннураи бадан дейишади. Замонавий тиббиётда – *vena basilica* венасига тўғри келади. Маъноси асос вариди, тана венаси демакдир.

Ал-қаҳил, деб келган нукта тиббиётга кўра, орқа томондан 7-умуртқа соҳасига тўғри келади баъзилар шу нуқтадан



45-расм. Гавданинг орқа юзасида жойлашган қонли ҳижома нуқталари (манба: RodiBio.com).

қон олишни “гардандан қон олиш” деб айтишади. Лекин, аслида гардон форсча сўз бўлиб, бўйин маъносини беради. Қахил эса, бўйинни тугаш ва икки курак ораси нуқталарининг кесишмасидир.

Бўйиннинг иккала томирларидан бирига қортиқ қўйиб қон олиш қийфол [дан қон олиш] ўрнига ўтади, бош қалтирашига фойда қилади; юз, олдинги тишлар, қозиқ тишлар, иккала қулоқ, иккала кўз, томоқ ва бурун каби бошдаги гавда аъзоларининг касалликларга фойда қилади.

Ал-ихдаъану, деб келган соҳа “Тиб қонунлари”нинг таржимасида “бўйиннинг иккала томири” деб келтирилган. Замонавий тиббиётга кўра бу борада икки фикр бор:

1) бу бўйиннинг икки томонидан ўтган вена томири бўлиб, ташки бўйинтуруқ веналари – *vv.jugularis externa* – на-
ружня яремная венага тўғри келади.

2) бу қулоқнинг орқасидан то ўмровгача тушган мушак бўлиб, бўйинтуруқ мушаги – *m.sternocleidomastoideus* – кивательная мышцага тўғри келади.

Бизнингча, иккинчи тахмин тўғрирок бўлиши керак. Чунки, биринчи тахминга кўра, агар ихдаъану вена бўлса, вена томирларидан қон олиш одатда фасд, яъни, нашта билан томирни тилиб туриб олинади. Ҳадиси шарифда эса, фасд эмас, ихдаъанудан ҳижома қилиш тўғрисида гап кетмокда.

Иккинчи тахминга кўра, ҳадисда келган ихдаъану бўйинтуруқ мушагининг устидаги тери соҳаси бўлиб, ҳижоманинг қондасига тўғри келади. Шу сабабли, иккинчи тахмин қувватлироқ, деб биламиз.

Қийфол – арабчалашган, грекча – кифолис, чекка маъносида. Билакнинг чеккасида жойлашган томир, шунинг учун бу ном билан аталди. Форсчада сарорўй, чунки у томир очилса бош ва юз, яъни баданнинг юқорисидан қон келади. Шунинг учун бу ном билан аталди. Замонавий тиббиётда

бу томир – *vena cephalica* томирига тўғри келади. Арабчалаштириб қийфол дейилади. Маъноси бош вариди (венаси), демакдир.

Замонавий тиббиётда асосан шу жойдан томчи дори юборилади [бу томир – *vena cephalica* томирига тўғри келади. Арабчалаштириб қийфол дейилади.

Анас розияллоҳу анҳудан ривоят қилинади: “Набий соллаллоҳу алайҳи васаллам бўйиннинг икки ёни (ахдаъайн)дан ва икки курак ораси(қоҳил)дан ҳижома қилдирдилар”.

“Саҳиҳайн” у зотдан қилинган ривоятда: “Набий соллаллоҳу алайҳи васаллам уч марта, (яъни,) икки курак ораси (қоҳил)дан бир марта ва бўйиннинг икки ёни (ахдаъайн)дан икки марта қон олдирдилар”, – дейилган.

“Сунани Ибн Можа”да Али розияллоҳу анҳудан ривоят қилинади: “Жаброил (алаҳиссалом) Набий соллаллоҳу алайҳи васалламга бўйиннинг икки тарафи (ахдаъайн)дан ва икки курак ораси (қоҳил)дан ҳижома қилдиришни нозил қилдилар”.

Лекин бўйин чуқурчасига қортиқ қўйиб қон олиш унутувчанликни келтиради, дейилгани тўғри. Чунки миянинг орқа бўлаги эслаш қувватининг ўрни [бўлиб], қортиқ уни кучсиз қилиб қўяди.

Икки курак ўртасига қортиқ қўйиб қон олиш меъда оғзини кучсиз қилади.

Бўйиннинг иккала венасига қортиқ қўйиб қон олиш баъзан бош қалтирашини пайдо қилади.

Шунинг учун бўйин чуқурчасига [қон олиш учун] қўйиладиган қортиқ бир оз куйига қўйилсин, икки курак ўртасига қўйиладигани эса бир оз юқорига қўйилсин!

Лекин [кураклар ўртасига қўйиладиган қортиқ], агар у қон кетишига ва йўталга қарши бўлмаса, юқорига эмас, куйига қўйилмоғи керак.

Мана шу икки курак ўртасига ва иккала сон ўртасига қор-тиқ қўйиш қондан бўладиган кўкрак касалликлари ва қонли ҳарсиллаш касаллиги вақтида фойда қилади, лекин бу меъда-ни бўшаштиради ва хафаконни келтириб чиқаради (45-расм).


19-фасл. Хайбарда яҳудийлар томонидан етказилган заҳарланишни даволашда Расулulloҳ соллаллоҳу алайҳи васалламнинг тутган йўллари

Абдураззоқ Маъмардан, у Зухрийдан, у Абдурахмон ибн Каъб Ибн Молик (розияллоҳу анҳу)дан ривоят қилади: “Бир яҳудий аёл Расулulloҳ соллаллоҳу алайҳи васалламга Хайбарда пиширилган қўй ҳадя қилди. У зот: “Бу нима?” – дедилар. Аёл садақа деса, у Зот уни емасликларидан ҳазир бўлиб, “ҳадя”, – деди. Расулulloҳ соллаллоҳу алайҳи васаллам ундан едилар ва саҳобалар ҳам ейишди.


Сўнг у зот: “Тўхтанглар”, – дедилар ва аёлга айтдилар: “Бу қўйни нима учун заҳарладинг?”

У: “Ким сизга бунинг хабарини айтди”, – деди. У зот: “Бу болдир суяги (заҳарланган)”, – дедилар ва у қўлларида турган эди. Аёл: “Ҳа”, – деди. У зот: “Нима учун?” – дедилар. Аёл: “Агар ёлғончи бўлсангиз, одамлар сиздан қутулишини ва агар пайғамбар бўлсангиз бу сизга зарар бермаслигини хоҳладим”, – деди. Набий соллаллоҳу алайҳи васаллам гарданлари (каҳил)дан уч марта қон олдириб, саҳобаларига ҳам қон олдиришни буюрдилар. Улар қон олдирди ва баъзилари вафот этди”.

Бошқа бир ривоятда: “Расулulloҳ соллаллоҳу алайҳи васаллам қўйдан еганлари учун гарданлари (каҳил)дан қон олдирдилар. У зотни Абу Ҳинд шох ва тиғ билан ҳижома қилди. У ансорлардан бўлган Бани Баёзанинг мавлоси эди. Шу заҳарланишдан сўнг у зот уч йил яшадилар. Ҳатто унинг



46-расм. “Расулulloҳ соллаллоҳу алайҳи васаллам икки бўйинларининг чети (аҳдайн)дан ва икки елкаларининг ораси (каҳил)дан ҳижома қилдирдилар”.



47-расм. Бўйин ва энсадаги фаол нуқталар (акупунктурные точки) – (нуқраи гардан – фэнфуй).

оғриғи вафот этадигандагидек бўлган. Бу борада у зот: “Хайбар кундаги қўйдан еган луқма сабабли доим (оғрик) ҳис қилиб келганман. Хатто бу катта томир мендан узилгунга қадар бўлган”, – деганлар. Расулуллоҳ соллаллоҳу алайҳи васаллам шаҳид ҳолда вафот этганлар. Мусо ибн Уқба шундай деган

Заҳарни даволаш қайт қилиш ва заҳар таъсирини унинг сифатлари ёки хусусиятлари билан бирга йўқотиб, кесиб юбуровчи дорилар ёрдамида бўлади. Дори топа олмаган киши умумий тозаланишга шошилиши керак. Энг фойдалиси қон олдиришдир. Айниқса, иссиқ ўлкалар ва иссиқ кунларда бўлса, шу услубни қўллаш лозим. Чунки заҳар кучи қонга сизиб кириб, томирлар ва қон йўлларида ҳаракатланади ҳамда юраккача етиб бориб, ўлимга олиб келади.

Қон заҳарни юрак ва бошқа аъзоларга етказиб борувчидир. Агар заҳарланган инсон зудлик билан қон чиқарса, унга аралашган заҳар у билан бирга чиқиб кетади. Агар бу услуб унинг учун бутунлай тозаланиш бўлса, заҳар унга зарар бера олмай, балки чиқиб кетади ёки кучи заифлашиб, заҳарланган кишининг табиати унга ғолиб келади. Демак, ҳижома заҳарнинг таъсир кучини кетказди ёки камайтиради.

Қон олишнинг имкони бўладиган юракка энг яқин жой гардан (каҳил) ҳисобланади. Шунинг учун Расулуллоҳ соллаллоҳу алайҳи васаллам гарданларидан қон олдириларида заҳарли моддалар қон билан чиқиб кетган. Аммо бутунлай чиқиб кетмаган, балки оз миқдорда асорати қолган. Чунки Аллоҳ таоло фазл даражаларнинг барчасини у зотга тўлиқ қилиб беришни ирода қилган эди.

Аллоҳ таоло у зотни шаҳидлик билан сийламоқчи бўлганида яшириниб ётган ўша асоратнинг таъсири зоҳир бўлди. Зеро, Аллоҳ таоло бу билан битиб қўйилган ишни рўёбга чиқарди ва яҳудий душманларига айтган қуйидаги каломининг сири намоён бўлди: “Ҳар гал бирор пайғамбар сизларга

ёкмайдиган нарса (оятлар)ни келтирса, кибр қилиб, бир кимсани ёлғончига чиқариб, бир кимсани қатл қилаверасизларми?!”

Оятда “ёлғонга чиқариб” маъносини берувчи феъл ўтган замон шаклида келиб, бу иш бўлиб ўтган ва амалга ошганини билдиради. “Қатл қилаверасизларми” лафзи эса келаси замон шаклида келиб, бу энди воқе бўладиган ва кутилаётган иш ҳақида хабар беришдир.

Ибн сино айтадилар:

Болдирга қортиқ қўйиб қон олиш [таъсир жиҳатидан] томирдан ништар билан қон олишга яқиндир. У қонни тозалайди ва ҳайз қонининг кетишини кучайтиради.

Оқ ва ғовак гавдали, суюқ қонли хотинларнинг иккала болдирига қортиқ қўйиб қон олиш, оёқ тери ости томиридан қон олишдан кўра мувофиқроқдир.

Имом Заҳабий айтадилар: Анас розияллоҳу анҳу айтди: “Набий соллаллоҳу алайҳи васаллам оёқларининг тепаси (зоҳаро қадамуху)дан ҳижома қилдирдилар” (Имом Термизий ва Имом Насоий роҳимаҳумаллоҳ ривояти)

Ибн Сино айтадилар:

Бошнинг орқа дўнгига ва бош ўртасига қортиқ қўйиб қон олиш баъзи табибларнинг фикрича, ақл чалкашлиги ва бош айланиши вақтида фойда қилади;

Айтишларича, у соч оқаришини кечиктиради, бу масала тўла ҳал бўлган эмас, чунки бундай даво баъзи кишиларда бошқаларга қараганда соч оқаришини кечиктирса ҳам, кўпчилик кишиларда [аксинча] уни тезлатади. [Юқоридаги нуқталарга қортиқ қўйиш] кўз касалликларига фойда қилади; бу унинг энг катта фойдаларидандир. Кўз қўтири ва майда чикикларига фойда қилади, лекин у зехнга зарар қилади; бефаҳмлики, унитувчанлики, фикр пастлигини, узоқ чўзиладиган касалликларни келтиради; [Юқоридаги нуқталарга қортиқ қўйиш] кўзи катарактали кишиларга зарар қилади, ле-

кин қортиқ қўйиб қон олишнинг ишлатилиши керак бўладиган пайтга ва ҳолатга тўғри келиб қолса, баъзан зарар қилмайди.

Ҳома – бош ва пешона суяги (“Фарҳангал-мабсут”)

“Жомиъи Термизий” китобида Аббод ибн Мансурдан ривоят қилинади: “Икрима (розияллоҳу анҳу)нинг бундай деганини эшитдим: “Ибн Аббоснинг учта ҳажжом хизматкори бор эди. Иккитаси унга ва аҳлига даромад келтирар, бири эса уни ва аҳлини ҳижома қилиш учун эди.

Ибн Аббос деди: “Набий соллаллоҳу алайҳи васаллам: “Ҳажжом қандай ҳам яхши банда. Қонни кетказади, сулбни енгиллатади ва кўзни равшан қилади. “Саҳиҳи Бухорий”да Анас розияллоҳу анҳудан қилинган ривоятда “Набий соллаллоҳу алайҳи васаллам бошларидаги қаттиқ оғриқ сабабли эҳромда бўлган ҳолларида бошларидан қон олдирдилар”, – дейилган.

Табиблар энса чуқурчаси (нукра)дан, яъни, энса дўнги (қамаҳдувах)дан ҳижома қилишда ихтилоф қилдилар.

Абу Наъийм “Тиббун-Набавий” китобида марфуъ ҳадис ривоят қилганлар: “Расулуллоҳ соллаллоҳу алайҳи васаллам: “Бошнинг энса дўнги (қамаҳдувах)дан ҳижома қилишни лозим тутинглар. Чунки, бу беш дардга шифо бўлади”, – дедилар”. Моховни шу бешта дард ичида саналган.

Бошқа бир ривоятда “Бошнинг энса дўнги (қамаҳдувах)дан ҳижома қилишни лозим тутинглар. Чунки бу етмиш иккита дардга шифо”, – дейилган.

Бир гуруҳ табиблар буни яхши деб билишиб, буни кўз чақчайишида ва унда шиш пайдо бўлганда ва кўпгина кўз касалликларида, қош ва қовоқ оғирлашиши ҳамда кўтирида фойда беришини айтишган.

Ривоят қилинишича, Аҳмад ибн Ҳанбал бунга муҳтож бўлиб, энса чуқурчаси (нукра)дан эмас, балки бўйин(гардан)нинг икки томонидан ҳижома қилдирганлар.

Ушбу жойдан қон олдиришни “Қонун” китоби муаллифи ҳам қариқ кўриб: “Саййидимиз ва шариатимиз соҳиби Муҳаммад соллаллоҳу алайҳи васаллам айтганларидек, албатта, бу эсдан чиқаришни келтириб чиқаради. Чунки, орқамия ҳифз ўрни ҳисобланиб, у жойдан қон олдириш ҳифзни йўкотади”, – деган.

Бошқалар унга раддия бериб, айтишадики, (энсанинг чуқурчасидан ҳижома қилиш эсдан чиқаришни келтириб чиқариши тўғрисидаги) мазкур ҳадис собит эмас. Агар собит бўлса ҳам, зарурат бўлмаган ҳолатда қон олдиришгина орқамияни заифлаштириб қўярди. Аммо қон ғолиб келиб турган вақтда табобат жихатидан ҳам, шариат томонлама ҳам фойдалидир. Набий соллаллоҳу алайҳи васалламнинг ҳолат тақозосига қараб бўйин (гардан)нинг бир қанча жойидан ва эҳтиёж сезилганда бўйин (гардан)дан бошқа аъзоларидан ҳижома қилдирганлари собитдир.

Ибн Сино ҳазратлари “Тиб қонунлари”да келтирилган ҳижома қилиш учун тавсия этилган нуқталарининг фойдалари Хитой халқ табобатида қўлланиладиган 12 та жуфт ва 2 та тоқ меридианалар (энергетик каналлар) да жойлашган биологик фаол нуқталарнинг хусусиятларига тўғри келади. Масалан, бошнинг тепа қисмида жойлашган **Яфух (васато роси)** нуқтаси орқа ўрта меридианда жойлашган **GV 20** нуқтасига тўғри келади (46–47-расмлар).

20-фасл. Қуруқ ёки кичик ҳижома. (Ҳижомаи имтисосий бешарт).

Юқорида келтирилган таърифимизда ҳижома сўзи “сўрмоқ”, “шиммоқ” маъноларида келиши ҳақида тўхталдик. Шу сабабдан қон чиқмаса-да, баданнинг бирор жойини ўзига тортувчи ва сўрувчи амалиётни ҳам ҳижома деса бўлади. Шу-

лардан бири қуруқ, яъни қонсиз ҳижомадир. Бунда банкачалар тананинг оғрикли жойларга манфий босим ҳосил қилиб жойлаштирилади. Банкачалар терини сўриши натижасида у бўртиб чиқади ва қизаради, лекин кўқартирмайди. Терида сунъий куйиш яъни (баъзи беморлар анатомик ва физиологик хусусиятлари эътибор килинмасдан банка узок муддатга ва кучли тортилганда тери остида) эпидермис қаватида суюқлик сақлаган пуфакчалар ҳосил бўлади. Банкалар ўртача 4-15 минутгача бемор ёши касаллик ҳолатига кўра қўйилади. Натижада организмдаги ўша жойда оғриқ камаяди, аммо қон чиқмайди.

Кичик ҳижома раис органлар бош, юрак, жигар соҳасидан ташқари вужуднинг исталган ерига қўйиш мумкин.

Банка қўйиш учун 50 гр., 100 гр, 150 грамлик банкалар, пахта ва узун ёндиргич (ҳозирги даврда банкалар учун махсус сўрувчи насослар) қўлланилади. Банканинг тубини майда бир қатлам ҳолида ёпишга етарли кичик пахта парчаси жойлаштирилади ва ёндиргичга ёқилиб керакли жойга ёпиштирилади ва аҳволига кўра 10-20 дақиқа (баъзан 1-1,5 соатга қадар) кутилади. Сўнгра, банканинг оғзига энг яқин бўлган терига бармоқ билан бостирилиб, банканинг ҳаво олиши таъминланган ҳолда банка олинадилар ва банка ўрни бир оз массаж қилинадилар.

Болалар, озгин ва кекса кишилар учун 50-100 грамлик банкалар қўлланилади. Банкалар, илк маротаба қўйилганда фақат 3-5 дақиқа кутилади. Кутиш вақти ундан кейин 15 дақиқа чўзилиши мумкин. Юз ва чакканинг пастки қисми учун ҳам 50-100 грамлик банкалар қўлланилади. Юз ва чакка пастига қўйилган банкаларнинг кутиш муддати 1 дақиқадан бошлаб, 10 дақиқাগача чўзилиши мумкин.

Банкалар бир жойга икки кунда бир ёки уч кунда бир 5-7 марта қўйилиши мумкин. Сўнг бошқа жойга ўтилади. Эҳти-



48-расм. Гавданинг олдида жойлашган қонсиз ҳижома нуқталари (манба: RodiBio.com).

ёжга кўра, 1-3ойдан сўнг айна жойга такроран қўйилади. Навбати билан, кетма-кет тананинг барча қисмига қўйилган банкаларнинг ҳеч бир қўшимча таъсири ва зарари йўқ.

Банкаларнинг изи соғлом инсонларда равон, кизғиш ранг олади ва тезда тарқайди. Банка изи равон бинафша рангда бўлса, қондаги захарли модданинг кўплигини, равон бўлмаган доғли бинафшарангда бўлса, майда томирларда янги тикилишлар мавжудлигини намоён қилади.

Қўйилган банкалар ҳеч бир из қолдирмаса, банка қўйилган жойда қон айланиши ёмонлигини, ўша аъзода совуқлик, тикилмалар борлигини англатади. Бу тикилишларни ҳаракатга келтириш ва қон айланишини яхшилаш учун ҳаммомга тушиш, вужудни укаламоқ, ҳаммомдан кейин седана ёғи билан аралаштирилган зайтун ёғи ёки сирка ҳамда аччик тарвуз шарбати билан баданни массаж қилиш керак бўлади. Буларни бажаргандан сўнг, кучли банкалар қўйилади ва қон олдирилади. Оғир касалликларда фақат касалликнинг шиддати озая бошлаганида ва иситма сўна бошлаганда банка қўйилиши мумкин.

Эслатма: Юз ва бўйинга тез қўйилган қувватли банкалар кўришнинг заифлашишига сабаб бўлиши мумкин.

Айнан шу турдаги ҳижоманинг бойитилган кўриниши ҳам мавжуд. Бунда инсон териси устига қўйилган ҳавосизлангирланг банкачалар бир жойда узок қолдирилмайди. Муайян биров тургач, ҳижома килувчи уни мақсадли равишда баданнинг маълум жойларида сирпантеририб юргизади. Содда килиб, буни банкачалар воситасида танани укалаш ёки *банкани массаж* дейиш мумкин. Ушбу бир-бирга яқин икки услуб асосан қон айланиш системаларини яхшилаш, тери ҳамда мускуллардаги совуқликни кетказиш ва асаб тизимларини жойига келтириш каби муолажаларда қўлланилади.

Банка қўйиш учун энг мос жойлар:

- Елкага, елканинг ўрта қисмига ва ёнларига қўйилган банкалар (охирги қовурға суягига умуртқанинг икки тарафи) ўпка, жигар, ўт пуфаги, ошқозон ости беши, ошқозон касалликлари ва оғриқлари, юқори қон босими, умуртқада туз йиғилиши ва бўйин чуррасига (грижасига) жуда мос келади.

- Белга (охирги қовурғанинг суягидан бошлаб, думгазага қадар умуртқанинг икки тарафи) қўйилган банка бел оғриғи, юқори қон босими, буйраклар, жинсий касалликларга мос келади.

- Чаккаларнинг паст қисмига (қулоқларнинг олдига) қўйилган банка кўз, бурун, лаб, қулоқ, томоқ, бўйин, тиш ва милк хасталикларига фойдали; миани тозалайди, юз терисини чиройли қилади.

- Қулоқнинг пасти ва бир оз орқасига қўйилган банка қулоқ, бурун, кўз хасталикларига, олд тишларга ва ўткир тишларга, бош оғриғига, жигар ва ўт пуфаги санчикларига, бош титрашига яхши бўлади.

- Жағнинг пастки қисмига қўйилган банка бош ва юз аъзоларининг касалликларига (жағ, кўз, бурун, қулоқ, лаб, тиш, тиш милки ва ёноқлар), бўйин аъзолари хасталикларига (товуш пайчалари, тироид ва лимфа безлари хасталиклари, бўйин чурраси, бодомсимон безларнинг (ангинанинг) шишишига яхши даволайди.

- Кўкрак усти, пасти ва кўкрак учларига қўйилган банкалар кўкрак сиқилишларини таркатади, она сутини кўнайтиради.

- Анал йўли (анус) ва жинсий аъзо орасига қўйилган банка простата хасталикларига, бавосил (геморрой) ва фил касаллигига (электантиазга), хайз тартибсизлигини даволайди.

- Анал йўли (анус)га қўйилган банка бошдан ва бутун вужуддан қонни пастга туширади. Барча аъзоларга ва вужудга хотиржамлик бахш этади. Асосан, ичакларга, простата хасталикларига ва хайз тартибсизликларига яхши даво бўлади.

- Сонларнинг ички қисмларига қўйилган банкалар сон ва тўпиқ оғриқларига, бавосил (геморрой), қорин ва қориннинг пастки қисми чуррасига (грижасига), подагра хасталигига яхши даво бўлади.

- Сонларнинг олд қисмига қўйилган банка моякларнинг ишиши, сон ва болдир яраларига яхши шифо беради.

- Сонларнинг орқа қисмига қўйилган банка юқори қон босимини туширади, бош оғриғини тиндиради, сонлардаги яра ва оғриқларни кетказди.

- Тўпиқларга қўйилган банка ҳайз тартибсизликларига, куймич асаб толасининг яллиғланиши оғриқларига, подагра хасталикларидан халос қилади.

- Киндикнинг уст қисмига қўйилган банка ёғларни таркатади, терини гўзаллаштиради, чуррага, ошқозон ва қорин оғриғига яхши даво беради.

- Киндик чуқурига ярим литрлик банка ёпилса, бу қорин оғриғини ва ҳайз оғриқларини кетказди.

- Киндикнинг паст қисмига қўйилган банкалар буйракдан сийдик йўлига тушган тошни сийдик пуфагига туширади, мояклар ва жинсий йўллардаги тикилишларни очади ва киндикнинг уст қисмига қўйилган банкалар берадиган фойдани беради (48-расм).

21-фасл. Шақиқа (мигрень)да ҳижома?

Имом Заҳабий роҳмаҳуллоҳ “Тиббун-Набавий” асарида шундай ёзадилар:

Ҳижома қилиш ўринларига тўхталадиган бўлсак, Ибн Аббос розияллоҳу анҳу: “Росулуллоҳ соллаллоҳу алайҳи васаллам ўзларининг бошида бўлаётган оғриқда бошларидан ҳижома қилдирдилар”. Бошқа ривоятда: “Шақиқада (бошла-

ридан ҳижома қилдирдилар)” дейилган. Имом Бухорий роҳмаҳуллоҳ ривояти.

Бошқа бир ҳадисда Пайғамбаримиз алайҳиссалом эҳромдалиқ ҳолларида шақиқада бошларидан қон олдирганлар (ушбу ҳадисни бешовларидан фақат Абу Довуд ривоят қилмаганлар).

Бир ривоятда: “Росулуллоҳ соллаллоҳу алайҳи васалламга бош оғриғидан шикоят қилишса, ҳижома қилгин, дер эдилар. Икки оёғидаги оғриқдан шикоят қилишса, ҳино билан бўягин, дер эдилар” (Имом Абу Довуд роҳмаҳуллоҳ ривояти).


Бошқа бир ҳадисда Пайғамбаримиз алайҳиссалом эҳромдалиқ ҳолларида шақиқада бошларидан қон олдирганлар (ушбу ҳадисни бешовларидан фақат Абу Довуд ривоят қилмаганлар).

Бу касаллик ҳақида невролог Фахрилло Файзуллаев қуйидагича маълумот берадилар: “Шақиқа – мигрень. “Мигрень” сўзи юнонча “гемикрания” – “бошнинг ярми” сўзидан келиб чиққан”. Hemicrania сўзининг бошидаги he- ва охиридаги -ia тушиб қолдирилиши натижасида micran, яъни мигрень келиб чиққан.


Шақиқа арабча сўз бўлиб, кўпроқ “ёриш” маъносидадир. Яъни, оғриқнинг кучидан бош ёрилиб кетгудай бўлгани учун шу ном берилган. Баъзи манбаларда шақиқани – бошнинг ярмисини оғриши (“судох нисфи”) деб ҳам келтирилади

Биринчи ҳадисда Пайғамбаримиз алайҳиссаломнинг бошлари оғригани ва унда қон олдирганликлари келтирилди. Бошқа ривоятда аниқроқ қилиб у зоти шарифда бош оғриғининг шақиқа деб номланган туридан азиат чекканликлари ва шунинг учун бошларидан ҳижома қилиб қон олдирганликлари айтилмоқда.


Расулимиз алайҳиссалом шақиқада бошнинг қайси қисмидан қон олдирган эканлар? Бу борада икки хил фикр бор:




49-расм. “Росуллоҳ соллаллоҳу алайҳи васаллам шақиқа оғриғидан бошларидан ҳижома қилдирдилар”




50-расм. Чакканинг юзаки артерия ва венаси (уруқул-жабҳату (عرق الجبهة) – vena et arteria temporalis superficialis – поверхностные артерии и вены виска).




51-расм. Ёфух томири.



52-расм. “Абу Ҳинд Набий соллаллоҳу алайҳи васаллам бошларининг тепа қисми (яфух)дан ҳижома қилди”.



53-расм. Ал-ихдаъану нуқтасининг ва ахдаъану томири (ташқи бўйинтуруқ венаси)нинг жойлашishi.



54-расм. Уч шохли асабни шохларининг чиқадиган тешиклари ва улар таъминлайдиган худудлар.

Буни билиш учун Абу Али ибн Сино ҳазратларининг “Тиб қонунлари”ни шақиқага бағишланган фаслидан топамиз. У киши шақиқани даволаш ҳақида бундай ёзадилар:

Таржимаси: “Шақиқани “темир қалпоқ” (байза) бош оғриғидаги ва бошқа бобларда билганингга мувофиқ томирдан, айникса, пешона (уруқи жабҳату) ва чакка (садғу) томирдан қон олиш, сурги дори ва хукналар ишлатиш, ҳамда моддаларни қарши тортиш билан даволанади. Буларнинг ҳаммасини асосий қондалар бобида сенга айтилганларга мувофиқ қилиб ишлатилади. “Қорабодин”да эслатилган сабр ивигилган сачратқи суви иссиқдан бўлган шақиқада фойда қиладиган дорилардандир. Бу дорилардан ҳар гал бир уқиядан олти уқиягача ичирилади. Пешона томиридан ва шунингдек, бурун томиридан қон олиш жуда фойдалидир” (“Тиб қонунлари” 3/1-китоб, 84-бет.)

Пешона томиридан қон олиш шақиқада фойдали эканлиги тўғрисида “Қонуни Боситий”нинг 2-китоби 770-771-бетлари ҳам етарлича ёзилган.

Тажрибали табиб Ўрол Ўзбек айтадилар: “Шақиқа, яъни мигрень шарқ табobatiда жуда-жуда қийин тузаладиган касалликларга киради. Замонавий тиббиётда-ку унинг дорилар билан даволашнинг иложи йўк.

Бемор “Тиб қонунлари” китобига кўра даволанганда пешона чакка сохаларига зулук қўйиб, кортиқ билан қон олиб ташлаш керак. Ундан ташқари, суртма дорилар, чоршанба куни сув тегмаган чинни косага заъфарон билан оят ва дуоларни ёзиб, сув қўйиб ичиш буюрилади” (49–54, 56, 57-расмлар).

22-фасл. Сехрланганда қандай ҳижома қилинади?

Сехр инсоннинг табиатига, хилтларнинг ғалаёнига ва мижознинг бир маромда бўлмаслигига таъсир қиладди. Агар бирор аъзода унинг таъсири сезилиб, ўша аъзодан зарарли

моддаларни чиқариб ташлаш (истифроғ) яъни ҳижома қилиб тозалаш жуда фойдали бўлади.

Абу Убайд “Ғарибул ҳадис” китобида ўзининг исноди билан Абдурахмон ибн Абу Лайлодан ривоят қилади: “Расулуллоҳ соллаллоҳу алайҳи васаллам сеҳрланганларида бошларидан шох билан қон олдирдилар”.

Абу Убайд айтади: “(Ҳадисдаги “сеҳрланганларида” деб таржима қилганимиз) “тубба” феъли “сеҳрланди” маъносидадир. Бу ҳадис илмий савияси пастроқ кишиларга муаммо туғдириб, улар “Қон олдирешнинг сеҳрга нима алоқаси бор? Иккаласини нима боғлаб туради?” – дейишади. Бу кишилар Букрот ёки Ибн Сино кабилар шу муолажани тавсия қилганини билишганида сўзсиз қабул қилишиб “буни билимли ва фазилатли кишилар айтган” – дейишарди.

Расулуллоҳ соллаллоҳу алайҳи васаллам мусибатланган сеҳр моддаси бошларига, яъни, унинг қувватларидан биригача шу даражада етиб борган эдики, ҳатто бир ишни қилмаган бўлсалар ҳам қилган каби туйилар эди. Бу сеҳргар тарафидан инсон табиати ва қон моддасини тасарруф қилишдир. Ҳатто у бошнинг олдинги қоринчасига устунлик қилиб, унинг мижозини асл табиатидан ўзгартириб юборади.

Сеҳр – нопок руҳларнинг таъсири ва табиат қувватларининг таъсирланишидан ташкил топган нарсадир. У тамриҳот сеҳри бўлиб, энг ёмон сеҳрдир! Айниқса, сеҳр қилинган жойга қаттиқ таъсир қилади.

Сеҳр сабабли фаолиятига зарар етган жойдан зарурий қонун-қоидаларга амал қилган ҳолда ҳижома қилиш жуда фойдали муолажадир.

Букрот айтади: “Тозалаб чиқариб ташланиши (истифроғ) лозим бўлган зарарлар фойдали ва самара берувчи воситалар ёрдамида чиқиб кетишга мойил жойлардан чиқарилиши керак”.

Баъзи олимларнинг айтишларича, Расулуллоҳ соллаллоҳу алайҳи васаллам бу дардга йўлиқиб, қилмаган ишлари қилгандек туюлганда, у зот бун қондаги ёки бошқа бир модда сабабли деб ўйлаганлар. Ўша модда димоғ тарафга мойил бўлиб, миянинг олдинги қоринчасига ғолиб келган ва мижозни асл табиий ҳолатидан чиқарган. Бу пайтда ҳижома қилдириш энг яхши даво ва энг фойдали услуб ҳисобланган. Шунинг учун у зот қон олдирганлар.

Расулуллоҳ соллаллоҳу алайҳи васаллам бу услубни сеҳр қилинганларини ваҳий орқали билишларидан олдин қўллаганлар. Аллоҳ тарафидан ваҳий келиб, сеҳр қилинганлари маълум бўлгач, ҳақиқий муолажа, яъни, сеҳрни чиқариб йўқотиб юборишга юзландилар. Аллоҳдан сўраган эдилар, у зотга сеҳр яширилган жой билдирилди ва уни чиқариб ташлаб, кишандан озод қилингандек бўлдилар. Сеҳр у зотнинг таналари ва зоҳирий аҳзоларига таъсир кўрсатиб, ақллари ва қалбларига ўтмаган. Шунинг учун аёлларига яқинлик қилганларидек туюлган ҳаёлни тўғри деб эътиқод қилмай, балки бу ҳақиқат эмас, аксинча, ҳаёл эканини билганлар. Бундай ҳолат баъзи касалликлар сабабли пайдо бўлади. Аллоҳ билгувчидир.

Ибн сино айтадилар:

Ияк тагига қортиқ қўйиб қон олиш тишларга, юзга ва томоққа фойда қилади, бошни ва жағларни тозалайди.

“Саҳиҳайн”да Расулуллоҳ соллаллоҳу алайҳи васалламдан ривоят қилинади: “Даволанадиган нарсангизнинг яхшиси ҳижома ва қустул-бахрийдир. Гўдақларингизни узрани эзиш билан азобламанглар”.

Юқорида коҳил ва ихдааъйндан ҳижома қилиш томоқ касалликларига фойдали, деб келтирилган эди. Бу ерда ияк тагидан дейилмоқда. Ҳадисда болалардаги узра касаллигида ҳижома ва қустул-бахрий келмоқда. Демак, ҳижома қилувчи киши шуларни ҳисобга олиши керак.

Думғазага қортиқ қўйиб қон олиш сон чипқонларига, қўтирларига, майда чиқикларига, никрисга, бавосирга, “фил касаллиги”га, ковуқда ва бачадонда бод пайдо бўлиш касалликларига ва орқа кичишига фойдалидир.

Қортиқ олов билан қўйилганда хоҳ тилиб, хоҳ тилмай [бўлсин, барибир] ўша касалликлар вақтида фойда қилади; тилиб [қортиқ қўйиш] бод бўлмаганда, кучлироқ таъсир қилади.

Тилмай қортиқ қўйиб қон олиш эса ўша ерда ёки бошқа жойларда совуқ бодларни йўқотишда кучли фойда қилади.

Иккала сон олд томонига қортиқ қўйиб қон олиш мояк шишига, икки сон ва икки болдир чипқонларига фойда қилади.

Иккала сон орқасига [қортиқ қўйиб қон олиш] иккала думбада пайдо бўладиган шишлар ва чиқиклар вақтида фойда қилади.

Тиззанинг пастроғига қортиқ қўйиб қон олиш ўткир хилтлардан пайдо бўладиган тизза лўкиллашига ва оёқдаги ёмон чиқикларга ҳамда эски яраларга фойда қилади.

Иккала товонга қортиқ қўйиб қон олиш ҳайз қонини тўхтатишга, иркуннасо ва никрис вақтида фойда қилади.

Таржимада товон деб берилган сўз асл матнда “каъб” деб келган. Бу эса, тибга қўра товонга эмас, тўпиқ сўзи тўғри келади. Товон эса, арабчада каъб эмас, уқбо деб келади.

“Ҳайз қонини тўхтатишга” деб таржима қилинган сўз матнда “ихтибос ут-тамс” деб келган. Бу эса, “ҳайзнинг қамалиб қолиши” маъносини билдиради.

Тилмай қортиқ қўйиб қон олишга келсак, у моддани қўзғалган томонидан тортишда ишлатилади. Масалан, ҳайз қонининг кетаверишини тўхтатиш учун эмчакка қортиқ қўйиб қон олинади.

Гоҳо тилмай қортиқ қўйиш билан чуқур турган шишни даволаш учун юзага чиқарилади.

Тилмай қортиқ қўйиш гоҳо аҳамиятсизроқ қўшни аъзога шишни қўчириш учун ишлатилади;

гоҳо аъзони қизитиш, у аъзога қонни тортиш ва бодларни тарқатиш учун [ҳам] ишлатилади;

гоҳо аъзони тушиб кетган жойидан ўзининг табиий жойига қайтариш учун ишлатилади. Масалан, даббада.

Гоҳо оғриқни тўхтатиш учун қортиқ қўйилади. Масалан, оғритувчи қулунж касали сабабли, қорин бодлари сабабли, ҳайз қони қўзғалган пайтдаги, айниқса ёш хотин-қизларда бўладиган бачадон оғриқлари сабабли киндикка қортиқ қўйилади.

Сон бошига қортиқ қўйиб қон олиш иркуннасо учун, [қуймиқ суягининг] ўрnidан чиқиб кетиш хавфи учун;

“Сунани Аби Довуд”да Жобир розияллоху анҳудан ривоят қилинади: “Набий соллаллоху алайҳи васаллам думбадаги оғриқ сабабли ундан ҳижома қилдирдилар”.

Икки сон бошининг ўртасига қортиқ қўйиб қон олиш эса, иккала сон боши оралиғи, иккала сон, бавосир учун, дабба ва никрис касалига учраган кишилар учун манфаатлидир.

Орқа тешиқ атрофига қортиқлар қуйиш бутун гавдадан ва бошдан [қонни] тортади, ичакларга фойда қилади, ҳайз бузқлигига даво бўлади, шу билан бадан енгиллашади.

Биз айтамыз, тилиб қортиқ қўйиб қон олишнинг уч фойдаси бор: биринчиси, аъзонинг худди ўзидан қонни чиқариш.

Иккинчиси, чиқарилиши керак бўлган хилтлар билан чиқиб кетиши мумкин бўлган рух моддасини сақлаш.

Учинчиси, бошқарувчи аъзолардан [қон] чиқарилишига йўл бермаслик.

Тилиш чуқур бўлиши керак, шунда чуқурдаги қонни тортади. Баъзан қортиққа ёпишадиган жой шишиб, қортиқни чиқариб олиш қийин бўлади, шу пайтда бир парча латта ё булут олинсин, уларни иссиқроқ сув билан ҳўллаб, аввал қортиқ атрофини пахтадоғ билан иситилсин.

[Қортиқ қўйилган жойнинг шишиши] кўпинча қортиқларни ҳайз ё бурун қонини тўхтатиш учун эмчак атрофига ишлатганимизда пайдо бўлади. Шунинг учун эмчакнинг худди ўзига қортиқлар қўйиш керак эмас. Қортиқ қўйиб қон олинандиган жой ёғланганда қортиқ солишга шошилисин, тилишда сустлашмай, балки шошилишсин. Қортиқни биринчи марта енгилгина қўйиб, тез олинади. Кейин аста-секин қортиқни ушлаб турилади ва узоқ вақт тутилади.

23-фасл. Ҳижома қилинаётган вақт ва таомланиш вақти.

Табиблар тўқ қоринга қон олдириш яхши эмас, дейишади. Чунки у кўпинча, айниқса, таом ёмон ва қуюқ бўлганда (қон йўлларида) тикилмалар ва ёмон касалликларни келтириб чиқаради.

Ҳадисда: “Оч қоринга қон олдириш даво, тўқ қоринга олдириш дард ва ойнанинг ўн еттинчисида олдириш шифодир”, — дейилган У кишидан ривоят қилинади: “Оч қоринга ҳижома қилиш даводир, тўқ қоринга қилиш эса дарддир”

Касал қортиқ қўйилгандан бир соатдан кейин овкатланиши керак.

24-фасл. Ҳижомага тайёргарлик ёхуд нима учун очлик зарур?

Пайғамбаримиз соллаллоҳу алайҳи васаллам ҳижомага, рўзага қайта — қайта тарғиб қилишлари ва ўзлари ҳам амалда бу соғлиқни сақловчи усуллардан ҳаёти давомида фойдаланганликлари бежиз эмас албатта. Қабулимизга келган беморлар аксарига бир кунлик, уч кунлик, олти кунлик очлик

буюришимиз, кейин ҳижомани амалда қўллашимиз сабаби ҳақида сўрашади...

Зарарли моддаларни организмдан чиқарув органларидан бири бўлган терини зарарли моддаларни йиғишга қобилиятли соҳаларига максимал даражада йиғишимиз ва ҳижома йўли билан чиқаришимиз лозим бўлади. Бунинг учун аввало табиб ўша ортиқча ғайритабиий (зарарли) хилтни аввал пишириши яъни етилтириши, кейин эса чиқарув органларига йиғиши, тўплаши ва бирор восита орқали чиқариши лозим бўлади. Хар бир бузилган хилтни ўз етилтирувчи пиширувчи гиёҳлари мавжуд. Лекин, ҳар доим ҳам уларни топиш имкони бўлмайди. Энг мўътадил ва ҳаммабоп хилтни пиширувчи, етилтирувчи восита бу тўғри амалга оширилган — ОЧЛИК (АУТОФАГИЯ) дир. Очлик даврида организм ўзидаги ортиқча зарарли, кераксиз ҳужайраларни, моддаларни аста-секин барча ажратув органларига ажрата бошлайди. Шу сабаб очлик қилаётган инсон оғзи, терлагандаги тер ҳиди, сийдиги ҳидлана бошлайди. Шу парчаланаётган махсулотлар тезроқ чиқиши учун беморларга кун бўйи илиқ («Шифо-19», «Муназзиф» каби чойлардан кўпроқ ичилса янада яхши) сувни кўп миқдорда ичишни, ич қотишга йўл қўймасликни (керак бўлса клизма ёки сургилар ёки «нури сафо» сиропи, «Муназзиф» маъжуни кабиларни ичишни) тавсия қиламиз. Демак, биз тўғри ўтказилган очлик билан зарарли, ортиқча хилтларни пиширамыз, тўплаймыз, уни ташқарига чиқишини кучайтирамыз ва қўшимча равишда терига йиғилиб қолганларини осонлик билан бирор восита (тиғ ёки зулук) ёрдамида ташқарига чиқариб юборамиз. Худди шундай йўл билан қилинган ҳижома жуда фойдали бўлиб беморни тез шифоланишига, ҳижома давомида нохуш ҳолатларни юз бермаслигига сабаб бўлади.

25-фасл. Тиббий зулуклар

Юртимизда ҳижоманинг яна бир тури амалда бўлиб, бу зулук воситасида қон олдиришдир. Асосан оқмайдиган сувларда, сувли ботқоқликларда яшовчи куртларнинг бир тури бўлган зулук қон сўриш борасида банкахалардан кўра кучлироқ таъсир кучига эга.

Мир Муҳаммад Хусайн ал-Оқилий “Махзан ул-адавия” (Даволар хазинаси) китобида шундай ёзадилар: “Зулукнинг арабча номи – алақ, форсчаси – залу, девча, туркча номи – сулук, ҳиндча номи жунк”. Ўзбекчада – зулук бўлиб, форсчадаги залу дан ўзлаштирилган бўлса керак, русчада – пиявка, пиявки.

Ибн Сино ҳазратлари зулуклар тўғрисида шундай ёзадилар: “Ҳиндийлар айтади: зулуклардан баъзисининг табиатида заҳарлилиқ бор. Шунинг учун боши катта, сурма-ранг-қорамтир ё кўкимтир [сабзранг], тукли [музғаб – андак мўйдор], илонбаликка ўхшаш, устиларида зангори йўллари бор [қора ложувард ранг хутут] ва буқаламун рангли зулуклардан сақланиш керак. Шуларнинг ҳаммасида заҳар бор. Бу зулукларни солиш шишлар [варам], беҳушлиқ [ғаший], қон кетиши [назф уд-дам], иситма, бўшашиш [истирхо] ва ёмон яраларни [радияйи фосида] пайдо қилади. Балчикли ифлос сувлардан [лойлик чашма] тутилган зулуклардан ҳам сақланилсин.

Лекин, [энг яхшиси] юзида қурбақаўт [тўхлаб] пайдо бўлган ва қурбақалар макони бўлган сувлардан тутилган зулуклар танлаб олинсин. Қурбақали сувларда бўладиган зулуклар ёмон, деганларга эътибор бермаслик керак.

Зулуклар турли рангли, кўпроқ кўк [мош] рангли ва устларида зарних [оловранг, сарик] рангли икки чизиқ тортилган бўлсин ё сарғиш, кўкимтир, ёнлари юмалоқ бўлсин. Яна

жигарранг, кичик чигиртка рангли, сичқон думига ўхшаган, ингичка ва кичик бошли [зулук яхшидир].

Қоринлари қизил, орқалари кўк, айниқса, оқар сувларда бўладиган зулуклар ишлатилмайди” (“Тиб қонунлари” 1-китоб, 489-б.).

Боситхон Шоший эса, Ибн Синонинг юқоридаги гапидан фарқли равишда бундай деб ёзадилар: “Ва агар зулувки, қорни тарафи қизил бўлса, орқаси сабзранг бўлса, ҳамма зулудан яхшироқ бўлур. Хусусан, агар оқар сувдин сайд қилинғон [тутилган] бўлса, ҳаммадин афзал бўлур” (“Қонуни Боситий” 2-китоб, 789-б.).

“Махзан ул-адавия”да шундай келтирилади: “Зулук ширин сувли анҳор, ҳовуз, кўл, тўхтаб қолган [турғун] сувлар, ҳидланган ва айниган сувли чуқурлар, тўхлаб⁴⁸ кўп бўлган жойларда яшовчи курт бўлиб, унинг турлари жуда кўпдир.

Энг яхши зулук ширин сувли анҳор ёки ҳовуз ёхуд сасимаган сув ости ўтлари кўп бўлган сувларда етилганидир. Унинг ранги оч қора, катта-кичиклиги ўртача, боши қора ва юмалоқ, қорнининг ости бир оз олароқ бўлади.

Зулукнинг бир неча турлари бўлиб, улар яхши-ёмонлиги жихатидан бир-биридан фарқ қилади. Ёмонлари, яъни заҳарлиларининг белгилари учта: боши катта, сурма ёки қора рангли ва устида майин туклари бор. Ушбу сифатларга эга зулукдан ҳижомада фойдаланилмайди.

Бу мақсадда фойдаланиладиган зулуклар тури саккиз хил бўлиб, улар қуйидагилардир:

1) Устини зангори рангли майин мох босган сувда яшовчи зулуклар;

2) Бакалар кўп бўлган сувда яшовчи зулуклар. Чунки бакалар сувни чириндилардан тозалайди;

3) Мош рангли зулуклар;

⁴⁸ Тўхлаб – сув остида ўсадиган, баъзан унинг устига ҳам ўсиб чиқадиған ўсимлик (русча. ряска).

- 3) Жигарранг зулуклар;
- 5) Сарик чигирткага ўхшаш зулуклар;
- 6) Боши кичкина ингичка сичқоннинг думига ўхшаш зулуклар;
- 7) Қорин томони қизил ва усти яшил зулуклар;
- 8) Малла рангдаги зулуклар.

26-Фасл. Қачон зулук қўйилади?

Қон олиш уч тури борлиги ҳақида юқорида ёздик. Ҳар бир турини қўллашнинг мақсади бор. Ҳўш, қачон ҳижома ёки фасд қилмай, айнан зулук қўйилади?

Ибн Сино шундай ёзадилар: *“Зулуклар қортиқдан кўра чуқурроқ ердан қон тортадилар”* (“Тиб қонунлари” 1-китоб, 490-б.).

Бобурий подшоҳ Оламгиршоҳ даврида яшаган Муҳаммад Акбар Арзоний роҳмаҳуллоҳ (ваф. 1772 й.) ўзларининг “Мезонут-тиб” китобларида шундай ёзадилар: *“Билишсинки, ҳижомат ва зулук болаларга томирдан олиш ўрнидадур. Зарур бўлмаса, қилиш керак эмас. Юқорида олтимини ёшдан кейин ва икки ёшдан олдин мумкин эмаслиги айтилди. Зулук тилиб ҳижомат қилишнинг имкони бўлмаганда солинади”*.

27-фасл. Қайси касалликларда зулук қўйилади?

Ибн Сино ҳазрат шундай ёзадилар: *“Ширинча [саъфа - диатез], темиратки [қувабо – лишай], сепкил, намаш⁴⁹ ва бошқалар каби тери касалликларида зулук ишлатиш яхшидир”* (“Тиб қонунлари” 1-китоб, 490-б.).

⁴⁹ Калаф – форсийда нош ва туркийда сепкил дерлар. Ва хайлон туркийда майда хол дерлар, калафга ўхшар, лекин пўстдин баландроқ турғай. Ва намаш туркийда қизил сепкил дерлар, зохири жилдга зоҳир бўлур. Жилд (тери) тағидаги рағларни боши очилмоқдин пайдо бўлур (“Фарҳанг ал-мабсут”, 527-б.).

“Махзан ул-адавия”да шундай келтирилади: *“Зулукнинг яхши навидан ҳаром қон йиғилган жойга, масалан, ёғли ўсмага, ярага, сепкил, тошма, нашитар уриб, қон олдириш хавфли бўлган жойларга, чунончи, қовоқ, кўз атрофлари, юзга ёки кичик ёшдаги болаларга қўйилса, бузуқ қонларни осонгина тортиб олади”*.

Зулук қон айланишини яхшилаш, шамоллаш асоратлари, оғриқларни кетказиш, қон босимини тушириш, узоқ муддат тузалмай келаётган яраларни тузатиш ҳамда темиратки ва кўтир каби хасталикларни даволашда ҳам қўйилади.

Табобат соҳаси мутахассисларининг айтишларига кўра, баъзи аъзолар, масалан, лаб, милк ва шу кабилар кичиклигидан уларга банкахалар қўйиш имкони йўқ. Яна айрим аъзоларда, масалан, бармоқлар, бурун ва кулоқ кабиларда гўшт кам ёки йўқлиги сабабли ҳам уларга умуман банкахалар қўйиб бўлмайди. Шу боис бу аъзоларга зулук қўйиш билан даво излаш қўл келади.

Касалликларнинг ўткир ҳолатларида (Масалан; умуртқа чурраси, калит, инфаркт миокард, фурукул ва ҳ) ҳам зулукнинг ўрни бекиёс ҳисобланади. Бундай вақтларда хасталик ҳолатига қараб 10-15 минут яъни ўзидан ферментларини танага ўтказиб олгунича қўйилади.

Ҳозирги кунда зулукдан тиббиёт соҳасида жарроҳлик амалиётларида ҳам фойдаланилмоқда. Мат Кларк “Нью-Йорк” журналининг 1987 йил феврал ойи сониде чиққан мақоласида ёзишича, охириги йилларда зулукни тиббиёт бобида кенгроқ қўлланиш йўлга қўйилди. Америка, Буюк Британия ва Франция тиббиёт муассасалари ундан бармоқ ва бурунларни улаш амалиётида фойдаланишмоқда.

Жарроҳлар бундай амалиёт жараёнида аъзоларнинг капилляр қон томирлари оз муддат ёпилиб қолиши сабабли муваффақиятсизликка учрашлари мумкин. Шу боис улар ўша

уланаётган аъзо қисмига зулук кўйишади. Натижада зулук майда қон томирларини очиб бериш вазифасини бажаради. Шунинг учун зулук сўриши керак бўлган 28 грамм миқдор атрофида қонни сўрганидан кейин капилляр қон томирлари очилгани боис қон сизиб оқиб тургани кузатилади.

Америкада нашр қилинган “Тиббиёт ва фармацевтика дунёси” номли журналда Москва шаҳрида зулукдан кўз касалликларида ҳам фойдаланилаётгани ёзилган. Унда кўзларида катаракта касаллиги бор беморларнинг икки чаккасига зулук қўйилаётгани айtilган.

Зулук таркибидаги шифобахш моддалар:

Гирудин. Қонни суюлтирувчи. Бошқа химиявий қонни суюлтирувчи препаратлардан фарқи қон томирларни жароҳатламайди, аксинча қон томирларни жароҳатларини битишини тезлаштиради.

Оргелаза. Қонни суюлтириш билан биргаликда қон томир ўтказувчанлигини яхшилайдди, организмдаги суюқликлар балансини тиклайди, шиш ва яллиғланишни камайтиради. Микроциркуляцияни яхшилайдди.

Гиалуронидаза. Бириктирувчи тўқимадан иборат тикилмаларни эритувчи. Бу фермент организмни уруғланиш жараёнларини тезлаштиради. Шунинг учун бефарзандликни даволашда зулук курси бебаҳо ҳисобланади.

Коллагеназа. Чандиқларни эритувчи. Бу фермент куйиш, травма, яралардан кейин ҳосил бўлган чандиқларни эритиш билан бирга яраларни битишини тезлаштиради. Терини эластиклиги ва тонусини оширади.

Липаза. Организмдаги ортиқча ёғ кислоталарини парчаловчи. Атеросклероз, семизлик, целлюлитда шунингдек организмни организмни тозалашда ўрни бекиёсдир.

Бделлин. Табиий антибиотик. Яллиғланишга қарши таъсир қилади.

Элинин. Тўқималарни парчаланишини олдини олади. Бу фермент артрит, полиартрит, тери касалликларини даволашда аҳамиятли.

Зулукни даволовчи таъсири:

- Иммуниетни рағбатлантирувчи. (Зулук таркибидаги биологик актив моддалар иммун система фаолиятини рағбатлантиради).

- Умумий рефлектор. (Биологик актив нуқталар, марказий ва вегетатив нерв системаси фаолиятини стимуллайдди).

- Антикоагулянт. Қон ивишини секинлаштирувчи.

- Тромболитик. Тромб ҳосил бўлишини олдини олувчи, ҳосил бўлган тромбни эритувчи.

- Антисклеротик. (Қон томир қаришини олдини олади. Қондаги холестерин миқдорини пасайтиради).

- Шишга қарши.

- Ишемияга қарши. Тўқималардаги қон айланишни яхшилайдди.

- Антигипоксик. Тўқималарга кислород етиб боришини яхшиловчи.

- Норматензив. Зулук таркибидаги ферментлар организмдаги тана ҳароратини, артериал босимни, моддалар алмашиувини яхшилайдди.

- Липолитик. Ортиқча ёғларни эритувчи.

- Оғриқсизлантирувчи.

- Микробларга қарши.

28-фасл. Зулукнинг мизожи ва уни дори сифатида қўллаш?

“Махзан ул-адавия”да шундай келтирилади: “Зулукнинг мизожи – қуруқ-совуқ.

Зулукни қуришиб, асалга солиб яланса, томоқ оғриғини қолдиради, буйракдаги тошларни майдалайди. Туйиб, алоэ

билан қўшилгани эса бавосир ярасини куритади. Суркалганда эса доғларни кетказади. Кичик турининг куйдирилган кули сирка ҳамда банг (наша) га қўшилиб, ковоқ атрофига ўсиб чиққан ортиқча тукларга суркалса, ўсишини тўхтатади.

Зулукдан ўн беш дона олиб (каттаси бўлиши лозим), ювиб, қуритиб, йигирма мисқол туйилган чувалчанг билан бирга ярим осор тоза кунжут ёғи билан қайнатиб, сув оқиб кириши натижасида шишган моякка бир неча кун иситиб суркалса, бу иллатни зойил қилади. Бу синалган дори”.


29-фасл. Зулук қўйиб қон олиш

Малакали шифокор-радиолог Жасур Абидов шундай таъкидлайдилар: “Қон олувчининг эътибор қилиши керак бўлган жиҳатлардан бири – беморнинг қон кўрсаткичларидир. Қон олдирмоқчи бўлган шахсда дастлабки қон таҳлил (анализ) лари: умумий қон таҳлили ва коагулограмма текширувлари ўтказилса, нур устига аъло нур бўлади. Зеро, бунда қон олиш вақтида қон кетишини олдини олган бўлинади.

Буни замон билан ҳамнафаслик деб тушуниш керак. Аввало мижоз ҳолати оғирлашиб қолишининг олди олинади. Ҳамда табиб ишида натижа кўринади”.

Ибн Сино ҳазрат шундай ёзадилар: “Зулуклар ишлатишдан бир кун бурун тутилиб, мумкин бўлса ичларидаги нарсаларни чиқариб ташлаш учун бошини ерга қилиниб, қусдирилиши керак. Уларга солишдан олдин овқатланишлари учун қўзичоқ ё бошқа [ҳайвон]нинг қонидан бир оз берилади. Кейин ушлаб, булутга ўхшаш бирор нарса билан ёпишқоқ нарсалари ва ифлосликлари тозаланади.

Зулук солинадиган жой бурақ билан ювилади ва қизаргунча ишқаланади. Зулукни ишлатиш[дан] олди[н] чучук сувга солиниб тозаланади, кейин ишлатилади. Зулук солинади-



55-расм. Зулук сўлагини таъсирининг чизмаси (манба: Савинов В.А. “Гирудотерапия”. – Москва: Медицина, 2004) аъзоларнинг акс этиш нуқталари

ган жойга [бош ювиладиган] турпоқ ёки қон суриш зулукни ишлатишга қизиқтиради.

Зулуклар тўлиб, туширилмоқчи бўлинса, устларига бир оз туз ё кул ё бурақ ё каноп латта кули ё куйдирилган булут [баллут] ё куйдирилган юнг сочилади.

Зулуклар тушгандан кейин зулук солинган жойнинг қонидан қортиқ билан бироз сўриб олинади. Шу қон билан зулукларнинг зарарли таъсирлари ва тишлашларининг зарари чиқиб кетади” (“Тиб қонунлари” 1-китоб, 490-б.).

“Махзан ул-адавия”да шундай келтирилади: “Зулук икки марта қўйилса, масалан, биринчи кун қўйилган жойга иккинчи кун ҳам қўйилса, ёмон бўлмайди. Чунки биринчи кундан қолган ҳаром қон қолдигини иккинчи кун қўйилганда тортиб олади. Аммо биринчи кундагидан кам бўлиши зарур.

Масалан, биринчи кун ўн дона зулук қўйилган бўлса, иккинчи кун беш дона ёки уч дона қўйилиши керак. Аммо қув-

ватга эътибор бериш зарур. Куч-қувватдан қоладиган даражада қон олдириш ва томир устига зулук қўйиш хавфлидир. Танлаб олинган зулукни қўйишдан аввал унинг бошини ерга қаратиб турилса, аввал нимаики ичган бўлса, қусиб ташлайди.

Зулукни қўйишдан аввал бемор кишининг аъзоси қизаргунча ишқаланади, сўнг зулук қўйилади. Зулукнинг ишиганига қараб, уни тўйди деб гумон қилиб, куч билан ажратишига уринмаслик керак. Тўйгандан сўнг ўзи тушиб кетади.

Ёки тушириш зарур бўлса, озгина кул ёки туздан озгига сепилса ёки пиёз парчаси озгига тегизилса, дарҳол тушиб кетади. Сўнггра тишлаган жойи тоза мато, юмшоқ бўз латта билан қони тўхтагунча артиб турилади. Қон тўхтамай оқаверса, кул босилади ёки қон тўхтатувчи муносиб дори ишлатилади.

Зулук тўйиб тушгандан сўнг озгига бир оз туз сепилса, сўриб олган қонларини қусиб ташлайди ва ўлади”.

Олдинги зулук тўйиб тушиб кетгандан кейин орқасидан яна қўйишга эҳтиёж бўлса, бошқа зулук қўйган яхшироқ (55-расм).

30-фасл. Зулук қўйилган жойдан қон оқишини тўхтатиш

Ибн Сино ҳазрат зулуклар тўғрисидаги фаслда шундай ёзадилар: “Қон тўхталмаса, зулук солинган жойга қуйдирилган мози, оҳак ё кул ё майда янчилган сопол ёки қонни тўхтатувчи бошқа нарсаларнинг бири сепилади. Зулук соладиган кишининг олдидан [шу нарсалар] тайёр туриши керак” (“Тиб қонунлари” 1-китоб, 490-б.).

“Махзан ул-адавия”да шундай келтирилади: “Қон тўхтамай оқаверса, кул босилади ёки қон тўхтатувчи муносиб дори ишлатилади”.

Малакали шифокор-радиолог Жасур Абидов шундай таъкидлайдилар: “Ҳозир табиблар, улуғ алломалар даврига яраша ишлатган усулларига қўшимча замонавий қон тўхтатувчи дори восита (препарат)лар, гемостатик материаллар мавжуд. Керак вақтда улардан ҳам фойдаланиш мумкин”.

31-фасл. Нега зулук чакмайди?

Баъзи инсонларни зулук қийинроқ, баъзиларини эса мутлақо чакмайди. Бунинг баъзи сабабларини келтириб ўтамиз:

1. Зулук табиатан ўта таъсирчан, ниҳоятда озода жонивор. У ҳар қандай сунъий ва организмдан чиқаётган ҳидларнинг ёқтирмайди. Бундай ҳидлар жумласига тер хиди, мушк, атир ва барча парфимерия маҳсулотлари жумладан крем, упа ва хоказолар киради. Шунинг учун зулук курсига боришдан олдин яхшилаб ювиниш тавсия қилинади.

2. Таъм билиш хусусияти ҳам ўта кучли ривожланган. Тери қопламига сингиб қолган дори-дармонлар (мазлар, баъзи витамин гуруҳлари ҳам тери орқали ажралади, олтингугуртли, тузли ванналар қабулидан кейин ҳам зулукнинг чакиши қийинлашади.

3. Зулукдан ўта қўрқиш ёки ундан жирканиш. Зулук жудаям инсонни кечинмаларини ва унга нисбатан берилаётган баҳони яхши ҳис қилади. Шунинг учун зулук олаётганда яхши кайфиятда, пок ҳолатда бўлиб, оятал курси ўкиб ўтириш тавсия қилинади.

4. Ҳароратдаги кескинлик. Зулукнинг совуқ жойдан иссиққа, ёки иссиқдан совуққа олиб чиқиш ҳам то ўша ҳароратга мослашгунга қадар унинг чакиш хусусиятининг пасайтиради. Шунинг учун уни чақтиришдан олдин хона ҳароратида сақлаш тавсия қилинади.

5. Зулук сақланаётган сувнинг алмаштиришдаги сувдаги ҳарорат фарқи. Юқорида айтиб ўтганимиздай зулук ўта озода мавжудот бўлиб тез-тез ўзи яшаётган сувга терисида ҳосил бўлган пўстларини ташлаб туради. Шунинг учун у сақланаётган сув ҳар куни ёки кун аро алмаштирилиб турилиши керак. Сувни алмаштиришдаги ҳароратнинг фарқи уни сўрувчанлигига таъсир этади.

6. Зулукнинг “қорнини тўқлиги”. Агар зулук келтирилишдан олдин бирор ҳайвон қони билан озиқланган бўлса. (Зулук боқиладиган ҳовузлардаги бақа ва шунга ўхшашлар билан).

7. Зулукнинг ўзидаги мавжуд касалликлар сабабли.

8. Бемор тери қопламларини қаттиқ, дағал бўлиши ёки тери ҳароратини паст бўлиши.

9. Терининг туклар билан қопланганлиги.

10. Энергетик мос келмаслик ёки магнит бўронлари сабабли ҳам зулук чакмаслиги мумкин.

32-фасл. Ҳижомага кўрсатмалар

Организм ғайритабиий хилтларга тўлиб кетишида қон олдириш тез ва самарали ёрдам беради. Бу ҳолат эса табобатда келган олти зарурий омилга амал қилинмаганида пайдо бўлади. Қон олдиришга энг кўп муҳтож бўлувчилар:

- Энг аввало ўта ширин, ёғли, қуюқ овқатлар, химикат ва консерванланган маҳсулотлар истеъмолчилари.

- Овқат маҳсулотларини кўп истеъмол қилувчилар. Бир кунда 3-4марта еганлари учун.

- Турли сабабдан келиб чиққан бош оғриқлари. Бош мияда қон айланишни бузилиши билан боғлиқ касалликлар. Тутқаноқ. Депрессия. Мигрен. Уйқусизлик. Зехн ва хотирани пасайиши.

- Турли сабабдан келиб чиққан бўғим оғриқлари. Тизза бўғими остеоартрози. Бел ва бўйин остеохондрози. Умurtқа грижаси. Подагра. Ревматизм.

- Юрак-қон айланиш системаси касалликлари. ЮИК. Стенокардия. Аритмия. Гипертония касалликлари.

- Қон-томир касалликлари. Вена қон-томирлар варикози. Барча қон-томирлардаги тикилмалар сабабидан келиб чиққан хасталиклар. Трофик яралар. Атеросклероз. Инфаркт ва инсультдан кейинги ҳолатлар. Геморрой.

- Нафас системаси касалликлари. Бронхиал астма, сурункали бронхитлар. Пневмония.

- Турли сабабли гепатитлар. Холецистит. (Зулук кўйиб, орқасидан ҳижома қилинса, янада самарадорлиги ошади.)

- Эндокрин системаси. Қандли диабет. Қалқонсимон без касалликлари.

- Тери системаси касалликлари. Аллергик тошмалар. Сочларни эрта тўкилиши.

- Сийдик ажратиш ва жинсий аъзолар касалликлари. Цистит, пиелонефрит, простатит, аёллар жинсий органлари яллиғланишлари билан боғлиқ касалликлар, климактерик синдром, бефарзандлик. Мастопатия.

- Турли сабабдан келиб чиққан яллиғланиш билан боғлиқ касалликлар. Отит (кулоқни яллиғланиши), гаймарит, фронтит, милк яллиғланиши, фрункул ва бошқалар.

- Косметологияда. Юздаги қон айланишни яхшилаш, ажинларни тортиш, уғрилари, доғларни йўқотиш учун ва бошқа касалликлар.

33-фасл. Ҳижома қимларга мумкин эмас?

- Ибн Сино ҳазрат бундай ёзадилар: Билишсинки, ҳижома ва зулук болаларга томирдан олиш ўрнидадур. Зарур бўлмаса, қилиш керак эмас.

- Имом Заҳабий шундай ёзадилар: Шунинг ҳам билиш лозимки, фасд (томирни тилиб қон олиш) ўз ўрнидан эмас, балки бошқа жойдан олинса ва зарурат бўлмаган ҳолатда қўлланилса, қувватни кетказиш, заифлаштириш, фойдали (солиҳ) хилтларни йўқотиб, зарарлиларини пайдо қилиш каби бир қанча зарарлари бор. Шунинг учун ҳам фасд ва ҳижомадан ҳайзаси борлар наақиҳлар (касал бўлиб, ҳали касалликдан мукамал тузалмаганлар), жуда қари инсонлар, жигар, ошқозони касаллар, юз ва қадамлар сустлиги (оғриғи)да, ҳомиладор, нифос ва ҳайзли аёллар сақланиши шарт!

- Муҳаммад Акбар Арзоний роҳмаҳуллоҳ “Мезонуттиб”да шундай ёзадилар: Ойнинг 14-15-кунлари яхшиси ҳижомат қилмаслик керак. Энг яхши кунлари – ойнинг 16–17 кунлари. Энг яхши вақт эса, кун чиққандан уч соатлар кейин.

- Ҳаммомдан чиққандан кейин ҳижомат қилинмайди. Фақат, қони куюқ одамни ҳаммомдан чиққандан бирор соатдан кейин қортиқ қўйса бўлади. Ҳар қачон бир аъзода модда тўпланган бўлса, фасд қилмасдан туриб шу аъзони ўзини танқия қилмаслик керак!”

- Зулук таркибидаги биологик актив моддаларга сезувчанликнинг юқори бўлиши (аллергия).

- Ёши 60 дан ошган лекин умри давомида ҳеч қачон қон олдирмаган инсонлар. Бунда бемор қуввати ва касаллик турига кечишига қаралади. Агар қон олдиришга одатланган бўлсалар, ёшни умуман аҳамияти йўқ.

- Бир ярим ёшдан кичик болаларга (лекин агар зарурат бўлса, қирқ кунлик чақалоққа ҳам зулук қўйса бўлади, фақат ҳозик табиб ёки малакали шифокор томонидан қўйилсин).

- Хомиладор аёлларга (лекин агар зарурат бўлса зулук қўйса бўлади, фақат ҳозик табиб ёки малакали шифокор томонидан қўйилсин).

- Қон ивишини сустлиги билан боғлиқ касалликлар (гемофилия, тромбоцитопеник пурпура...).

- Ўта камқон ва холсиз беморлар (лекин баъзи камқон беморларга суяк илигини стимуллаш учун оз миқдорда ҳижома қилса, ёки 2-3 та кичикроқ зулукни қисқа вақтга қўйилиб, зулукдан сўнг тезда қон тўхтатилса фойда бўлади, фақат ҳозик табиб ёки малакали шифокор томонидан қўйилсин).

- Артериал босимнинг ўта пастлиги.

- Онкологик касалликларни охириги босқичларида.

- Буйрак, жигар, юрак етишмовчиликларнинг охириги босқичларида. Сунъий диализдаги беморларга.

- Қорни тўқ бўлган инсонларга.

- Куйган жойлардан, экзема, вена кенгайиши ва бошқа яраларнинг, холларнинг, пс (вителиго) доғларининг устидан банка қўйиб ҳижома қилинмайди, лекин зулук қўйса, катта натижалар олиш мумкин. Сабаби зулук нафақат моддани (шлаклар билан зарарланган қонни, халқ тилида айтганда ҳаром қон) тортади, балки қонни таркибидаги ахлатларни (ғайритабиий хилтларни) зулук таркибидаги биологик актив моддалар (халқ тилида зулук сўлағи) эритади, парчалайди ва терини чуқур қаватларидан тортиб чиқаради. Тилиб банка қўйиб ҳижома қилинганда эса, терини юза қаватини тозалаб, юқорида санаб ўтган касалликларда моддани (ахлатланган қонни) тери юзасига тортиб, зулук қуйилганчалик манфаат бермайди.

34-фасл. Қуйи аъзоларни ҳижома билан ҳимоя қилиш.

Юқориги аъзоларга қортиқ қўйиш моддаларни қуйи аъзога қуйилишидан сақлайди.

35-фасл. Қортиқ қўйдирувчининг сафроси кўп бўлса

Қортиқ қўйдирувчининг сафроси кўп бўлса, қортиқдан кейин анор донасини, анор суви, шакар билан сачратқи ва сирка билан сутчўп тотинади.

36-фасл. Ҳижомада зулук афзалми ёки тилиш?

Албатта бу икки амал ҳам жуда фойдали бўлиб, буларнинг бири иккинчисидан устун ёки камчилик жойи йуқ. Уларнинг фарқлари юқорида келтирилган бўлсада баъзи инсонларга аввал зулук қўйиш, кейин лозим бўлса зулук қўйилган жойлардан ҳижома қилмоқ керак бўлади.

- Ҳайз цикли тугаган климакс давридаги аёллар. Чунки аксар ҳолларда бу ёшда қон қўйилади. Организмдаги гормонал ўзгаришлар сабабли қон босими ортиши, остеопарозга мойиллик, климактерик синдромларда зулук сўлаги фойдали таъсир этади. Ёғ қавати қалин жойлашган семиз инсонлар.

- Ёғ қавати қалинлиги учун (липид қаватида деярли қон томирлар бўлмайди, шунинг учун кесиклардан мутлақо қон чиқмайди).

- Қони ўта қуюқланган инсонлар. Буларда ҳам деярли қон чиқмайди. Оз миқдорда чиқиб қотиб қолади.

- Тилинишга чидай олмайдиган (жони ширин) инсонлар.

- Агар яхшироқ қон чиқаришни хоҳласак, чуқурроқ тилишга тўғри келади, бу эса терида айрим ҳолларда косметологик дефектга сабаб бўлади. (Аёл-қизларимиз кўплари терисида кесик чандиқларини қолишини хоҳлашмайди.) Агар юза тилинса терида аксар ҳолларда мутлақо из қолмайди.

37-фасл. Қон олдирганидан кейинги тадбирлар

“Махзан ул-адавия”да шундай келтирилади: “Зулук қўйгандан кейин совуқ сув ичмаслик лозим. Яна совуқ ҳаводан сақланиш, аччиқ, шўр нарсалардан ҳам емаслик керак.

Сув текканидан ёки совуқ ҳаво сабабли оғриси, яллиғланса ёки қичишса, тўйилган ва эланган зарчавадан боғланади. Сўнг сув ва совуқ ҳаво тегишидан асралади”.

◊ Қонни суюлтирувчи дориларни (аспирин, кардиомагний, тромбоасс, тромбопол, лопигрол, гепарин, курантил) қўллаётган кишилар зулук қўйишдан етти кун аввал дориларни тўхтатишлари зарур ва бу дорилар истеъмолини қон тўхтагандан сўнг бошламоғи зарур.

◊ Гилос, олча ва лимон қонни суюлтириши сабабли зулук қўйишдан уч кун аввал ва зулук қўйилгандан уч кунгача бу меваларни емаслиги, совуқ сув ичмаслиги керак.

◊ Зулук қўйилган жойлар совуқ олмаслиги ва ифлосланмаслиги зарур.

◊ Зулук қўйилган жойлардан нормада бир кунгача қон сизиб чиқиб туради. Агар қонаш кучайса, бемор ҳолсизланса, зарурат туғилса анор пўсти ёки унинг кули сепилади ёки пахта куйдириб босилади.

◊ Зулук қўйилгандан сўнг қон тўхтамаса боғлов олиб ташланмайди, балки устидан янги боғлов қўйилади.

◊ Зулук қўйилган жойлар қичиса енгил сийпаланади. Қичишиш кучайса Синаflan мази ёки зайтун ёғи суртилади. Агар бутун бадан қичиб, шишса антигистамин препаратлар (Задак, лоратал, аллер-Г) ва сийдик хайдовчилар (фурасемид) қабул қилинади ва доваловчи шифокорга ёки табибга мурожаат қилинади.

◊ Ҳижома қилинишдан 24 соат олдин ва қилингандан сўнг 1-2 кун қаттиқ жисмоний зўриқиш, жинсий яқинликдан сақланиб турилади.

◇ 24 соат мобайнида ҳазми оғир овқатлар ва сут маҳсулотларидан сақланмоқ керак.

◇ Ҳижомадан сўнг инсон дам олиши, асабийлашмаслиги, каттиқ ҳаяжонланмаслик лозим.

◇ Ҳижомадан сўнг 1 сутка чекмаслик, яхна ичимликлар, ўта совуқ суюқликларни ичиш ман этилади.

◇ Ҳижомадан (айниқса зулукдан сўнг) сўнг баъзи беморларда тана ҳарорати кўтарилиши мумкин, бу ўша организмда қанақадир инфекция борлигини ва ўша инфекцияга қарши иммунитет кўтарилиб, организм курашаётганини билдиради. Бу ҳолат 1-2 кунда ўтиб кетмаса қўшимча даво чораларни кўриш керак.

38-фасл. Зулук қўйгач, қон чиқиб туриш вақтининг қон гуруҳига боғлиқлиги

Малакали шифокор-гинеколог Мадина Тошкандий шундай маълумот берадилар: *“2015 йилдан бери инсонларга зулук қўяман. Зулук тушгач, зулук тишлаган жойдан маълум вақтгача қон чиқиб туради албатта. Шу нарсани кузатдимки, турли қон гуруҳли одамларда мана шу муддат ҳар хил бўларкан. Масалан, 1-қон гуруҳли кишиларда 48 соатгача қон чиқиб туради.*

2-қон гуруҳли кишиларда зулук тишлаган жойдан қон оқиши 7 соатларда тўхтайди.

3-қон гуруҳ соҳибларига зулук қўйиб, олиб ташилаганимизда 11-12 соатгача ўша ердан қон чиқиб туриши кузатилади.

4-қон гуруҳ вакилларида зулук қўйгандан кейинги қон чиқиши 24 соатгача давом этади”.

39-фасл. Ҳижома қилувчи (ҳажжом)нинг сифатлари

Ибн Можа роҳмаҳуллоҳ ривоят қилади: Ибн Умар розияллоҳу анҳу Нофеъ розияллоҳу анҳуга айтдилар: “Эй Нофеъ! Менинг коним тўлқинланяпти (табиғу дама). Менга яхши ҳижома қилувчи (хужамана рофиқона)ни топгин. Унинг ёши катта чол ёки ёш бола ҳам бўлмасин. Албатта мен Росулulloҳ соллаллоҳу алайҳи васалламдан: “Оч қоринга ҳижома қилиш энг муносибдир. Унда шифо ва барака бордир. Ҳамда, ёдлашни ва ақлни зиёда қилади”, деганларини эшитдим.

40-фасл. Аёлларда ҳижома қилиш

Аёл киши ҳижома қилдиришга эҳтиёж сезса, ўз маҳрамларига ҳижома қилдириши лозим. Умму Салама розияллоҳу анҳонинг ҳадисларига биноан: “Росулulloҳ соллаллоҳу алайҳи васалламдан ҳижома қилдиришга рухсат сўрадим. У зот Абу Тоййибага буюрдилар. Абу Тоййиба Умму Салама розияллоҳу анҳонинг эмикдош акаси эди ёки балоғатга етмаган бола эди” (Имом Муслим роҳмаҳуллоҳ ривояти).

41-фасл. Ҳижома хизмати учун ҳақ олиш

“Саҳиҳайн”да Товуснинг Ибн Аббос розияллоҳу анҳумодан ривоят қилган ҳадиси бор: “Набий соллаллоҳу алайҳи васаллам ҳижома қилдириб, ҳажжомга ҳақини бердилар”.

“Саҳиҳайн”да Хумайд ат-Товийлнинг Анас розияллоҳу анҳудан ривоят қилган ҳадиси келтирилади: “Абу Тойба Расулulloҳ соллаллоҳу алайҳи васалламни ҳижома қилди.

Шунда у Зот унинг учун икки соъ таом буюриб, ёрдамчиларига гапирдилар. Улар ундан солиқларни енгиллатишди. Кейин Расулуллоҳ соллаллоҳу алайҳи васаллам: “Даволанадиган нарсаларингизнинг яхшиси – ҳижомадир”, – дедилар”.

“Жомиъи Термизий” китобида Аббод ибн Мансурдан ривоят қилинади: “Икрима (розияллоҳу анху)нинг бундай деганини эшитдим: “Ибн Аббоснинг учта ҳажжом хизматкори бор эди. Иккитаси унга ва аҳлига даромад келтирар, бири эса уни ва аҳлини ҳижома қилиш учун эди.

Олдин ўтган фаслларда келган ҳадислар табибни ёки бошқасини ижара битими тузмасдан ижарага олиш ва унга ажри мисл ёки у рози бўладиган нимадир бериш жоизлигига далолат қилади.


Мазкур ҳадислар яна ҳижома орқасидан пул топиб, уни ейиш хур-озод одамга унчалик хуш кўрилмаган бўлса ҳам, уни касб қилиш жоизлигига далолат қилади. Чунки Пайғамбаримиз соллаллоҳу алайҳи васаллам қон олувчига ҳақини бердилар, лекин уни ейишдан қайтармадилар. Унинг пулини хуш кўрилмаган дейилиши худди пиёз ва саримсоқ пиёзни хуш кўрилмаган кабидир. Бундан унинг ҳаромлиги келиб чиқмайди.

У ҳадисларда яна киши ҳар куни қулига уни тоқати етадиган маълум нарсани солиқ қилиб солмоқлиги жоизлигига далил бор. Қул зиммасидаги солиғидан ортиб қолган нарсаларда ўз билганича тасарруф қилиши мумкин. Агар саййид бунга йўл қўймаса, қулнинг топганлари хўжайинига тўлайдиган солиғи бўлади. Бунда солиқни тайин қилиб ўлчов қўйишнинг фойдаси йўқ. Демак, қул белгиланган ҳар кунлик тўловни жойига қўйганидан кейин ортгани саййид томонидан унга мулк қилиб берилган ҳисобланиб, қул уни хоҳлаганидек ишлатади.


Имом заҳабий бундай ёзадилар:

Имом Аҳмад роҳматуллоҳи алайҳи мазҳабларидаги зоҳир сўзга кўра ҳижомага ажр (ҳақ) олиш макруҳдир.


Ибн Аббос розияллоҳу анху: “Расулуллоҳ соллаллоҳу алайҳи васаллам ҳижома қилдирдилар. Ҳижома қилувчига ажрини (ҳаққини) бердилар. Агар ҳижома учун ажр (ҳақ) олишни ёмон деб билганларида эди, унга ҳақ бермаган бўлар эдилар” (Имом Бухорий роҳмаҳуллоҳ ривояти).




56-расм. Бош мия ва ошқозонни боғловчи асаб – адашган асаб (n. vagus – блуждающий нерв)нинг чизмаси




57-расм. Бош ва бўйиннинг асаб тоалари билан таъминланиши (иннервацияси).




58-расм. Бослиқ, ақхал ва қийфол томирларининг ўнг елкада жойлашиши.



59-расм. Софин томирнинг жойлашиши



60-расм. Мобиз ва урқун-насо томирларининг жойлашиши
 (“Набий соллаллоҳу алайҳи васаллам оёқларининг тепаси
 (зоҳаро қадамуху)дан ҳижома қилдирдилар”).



61-расм. Лимфа тизими.

ХОТИМА

Мана азизлар, “Табобат асослари ва ҳижома” деб номланмиш асаримиз ўз ниҳоясига етди. Албатта, тибнинг барча жабҳаларини кичик китобчада қамраб олишнинг имкони йўқ. Зеро, бу ҳақида жилд-жилд китоблар ёзилган.

Ҳижомада, аввало, Расулуллоҳ соллаллоҳу алайҳи васаллам қон олдириб ўрнак кўрсатганлари учун қон олдиришга ният қилинса, у зот соллаллоҳу алайҳи васалламнинг тавсияларига амал қилиш орқали касалликдан халос бўлиш ҳам амалга ошади.

Аммо қон олдиришнинг ҳам табобатда белгилаб берилган қатъий қоидалари мавжудлигини билиб олдик.

Бу ерда биз асосий тушунчаларнинг баъзиларини бериб кетдик. Ўйлаймизки, ушбу рисола тиб илмига толиби илмлар ва қизиқувчи кишилар учун фойдали бўлади.

Фикр ва таклифларингизни қуйидаги рақам орқали юборишингизни сўраймиз:

Телеграмм: +998935874403; +998946514027.

14.08.2023 й.

Тошкент

ФОЙДАЛАНИЛГАН АДАБИЁТЛАР:

1. Абу Али ибн Сино. “Тиб қонунлари” 1-китоб. – Тошкент: Муҳаррир, 2013.
2. Абу Али ибн Сино. “Тиббий рисолалар” – Тошкент: Фан, 1987.
3. Алихонтўра Соғуний. “Шифо ул-илал” (“Касаллик шифоси”). “Муҳаррир” нашриёти, Тошкент, 2019 йил.
4. Боситхон ибн Зоҳидхон Шоший. “Қонун ал-мабсут”. 1-китоб, “Абу Али ибн Сино”, Тошкент, 2003 йил.
5. Боситхон ибн Зоҳидхон Шоший. “Қонун ал-мабсут”. 2-китоб, “Абу Али ибн Сино”, Тошкент, 2003 йил.
6. Боситхон ибн Зоҳидхон Шоший, Ҳомидхон ибн Зоҳидхон Шоший. “Фарҳанг ал-мабсут ёки Истилоҳот ул-атиббо фиинтифоот ил-аҳиббо”. “Абу Али ибн Сино”, Тошкент, 2004 йил.
7. Нидоий Бенавой. “Манофеъ ун-нос”. “Хоразм” нашриёти – Тошкент: 2004.
8. Нодир Абдусамад, Мираббос Ҳамидий. “Мизож” 1-китоб. – Тошкент: 2020.
9. Шамсиддин Абу Абдуллоҳ. “Тиббун-набавий” (арабчадан Абдулҳодий Гиёс таржимаси). – Тошкент: 2021 йил.
10. Ҳофиз Абу Абдуллоҳ Муҳаммад ибн Аҳмад Заҳабий “Тиббун-набавий”. Ливан, Байрут: - “Дорул-улум”, х.141 – м.1990 йил (арабчадан Алимардон МирАҳмад таржимаси).